

**NINTH MIZORAM LEGISLATIVE ASSEMBLY
(FOURTH SESSION CUM BUDGET SESSION)**

LIST OF BUSINESS

FOR THIRTEENTH SITTING ON WEDNESDAY, THE 19th MARCH, 2025
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

PRESENTATION OF REPORTS

2. **PU V. MALSAWMTLUANGA** to present to the House a copy each of the following :
- i) Twelfth Report on Action Taken by the Government relating to various Departments against the Recommendations of the Committee on Government Assurances contained in the Tenth Report of Ninth Mizoram Legislative Assembly.
 - ii) Thirteenth Report on Action Taken by the Government relating to various Departments against the Recommendations of the Committee on Government Assurances contained in the Eleventh Report of Ninth Mizoram Legislative Assembly.

FINANCIAL BUSINESS

Discussion and Voting on Demands

3. **DR. VANLALTHLANA**, Minister to submit the following to the Vote of the House on 19.03.2025 (Wednesday).

| Demand No. | Purpose | Amount | <i>Demands for Grants page No.</i> |
|-------------------|--|---------------------------|------------------------------------|
| 20 | School Education | 17,27,21,53,000.00 | 225-243 |
| 21 | Higher & Technical Education | 3,23,76,80,000.00 | 244-257 |
| 26 | Information & Public Relations | 13,19,86,000.00 | 317-323 |
| 48 | Information & Communication Technology | 5,43,70,000.00 | 550-553 |
| TOTAL | | 20,69,61,89,000.00 | |

4. **PROF. LALNILAWMA**, Minister to submit the following to the Vote of the House on 19.03.2025 (Wednesday).

| Demand No. | Purpose | Amount | <i>Demands for Grants page No.</i> |
|-------------------|---------------------------|--------------------------|------------------------------------|
| 25 | Public Health Engineering | 2,85,96,23,000.00 | 308-316 |
| 32 | Horticulture | 1,07,28,30,000.00 | 394-399 |
| 38 | Rural Development | 4,13,84,18,000.00 | 443-453 |
| TOTAL | | 8,07,08,71,000.00 | |

VANLALTHANTLINGI
Commissioner & Secretary

SPEAKER : *Finna a nasat poh leh buaina a tam a, Hriatna a pun poh leh manganna a pung.*

- Thuhritu 1:18

Kan zingah member zahawm tak Dr. Lorrain Lalpekliana leh Pu PC Vanlalruata te vawiinah an awm hman lo a ni tih House ka hriattir e. Kan thenawm kang hian min tibuai khawp mai a; electric line hi a kang deuh vek a. Power leh PWD lam te'n theihtawp chhuahin an bei a, nizan hmasa pawh khan tlaivar thakin an bei a ni. Chuti chung chung chuan khawi lai laiah emaw hmuh theih si lohah harsatna a lo awm leh zeuh thin a, memberte'n kan hrethiam dawn nia.

Nizan kan tin dawn khan boruak tlem kan han nei a. Khami chungchang kha eng emaw thu leh hla han neih ve deuh hlek ka duh deuh a. Nimin chawhma lam khan 'Point of Order' tih kan sawifiahnaah khan ka sawi tawh a. Minister emaw, member emaw ten statement an pek lai leh thusawi lai chuan tibuai lo hram hram teh ang u tiin ngenna kha kan siam a ni a. Tin, member emaw, minister emaw ten zawhna an chhan emaw, statement an siam lai emawa lo auh buai te, lo hnial buai te ching lo hram ila tiin kan in ngen kha a ni a. Amaherawhchu, chutih lai chuan, memberte'n kan ngaihawh sawi loh theih loh kan neih anih erawh chuan, a sawi dan leh tih dan ka sawi bawk a. Helaiia thu Speaker a ni emaw, Dy. Speaker a ni emaw, Panel of Chairman a ni emaw hnenah, 'khalai kha sawi a rem em?' tiin helaiia thu a piangte hnenah dil ila; ding chhuaka sawi nghal bawrh bawrh lovin, tiin kan inngen kha a ni a.

Tin, chumi loah pawh kan ngaimawh zawngte sawi dan ka sawi leh a. Rule No. 335-ah khan a hranpain 'Statement siam ka duh e', tiin House a statement siam dil theih a ni, tih te kan inhriattir kha a ni a. Nizan khan member pakhat khan kan Minister statement siam laiin ngaihawh a nei a; a rawn ding a, sawi a'n tum nghal mai kha a ni a. Amaherawhchu, 'i sawi zawh tir phawt ang' kan ti kha a ni a. Chutah chuan thil kalphung ni chiah lo - Minister-te'n Statement an pe emaw, chhanna an siam emaw ah hi chuan, kha chapter kha close a ni thin a, a hnuah sawi a awm ngai zen zen lo a. Amaherawhchu, kan member in a ngaihawh si, a ngaih pawimawh si avang khan, 'minute 2 te chu kan inpe leh dawn nia, lo in sum rawh' kan inti a, kan inngen kha a ni a. Chu pawh chu kalphung pel deuh hlek a ni.

Amaherawhchu, memberte kan zalenna - kan ngaihawh te sawi lova han inkhap ringawt hi a fel ka ti lo a. Tichuan, member kha kan han sawm ta a, minute 2 chhunga a zawhnaa lut mai lo deuh khan a pehhel kual thui rei deuh hlek a. Khatah khan member dangte'n mipui play lutuk anga a lan theih avang khan, 'A tawk e' an rawn ti a, kan han ri ta laih laih kha a ni a. Engpawh ni se, khatiang kha chu thleng fo tawh lo se a duhawm khawp a.

Tin, Lok Sabha leh Rajya Sabha-ah te, helai hmunah pawh a ni tho thin a. Kan Minister zahawm takin a sawi ang khan, memberte microphone hi on sa lovin an dah a. Tichuan, memberte'n an sawi duh a nih chuan, leh, Speaker-in a remti a nih chuan, an on sak chauh thin a ni a; chung te pawh chu kan hrelo a ni lo a. Amaherawhchu, 'memberte kan zalenna a ni e' ti zelin, tiang chuan kan kalpui lem lo a. Engpawh ni se, he House hi tunhma atanga discipline tha, House zahawm, invawngfel kan nihna kha chhawmnun hram hram tum ila tiin member te ka'n ngen nawn leh che u a.

Tin, ka'n sawinawn leh ang a. Memberte'n ngaih mawh kan nei anih chuan, kan minister-te emaw, member dangte din laia lo tibuai lovin, a hranpain helai Chair-a thu te a dil theih piah lamah, hun hran atan pawh Rule No. 335 hmangin statement a siam leh theih tho a ni tih kha ka'n sawifiah ni se.

Khi, minute 5 ka hmang a, Zawnha leh Chhanna kha kan hmang pel mai dawn nia. Zawnha leh Chhanna-ah kan lut nghal ang a.

QUESTIONS & ANSWERS

Starred Question No. 201: Hmunphiah chungchang.

Zawnha Neitu: Dr. K. Beichhua, Siah Bialtu.

DR. K. BEICHHUA: Pu Speaker, ka lawm e. Land Resources, Soil & Water Conservation Department changtu Minister zahawm tak hnena ka zawnha chu –

- a) Sorkarin tun dinhmunah hmunphiah engzat nge a lei tawh?
- b) Kg-ah engzatin nge a lei?

SPEAKER : Chhang turin, Land Resources, Soil & Water Conservation changtu, Minister zahawm tak Pu Lalthansanga ilo sawm ang.

PU LALTHANSANGA, MINISTER: Pu Speaker, Dr. K. Beichhua, Siaha bialtu zahawm tak zawnha - Starred Question No. 201 chhanna chu –

- a) Mizoram Agriculture Marketing Board (MAMB) hnuiaia Empanelled Buyer mi 7 (pasarih) te bakah Non-empanelled Buyer/Commissioned agents mi 16 (sawmparuk) ten hmunphiah an lei mek a. Dt. 20.2.2025 thlenga an lei tawh zat hi 12,400 qtls. a tling tawh a ni. Mizoram sorkar sum hmanga lei erawh a la awm lo.
- b) Tun dinhmunah Mizoram sorkar angin hmunphiah lei a la awm lo va. Amaherawhchu, sorkarin hmunphiah ro atan rate a siam a, Grade A - 1 kg@100/, Grade B - 1 kg@80/-.

SPEAKER : Zawhbelhna zawt turin:

1. Dr. K. Beichhua, (Zawnha neitu)
2. Pu VL Zaithanzama,
3. Pu Lalchhandama Ralte,
4. Pu Lalramliana Papuaia.

DR. K. BEICHHUA: Pu Speaker, ka Zawhbelhna chu –

- i) Kuhva leh rubber chingtute hi hand-holding-ah tanpuina pek an ni ve dawn em? Sorkarin kuhva leh rubber chingtute hi support price pek a tum ve em?
- ii) Sawhthing, Aieng, Hmarcha leh Hmunphiah piah lamah hand-holding ah hian thlai dang dah belh tumna a awm em?

PU VL. ZAITHANZAMA: Pu Speaker, Land Resource Water Conservation Department changtu Minister zahawm tak chhan atan ka zawnha chu –

Rubber hi Tripura lamah te khuan an hmingthatpui hle mai a, Mizoram-ah pawh mi eng emaw zatin ching vein, a tha hle tih kan hria a, a that duhna ram tak pawh kan ni ve a. Chutih lai chuan, sorkarin rubber-ah hian hmalakna thar a nei em?

PU LALCHHANDAMA RALTE, OPP. LEADER: Pu Speaker, Soil & Water Conservator changtu Minister khan “Sorkar chuan kan lei chiah lova, buyer - sorkar hriatpuite’n an lei a ni” a ti a. Chuta ka zawhbelhna chu –

i) Sorkar rate Grade A - kg ah cheng 100/- leh, Grade B - kg ah cheng 80/- lo deuh hlekin an lei niin news site hrang hrangah kan hmu a. Khatiang khan lo lei ta ang se, sorkarin subsidy, a tlin lohna kha farmers te hnenah a pe dawn em?

ii) Nimin lama Demand kan sawihonaah khan Hmunphiah kha qtl 90,000 dawn vel Mizoram-a thar tur ang khan kan sawi nge; (ka hresual em aw, ka hre lova) Tunah hian qtl 12,400 chauh hralh a la ni a. Sorkarin ‘kan lei vek dawn e’, a tih bawk si avangin, Hmunphiah season (a lei hun) a ni tawh bawk si lova. Helaiyah hian leitu tur an awm loh avanga kek tawh loh, a huana ro mai tawh tur hote hi sorkarin zangna dawmna a pe thei dawn em?

PU LALRAMLIANA PAPUIA: Pu Speaker, ka zawhbelhna chu -

Land Resources, Soil & Water Conservation Department hnuaiyah hian Hmunphiah chingtute tan an tharchhuah leisak bakah hian hamthatna dang awm thei a awm em? A awm chuan, eng hamthatna nge awm thei?

SPEAKER : Zawhbelhnate chhang turin a changtu Minister Pu Lalthansanga ilo sawm ang.

PU LALTHANSANGA, MINISTER: Pu Speaker, a zawhna neitu zawhna kha kuhva leh rubber ah a rawn kai chho a. Chutih lai chuan Hmunphiah bik hrim hrim hi chu, nimina ka wind-up naah pawh khan qtl 96,000 ka ti a. Tichuan, he zawhnaa ‘qtl 12,400 lei tawh a ni’ tih kha, kha kha February Ni 20 ami, he zawhna lo kala kan tih a ni a. A hnuah khan empaneled buyer-te, non-empanel buyer-te leh Commission hrang hrangte hian qtl 30,804 an lei leh tawh a. Chubakah chuan, ZOHANCO hian Ni 19 thlenga an lei hi qtl 2,450 a ni.

Tin, Hmunphiah support prize chungchanga zawhna kha, society kaltlanga tihah kha chuan kan pe thei a, society kaltlang ni lem lo mimala lo tite kha chu, record a mumal loh avangin pek ngaihna a awm lo a ni. Pu Speaker, society system hi kan la hmang thiam lo deuh ni hian a lang a. Tin, kan hmanhmawhna leh min rawn dawrtu an awm hian Pu Speaker, chumi ah chuan kan kal ta mai thin lai hi; wawiinniah pawh system fel taka tih kan tum lai hian harsatna kan tawk thin a ni a. Hei hi in educate a ngai hle a, awareness pawh hi pek nasat kan tum hle a ni. Society kaltlangte erawh chu marketing board-in a chhawmdawl zel ang a, support prize pawh a pe zel turah kan ngai.

Tin, Hmunphiah hi kan House Leader, kan CM zahawm takin a sawi ang khan, ‘kan lei vek dawn’ tih kha a ni a. Chuvang chuan, a season pawh lo tawp se, an lo lak tawh sa kha chu kan lei vek dawn a ni. Tin, ‘a grading awm lovin an neih ang ang kha kan lei vek dawn’ tiha kha, kan House Leader sawi kha ka chhannaah min lo pawm sak ula.

Tin, rubber hi CM - Rubber Mission kha nikum December Ni 20, 2024 khan kan launch a, chu chu tunah hian chak takin kan kalpui a. Pilot project ti chungin tunah hian hectare 1000 velah bul tan kan tum a, tunah hian an hal vek tawh a ni. Tin, Tripura leh South India lamah kan department ten zuk zirchianna an nei tawh a, chutiangah te chuan Mizoram rubber hi wawiinniah kan product quality hi a that vak loh avangin, a thatna tura mamawh hrang hrang smoke-house te, roller te bakah a tihdan hrang hrang awmte training turin

rubber hmunpui lam pawh an inpeih a. Tin, Rubber Board of India lam pawhin chutiang chuanrawn tih an tum a, a chi tha minrawn pek an tum bawk a ni. A chi tha kan hmuh chuan, Tripura pawhin a chi tha an chin avangin vawiinniah an dinchhuah phah a, an hmingthan phah a ni. Tin, a chin dan system hrim hrim pawh systematic/scientific takin tih chhoh tum a ni bawk a ni. Hemi atan hian NABARD atangin crore 27 (point something) kha kan hmu tawh a ni. A point zat chiah kha ka hre lo deuh a, chu chu a ni a.

Tin, kuhva hi, tunah hian Agriculture Farmers Welfare - Central Horticulture Division atangin hriattirna DoNER ah a lo kal a. DoNER Ministry, Central atanga thu kan hmuh 'India ram hi kuhva-ah kan intodelh tawh a, chin belh zel a tul tawh lo' arawn tih angin DoNER Ministry chuan Mizoram sorkar arawn hriattir a. Chutiang hriattirna avang chuan, 'kuhva chin belh tawh loh tur' tih ang zawng khan thu pawh a thang nasa ang reng viau a; 'chin belh tawh loh ni se', tih a ni a. Amaherawhchu, sorkar ang hi chuan kuhva chin belh tawh loh tih hi kan support lova. Chuvang chuan, vawiinni thleng hian an la chin belh zel a. Amaherawhchu, kuhva chin belhna tur project erawh chu siam loh ni se kan ti a; siam pawh ni sela, a tlang tawh dawn chuang lo tih kha DoNER Ministry atanga kan thudawn a ni a. Chuvang chuan, kuhva chingtute tan kha kha thu pawimawh tak pawh niin ka hria a.

Nimin khan Gaushik Gupta, Mahamanda Chairman Kolkata atangin a lo kal a, anni kha cooperative society lian tak an ni a; chu chuan an lei duh thu nimin piaha an lo chhoh khan anrawn sawi a. Kan indawr a, an genuine viauin kan hria a. Nimina ka sawi tawh ang khan, 'kan ring lo che u' kan ti tawl mai a ni, hmai chhanah. A chhan chu, kan ring sual zeuh zeuh a ni mai thei, tun kan sorkar hian. Chuvang chuan, 'in rinawmna inrawn tihlan hma loh chuan kan ring dawn lo che u' kan ti a, 'kan rinawmna in hria ang' min ti a. Chuvangin, beiseina sang tak pawh kan nei a.

Tin, price support peka hi tunah hian sorkarin a ngaihtuah mek a, tum loh chu a ni chuang lova. Tin, kuhva tih-rona leh a skop siamna tur te sorkar atangin sanction kan hmu a, tunah hian tender mek a ni a. Chuvang chuan, value addition hian kan kal theih a rinawm a. Tin, kuhva ah hian certificate of origin hi Soil Department hian kan pe thei a, chumi kan pek chuan harsatna awm dawn lova. Chutiang chuan, kuhva-ah pawh hian tan kan la ve a. Tunah hian kuhva chingtu society ten kuhva chin dan tha training pe turin program an kalpui dawn a ni a. Kan kuhva chin dan te pawh hi mizopa thluakin kan kal thin a, chu chuan harsatna min siam a. Tin, kan kuhva chingtute hian, Pu Speaker, thil pakhat kan hriat ve tura chu, a kuhva kan lo a, a man kan tel a, kan lawhna kuhva kunga te kha kan enkawl zui vak a ni ngai lo a ni. Kan rula-raw-neih lutuk deuh avangin kan kuhva kungte hian harsatna - deficiency hrang hrang an nei a, chung chu kan enkawl zui a ngai a. A man atang khan sum te pawh seng let ve ang u, tiin kuhva chingtute pawh ka'n ngen tel a ni.

Tin, Pu Papuaia zawhna kha - tunah hian heng item - kuhva, rubber, hmunphiah leh coffee te hi CM - Special Package-ah pawh diltu an tam tawh khawp mai a, tunah hian 3036 in an dil a; hand-holding loan component-ah pawh mi 604 in an dil a ni. CM - Special Package hi chu grant a ni a, nuai ₹1 thlenga tih a ni. Nuai 1 khatin kan pe ang kan ti lo a, nuai khat thleng a ni a. A chhan chu, hmunphiah atan chuan cheng sing 2-3 kha a tawh mai thei. Chutiang chuan, progress partner kha a tam thei ang zawngin multiply kan tum a ni. Soil Department-a tanpui ngaite chu hemi hmang hian banah kaiin a hruaichhuak dawn a ni.

DR. K. BEICHHUA: Pu Speaker, ka zawhna pathumna - sawhthing, aieng, hmunphiah, hmarcha piah lamah khan, thlai dang - dragon fruit, sapthei leh butter fruits te ang thei dang tam tak kan nei ve a. Hengte hi tun hand-holding ah hian telh tumna awm em, tih ka zawhna kha min chhan theih chuan.

PU LALTHANSANGA, MINISTER: Pu Speaker, keimahni Allocation of Business-ah khan item 4 – kuhva, hmunphiah, rubber leh coffee hi a ni a. A dang a rawn sawia kha chu horticulture subject mah mah a ni a; Horticulture Minister hnen atangin a hriat theihin ka ring.

PU LALRINSANGA RALTE: Pu Speaker, khawngaihin - kan Minister thusawi kha ka lo hresual deuh nge, hriatfiah deuh lawk duh kan nei a.

DoNER Ministry atang khan kuhva chin belh theih tawh loh ang deuh leh, Mizoram sorkar chuan khap chiah lo mah ila khami project-ah kha chuan hmuh kan nei dawn tawh lo a nih si chuan, hand-holding ah khan tanpuina a kal thei dawn nge dawn lo, kuhva bikah khan?

PU LALTHANSANGA, MINISTER: DoNER Ministry atanga kan hmuh dan chuan, ‘India ramah hian kuhva hi kan intodelh tawh avangin tihbelh loh ni se’ an rawn a, Mizoram te pawh hriattir kan ni a. Mahse, Mizoram sorkar chuan kuhva chin belh loh kha kan support lem loh avangin vawiinni thleng hian a duha te chuan an chin belh a. Tin, Mizoram State bikah hi chuan hand-holding-ah khan kha kha a tel thei vek a ni, tih kha ka chhanna a ni e.

SPEAKER : Zawhna dangah kan kal ang.

Starred Question No. 202: Support price chungchang.
Zawhna Neitu: Pu K. Laldawngliana, Tuirial Bialtu.

PU K. LALDAWNGLIANA: Pu Speaker, ka lawm e. Agriculture & Farmers' Welfare Department Minister zahawm tak chhan atana ka zawhna chu -

- a) Sokarin eng thlaiah te nge Support Price pek a tum?
- b) A thlai hming leh Support Price a pek tum zat kimchang min hrilh thei em?

SPEAKER : Nichina kan puan tak ang khan, a changtu Minister Pu PC Vanlalruata hi kan zingah awm lo a, authorisation a pek angin House Leader Pu Lalduhoma ilo sawm ang.

PU LALDUHOMA, CHIEF MINISTER: Pu Speaker, kan Member zahawm tak Pu K. Laldawngliana zawhna chhanna chu –

- a) Sorkar chuan sawhthing, aieng, hmarcha, hmunphiah leh buhhum-ah te support price pek a tum.
- b) Thlai hming leh support price pek a tum dan chu hetiang hi an ni - (Heng hi a support price a nilovin, sorkar minimum rate a ni. Khami minimum rate anga an hralh theih lohna zela kha sorkar chuan a tum dawn a ni. Ka sawi tur hi a minimum rate a ni.) -
 - i) Sawhthing (fresh) - ₹50/kg
 - ii) Aieng (fresh) - ₹20/kg
 - iii) Aieng (Sliced dried) - ₹130/kg

- iv) Aieng (fresh dried) - ₹150/kg
 - v) Mizo hmarcha (dried) - ₹350/kg
 - vi) Hmunphiah to (GradeA) - ₹100/kg
 - vii) Hmunphiah ro (Grade B) - ₹80/kg
 - viii) Buh hum - ₹30/kg
- (October 2024 – February 2025 chung atan)

SPEAKER : Zawhbelhna a awm lo a ni ang e. Tin, a changtu minister a awm loh chuan a tlangpui thuin zawhbelhna lak loh a ni thin a. Zawhna dangah kan kal ang.

Starred Question No. 203: Mau chungchang.

Zawhna Neitu: Pu Lalrinsanga Ralte, Serlui Bialtu.

PU LALRINSANGA RALTE: Pu Speaker, ka lawm e. Horticulture Minister zahawm tak min chhan atan ka zawhna chu –

Kan rama maute sawngbawl dan tur emaw, tangkai zawka hman dan tur sorkarin ruahmanna a nei em?

SPEAKER : Zawhna chhang turin Horticulture changtu Minister zahawm tak Prof. Lalnilawma ilo sawm ang.

PROF. LALNILAWMA, MINISTER: Pu Speaker, Serlui Bialtu zawhna chhanna chu –

“Mizoram-mau sawngbawl dan tur leh tangkai zawka hman dan tur sorkarin ruahmanna a nei” tih a ni.

SPEAKER : Zawhbelhna kan la ang a -

1. Pu Lalrinsanga Ralte, (Zawhna Neitu);
2. Pu Lalmuanpuia Punte,
3. Pu W. Chhuanawma.

PU LALRINSANGA RALTE: Pu Speaker, 6th January, 2024 khan kan CM zahawm takin press conference a ko a, chuta a sawi - British High Commission-a a len thu te, kan ram mau atanga mauhriak lakna tur bio-ethanol project din a tum thu te, Foreign Commonwealth and Development Office (FCDO) in he project atana investment an rawn neih ve tur thu leh investor zingah an tel tur thu te a sawi a. Chutah chuan, MoU pawh draft an neih tawh thu leh ‘power-point presentation pek hnuah kan sign mai dawn a ni’ tih a sawi te kan lo hria a, a lawmawm tak zet a ni.

Pu Speaker, chuta ka zawhbelhna chu –

- i) Mauhriak sawrna tur dinna atan MoU kha sign a ni tawh em?
- ii) Bio-ethanol project - mauhriak lakna tur atan hian Foreign Commonwealth and Development Office (FCDO) kha investor zingah an tel ta em?
- iii) Tel ta se, engzat nge an invest min hrih thei em?
- iv) Sorkar hmasaa maurua chinte kha puitling an awm ve hrim hrim em?

PU LALMUANPUIA PUNTE: Pu Speaker, Zawhbelhna hi pathum ka nei a –

- i) Sorkar hmasa hunlai khan mau-chi manah sorkarin engzatnge a sen? (Zawhna neitu zawhbelhna tawpna ber nen a inang a.)

- ii) An mau chin kha engtinngge sorkarin a buaipui zel? A puitlingin, buaipui tham a awm em?
- iii) IAS bansana mau buaipui engzatnge kan neih?

PU W. CHHUANAWMA: Pu Speaker, ka Zawhbelhna chu –

- i) Kut-hnathawktute thali-thar hralh chungchangah hian engtinngge Horticulture Department hian hma a laka, a tanpui dan?
- ii) VC inthlan hma khan lakhuihthei tawih chiam anga sawi awm awma kha department lamin a hriatpui em?
- iii) Mizoram-ah hian eng thei hi nge kan thar tam ber? Kan thei thar chhuah te zingah wine atana siam tura tha ber engnge ni?

SPEAKER : Chhang turin Horticulture changtu Minister Prof. Lalnilawma ilo sawm ang.

PROF. LALNILAWMA, MINISTER: Pu Speaker, ka theih ang angin chhan ka'n tum ang a. Zawhna neitu zawhnaah khan British High Commission sawilan a ni a. Khang zinga 'MoU te sign tawh te a awm em?' tih kha, nakin remchangah kan House Leader pawhin minrawn belhpui turah ngai ila. A zawhbelhna chhanna chu -

Mau-hriak leh bio-char hi European company te pawhin minrawn dawr hlawm a, anrawn leng a, department-ah te pawh. Keimahni lamah tlem la inpeih lohna avangin tunah hian bul tan theih a la ni lo a ni.

Bio-ethanol chungchang kha, a company lam buaipuitu turte pawh khan bio-ethanol ni lovin, SAF an tih mai, Sustainable Aviation Fuel - thlawhna fuel-a an hman tur ang chi khan her leh zawk ila an tih deuh avangin, anmahni lamah an inbuatsaih chho mek a. Nakinah a tul chuan an lo kal leh turah ngai ta ila; chung hunah te chuan MoU te pawh la sign theih turah ngai ila.

Maurua, sorkar hmasaa kan lo buaipui te kha an puitlinglo chu a ni lo a; a thenah an than a thu a, a thenah an thang tha ve tho a. Amaherawhchu Pu Speaker, a 'thang' tha kan han tih kha, hmunpui area-ah khuan tih tam ber a ni a, khata kan chin ho kha chu chuti lutukin a thang thalo a. Champhai-Zote ramah horticulture centre kan nei a, nikum khan chumi hmun chu kan han tlawh a, kan Director leh official thenkhatte nen. Chutah chuan, kum 3 mau kha kan ban pil, kan let hnih velin a lo sang ve tawh a ni; a tuaite pawh kha chawn tiat, chawn aia lian te a lo awm ve tawh a, 'a hmun a zirin a lo tha ve tho a nih hi' kan ti a. Mau lian tak tak awm chho tur kha kan hmu a ni. Kum 3-ah chuan maurua chu puitling tura ngaih anih rualin, kum 3-ah a puitling lo a, mahse a thang ve tho a ni kan tih kha, a hmuna zir a lo ni awm e.

Mau-chi man zawhna, term hmasaa mau-chi sorkarin a lei zawng zawng kha a 9,71,225 a ni. (mau-chi tiak lei zat a ni.) A vaiin ₹6,83,30,250/- sen a ni. Chutah chuan mau-chi hrang hrang-dendrocalamus brandisii, dendrocalamus sikkimensis dendrocalamus longispathus, heng chi thum leina kha a ni a, hetah hian brandisii hi lei hnem ber niin, a tiak kan lei zat chu ₹4,15,475 a ni. Brandisii bika kan sum sen chu ₹3,32,38,000/- a ni, Pu Speaker.

Mau chin hlawhtlin vanga IAS bansan an awm em, tih zawhna kha chhan a harsa angreng a; department chuan a placement lampang kha kan va ngaihtuah lutuk lo a. Lo bang ta an awm anih pawhin, kan hre lo a. Department thlirna atang chuan, bansan an la awmlo niin kan hria e, Pu Speaker.

Thlai-thar hralh chungchanga department hma lakpuina tih hi, Allocation of Business Rules-ah khan a marketing lampang chu Horticulture chan anih loh rualin, kan farmers te hian horticulture hi min rawn belbul ber a. Thlai an han thar hnem deuha a market-ah harsatna an tawh chuan, kan department lamah an lo kal thin a. Khang theite kha kan department-in a zawrhna tur hmun an lo buaipui a, Horticulture Directorate office building kawnganah sawn kan dahkhawl thin a, khata tang khan an zuar a. Chumi mai piah lamah Secretariat kawtah kan GAD lam phalna kan dil thin a, chungah te pawh chuan inpho chhuah phalna min pe a, kan zawrh tir thin a ni. A zawrh tir mai piah lamah keini pawh hian kan thehdarh sak a. ‘dawnfawh kg-ah chuti zatin lei theihin a awm e; tomato kg-ah chuti zatin lei theih a awm e’ tiin department-in theihtawp kan chhuahpui ve thin a ni.

Lakhuihthei tawih chungchang kha Pu Speaker, hetia zawhna kan han dawn takah chuan han sawi te pawh a thain ka hria a. VC inthlan dawn khan lakhuihthei hralh theih loh, ‘quintal chuti zat paih a ni; a chhia a, paih a ni’ tih te kha media-ah kan hmu a. Heta kan inngen duh chu - political party an awm a; kan farmers te pawhin affiliation te chu an nei ang Pu Speaker, nangmah kaltlanga kan hrilh duh chu, politics hi la na lutuk lo ila, a sorkar dem ang dawn lek lek, VC inthlan dawn avanga rawn tih te kha a fuh lovin ka hria. A department minister ka nihnaah pawh vawikhatmah an rawn kal ka hrelo, lakhuihthei tawih-chhia chungchangah khan. Kan Director te ka zawt a, ani paw’n a lo hre lo a. Amaherawhchu, ‘a tawih-chhe teuh’ tih kha VC inthlan dawn khan vawrh a ni a, hei hi kan farmers te pawh Pu Speaker, nangmah kaltlanga ka ngen duh chu - fimkhur ila, a politics inbeihna zawnga kan kal chuan kan thawkho thei dawn em ni, hetiang te chuan, tih kha ka rilruah a lo awm a. Fimkhur tlang tawh ila a tha khawp mai.

Mizoram-a thei kan thar tam ber chi 8 a list-ah kan kawla, chungte chu –

- i) Balha - metric tonne 1,40,502 (Hei hi 2023-2024 leh 2024-2025-a kan data neih theih china kan thar zat a ni.)
- ii) Lakhuihthei - matric tonne 29183 (record-a kan angin.)
- iii) Thingfanghma (papaya);
- iv) Grapes;
- v) Sapthei;
- vi) Dragon Fruits.

Tichuan, ‘wine atan eng thei nge tha ber’ tih kha, a interesting khawp mai. Wine specialist kan ni lova, ngaihdan erawh a dang thei a ni. Wine Rules kan pass tawh a, a siam phalna kan nei tawh bawka; kan en chho zel turah ngai ila. Nikum khan Taiwan-ah mau chungchang zir tura kan kal khan wine lam kha ka interest avangin, National Taiwan University-a an wine professor kha ka kawm a, ani chuan dragon-fruits hi wine atan a suggest tlat lo mai a. A chhan a sawi chu, ‘A tuiril a, amahin rim a neih loh avangin, wine ah a tha lo e’ tiin min chhang a.

Mahse, kum kalta khan keini lamah chuan kan dragon-fruits ching association te leh kan enterpreneur thenkhat Vietnam-ah an han kal a, department tirhin; dragon-fruits atanga

wine an siam chi 9 an rawn hawn a ni. Chu tak chu a ni. a then professor-in dragon-fruits wine min suggest loh laiin, Vietnam-ah chuan an lo hralh nasa hle tih kan hria a ni. Chuvang chuan, ‘Eng thei ber hi nge wine atana tha’ tih chu, kan la tichhin zel turah ngai ila. Budget session han zo se, a industry te kan din chhoh chuan kan han ti mawp mawp ang a, Pu Speaker, a tha ber a hriat mai ang. Ka lawm e.

SPEAKER : Kha; a lo specialist deuh chu a va ang si ve. Aw le. Tunah kan House Leader sawi duh a neih te sawi turin ilo sawm ang.

PU LALDUHOMA, CHIEF MINISTER: Pu Speaker, petrol-ah hian ethanol hi ‘percent eng emaw zat pawlh tur’ tiin India sorkarin thutlukna a siam a. Chumi pawlh tur zat tia a puan chu India ramah hian kan phak thei lo a ni. A chhan chu, ethanol production a tlem a, a market lam chu a tha khawp mai a. Tin, mau atang kher hian a ni lova, thildang atang pawhin ethanol hi a siam theih a. Kan sorkar tir lamah khan petrol-a pawlh tur ethanol chu siam duh an lo kal a, presentation pawh an rawn nei a. Agreement pawh draft kan nei chho tawh a, sign-a tih nghal mai an rilruk deuh a. Amaherawhchu, a hnu ah ngaihtuahna an nei thar leh a. Petrol-a pawlh ang chi ni lovin, thlawhnaa hman tur - Sustainable aviation fuel hi ti leh zawk ila, an ti a. Tichuan, an DPR zawng zawng thlak thleng vek a ngai ta a. Ethanol atanga a oil an lakchhuah kha la thlitfim leh chhawn tur a ni a, chu chu ‘a market a tha zawk e; a demand a sang zawk e’, an tih avangin, chumi lam kawng chu an zawh leh a. Chumi atan chuan anmahni lam hi an la inbuatsaih fel chiah lo a, amaherawhchu, ‘peih thuai kan inbeisei e’, tiin min rawn hrilh a ni.

SPEAKER : Aw le. Zawnha danga kan kai hmian, kan Health Minister hian ka theihngilh a hlau em mai a. Universal Health Scheme kan nghahhlelh em em kha tun chhun chawlh hun dar 1:00 ah ah hian kan Chief Minister-in a khuh hawnna a nei dawn a. Kan building Conference Hall ah mai hian a ni a, memberte kal theuh kan tum dawn nia.

Aw le. Zawnha dangah kan kai ang a.

Starred Question No. 204: Sports & Youth Services chungchang.

Zawnha Neitu: Pu T. Lalhlimpuia, Lunglei West Bialtu.

PU T. LALHLIMPUA: Pu Speaker, ka lawm e. Sports & Youth Services Department Minister chhan atan ka zawnha Starred Question No. 204 chu –

- a) Tun Sorkar kum chhungin Sports & Youth Services Department hnuaiyah construction hna eng zat nge thawh zawh a nih?
- b) Hnathawh mek a awm chuan, eng zat nge?

SPEAKER : A chhang turin Sports and Youth Services Minister zahawm tak Pu Lalnghinglova Hmar ilo sawm ang.

PU LALNGHINGLOVA HMAR, MINISTER: Pu Speaker, a chhanna chu –

- a) Tun Sorkar kum chhungin Construction hna 10 thawh zawh a ni.
- b) Hna thawh mek 51 a awm.

SPEAKER : Zawnbelhna zawt turin –
1. Pu T. Lalhlimpuia, (Zawnha neitu);

2. Pu Jeje Lalpekhlu,
3. Dr K. Beichhua.

PU T. LALHLIMPUA: Pu Speaker, ka zawhbelhna chu –

- i) Mizoram State Sports Council, Annual Report 2023-2024 kha website atangin ka lo en a, sorkar hmasa hunlaia Sports infrastructure project nuai tam tak thawh zozai kha kan ram tan chuan a lawmawm khawp mai a. Chutih lai chuan, a viltu Mizoram State Sports Council hi department lian an ni lem si lova, engtingge an tih theih bik; an va efficient awm em em ve? Engineer te an indaih em; an va hah awm bik ve?
- ii) Ka Bial Sazaikawn-ah Multipurpose Hall kum 2008 khan sak a awm a, hall tha deuh mai a ni a. A sak lam hi kan thiam viau a, a hmanna lam erawh chu kan thiamlo riau a. Kan Engineering College pawh tunah hian Chawke-run a ni ringawt mai a, an awke nuai nuai ringawt mai a ni.
- iii) Multipurpose Hall hi kan Sports Minister ho khan nikum July Ni 3 khan kan en tawh a. He hall hi tun dinhmunah chuan a hnuai hi NCC awmna a ni a, a multipurpose lo ang reng khawp mai a; a bak kum ruk chhung chu a awl ta ringawt mai a. Hei hi engtia hma lak zel tur nge, department hian ruahmanna in siam em? Project a tam ropui si a; chutiang karah chuan engtia hma lak nge in tum?

PU JEJE LALPEKHLUA: Pu Speaker, Pu Speaker, Rajiv Gandhi Stadium hi kan ramah chuan stadium kan neih that ber a ni a, tun dinhmunah hian duh thu a sam lo khawp mai a. Rajiv Gandhi Stadium hi Mizoram hmun kan neihah hian mikhual thleng tam ber, mikhual tlawh tam ber zingah hian a lang niin ka hria a; kan ram hmel lanna pawimawh tak pawh niin ka hria a. Pu Speaker, Sports & Youth Services Department changtu Minister zahawm tak Pu Lalnghinglova Hmar chhan atana ka zawhbelhna chu –

- i) Rajiv Gandhi Stadium hi chei that theih a ni em?
- ii) A lo nilo anih loh pawhin, Lammual zawk hi chei that tumna a awm em?

DR. K. BEICHHUA: Pu Speaker, kha, a lawmawm khawp mai a; construction hna zawh tawh hi 10 a ni a. Ka zawhbelhna chu –

- i) Heng construction te hi eng tika sanction nge? A funding source hi khawi atanga hmuh te nge?
- ii) Hnathawh mek 51 a awm tih a ni a. 51 te kha engtika sanction dawn nge nia, engtika zawh tur te nge? A funding source kha khawi atangin nge?

SPEAKER : Aw le. A theih ang anga chhang turin Sports & Youth Services Department changtu Minister Pu Lalnghinglova Hmar ilo sawm ang.

PU LALNGHINGLOVA HMAR, MINISTER: Pu Speaker, helai ka wind-up na tura ka inbuatsaihna bu ah hian a awm vek a. A vai vaiin kan chhang hman lo ang a, a rei dawn lutuk a.

Engpawh ni se, Pu Speaker, Mizoram State Sports Council dinhmun hi House leh ram mipuite pawhin kan hriat chian a thain ka hria a. Autonomous Body a ni a, amaha inrelbawlna hran nei anih rual hian Sorkar nena inhne-hnai tlat a ni a. Chuvang chuan, kum 2020-a Mizoram Sports Council Act amend anih khan technical authority ah hlankai a ni. Sports infrastructure chungchangah chuan, ‘a design theih a, a sa thei a’ tih a ni bawk a, thuneihna chu a nei zau hle a ni. Chuvang chuan, Sports Council amaha inrelbawla, sports

infrastructure bik siam sa buaipui thei dinhmuna dah a ni a, chuvang chuan, tha taka bawhzui a ni a. A zawhna ang deuh khan, a thawktu lam hi chu kan indaih lo nasa a. Tunah hian Asst. Engineer pakhatin a ho a, Junior Engineer a nghet pathum leh a nghet chiah lo contract pakhat kan nei a. Chu chu kan dinhmun chu a ni mai a. Tichuan, State Project Engineer hi PWD atangin kan hawh thin a, tunah erawh chuan kan nei lo a. Chuvang chuan, kan hnathawh leh a enkawltu lam han en chuan a inmil lovin, a inbuk tawklo a ni tih chu phat rual a ni lo a. Chuti chung chung chuan kan Engineer bikte hi chu an chhuanawm khawp mai a. An thawkrim a, theihtawp an chhuah a. An hna pawh hi a chhe lo a; a tha tawklo te pawh a awm mai thei a. Thlalak kan dawn atangin eng emaw zat hna kan han thawh that tir te pawh a awm a.

Tichuan, Pu Speaker, a ziaka ka neihah hi chuan, kan JE –

- No. 1 - Project 17; Amount ₹184 crore; Lawngtlai leh Lunglei District a vil a, JE vil atan chuan a lian the-thaw hlawm khawp mai a.
- No. 2 - Project 27; Amount ₹178 crore; Mamit District.
- No. 3 - Aizawl District; Amount ₹7 crore;
- No. 4 - Aizawl District; Amount ₹51 lakhs;

Chu chu tuna kan dinhmun a ni.

Pu Speaker, Dr. K. Beichhua zawhna - sanction hi engtika hmuh tur nge tih kha, PMJVK hnuiaia hmuh a ni deuh vek a. A then hi chu SASCI leh thil dang atanga hmuhte pawh a awm a. Pu Speaker, PMJVK bikah tunah hian Sports-a kan hmuh sanction approved amount hi ₹422 crore a ni a. Hna kan han thawk chho a, chung zingah chuan ₹227 crore hi a lo thleng tawh a. Pu Speaker, nimin nge, nimin piah kan khaihawm nia ka sawi ang deuh khan, tunah hian kan dawn loh ringawt pawh Central share ₹152 crore a la awm a ni.

Tichuan, State-in kan pek belh tur pawh hi tuna kan State budget zah ₹20 crore deuh thaw State-matching share hi kan pek a la ngai hrim hrim a ni. A hna kha sawi tawh ang khan, thawh tawh a awm a, thawh mek a awm a. Chu mi kal zel avang chuan tunhma deuha sanction hmuh pawh ni mahse, a pawisa lo la thleng lo kha heti zat hi a awm a ni. Tin, a lo thleng tawhah pawh thawh zawh loh kha eng emaw zat a la awm bawk a. Chuvang chuan, PMJVK-a hna lo kal zel turah hian a inhnawhkhawm ta a ni. ‘Heti zat kha hna zawh loh la nei e’ min la ti ve bawk a, chu chu tuna kan dinhmun hi a ni a. A dang pawh a la awm nual a.

‘Tu tu nge Contractor; engzat nge an thawh tawh’ tih te hi a awm nual a. Pu Speaker, i phalna-in; ka phone-ah hian document pakhat chu ka nei a. Kan hna neih dan chin bika Dr. K. Beichhua zawhna kha, sawi angin kan hna hi a thahnem tham a, a mihring hi kan beitham bawk si a.

DR. K. BEICHHUA: Pu Speaker, khawngaihin; a thawktu ka zawt lo a, ‘engtikah nge sanction hi hmuh a nih; hnate hi eng tika complete tur nge’ tih zawk kha a ni ka zawhna chu.

PU LALNGHINGLOVA HMAR, MINISTER: Sanction hun kha chu ka sawi tawh a, Sorkar hmasa hun lai kha a ni a; a hun tak record hi helaiyah hian ka nei mai lo a. Tichuan, a hna ho kha Pu Mahlima zawhnaah khan a awm nual bawk a. A chi hrang hrang kha a awm a, chungte chu –

Residential School 5, District Sports Complex 3, Community Service Centre 7, Girls Hostel 4, Artificial Football Turf 4, Futsal ground 2, Hockey ground 1, Volleyball court (Contract pakhat hnuai a awm) 28. A hrang hranga phel a ni a, ₹30 lakh man zel; basketball court hi ₹103 lakh niin ka hria a, chu mi man zel chu a ni a. Hei hi 28 a awm a, Contractor pakhat hnuai a thawh a ni a. Tin, 'Sadhav Madhav' tih hi 2 a awm bawk a ni.

Pu Speaker, sawi leh sawi hnu hengah hian kan duh chuan a record chu a awm a. 'Engtika zawh tur nge' tih kha a pawisa pawh hi kan la dawng kim lo deuh a. A then hi chu a hna a muang ang reng a, hnathawk tha deuhte awm bawk mahse. Tin, mi pakhat hian an awrh hnem deuh hlawn avangin, an hnate pawh duh anga chak hlei thei lote pawh a awm bawk a ni.

Pu Speaker, Pu T. Lalhlimpuia zawhbelhnaah Sazaikawn chungchang kha, Sazaikawn Indoor Stadium kha kan zu tlawh a, a lungawithlak loh hle mai a. A chhan chu, 2018 Congress hun lai, khatih laia Sports Minister Pu Zodintluanga hawn kha a ni a; Mizoram-a Indoor Stadium lian ber leh tha ber pawl a ni ang chu, kha tih lai khan a-ber pawh a ni hial mai thei. Chu chu, Sazaikawn, Lunglei-ah ₹6 crore sengin sak a ni a, dah mai mai a ni; kum 5 chhung khan an hmang lo hrim hrim a ni. A hnuai h NCCO an invawm lut a, a chungah chuan a ruk theih theih addict hovin an ru, an ti mai a. A kilhna leh a tui herh-hawna te, a tukverh leh engkim mai a ruk theih ang ang kha chu an ru deuh vek mai a, a pawl hle mai a. Thil hi kan han nei a, a enkawl chhonzawm emaw, hman-tangkaina emaw lam hi a pawimawh lai chu a ni a.

PU C. NGUNLIANCHUNGA: Pu Speaker, khawngaih takin; 'A ruk theih theih' tih lai kha chu House record atan a mawi lo deuh em aw? 'A lak theih theih' ti sela a tha deuh lo maw?

PU LALNGHINGLOVA HMAR, MINISTER: Pu Speaker, ka sawi sual anih chuan min lo ngaidam ula. Duh leh 'a ruk theih theih' tih lai kha chu kan paih ang a; amaherawhchu, an la bo a ni. A lakbo theihho kha an han labo a. Kan va kala kan hmuhchhuah tak chu, 'hei hi siamthat a ngai; enkawl a ngai' kan ti a. A bialtu MLA, zawhna zawttu khan hovin kan kal a, 'tun financial year chhung hian kan ti ang e' kan ti a; Sports & Youth Services te chu pawisa neilo kan ni a. Chuti chung chung chuan, kan Grant-in-Aid atangin 25% kha kan pe a; chu chu ₹25 lakh a ni a, ₹100 lakh kha kan neih a ni mai a. ₹25 lakh kan sanction a, tunah hian kan chei tha ang a. Engpawh ni se, kan luah tawp phawt ang kan ti a. Lunglei District Basketball Association kha 'invawm lut rawih u la, chei hnum ang; anih loh chuan khatih hun laia ₹600 lakh-a an sak tan hun pheiah chuan (2014 a nih loh chuan 2013 a ni ang a) USIS hnuai ami kha a ni a. 'Hei hi a tawl tur a ni lo; kan chei hnum tur a ni' kan ti a ni.

Pu Jeje Lalpekhlua zawhna - Rajiv Gandhi Stadium chungchang kha, a history a thui ang reng khawp mai a, duh thu a sam lo a. Amaherawh chu, kan neih that ber a ni a, kan tangkaipui em em a. Mi-thahnem takin eizawna, a then chuan hausakpui nan, an inzirchhuahna hmanraw tangkaia hman a ni a. A sak hun lai atang khan contractor nilo, ₹1/- pawh hlawn miah lo khan a viltu-ah kan tang nasa a, Mizoram Football Association hruaitu kan nih ang khanin. A hnawhsarum si; I-League khelh a ngai tawh si; a la inpeih silo. All India Football Federation-in an rawn nawr nasa si a, khatih lai khan theihtawp chhuahin kan bei ve a, kan nawr a; khatih hun laia MFA hruaitute khan an bei nasa hle a ni. Chuti chung chuan a hmawr bawk dan kha duhthu a sam ta lo deuh a, dressing room

leh thildang chuan chei that chu a mamawh khawp mai a, tuna mi aia chei that theih chu nise duhthusam a ni a. Pu Jeje-a te khan stadium tha an hmu hnem a; khang kha chu a phalo nasa a. Engpawh nise, upgradation chu khu stadium khuan a mamawh tawh a, a upa tawh hrim hrim bawh a. Tin, a bikin a stand thlang lama thutna ho khu a mawih tawh a, a him tawh loh avangin tum hnih ka zu endik tawh a, kei pawhin. A then khu tlak hawlh theihna hmun te anih avangin, repair anih loh chuan abandon-a siamthata, engtin emaw a chei chu angai dawn a ni. Engpawh ni se, kha chu kan kalsan ang a.

‘Lammual lam te hi’ a ti a. Ni e, Lammual hi tunah chuan Assam Rifles chu an vaiin an chhuak ta a, kan ti thei ang a. Home Minister a lo kal a, ka sawi chak deuh hi chu ka sawilo mai ang. An bel leh thil chi hrang hrang nen khan an chhuak kim vek a ni tunah hian Pu Speaker, tawh a. Tichuan, Aw...Eng kanna bel maw?

DR. K. BEICHHUA: Pu Speaker, ka zawhna kha min la chhang tlat lo mai a. ‘Khang hna ho kha engtika zawh nge ni ang’ tih lai kha. A la chhan theih loh anih pawhin, ‘hei, ka la chhang thei hrih lo e’ te tal ti se. Tin, a exact-a min chhan theih loh pawhin approximate-in ‘chumi kumah chuan kan zawh theih kan ring’ tih talin emaw min chhang se. Chuti lova, zawhna Chiang taka kan zawh han inchhan loh mai hi chu Pu Speaker, a innamnul thlak ka ti.

PU LALNGHINGLOVA HMAR, MINISTER: Pu Speaker, a zawh hun tur kha ka hre mai lo a, tuna a zia kah hianin. Tin, project kha pakhat a ni lova, chi hrang hrang a ni a. Tuna Sports project kan neih ho hi a funding source pawh a inan vek loh avangin leh, a contract-a kha a sanction hmuh hma deuh leh hmuh tlai deuh te a nih avangin, a zawh hun kha a inanglo a ni. Ziakin kan lo chhang dawn nia.

Tin, Pu Speaker, inzahlohna lam kha a ni chiahlo a ni, ka chhan loh chhan a kha. Tichuan, khi, hun ka hmang rei ta mah mah a, Lammual lam kha chu kan term chung hian tuna mi aia tha zawk Lammual hi Pu Speaker, kan hmuh ngei ka beisei e. Ka lawm e.

SPEAKER : A lawmawm. Ni e, kan sawi fo thin angin, Zawhbelhna hi chawp leh chillh hian kan han inzawt ta thin a. Information te minister ten kan lo inrin loh te a ni a, inrin vek hi a har ve bawh a nia. Engnge an rawn zawh dawn kan hre lawk si lova. Kha, ‘ziakin kan inpe ang’ a tihah khan lungawi ta ila.

Starred Question No. 205: Serlui chungchang.
Zawhna Neitu: Pu Lalrinsanga Ralte.

PU LALRINSANGA RALTE: Pu Speaker, Power & Electricity Deptt. changtu Minister chhan atana ka zawhna chu –

- a) Serlui B Hydel Project hi Privatise tumna a awm em?
- b) Power & Electricity Department hi Corporation-ah dah tumna sorkarin a nei em?
- c) Nei ta se, eng chen nge hmalak anih tawh?

SPEAKER : A chhang turin Power & Electricity Department changtu Minister Pu F. Rodinglana ilo sawm ang.

PU F. RODINGLIANA, MINISTER: Pu Speaker, Member zahawm tak Pu Rinsanga Ralte zawhna chhanna chu –

- a) Serlui B Hydrel Project hi privatise/out-source tura diltu leh beiseitu an awm a. Nimahsela, Mizoram sorkar tan a that ber dan tur zirchian mek a ni.
- b) Nei e. Power & Electricity Department hi corporate tura ruahmanna a lo awm tawh a. Nimahsela, tun dinhmunah hmalak chhunzawm a ni lo.
- c) Tun dinhmunah hmalak chhunzawm a ni lo.

SPEAKER : Zawhbelhna kan la ang a –

1. Pu Lalrinsanga Ralte, (Zawhna neitu);
2. Pi Baryl Vanneihsangi.

PU LALRINSANGA RALTE: Pu Speaker, kan Minister zahawm tak hmalakna a fakawm thin khawp mai a. Serlui B hydrel project khu kan vei khawp mai a, 100% Mizoram ta a ni a. Sawi fo tawh angin, khawl 3, mW 4 theuh pechhuak theiin, mW 12 a ni a. Amaherawhchu, a tak taka kan run theiha chu mW 4, khawl 1 bak ani hlei thei lova, sorkar tan pawh phurrit a ni khawp mai. Tin, a siamtute a nlo rei tawh a, (awm pawh an awm tawh mang lo mai thei) a part-te pawh a vangin a buaithlak mai thei a. Hei hi kan Minister zahawm tak hian remruatna thui tak, a ngaihtuahna sengin privatise-a engtin emaw outsource kha tha zawk tura kan ngai anih chuan, a thain ka hria a. Khulaia khutianga awm tawp mai khu a uiawm lutuk a. Outsource anih loh pawhin; Mizoram sorkar tan outsource-a tha vak lo zawka kan ngaih chuan, chei that leh hram dan awm se.

Tichuan, ka zawhbelhna chu - Serlui B hydrel project khu mW 4-5 tal pechhuak thei tura cheihnum leh theih dan sorkar hian a zawng thei ang em, out-source anih loh pawhin?

PI BARYL VANNEIHSANGI: Pu Speaker, P&E Department changtu Minister zahawm tak zawhbelh ka duh chu Tlawng lui khuah chungchangah ruahmanna engnge an neiha, engchen nge kalpui anih tawh tih kha ka hriat duh a ni e. Pu Speaker, ka lawm e.

SPEAKER : Zawhna leh Chhanna hun a tawp a. Zawhbelhna la tawh lovin kan Minister hi kan chhan tir mai ang aw? Aw le. A theih ang anga chhang turin kan Minister ilo sawm ang.

PU R. RODINGLIANA, MINISTER: Pu Speaker, ka lawm e. Nia e, Serlui B hi company pakhatin min bia a, kan zirchiang a. Ahmaa kan hmalakna te ka'n sawi ang a.

July Ni 23, 2024 khan Engineer SE chin 3 leh EE chin 2 a hmuna zirchiang turin kan tir a, chu chu line hrang hranga specialist-te an ni a. Chunga an thil hmuhchhuah chu, a khawl khu unit 3 a ni a, unit pakhat run tur pawh khan beih fe a ngai tawh a. Unit 1 run turin khawl danga mi electro magnet leh thildang dangte in share tawna hmalak a ni a; chutiang te chuan kan la ti tawng tawng a. Tunah hian koi-surut in kan la tlan ani tih kha kan sawi duh a. Tichuan, a pump house chung zawng zawng deuhthaw leh a quarters te khu a mawih chhia in, a trass-a te pawh a chhe tawh a. Chungte chu thlak a ngai a. Chu mai ni lovin, a chhung te pawh a tuiek tawh a ni, Power House chhunga khu.

Tin, an rawn hmuhchhuah pawimawh deuh chu, pen-stock an ti a; chu chu a tuikhuah powerhouse atanga tui luh thlakna kha thir pipe lianpui mai a ni a, chu chu a tui balance loh

avangin tuiin a tichhia a ni. Hei hi a hautak em em mai a siam a hi, wawi tam tak siam leh driver-te pawh la in hma an lo la tawh a. Mahse, an siam thei lova. Chu chuan a chhunga concrete block lian pui pui a tichhe tawh a ni. Chu chu kan problem a ni a. Hemi siam tur hian a hna thawk thiam company bik te pawh an bia a, amaherawhchu, an tiphui thei lo a ni.

Tin, an hmuhchhuah pawimawh em em mai pakhat leh chu, ‘rusting of draft’ an ti a, chu chu powerhouse-a kha underground ami a ni a. A tui paihchhuahna chu a life time kum 50 chhunga tuiiek lo tura tih kha, a tuiiek tlat mai a ni. Hei hi a pawimawh khawp mai a. Chu chu siam a ngai a, a siam man a to em em mai bawh a. Tin, chu aia hlauhawm leh zual chu, powerhouse chhungah generator a awm a, chu chu underground a ni a, feet 50 hnuailama awm a ni. A bang kha anih dan tur an rawn ziah danah chuan feet 1 leh a chanve aia chhah tur a ni a; chuta tang chuan tui a lo put lut tlat mai a ni. Kha kha a hlauhawm em em mai a, a siam that dan kan han ngaihtuah a, tihdan avang ang reng khawp mai a. PWD-a kan engineer te pawh kan han rawn a; retro-fitting tur chuan a senso a hautak lutuk a, a thar a tih leh an suggest a. Tui lut a kha khawi atanga lo lut nge, engtianga pressure na nge tih an hre si lova a buaithlak khawp mai a. Tin, a generator part kha a awm tawh mang lo a ni. Bell company a ni a, collaborated a ni a. Tin, oil kha a shaft hrang hrang atangin a leak a; chung te chu a ni a.

Tin, company min rawn dawrtute hi an insawi danah chuan 12 hi 24-ah kan ti chhuak thei ang an ti a. Chu chu Pu Speaker, kan engineer-te ka han zawt a, a theih loh ang an ti a. Amaherawhchu, engineer pawnlama miin an ti thei ang em tiin kan han zawt kual a, chuta min chhanna chu a awihawm khawpin ka hria a. Anmahni lam pawh ka zawt tho a min chhanna nen ka han sawi kawp ang a. Anmahni lam chuan, ‘tuna in khawl hmanlai hi a shaft pakhat ti vir turin patling pahnihin an tivir zo lova. Tuna kan shaft hman tura hi chu kut khing-khatin i tivir thei dawn a’ a ti a ni. Chutiang khawp chuan a technology a inthlau a.

Tin, engineer dangin min hrilh leh chu, Tata engine, a engine ngai reng block 6 thoa hi hmanlai chuan 70 tonne a phur thei a. Amaherawhchu, khami tonne 70 phur thei engine ngai reng si kha tunlaih chuan tlein an modify a, turbo te an vuah a, tonne 210 phur theiin an siam tawh a. Chuvang chuan, company-in ‘kan thei ang’ an tih chuan, company chuan ti mai rawh se, in engineer-te chuan a ti a. An ti thei anih chuan, heng company hian 30% min offer a ni. 24% lo siam chhuak thei se 30% min pe se chu, tuna kan thar let fe hi hman lohin kan thar dawn a.

Pu Speaker, helai hi han sawizau deuh ka duh a. Party thenkhat press release ah khan hlawk angin an insawi a. Hei, tunah hianin Serlui B-a kan manufacturing cost hi ₹5.35/- a ni a, kha kha mW 12 pechhuak thei anga kan chhut a ni a. 2021 khan kan manufacturing cost dik tak chu ₹18.79/- a ni a, 2022 khan ₹22.52/- a ni. A sang tawh em em mai a; khatah khan salaries leh wages leh maintenance fund a la tel lo a ni. Khang zawng zawng belh phei chuan ₹32/- ang velin unit khat kha kan run tawh a ni. Kha kha an lo chhut sual fo mai a. Party pakhatin hlawk anga an lo inchhut kha a pawh khawp mai a, mipuiah information dik lo kan pe khawp mai. A dik takah chuan hetah hian kan chal kan beng tawh a ni, a department ang chuan.

Tin, lo privatise ta ila, thawktu hi mi 84 kan hnuk kir thei dawn a; kum khatah ₹3.26 crore-in kan hlawk dawn a ni. Chung te pawh chu hmanniah kan sawi tawh a, hmalakna tur hrang hrang kan nei a. Hengte hi kan tih theih chuan, department ang chuan kan hlawk viau dawn a ni.

Pi Baryl-i zawhna kha; Ni e, Tlawng Lui hi kan au nasa a, kan sawi dan pawh a inang lo deuh a. Khuah tak tak kan tum tawh a, a hmuna press conference kan zuk neih kherna chhan pawh kha July, 2017 khan ZPM policy drafting committee te CWC-ah kan va leng a, ‘engtikah nge inzawh dawn’ kan va ti a, ‘nakumah’ an ti a; chu chu 2018 a ni. Mahse, vawiin ni thlengin an la ti thei lova. An chhuanlama chu, a hmunah drilling machine kan la lut thei lo an ti a. Kan sorkar tirh khan kan ko leh a, a ngai bawka min la chhan avangin kan Sorkarin theihtawp chhuahin hma kan la a, a hmunah press conference-te pawh kan zu nei a nih kha. 2025 zawh hmain a DPR kan zo ang an ti a, DPR zawhna tur a an hmalakna te min rawn hrilh a. A tuikhuah san zawng tur te, a tuikhuah chim chin tur te, a powerhouse awmna tur te leh multipurpose dam a nih dan tur te min ran hrilh tawh a, tun kumah hi chuan a DPR min rawn pek ngei beiseiin, khuah hman kan inring chiah lo na chu, kum thar lamah hi chuan hma lak kan tum a. Kan CM hian min phurpui a, Mizoram Sorkar pawisa pawhin hei chu hma kan la dawn nia a ti a ni. A tih theih dan a awm a, kum khatah crore tam tak a hman theih loh a, crore 100 pawh min pe se kum khatah kan hmang seng dawn lo. Chuvang chuan, DPR an peih chuan kan pawisa pawhin eng emaw chen hma lak kan tum a. Hei, Pu Nitea te department atan pawh a pawimawh a, tui lakna atan a tangkai em em dawn a. Chuvang chuan, hei hi chu hma lak ngei kan tum a ni tih kha ka han sawi duh a ni e. Ka lawm e.

SPEAKER : Tikhan Zawhna leh Chhanna hun kan zo a, *Presentation of Report-ah* kan kal ang a.

PRESENTATION OF REPORTS

Pu V. Malsawmtluanga, Chairman of Committee on Government Assurances-in hengte hi House-ah rawn present sela: -

- i) The 12th report on action taken by the Govt. relating to various departments against the recommendations of the Committee on Govt. Assurances containing the 10th report of Ninth Mizoram Legislative Assembly;
- ii) The 13th Report on Action Taken by the Govt. relating to various departments against the recommendations of the Committee on Govt. Assurances containing the 11th Report of Ninth Mizoram Legislative Assembly.

PU V. MALSAWMTLUANGA: Pu speaker, i remtihna leh he House zahawmtak remtihna, heng Committee on Govt. Assurances action taken report pahnihte hi he House zahawmtakah hian ka rawn present e: -

- i) The 12th report on action taken by the Govt. relating to various departments against the recommendations of the Committee on Govt. Assurances containing the 10th report of Ninth Mizoram Legislative Assembly;
- ii) The 13th Report on Action Taken by the Govt. relating to various departments against the recommendations of the Committee on Govt. Assurances containing the 11th Report of Ninth Mizoram Legislative Assembly,

Pu Speaker, kum 2024 August 21 khan Committee on Govt. Assurances chuan he House zahawmtakah hian report pahniht a lo present tawh a. Chutah chuan 8th Assembly, Session 7th, 8th leh 9th chhunga Ministerte'n he House zahawmtaka assurance an lo pekte department lamin an lo bawhzui dan leh, chuta tanga Committee-in recommendation a neih te tarlan a ni a. A main report-a committee recommendations te chu concerned

department-te chuan an bawhzui ve leh a, chuta tanga hma lak dan chu Action taken Report niin, he House zahawmtakah hian ka rawn present a ni e. Ka lawm e.

(Hon. Speaker thu angin a copy membrete hnenah sem a ni a.)

FINANCIAL BUSINESS:

SPEAKER : Tunah chuan Financial Business-ah kan kal ang a. Vawiinah hian Minister zahawm tak takte pahnih - Dr. Vanlalhlana leh Prof. Lalnilawma te Demand kan sawi ho ang a, pass nghal kan tum dawn a ni.

Hun kal taa kan lo tih tawh thin angin, Minster pahnih te Demand hi a rualin kan la ang a. Tunah Minister zahawmtak Vanlalhlana'n heng a Demand-te hi House-ah lay turin ilo sawm ang: –

- 1) Demand No. 20 - School Education;
- 2) Demand No. 21 - Higher & Technical Education;
- 3) Demand No. 26 - Information & Public Relations;
- 4) Demand No. 48 - Information & Communication Technology.

DR. VANLALHLANA, MINISTER: Pu Speaker, Governor of Mizoram recommendation leh i phalnain, heng -

| <i>Demand No.</i> | <i>Department</i> | <i>Amount in ₹</i> |
|-------------------|--|---------------------------|
| 20 | School Education | 17,27,21,53,000.00 |
| 21 | Higher & Technical Education | 3,23,76,80,000.00 |
| 26 | Information & Public Relations | 13,19,86,000.00 |
| 48 | Information & Communication Technology | 5,43,70,000.00 |
| TOTAL | | 20,69,61,89,000.00 |

Hengte hi kum 2025-206 chhunga heng ka department chante inrelbawlana hman turin he House zahawm takah hian ka rawn submit a, sawiho turin ka rawn move nghal e. Ka lawm e.

SPEAKER : Aw le. Tunah chuan Minister zahawmtak Prof. Lalnilawma'n House-ah heng a Demand-te hi House dawhkanah rawn submit-a, sawiho tura rawn move nghal turin ilo sawm ang: -

- 1) Demand No. 25 - Public Health Engineering;
- 2) Demand No. 32 - Horticulture;
- 3) Demand No. 38 - Rural Development.

PROF. LALNILAWMA, MINISTER: Pu Speaker, Governor of Mizoram recommendation leh i phalnain, heng –

| <i>Demand No.</i> | <i>Purpose</i> | <i>Amount in ₹</i> |
|-------------------|---------------------------|--------------------------|
| 25 | Public Health Engineering | 2,85,96,23,000.00 |
| 32 | Horticulture | 1,07,28,30,000.00 |
| 38 | Rural Development | 4,13,84,18,000.00 |
| TOTAL | | 8,07,08,71,000.00 |

Kum 2025-206 chhunga heng ka department chante inrelbawl naa hman atan he House zahawmtakah hian ka rawn submit a, sawiho turin ka rawn move nghal e. Ka lawm e.

SPEAKER : Aw le. Kan Ministerte'n an Demand-te an rawn submit ta a, sawihona kan nei tan ang a. Hun minute 10 kan inpe ang a, minute 8 ah warning kan inpe ang a. Member zahawm tak Pu T. Lalhlimpaia hi ka register-ah a la attend tlat lo mai a, hei hi khawl chiang lo nge? (**Pu T. Lalhlimpaia**: Pu Speaker, ka attend chiah ang.) A lawmawm e. Tunge sawi hmasa ang? Pu K. Hrahmo i lo sawm ang.

PU K. HRAHMO : Pu Speaker, ka lawm e.

Kan House Leader kha, nimin khan Pu Amit Shah lo thlen laia ka thil tawn min chhannaah ka ngai a, hriatsualna a neih ka ring a. MLA ka ni tih an hre reng a; 'min hria em?' ka ti a, 'hria e' tiin min chhang a. Mahse, MLA ai chuan invitation card kha an ngai pawimawh zawk tlat a; kha kha ka sawi chhan zawk tak chu a ni. Pu Speaker, hmelin a zir ve deuh te pawh a ngai a ni ang e. MLA san zawng hi feet 3 pawh nise, mipuiin an thlan miau chuan, MLA a ni mai; lehkhah thiam vak pawh a ngailo; public vote kha qualification a ni mai. Pu Speaker, minute 5 min pek belh a ngai ang. Ka han sawi tur department pawimawh em emte pahnih hi an inkawp tlat mai a, sawi ve ve chu kan tum ang a.

Demand No. 20 - School Education:

School Education chungchangah a bik takin ADC area-ah harsatna namen lo kan tawk tawh a, kan tawk mek a, kan la tawk reng dawn a. MDC ka nih laiin Education hi kum 5-6 vel ka enkawl ve tawh a. A taka khawih tu ka nih avangin an problem pawh hre ber pawl ka ni ve a, sawi tur a tam khawp mai a. Kan House Leader khan, 'sawlama parallel administration awm hi a tha lo e; nakinah sorkarin a solve sak ang' tih he House-ah a sawi tawh avangin, kha kha ka ring a. Kan Minister zahawm takin a sawifiah tura ka duh chu, MNF sorkar lai khan Higher Secondary School - 34, Higher School - 11, Middle School - 7, A vaiin - 52 te chu lumpsum atangin provisional adhoc-ah upgrade an ni a. Sorkar thar a lo din khan, 'dan leh dun felfai tak a awm hma chuan upgrade hi a fuh ber lo e; dan leh dun siam phawt ang u' an tih avangin, an nghak a. Nimin lam Session-ah Dan te kan siam a, passed a ni tawh a.

Kan Education Minister ka zawh duh chu, kha Dan kha passed a ni tawh a, hman tan theih mai turah beisei ila; khang school 52-te kha provisional adhoc-a upgrade tawh an nih angin pawm nghal vek theih an ni em? Ni ta lo se, engchin nge pawm theih ni ta ang? Pawm theih ni ta se, a effective date engnge ni ang? Khangte kha ka zawhna ni ta sela. Tin, 'SAMAGRA chungchangah dan leh dun framework ka mamawh avangin a changtu minister-in min rawn pe a, ka lawm khawp mai. Hei hi ka mamawhna chhan chu, Mizoram pumpui school SAMAGRA repair-na tur te, toilet siamna tur leh engkim mai civil works-ah dan mumal awm lovin an duh duhin party-workers ho kutah dah a ni a. A dan leh dun ka hriatloh avangin kan minister-in a bu min rawn pe a. Helai 2.14 - Execution of civil works tih ah khan, "Construction of executive works are to be taken with community involvement; planning & implementation by the community through SMC or SDMC in all infrastucture developmental activity will be mandatory; all works costing upto 30 lakhs will be executed preferably by SMC or SDMC" tih a inziak a ni. Tichuan, school pakhat hathawhna tur sanction ₹30 lakh chu school management kutah emaw, SDMC account-ah emaw dah luh tura tih a ni a. Tin, community involvement pawh mandatory a ni tih a

inziak bawk a ni. Amaherawhchu, Pu Speaker, community-in an thawk ve ngai lo a, ZPM workers ho hmingin work-order an chhuah a, an inchuh a ni. A an chu – Mulukawlh hovin ran thi sa an hmuha an inkokhawm ang hian, school tin saknaah ZPM workers awm ang angte an inkokhawm a, an thawk thin a ni. Hei hi pawl ka ti khawp mai a.

School building tha nei tur chuan a tam thei ang berah community involvement awmin leh PPP mode-a kapui nise, chu chu school building tha innghana chu a ni a. Mahse, party-workers ho inhlawhna atana hman a ni hi a pawl ka tih le a.

Kan Education Minister hi Aizawl-ah a awm a; a school enkawl hi sang 2-3 dawn a ni ang a, felfai taka han enkawl erawh a tlin bik lo ang a. Chuvang chuan, khaw tinah SMC or SDMC din a ni a, khangho tha kha tichak zawk sela; Dan-in a phut angin ₹30/- lakh hnuai lam chu SMC account-ah dahin, khawtlangin inhlawhnan lo hmang ve se; profit a lo awm a nih pawhin khang kha an school tan an hmang leh tho a ni. Chutianga kan kal hma chuan institution tha hi beisei chi a ni tawh lo a ni.

Tin, Pu Speaker, kan Minister hnena zawhna ka neih leh pakhat chu - SAMAGRA hi society a ni a; a hnuaiah hian society enkawl na Acts emaw, Rules emaw department hian a nei em? Nei ni se, a copy min pe thei em?

Demand No. 38 - Rural Development Department:

Nimin lamah khan tlem ka sawi tawh a. District Council hi Sixth schedule (para 3) hmanga power neiin village council-te dina enkawl ve an ni a. Para 3 (E)-ah District Council-te power chu ‘Establishment of village or town committee, councils and their power’ a ti a ni. ‘Village council an siam ve thei anga, an thuneihna pawh district council in a siamsak ang’ tih a ni. Chumi Sixth schedule provision hmang chuan village council te an din ve a ni. Kan Dan siam hi “The Mara Autonomous District/Village Council Act, 1972” tih a ni a; 1972-ah an lo nei daih tawh a, chumi hmang chuan village council-te kha an lo din ve a ni.

Tin, village council pakhat dissolve a lo nihin election awm hmaa village administration take-care turin care-taker an ruat thei a, an ruat thin a ni. Hmannia ka sawi tawh ang khan, a term erawh chu thla 6 a ni a. Full-power neia an kal laiin, Mizoram-a department pakhat, RD Department in MGNREGA Act, 2005 hmangin dan an siam ve a, chu an dan siamah chuan district council area kha an va cover tir a, “village council dissolve anih chuan, khami chhung khan BDO kutah ‘job-card’ kan tih mai, Ni-100 inhlawhna hi a awm ang” tih zawng khan an dah a ni. Chu chu department pakhat, Rural Development dan siam a ni. Dan pawh a ni chiah lo, notification a ni. Chumi hmanga khilaia Sixth schedule (para 3) district council thuneihna hran an neihna va palzuta hetiang dan an siam hi a tha lo ka ti a ni. Hei hi kum 2014 atang tawha hman a ni; tun sorkar thar atanga hman tan a ni chuang lo.

Chuvangin, kan Minister zahawm tak hian he dan hi min en that sak leh se; ADC area cover lo turin min tihsak thei ang em, tih kha ka zawhna chu ni ta sela. Tunah hian village council pakhat loh theih lohna avanga an dissolve-in, administration leh job card hmanga hnathawhna pawisa sem kha BDO kutah a awm a. BDO te khan staff an nei chau si a, VLA kan tihte kha a hmang leh thin a ni. Sawngah sawn mifel takte chu awm ve mahse, mi thenkhat saw chu (kan House-leader zahawmtak tawngkam han hawh ve ila) thluak vung ber-bur, thilung vung ber-bur tawhte an ni a. An ni kuta village council sum tam tak withdraw-a han sem kha chu thil fel lo tam tak a inzep thei a ni tih hi min hriatsak ka duh

a. Engpawh nise, he provision hi chu a hma thei ang bera ADC area cover lo turin kan RD Minister zahawm tak hian min enthat sak turin ka ngen a ni e.

Tichuan, kan Minister zahawm tak pahnihte demand kan sawi hi tha ka ti a, ka pawmpui e. Ka lawm e.

SPEAKER : Pu T. Lalhlimpuia ilo sawm ang.

PU T. LALHLIMPUA: Pu Speaker, ka lawm e. Kan hmaa tablet-ah hian NeVA chauh access theih anih avangin eng eng emaw han inen ve te kan duh a. Chutah chuan, a man hi a to ropui si a, access theih turin thil dang ka lo tih avangin nichinah khan attendance kha ka lo la thai hman lo a ni. Kan inbuatsaihna te pawh cloud storage hmangin engkim helaiah hian kan ti tawh thin a. Chumi chu min lock sak chuan kan buai ve deuh thin a; chu chu Assembly Secretariat lam te pawhin min lo hriatpui atan nise.

SPEAKER : Kan comment lawk ang aw, khalai kha. Access theih khan dah a ni reng zawk a. Amaherawhchu, member thenkhatin multiple window an lo hawn khan a buai ta thin a ni. Chuvangin, ‘safe mode-ah hian i ti leh phawt mai ang u’ kan ti a. Hun eng emaw lai khan eng emaw zat kha a fel lo thup a nih kha. Chutiang a ni tih kan hmuhchhuah khan browsing hi limit mai ila, hetiang hian iti leh chhin ang. Amaherawhchu, pdf leh kan document mamawhte chu en theih tho siin kan han ti a. Kan enchho zel ang a, a tha zawk ni tura kan ngaih chu kan sawiho zel dawn a nia.

PU T. LALHLIMPUA: Pu Speaker, i thu sawi chhung kha minute 5 vel ni turah kan ngai a. Kei pawhin minute 5 vel chu pekbelh ve turah ka inngai a. Hun hmasa lam leh nimin lamah te kan session chhungin hun tawpa result i puan thinah khan hun hman dikah heti lam hi kan lang deuh tlangpui thin a, hun hmang reiah i veilama mite an lang tlangpui a. Vawiin chu sawti lamah ka tang deuh dawn a, pakhatna nih ngei tumin ka rawn ding a ni. I veilama mite an position hauh zel hi a fair ka ti bik lova, vawiin chu rawn hauh ve ngei ka tum a ni. (**Hon. Speaker:** Nikhat kha chu Pu TBC-a leh Pu Clement-a te kha an lang lo maw, Top 1 leh 2-ah khan). Kan lang khat deuh tlat; lan zin ve deuh a ngai a ni.

Pu Speaker, vawiinah hian Minister pahnih - Dr. Vanlalhlana leh Prof. Lalnilawma te demand kan sawiho dawn a. Tuna kan buaina - surface pro-tablet kan hman chungchang kan han sawi te nen pawh khan a inzawm dawn riau a.

Demand No. 48 - Information & Communication Technology Department:

Tunhnaiah Elon Musk-a Spacelink-in a pekchhuah Starlink kha Airtel leh Jio ten deal an siampui a, an sign a. Chutah chuan India ramah hian reiloteah internet chak chi hi kan avail theih turah ngaih a ni a. Chu chuan communication leh thil dang reng rengah khan a tha zawngin min rawn nghawng turah ka ngai a. Mizoram pawh chumi atan chuan kan sorkarin a dawnthleng kan siam thiam hi a tul hlein ka hria a, chutah chuan hmasawanna kan nei dawn niin a lang a. Kan Minister, Dr. Vanlalhlana, chutiang lam hriain min enkawl mekah kan mithiam zawkte leh developers ten software kan duang mawlh mawlh a, kan hmang mawlh mawlh hi a lawmawm ka ti a.

Chung zinga ka han tarlan duh chu, minority-te tinzawn rana IT skill development centre hmun eng emaw zata an ruahmanpui hi a tha ka ti hle a. A chhan chu, tunlaiah thuthlawh

ringawt emaw, chem ringawt emaw hum pawh hi internet base-a thiltih ngai tlat tho, Aadhaar-based a in link-ah te leh thil chi hrang hrang ration card leh form eng eng emaw online-a thil tih ngai an tih tho tho a ngai a, skills eng emaw tal leh awareness an neih a ngai a. Chung chu western belt leh kan boundary-ah te hian a ngai tam a. Hetiang thil a han ti hi 'a hmangchang a hre hle a ni' tih vawiinah hian ka sawi duh a ni.

A dawt lehah chuan, e-Office hmang turin hma an la mek a, file management system pawh fel zawk turah kan han ngai a. Tin, heng kan inchhawp teuhte pawh hi a zia tawh turah kan han ngai a. Tunah pawh kan hria a; tablet hmang-tangkai tan chuan a awlsam tawh a ni. Hengte pawh hi hma kan sawn zel a tul niin kan hria a, langtlang zawk dawn bawk a. E-attendance, KAI app chungchang pawh a ni a. Chu mai pawh ni lovin, Mizoram e-Service Portal and Upgradation of Mizoram State Data Centre and Cloud Enable buaipui a ni te hi a lawmawm dawn em mai a. Sorkar hmalakna awlsam zawka hriat theihna tura mipuiin platform pakhata thil an hre thei tur hi a lawmawm a. A ngaihna hria kan nei hi vawiinah hian a chhunawm a ni.

Tin, digital personal data vawn chungchang hi sawichhuah ve hrim hrim pawh a tulin ka hria. Chhawpchuah tura hmalak a ni a. E-Ram ang thovin sorkar-hnathawkte an dinhmun awlsam zawka enna tur kha portal an han siam chhuak dawn ta a. Chutah chuan, sorkar-hnathawk chu promotion dawnah te appraisal report lak te a lo ngai a. Chutah chuan, a chang chuan department te'n an tibo a, a buaithlak em em mai a. Institution te emaw, department head pension tawh te zawngin emaw, an signature zawng te emawin kan tlan a. Chutiang tawktu te ka nih ve avangin heng thil an han buatsaih hi a lawmawm ka ti a ni.

Mizote IT ah kan sang em em a. Mithiamte'n potential kan neih that zia hi an hmu a, nimahsela, infrastructure kan dawng tha si lova; chutah chuan kan tihtheih - software development ah te, animation ah te leh architecture landscaping ah te mahnia thiltih theih, power lama kan hniam avanga kan chan hi Mizote ah hian a tam lutuk a ni. Tunah hian convergence angin, chumi mamawh chu nichina Pi Baryl-i rawn zawhna ang chi hydro-electric-ah kan mamawh a. Tichuan, department hrang hrang hi kan infawkkhawm hian heng thil zawng zawng hi a lo thleng dawn a, thalai hma hi a kaw dawn niin ka hria a, a lawmawm ka ti hle a ni.

Tichuan, heng hmalakna te hi SASCI atanga duan a ni a. SASCI he sorkarin a hmandan hrim hrimah pawh hian a lawmawm tawh hrim hrim a ni; chung ruahmanna chu hetiang a lo kal thei te hi a lawmawm ka ti a. Sorkar hmasa kan biala hall sa estimate ngawt ai chuan, vawiina kan hotute hian an lo thlir thui deuh a ni tih hi vawiin ah hian ka'n tarlang duh a ni.

Demand No. 20 - School Education Department:

Nikum lamah te pawh ka lo aupui tawh a, kumin ah a tak takin hei, Mizoram University Bill te kan han passed takah chuan NEP, 2020 hmanglo thei lovin kan awm chho dawn a, 2035 kan thlir a, kan tinzawn a ni. School Education pawh chu tho chu a ni dawn a; 10+2 tih bova, a age-level ang zela age-education siam te pawh a ngai dawn a. Play-base te, code-base learning te khatiang khan skill development kha a ni tawh dawn a, Science leh Arts kan tih ang chi kha kan hawi tawh hmel loh a ni. Chuvang chuan, kan Education Minister-in min kaihhruainaa hmalakna hrang hrang han en hian a lawmawm a. Mi-fit, mi-thiam, mi-special kan mamawh ta a, politically-fit ringawt kan mamawh tawh lova, mithiam tak tak kan mamawh tawh a ni. Kan hnalak chungchangah pawh tunah hian sorkar lai mek te luhaina tam

tak a awm a; mi-fit lote avanga kan minister-te rilru hahna leh buaina deptt. ah hian a tam em em a. Tunah pawh thenkhatah chuan chance te pawh kan han inpe leh a, henge te pawh hi Mizoram future leh khawvel thiamna han ngaihtuah hian, ‘kan tihtawp hi a hun tawh lo maw’ tih te pawh kan ngaihtuah a ngaiin ka hria.

Tichuan, ka’n zawh duh leh Minister-in a windup huna min chhan atana ka duh chu, zirtirtu quarters leh zirna-in tlabal hi a tam em em mai a. Hei hi kan hnathawh ve lainin, canteen pakhat hian thil hi an han siamthiam lo ve khawp mai a; ‘Engtin nge an siam thiamloh thiam le?’ tih hi ka zawhna a ni a. Chutiang deuh hlek chuan, vawiinah hian ‘hetiang em ema chhia hi engtin nge sorkar hian kan neih theih reng le’ tih hi ka ngaihtuah a. Ka bial Sazaikawn P/S phei chu MLA fund-a repair tura min dil pawhin, ‘repair tawh loving; tlu tawp rawh se’, ka ti a. Chutiang chuan, quarters sak belhna te hi engzat nge kan dah belh theih, tih kha kan Education Minister ka’n zawt duh a.

Tin, Zirna-thanmawh bawk nia ka hriat ve a chu, zirtirtu transfer kan dil nasa lutuk hi a manganthlak a. MLA anga min hmu tam ber hi zirtirtute an ni a; transfer chungchangah Education Minister hi kan hmu tam em em a. A hunlai phei kha chuan vawihnih-vawithum hi a office-ah ka lut a, sorkar tharah chuan henge te pawh hi zirnaah hmasawn tak tak tur chuan, ‘theihtawp ka chhuah ve tawh dawn lawm ni; kan in devote ve tawh dawn lawm ni’ tih kha; moral reforms nimin lamah khan kan sawi tawh a. Chuvang chuan, ‘kan zirtirtute pawh hian moral reform kan nei ve tawh dawn lawmni’ tih te ka rilru ah ngaituahna ka’n seng ve a ni.

Demand No. 21 - Higher & Technical Department:

Quality teacher tih te tunlaih chanchin a lar hle mai a, chance te pawh kan han inpe a; khawngaih theih chin te pawh hi awm ve se a tha em, tih te pawh mitam tak sawi a ni a. Nimahsela, vawiinah hian sorkar hmasaa thil lo tih tawh tihbuai tihbuai kha a tul lem lova. Mihring eizawna a ni a, theihtawp a chhuahna kawngah hian tha thei ang bera ti turin vawiinah hian minister-te pawh kan inngen ni sela.

Demand No. 20 - Information & Public Relations Department:

I&PR chungchangah hian sawi ka duh chu, media hnathawh hi a pawimawh a. Vawiina live-a min entute pawh hi kan lo hriattheihna chhan chu, media vang a ni a; information visual leh audible-a pekchhuah anih avangin vawiin ah hian ka aw te, ka thla te an hre thei a.

Chutiang chuan, media personnel te indaihlohna hi a pawimawh em aw ka ti a; Engineering lamah pawh a pawimawh tho nachungin. Amaherawhchu information an cover loh chuan a ral atanga information kha kan pek theih loh chuan kha information kha a ral thung a, infrastructure tih loh hi chu a hmuh let leh theih a. Information erawh chu, a tlakbal chuan, mipuiten an hriat tur anga kha an hre pha lo a ni. Vawiinah hian media personnel-te a bik takin kan fimkhur a ngai hle a. Hmanniah ‘The Mizoram University Bill, 2025’ kan sawiho khan sentence pakhat ka sawi chu ka sawi ang ni lovin an lo puang palh a, chutah chuan zawhna ka dawng tam hle mai a. Mizoram University, tuna MZU ang hi kan mitthla a ni mai thei e; NEP 2020 guidelines ah chuan, “State University chu hmunkhatah, MZU ang zirna-in lianpuia subject zawng zawng khung len vek hi a tum a ni lo” ka tih kha, “khung len vek tum a ni” tia sawi angin min puang a, chu chuan a hriate leh mipui thilung a tina em em mai a ni. Chutiang chu a nih avangin, vawiinah hian media hi a pawimawh em em

mai a, kan minister pawhin hemi kawngah hian ‘kan media-te equip a ngai a ni’ tih hi House ah hian han tan tlat ka duh a ni.

Demand No. 25 - PHE:

Lunglei min duhsakna vawiinah hian kan Minister hmaah, lawmthu sawi pahin tarlan ka duh a. Lunglei water supply, pump leh distribution upgradation atana crore 55.7 min ngaihtuah sak hi a lawmawm a. Chutianga ruahmanna min ngaihtuah sak tuk kan Finance Minister, kan CM chungah pawh lawmthu kan sawi a ni. (**Hon. Speaker:** Minute 2-in a pel ta e. I zo thei dawn tawh em?) Hna erawh chu a chak mawh hle mai a, department lam pawhin min enpui a tul hle mai. Tlawng Lui bawhlawh veng tur Gabian check-dam min siamsak te kan lawm a. Tin higher institution pathum tan roof-top solar rain-water harvesting te min ngaihtuah sak a, Pukpui leh hmun hrang hrangte hniang hnar turin ruahmanna min siam sak bawk a. Tin han ngen ka duh chu, ka bial Vanhne leh W. Bungtlang inkar hi tlang chhipa khaw awm phei vek a ni a, a khawro lutuk a ni. A hming pawh ‘Vanhne’ a nih chu; tlang sang tak a ni a. JJM atanga solar water-pump mumal lo leh a khawl thenkhat chhiate pawh a awm a, hmanni ah department lam te pawh ka phone nghe nghe a. South Lungdai-ah te pawh a chhia a, an hnathawh zawhah inbual turin hla takah an kal leh a. Tunah phei chuan khua a lum a, in an thlen chuan inbual tura let leh an ngai a ni; chutiang khawp chuan a ni a. Chuvang chu a ni a, vawiinah hian hengte hi ka’n han sawi duh a.

Demand No. 32 - Horticulture Department:

Tin, kan horticulture ah hian han sawi lan leh hram ka duh chu, thil min tihsakte pawh tam tak a awm a, dragon-fruits zamna te, sawhthing enkawl dan te. Chutih lai chuan kan bialina kan mamawh em em chu, portable-water pump leh pipe te hi kan mamawh zual a ni. Subsidized-a department atanga neih dan te hi min ngaihtuah sak thei em?

Demand No. 38 - Rural Development:

A tawp berah chuan Pu Speaker, kan library sakna project awmsa 44 chei that leh, a thar 229 sak hna, a vaiin 273 khaw hrang hrangah RD Block ah 28 ah thawh mek a ni a. Hei hi a lawmawm hle mai a, ka bialah pawh hmun hnihah kan chan hang ve a. Khawtlang hruaitute an lawm a, hemi ngaihtuah sak theitu tur, ngaihtuah sak tura department hmalakna leh kan CM hmalakna a ropui a, lawmawm ka ti a. Khaw chung lun lai takah an han sa hlawm a. Tunah pawh tun inrinni khan ka bialah pawh hun kan hmanna ah ka en nghe nghe a; an lawm a ni.

Tin PMKVY hi ka bialah kan chhawr hle mai a, tunah hian a cover khaw pathum kan nei a - Lungdai, Serte leh Sertlangpui. Tuihna humhalh leh tui kal ral tur venna min tih sak nasa hle mai a, kan tangkaipui hle a ni. Hun lo kal zel turah he scheme-ah hian khaw dangte pawh min pek belh theih chuan tiin vawiinah hian kan Minister pawh kan ngen a. Min tih sak theih chuan ka lawm hle ang. (**Hon. Speaker:** Minute 10 a kawt ta e)

Tichuan, Pu Speaker, Dr. Vanlalhlana leh Prof. Lalnilawma te Demand hi vawiinah hian House-ah hian ka thlawp a, pass ngei a nih theihna turin ka rawn dinpui a ni e. Ka lawm e.

SPEAKER : Aw le. Member zahawm tak Pu Ramthanmawia ilo sawm ang.

PU RAMTHANMAWIA: Pu Speaker, vawiina kan Minister zahawm tak tak Dr Vanlalhlana leh Prof. Lalnilawma te Demand kan sawiho thei hi lawmawm ka ti a. School Education hian ka han tan ang a.

Demand No. 20 - School Education Department:

Pu Speaker, BE ah hian nikum aiin crore ₹2,48,43,43,000/-in a tlem a, sum dah hi. Engnge a chhan ni ang, heti zat zata a tlem thut mai hi, tih te rilru ah a awm a ni. Pu Speaker, kan sorkar tharin zirtirtu kan indaihlohna hriain mi 1507 lai a la a. Amaherawhchu, chung zinga mi 526 ngawtin he hna an zawm loh chhan kha, eng emaw a lak dan system-ah fuh tawk loh thil a awm vang nge tih te ngaihtuahnaah a awm bawk a.

MNF sorkar laia MR teacher lak a nih khan a khaw mi an dil an awm a nih chuan duhsak an ni a; chuta an la awmlah chuan, a khaw hnaia mi tih kha a ni a, kha kha a fuh hle mai a. A hmaa kan member Pu Hlimpuia rawn sawi ang khan MLA kan han nih hlima kan han buai ber chu, transfer a ni. Khawpui a luh duh vek mai kha an lo ni a, chu chu kan buaina ber kha ni a. Pu Speaker i ding lama mite hian an tawng ve ta chiah a nih chu. Vawiinah erawh chuan kan tawng ta lova, kan hahdam khawp mai. Hei hi zirtirtu kan lakte hian kan an awmna post tur tihchian a nih loha duh an thlang thei a nih chuan, a hnai vai leh eng emaw khawpui lamah te an in sawn thin a. Tin, hna zawm hma tein an insawn leh a. Tiang reng reng khan zirtirtute ah harsatna kan bialin kan tawk thin a ni. Chuvang chuan, Pu Speaker, kan Minister zahawm tak hian primary school-a thawk tur casual teacher 234 an lak thar turah hi chuan ngaihtuahna thar a hman ngei ka ring a. Insawn dil lo tur leh zawm duh lo tur ang chi kha awm tawh lo se.

Pu Speaker ka bialah lut lawk ila. Zirtirtu chungchang hi a buaithlak khawp a. Zoram ah hi chuan sorkar-hnathawk a tam ber an ni ang tih tur a ni a, zirtirtu pawh rual taka neih reng hi a har khawp mai a. Vawiinah zirtirtu kan indaih a, a then a vanduaithlak takin an lo thi a, a then an lo pension a, an lo kimlo leh a. Chuti reng reng chuan kum tluan hian kan buai a. Chuvang chuan, helai ah pawh hian inrin reng a ngai a ni. Hengah hian kan bialah chuan sorkarin zirtirtu a lak mai theih loh khatiang an awm chuan zirnain a a chhiat phah lohna turin MLA fund hi ka reserve a. Zirtirtu tha tur, a khuain qualified-a an ngaih te an awm chuan sorkarin a min pek hmam zirtirtu tur kha fund atangin ka lo ruai thin a, tunah pawh hian rawih ka nei bawk a ni. Chutiang chuan, sorkarin a min pek hma khan kha sikula zirtirna a kal tluan nan fund in kan lo ruai thin a. Tunah chuan hei kan sorkar tharin zirtirtu tha tak takte an la chho leh dawn a, kan bialah pawh fund hman ngai loin kan awm theih ka beisei a ni.

Pu Speaker kan bial chhung a zirtirtu awm dan update thei ang ber hi kan sawi ve hrim hrim ang e - Leithum Primary School ah zirtirtu 1; New Hruaikawn PS, Chawngtui East PS, Khuangthing PS-II - zirtirtu pahnih theuh; Vanzau PS, Dungleang PS, Zawngtetui PS, Thekpui PS, Vaphai PS-II, Hruaikawn Middle School, Leithum Middle School, Thekpui UPS, Chawngtui East UPS leh Saikhumphai NRSTC - zirtirtu pathum theuh kan nei a ni. Bulfekzawl PS - zirtirtu pali (September ah headmaster pension tur). Ka sawi tak ang khan kan bial hi department a an thlen hma hian MLA te hi min rawn hrilh hmasa thin a. Chuvang chuan, bial chhung indaihlohna leh eng emaw hi chu MLA te hian kan hriat hmasak zung zung thin avangin kan thil hriat pawh hi a update thin viau a ni, Pu Speaker.

Pu Speaker, kan sawi fo tawh angin teacher quarters hi kan House Leader pawhin a ngai pawimawh a, tunah hian khaw thum velah min sak sak dawn niin kan hria a, a lawmawm khawp mai a. A bul tanna a ni a han tang zel se la, khaw dang dangah te pawh kan mamawh a ni. Zirtirtute in luah tur an neih loh chuan mi va fin reng kha a rem lova, insawn an dil a, a tawpah an chhuak leh nge nge thin a, zirtirtu tha tak tak kan neih thin kha kan chan thinna a ni. Chuvang chuan ngaih ngam taka zirtirna hna an thawh theihna turin an chenna tur quarters hi tha tak kan pek hi a tul em em a ni.

Tin, Pu Speaker, SAMAGRA hnuaiia zirtirtu dah ngheh an nih theih nan sorkarin hma a la mek hi lawmawm ka ti a. Kan sawi rik ve duh hrim hrim chu, hun rei tak a ngheh loa lo thawk tawhte an han ngheh chho tur hi a lawmawm dawnin ka hria a. Sorkarin chak taka hma lain, dah ngheh an nih theih nan tan han la sela. Heng dah ngheh ni turte pawh hi ka duhsak em em a, duhsakna ka hlan a ni. He House kaltlang in Pu Speaker.

Demand No. 48 - Information & Communication Technology Department:

Pu Speaker, ICT Department kaltlangin sikul hrang hrangah computer pek a ni a, a lawmawm a. Nikum pawh khan Middle School eng emaw zat ah kan dawng a. Hei, kuminah kan bial chhunga middle School 19 lai ah min pe leh dawn niin ka hria a, kan lawm em em a ni. Tunlai chuan computer tel lovin sikul te hian hna a thawk thei tawh lo a ni. Tin, a bak te pawh hi min larawn tuam sak zel se tih kha ka ngen duh bawka ni.

Demand No. 25 - Public Health Engineering Department:

Central Sorkarin JJM hmangin thil tha deuh mai minrawn duan chhuah sak a, solar pump hmangin. Mizoram pum 90% deuh thaw a ni mai awm mang e; kan tangkaipui em em a ni. Amaherawhchu, solar pump hi chhum te a lo awm a, fur ah te chuan a lo pump that theih loh a, ni a lo that loh chuan. Chuvang chuan, hemi nena tangkawp tur hian rainwater-harvesting lamah kan department hian hma la tel se a tha awm mang e ka ti a. Khawl thil te a lo ni a, a lo chhiat palh pawha tui in tur thianghlim an lo neih theih nan leh thala an in tur tui lo dahkhawl na tur tanky hi siam theih ni sela. Hei hi department lamte'n an lo bawhzui theih chuan a lawmawm khawp ang. MLA ka nih hlim khan he scheme hi khaw 4 vela tihna tur Social Welfare kaltlangin Tribal Affairs Ministry ah kan nawr a. Mahse, kan tlang thei ta lo a ni.

Demand No. 38 - Rural Development Department:

Pu Speaker, tun hma zawng kha chuan hmasawwna zawng zawng hi BADP kaltlangin hna kan thawk a ni. Hei, BADP hi a tawp dawn a, tunah hian VVP-2 angin a lo kal tawh dawn ni awmin sawi a. Chuvang chuan, hetah pawh hian Pu Speaker, keini thingtlang bial kilkhawr zualte phei chu minrawn ngai pawimawh turin ka'n ngen bawka ni.

Pu Speaker, nikum 3.12.2024 khan kan RD Minister zahawm tak hovin Khawbung RD Block Silver Jubilee lawmna an han neihpui kha a ni a. kei, rawlkhawlhna avangin ka tel thei ta lo a. Khang lawmna ah te khan MLA bialtu ka nihna angin ₹1,00,000/- ka han thawh ve a ni tih kha kan Minister hian a hre loin ka ring a. A lawmawm khawp mai, kan Minister-in min han lawm sak kha.

Demand No. 32 - Horticulture Department:

Ka biala Samthang leh Khankawn te hi zikhlum chinna hmunpui a ni a, Pu Speaker. Thlai chhe hma a nih avangin cold-storage, Samthang ah emaw Dungtlang vel ah emaw hian

kan mamawh hle mai. Hei hi SASCI te pawh kha kan sawi a, sum kan nei bawh a, hengah te hian min dah sak turin Pu Speaker, ka'n ngen a ni.

Pu Speaker, a tawp berah chuan, kan han sawi tak demand pahnih, Dr. Vanlalhlana leh Prof. Lalnilawma te chanpual hi pawmpui ngei tha ka ti a, ka rawn support a ni e. Ka lawm e.

SPEAKER : Member zahawm tak Pu Jeje Lalpekhlua ilo sawm ang.

PU JEJE LALPEKHLUA: Pu Speaker, ka lawm e. Vawiin ni ah kan Minister chhuanawm, tak tak pahnih Dr. Vanlalhlana leh Prof. Lalnilawma te demand kan sawiho tur hi lawmawm hlein ka hria a. A hmasa ber ah chuan –

Demand No. 25 - Public Health Engineering Department:

Mihring dam khawchhuahna tur atan a thil pawimawh ber pakhat chu tui hi a ni a, a tel loa kan awm theih loh thil a nih avangin a pawimawh hle a. Mizoram hmun hrang hrangah a kum telin kan tui tlan te a tlem chho zel niin a lang a. Aizawl khawpui chawmtu Tlawng Lui pawh nikum aiin kuminah a kam nasa hle mai a. Ruahtui a tlak vat loh phei chuan tui indaihlohna a nasa zual hle dawn niin a lang a. Tin, Aizawl hmar lam leh chhak lam veng thenkhat Bawngkawn, Durtlang, Selesih, Thuampui, Zuangtui, Zemabawh leh Muanna Veng te hi veng dang ai hian tui hi an dawng tlem bik hle mai a. Veng thenkhatah kar tin tui a haw laiin heng vengah te hi chuan thla khat ah vawi hnih te a haw thei tawh a. chhungkaw tam takin tui a trip-in a lei nasat pah hle mai a.

Heng kan harsatna hrang hrangte sukiang tur hian a changtu Minister chhuanawm tak Prof. Lalnilawma leh a department lamin theih tawp an chhuah a. Tlawng Lui tuikhuah zat tipung turin tuikhuah tihsan belh tura ruahmanna an siam te hi a lawmawm ka ti a. Tin, Aizawl hmar lam leh a chhak lam vengte mumal taka tui an dawn theihna turin dedicated pipeline siamna tur SASCI atanga ruahmanna a awm te hi a lawmawm tak zet a ni. Tin, chhim lama kan khawpui ber, Lunglei khawpui hian tui harsatna an tawh rei tawh hle mai a. Tuna an tui tlan mek hi an kham tawh lo hle mai a. Heng harsatnate hi sukiang turin SASCI atangin Mat Lui pump tura ruahmanna a awm hi a lawmawm ka ti hle a. Lunglei mipuite pawh, a bik takin ka lawmpui tak zet a ni.

Pu Speaker, Hnahthial khua hi lui hrang hrangin min hual vel a, tui nuam tak khua kan ni a. Amaherawhchu, tuna kan tui tlan mek Tuichang pawh hi thalah tui a kam nasat avangin tui pump theihna zawnah hian tui a tlem a, lung te pawh vawm hial a ngai a, tui kam ti sang tur khan. Chutiang te pawh chuan tunah hian harsatna kan nei chho ve mek zel a. Heng laia kan tui lakna hmun te pawh hi khua turin a changtu Minister bulah khan ka thlen tawh a, chak taka hma min laksak turin he House zahawm tak kaltlang hian ka'n ngen nghal duh bawh a.

Tin, Tuichang leh kan tui lakna ber a nut chang te, current a awm mumal loh chang te hian in Aithur khua atangin gravity atangin tui lakna kan nei a. Hengte hi a tangkai khawp mai a. Amaherawhchu, siam that ngai tam tak tunah kan nei tawh a. Hei pawh hi kan Minister khan min lo hriat sak se ka'n ngen nghal duh bawh a.

Pu Speaker, kan bial chhung khaw thenkhatah te hian tui lama harsatna chi hrang hrang an tawk mek a. A bikin New Kawnpui hi nikum session-ah khan ka sawi lang tawh a. Pu Speaker, kan hriat angin JJM Scheme hi thingtlang khaw tinah a thleng pha tura kan ngaih laiin New Kawnpui bik chu a lut pha ve tlat lo mai a. Helai hi session hmasa pawh khan ka sawi tawh a. Tunah pawh hian tanky tha tak chu han nei sela chuan an tui harsatna te pawh hi kian lam a pan thei dawn a. Heng te pawh hi lo bawhzui nawn leh turin ka ngen bawk a.

Tin, South Vanlaiphai leh Darzo khua ah tui pump-na solar hi a dahna hmumin a zir loh avangin tunah hian tui a pump hleitheih loh a. Tin, Bualpui khua ah hian Session hmasa a ka ngenna te min ngaih pawimawh sak a, a changtu Minister hian, JJM scheme hmanga tui pump-na kha khawl a chhe tlat mai a. Helai department hotute nen theihtawp chhuahin hma an la a, tunah chuan Bualpui 'H' khua chuan tui hnianghnar takin an nei thei a ni tih kha he House zahawm tak kaltlang hian ka'n sawi leh duh a. A changtu Minister leh department hotute chungah pawh khan lawmthu ka sawi duh bawk a.

Tin, Pu Speaker, Tarpho khua gravity-a tui an lak hi a tha em em a. Amaherawhchu, dar rim a nam tlat avangin ei tlak a ni lo a. New Ngharchhip khua ten tunah hian JJM scheme atanga tui lakna te pawh tuihna a kang chak tawh a, an buai a. Tunah VC leh khawtlangin tui hna zawng leh hemi kawng buaipuiin an hnatlangin mup mup mai a ni. Heng te pawh hi min hriat sak turin ka'n ngen nghal duh bawk a.

Tin, Pu Speaker, JJM scheme hi a nihna tur takah hian hmang ila. Kha, kan hriat angin ka hmaa Member thenkhat te pawhin an lo sawi a; khaw tam takah hian harsatna kan tawk mek niin ka hria a. Hengte pawh hi a nihna tur dik takah hian hmang ila chu tuna harsatna kan tawh tam tak hi a sut kian theih ka ring a. Tin, Pu Speaker, a changtu Minister kha kan harsatna te min hriatpuia, hma min laksak turin ka'n ngen duh bawk a.

Tin, Mizoram ah lui-tui luang zat a tlem tial tial a, khaw tam takah tui tlan tur kawr-tui a kam chak hle bawk a. Heng harsatnate sukian tur hian PHE Department leh YMA te, a khawtlang ang te pawhin nasa takin hma an la a, hengte pawh hi theihtawpin Mizoram mipui, a te ber atanga a lian ber thlengin hemi kawngah hian 'thawihtawp i chhuah ho zel ang u' tiin, he House zahawm tak kaltlang hian ka'n ngen nghal duh bawk a.

Demand No. 32 - Horticulture Department:

Sorkarna kan chan tirh, nikum January thla khan a changtu Minister hi Taiwan ah mau zirchiang turin a zin a, kan ram rohlu neihsa tangkai em em mau leh rua te tun aia tangkai zawka sawngbawla, hlawkna tam zawk kan ram leilung fate'n kan neih theihna tura hmalakna tam tak kalpui mek a ni hi a lawmawm takzet a.

Hnahthial District Horticulture Department hmalakna in tunah hian Mizoram record kan break mek a. Nikum khan Pu FJ Thangliana Cherhlun khua chuan Mizoram-a dawnfawh lian ber kg 23.5 a thar a, kan lawmpui takzet a ni. South Tuipui bial hi a mipuite kan taima em em a, kan tih tawh lamah hi chuan champion tum tlat mi kan ni hlawm a. Tin, Cherhlun khua ah khian nikum khan zikhlum, fur zikhlum qtl 1000 dawn kan thar chhuak a, a hralh chhuahna kawngah hian harsatna kan tawk thin tih hriain a changtu Minister leh Department-in theihtawp chhuahin min buaipui a, anni zarah liau liau kg ah ₹40/- in kan hralh thei a, khang te kha a lawmawmin ka hria a.

Horticulture Department hian fak an phu ka ti a. Nikum July thla kha International Agri-Horticulture Expo' 2024 New Delhi-a neihah khan Mizoram Horticulture Department ten thei, thlai, pangpar leh thilsiam chi hrang hrangte kha phochhuak a, lawmman pakhatna te kan dawng thei kha a ropui ka ti takzet a. Kan bial chhung khaw hrang hrang ah hian hmarcha hi kan thar chhuak nasa a, department lam pawh hian min hriatpui ka ring a. Hemi kawngah hian a changtu Minister ka'n ngen duh chu, solar hmanga hmarcha tih rona khawl te hi nei ila tun aia nasa zawkin kan thar chhuak thei ang tih kha min hriatpui turin leh, tihdan kawng min dap sak turin ka'n ngen nghal duh baw k a.

Tin, Horticulture Department atang hian kut-hnathawktu ten (Pu Speaker, hemi chungchang hi a pawimawh ka ti khawp mai) tanky an dawng ve thin a, department hrang hrang atang te pawh a ni ang a. Pu Speaker, sorkarna kan chan hnu hian ka bula rawn sawi ve hi an awm thin a, "kan party awmna a fuh loh avangin vawi khat mah kan dawng ve ngai lo" tite an awm a, a thente chu huan nei puitling tak tak, taima tak takte an ni a. Hetiang a awm thin hi a pawi ka tiin ka lo na ve thin a, keimah hi. ZPM Sorkarna ah chuan hetiang hi awm tawh lo sela, dawng tur dik tak te'n sorkar atanga hamthatna kan hmuh thin te, a bikin department pawn lam te pawh han sawi ila, Pu Speaker i rem tih nain. Insak tanpuina tih te leh thil dang tam tak a awm a, hetiang kawngah hian miharsa zawkte leh a dawng tur dik tak te'n an dawn theihna turin he House zahawm tak kaltlang hian ka ngenin, ka'n chah duh baw k a ni.

Demand No. 38 - Rural Development Department:

A changtu Minister hi he department lama thiamna nei, Professor a ni a, a department enkawlte hi a tuina tak tak a nih avangin a enkawl hneh em em vek mai a. A lawmawm takzet a, July 20, 2024 khan MGNREGS hnuaiyah hmalakna thar, 'Project-rotling, Hmasawna rahbi thar' tih kan Minister zahawm takin a tlangzarhah khan long term project 'Comprehensive Sustainable Cluster Framing at Hnahhriphaizau, at South Chawngtui' ₹190.459 lakh senna turah Hnahthial RD Block te thlan kan ni a. Hetiang dinhmun kan thlen theihna tura Hnahthial RD Block hnuaiyah thawktute chungah lawmthu ka sawi duh a. He project hi South Chawngtui te eizawna ngelnghet zawk an neih theihna turin a pawimawh takzet a, project hlawhtlin nana sum hman tur ruahman te, a bikin material components atangin a hun taka release chhunzawm a nih zel theih nana hma min lakpui turin a changtu Minister ka'n ngen nghal duh baw k a.

Hnathial District ah hian Watershed Development Component, PMKSY 2.0 hnuaiyah project pakhat kan nei ve a. Hei hian South Chawngtui, Tarpho leh Khawhri te a huam a. He scheme ina a huam khuate hian eizawna atan an chhawr tangkai em em a, thingtlang khaw dangah te pawh an mamawh ve khawp mai, Pu Speaker. Kan Minister hian Hnahthial District tan hian project dangte hi min han sih chhuah leh sak thei sela, chu chu Hnahthial district mipuite tan ka'n ngen nghal duh baw k a.

Tin, BADP hian Myanmar border RD Block 10 leh Bangladesh border RD Block 5 te a huam a. He scheme hi Vibrant Village Programme 2 a thlak tawh tur a ni a. He scheme hian kan bial chhung khaw hrang hrang a huam a, hman tan a nih hnu ah pawh kan bial chhung khaw hrang hrangte'n kan hman-tangkai ngei ka beisei a.

Demand No. 20 - School Education Department &

Demand No. 21 - Higher and Technical Education Department:

A pahnih hian sawi kawp ta mai ila, hei; hun te a awm tawh lo a. Kan Minister chhuanawm tak Dr. Vanlalhlana hi Minister a nih hnuah a hmalakna hi sawi zawh vek sen a ni lova, tun budget session-a kan hmuh ang hian ‘The Mizoram State University Bill, 2025’ House-a a rawn pulut te hi a chhuanawm ka ti takzet a. Kan hriat theuh angin Mizoram hmun hrang hrangah zirtirtu indaihlohna a nasa em em a, he kan harsatna sukiang tur hian kan CM leh a changtu Minister chhuanawm tak te hmalaknain, advertsement chhuah ngeiin casual teacher lak a ni thei te kha a lawmawm ka ti hle a. Pu Speaker, a changtu Minister hnena lawmthu han sawi ka duh a.

Education Reform Programme Mizoram tuna a bul kan tan mek, kal mekah hian Hnahthlial District hi bul tanna ah min lo hmansak a, hemi nia hemi programme hmangtu zirtirtute pawhin an hlawkpui em em a ni tih kha kan sawi lang duh bawk a; tun dinhmunah zirtirtu indaihlohna a ziaawm tan khawp mai. Primary leh Middle school-a tling kawp an awm nual avangin post zawm loh pawh an awm phah a. Heng casual teacher post zawm lohna hmuna thawktu lak belh mek zel a ni hi a lawmawm ka ti a.

Kan bial chhung school thenkhatah pawh zirtirtu dukhawplohna a la awm tih ka’n tarlang tel duh a. Tin, thingtlang khaw thenkhatah in luah mai tur a awm thin lo a, zirtirtute’n harsatna tam tak an tawh phah thin a. Hemi hre chung hian a changtu Minister leh kan CM ten theihtawp an chhuah a. Kan bial chhungah ngei pawh zirtirtute quarters sak a nih tur thu te kan lo hria a, a lawmawm hlein ka hria a. Pu Speaker, a changtu Minister khan wind-up ah khan min lo sawifiah sak atana ka duh chu, Sorkar kal ta ah khan heng zirtirtu quarters sak tumna te hi a awm tawh em, hmalakna te hi a awm tawh em, tih kha. Tin, tun hnaiah khaw hrang hrangah zirtirtu quarter sak tur hi engzat nge awm, tih pawh kha a wind-up hunah a remchan dan angin min chhansak se.

A tawp berah chuan, zirlai lehkhathiam thei tak tak chherchhuak tur chuan grassroot atanga a bul tan that hi a pawimawh ka ti hle a. Kan Sports Minister demand ah pawh khan Sports ah grassroot a pawimawh thu te kan sawi lang tawh a. Hetiang chiah hian zirna ah pawh hian kan ngaihpawimawh zual hi a tul hlein ka hria a. Zirlai naupangte’n primary level an zirlai atanga zirna tha an dawn loh chuan hmasawn hi a har tawh thin a. Kei hi a bikin sports lamah te pawh a ni ang a, a tawngtute zinga awm ve ka ni a. Chuvang chuan, Sorkar school, a bik takin primary school te hi tun aia thaa kan thuam chaka kan chawikan leh zual a pawimawh in ka hria. (**Hon. Speaker:** Minute 2 a pel tawh a. I zo thei dawn tawh em?) Ka zo; a tawpna a ni tawh e.

Tichuan, School Education leh Sports & Youth Services Department changtu Minister-te chungah khan lawmthu han sawi ka duh a. Kan hriat angin Sorkar school te leh Sport Council lam ten inremsiamna MoU an ziaak thei te kha a lawmawm ka ti a, a bikin kei sports lama lo kal thin ka nih tawhnaah lawmthu ka’n sawi duh a.

Pu Speaker, a tawp berah chuan, kan Minister te pahnih - Dr. Vanlalhlana leh Prof. Lalnilawma te demand hi ka pawmpui a, he House ah hian pass ngei ni se a tha ka ti e. Ka lawm e.

SPEAKER : Member zahawm tak Pi Baryl Vanneihsangilo sawm ang.

PI BARYL VANNEIHSANGI: Pu Speaker, ka lawm e. Minister zahawm tak Dr. Vanlalhlana chan department-te hian bul ka tan duh a.

Demand No 20 - School Education Department:

Vawiin ah hian kan sawi dawn a, demand hi. Infrastructure ni se, hnathawh tawh tam tak a awm a. Tin, thawhbelh tur a awm zel dawn a, dil belh tur a awm zel dawn a. Zirtirtu indaih lohna ni se, bial tinin kan sawi dawn a, a chiang reng mai a. Chuvang chuan, kha lampang kha sawi vak ka tum lem lo a. Minister hi ka hrechiang a, ka ring a, kan bial mamawh ziaka kan thlen te, tawngkaa kan thlen te min ngaih pawimawh sak a, engkim mai a theih ang tawkah minrawn tih hlawlhtlin sak zel avangin, rinna, beiseina nghat chungin nakin lamah mimal te'n kan lo la dawr zui ang a, bial tan kan la fehchhuak leh dawn a ni. Tin, zirtirtu casual teacher lak belh chungchanghah khan midang tena an thik tham khawp kha kan bialah anrawn dah a, kan lawm khawp mai a. Tin, quarter sak te pawh kan chang dawn a, kan lawm tak zet zet a ni.

Education-a ka sawiduh zawk chu, hmannah Minister hian consultative meeting arawn ko a, meeting kan nei a. Chutah chuan kan sawi a, thahnem kan ngai tlang khawp mai a; chu chu he platform-ah hian sawi leh tha in ka hria a. Quality education te, world class education te kan hria a, kan sawi thin a. Amaherawhchu, chumi tluka pawimawh ka tih pakhat chu, sorkar school kan hria a. Kan rama mi ropuite, mi hlawhtlingte, a tam zawk hi sorkar school-a zirchhuak an ni tlangpuiin ka hria a; tunhnuah erawh chuan a dang deuh mai thei e. Tah chuan sorkar school leh private school te, english medium te kan tehkhin hian, a mipui nawlpui pawh hian sorkar school hi tha lo zawk nia ngaihna leh a nihna te pawh a lo lang chho tan zel mai a, hei hi pawika ti hle mai a. Zirtirtu ni se, thiamna nei training chhuak, a nih tur ang ni thlap ten an enkawl a ni a. Chutah chuan, kan indaihlohna te chu awm ve tho mah sela, pakhat-pahnihin thahnemngai taka inpekna tak tak nena an tih chuan hmasawna tam tak a thlen thei a.

Chulayah chuan, engvangin nge sorkar school heti zozai kan neihah hian, a chang chuan amalgamation tih ngai te in kan awm a; heng hi chu kan inenfiah a tul tak zet zet a ni. Kan moral hi kan siamthat a ngai a ni tih he House-ah hian kan sawi zing ta hle mai a, vawiinah hian keipawhinrawn sawi nawn leh ka duh a ni. Thatlohna bik pakhatmah kan neilo; zirlaiteah han puh dawn ila, Kg I, Class I zirte, thiam bik-thiam lo bik han awm vak theih a ni lem lo bawka. Chuvang chuan, a zirtirtute, a enkawltute an pawimawh, kan pawimawh, mipui kan pawimawh. Kan mindset a cheng tam tak senga thiamna neih tum private lama luh te kan sawisel lam ni lovin, tlin lo chung chung pawha rualpawl nana tih ngaia kan awm te hi a pawika ti lutuk. School tha tak tak kan nei a, khaw tin deuh thawh kan nei a. Hengte hi thumthat ni se ka duh takzet a. Vawiinah hian, Pu Speaker, nangmah kaltlangin a changtu Minister hnenah hian kan sawinawn ve leh duh hrim hrim a ni. I tang ang u; heti zat school kan nei a, enkawl na tur budget kan pass a; Supplementary Demand kan la sawiho leh a ni a. Sum te chu indaih tak tak a awm lo, mahse a awmchun hian hma a sawn theih tih hi ka sawi duh a ni.

Tin, sorkar school te, sorkar thil reng reng hi mipui ta a ni. A neitu kan ni a, a neitu thinlung hi kan pu lo deuh thinin ka hria. School dangte pawh kan han tlawh ve a, bialchhungah te leh khaw thenkhat kan kal remchanah te pawh a ni; tukverh pakhat eng emaw han tlabal deuh tlem te thawhkhawma tihphui mai theih te kan han ti lo va, a kua han hnawh mai theih te kan hnawh lo va. Tichuan, a lo zau zel a, a chhe lian ta tawlh tawlh a, nakinah

chuan a sum hrawm a lo na a. Khalaiah khan keimahni ta a ni a, keimahni property a ni a; lo thawmthata, lo belthat kha kan theih chin a nih kha chuan, tih ve mai tur te pawh niin ka hria. Heng te pawh hi ka ngaimawh hle mai. Keini pawhin kan bialah MLA fund in rangva kan thlak a, school tual, school kawt kan PCC a. Tin, computer set te pawh 30 dawn kan sem a, chutiingin printer te pawh kan ti a; nasa takin a department leh a changtu te pawh kan lo thlawp ve a ni. Heng a tana hman tur hi a ni a. Chutiang chuan, keimahni a sorkar hnathawktute ngei ngei pawh hian department min pek hun nghah tawp emaw, MLA in emaw min pek hun nghah tawp anga kan awm thin laia hi paw ka ti a. Chhiatna tam zawk, zau zawk a thlen hmaa keimahni ta a nihna anga kan lo thawmthata, kan lo bel ve mawlh mawlh te hi a pawimawh hlein ka hria a ni.

Tin, ka sawi duh pakhat chu, rural area tan bik deuh a ni a, min lo ngaithiam ta sela, a department lamin. Hei rural-ah hian kan tawn, kan tawrh tlangpuia chu, zirtirtu pension turte post ang deuh hian kan awm lek lek thin a. Kum hnih-khat an awm a, an active, an vanglai te an han pel tawh a, hun reiloteah min liam san leh mai a. Chutiang a nih avang chuan an bel hman tak tak lo va; keini pawh in an thiamna te kan chhawr hman tak tak lo va, a dang dil leh zel a ngai a. Pension tur na na na chu vanglai te leh an active lai kan tawn loh miao avangin an contribution kha tlemin a dang kha an pha lo ve deuh bawk a, chu chu a tawpah chuan zirlaite'n kan tuar a, khuain kan tuar thin a ni. Chuvang chuan, pension hnai chauh dah nan ni lo hian a thalai tak takte, thahnemngai taka thawk tur valai chak-vak tak takte pawh hi kan phu ve thoin ka hria a, hengah te pawh hian khawngaih takin min rawn dah sak ve thei se la. Leave la nghal char char chi angte nei nual mai a, heng hi chu a tha lo. Khawpui chu thik phak rual an nih loh rualin, thingtlang zawk, a kilkhawr zawkah zirnaah tan kan ngai. Chungah chuan a thiam thiamte pawh hi tirh theih ni se kan duh tak zet zet a ni. Hei hian kan bial bil chauh a ni lo va, kan vaiin, rural-in a huamte kan ni a, kan buaina, kan problem pakhat a ni a. Vawiiinah hian sawichhuah loh theih lovah ka ngai a ni.

Demand No 21 - Higher & Technical Education Department:

Tin, Higher & Technical-ah hian point khat chiah sawi ka duh a. Hei accreditation hi kan hria a, NAAC Accreditation hlut zia kan hria a. Hemi nei tur hian tan kan la zel em? Nakinah Minister in rem a tih hunah min chhang se la. Eng angin nge hma kan lak tih te kha ngaihthlak a chakawmin ka hria a. NAAC Accreditation nei pha, nei thei nih hi a hlu em em a. A school tan, a ram tan, a college tan a ni a. Chuvang chuan, hemi chungchang hi zawhna ka'n chhawpchuak ve a ni.

Demand No. 26 - Information & Public Relation Department:

Pu Speaker, I&PR chungchang nichin lamah kan ngaithla a, kei pawhin tawi te sawi ve leh ka duh a. Anni hi a saptawnga 'Unsung heroes' kan tih ang deuh, a fak hlawh lutuk ni si lo, mahse sorkar tana pawimawh em em, tangkai em em an ni a. Tin, India rampum ang pawhin kan hriat phak ve ang tawkah hian DIPR hi a che tha pawl, a ti tha pawl hi an niin ka hria a, an chhuanawm em em mai a. Sorkar tan mipuia information pek kawngah te leh thil hrang hrangah an che tha hle mai a, an chhuanawm tak zet a. Chutih rual chuan, thumthat an ngaihna te, tih changtlun, tih chak an ngaihnaah te, hmasawn an ngaihnaah pawh kan Minister zahawm tak hian a enzuipui zel ang tih ka ring a. Thil phal deuh a lo ngai a nih pawhin, thilphalna thinlung nen lo enkawl ta sela.

Tin, hemi Film & Visual Arts hi sawilan leh lawk ka duh a. Tun hnaiah kan hria a, Mizote hi film industry-ah kan thang em em a, Vanapa Hall leh hmundangah hian film release kan

nei deuh reng tawh mai a, a lawmawm tak zet zet a ni. Film & Visual Arts tan hian GIA dah sak anni tih kha chu ka hre tho nain, tuna kan dah thin te pawh hi hetiang a industry hi a lo thangchho zel a nih chuan, helaiah pawh hian tlema han tih chhah a, han thuam chhah deuh te pawh an ngai tawhin a langin ka hria a. Hei hi department tan chauh a ni lo a, ram tan, mipui tan, film industry mite tan a ni, tih lai kha ka'n sawi belh duh a ni. Pu Speaker, Pu Muanpuia'n min fuih tha khawp mai a; recess dawn a nih avangin dar 1 thleng hi kan han ti law law mai ang e. Khawngaihin min remtih sak dawn nia.

Demand No. 25 - PHE Department:

Kan Minister hian min duat em em mai a; kan mamawh kan sawite ni a rial mang ngai lo va, a rawn ti zar zar a, a fakawm khawp mai a. A department chan a tui a, a hneh em em a. Min duat em avang hian ka insawithei deuh dawn nain, bial dangte pawh ka han zawt a, ka han thlithlai a, a lo duat vek mai a, a lo che vek mai a, a thei khawp mai a; a fakawm takzet a ni.

Cyclone Remal avang hian kan tibuai hle a. Ani pawh zan dar 11-12 ah biain, a tuka kal nghal rum rum te kan nei a, chutiang chu a ni a. Cyclone Remal-in min tih chhiat sak tui lakna te pawh siam hmabak tam tak kan nei a, vawiinah hian Minister hnenah hian ka han sawilang leh duh a.

Tin, Aibawk-ah sawn Lungtiantlang ah bawlhhlawh paihna PHE-in an nei a, kan Minister hian a hre em em a. Saw saw mipui tamna hmun laili deuhah kan lo tipalh si a, nakinah chuan harsatna min siam leh dawnin a lang a; department-te pawh puh hmingchhiat an la ni leh thei dawn a. Heng te pawh hi ngaihtuahna min sen sak se kan ti hle mai.

Tin, Pu Speaker, tui pump te, solar te an sawi a, khang kha chu kan ngah khawp mai. In ngahsiak ila, a ber pawh kan ni mai thei a. Nakinah a dawhkanah lehkha nen kan la bawhzui leh turah ka ngai a. Tuirivang te, Tingpawh te, Samtlang lamah te pawh sawrkar hmasa khan tanky an dah dawn a ni tih te pawh an lo puang tawh a; chungte chu vawiin thleng hian (ka hriatsual loh chuan) hmalakna a awm lova. Khang kha cancel a ni leh ta nge, hmalak zel tur a ni em tih te pawh kha zawhna ka chhawp chhuak tel ni sela.

Tin, Pu Speaker, kan bial Aizawl South-III hi in hriat angin Trinity Hospital leh ZMC&H a awm a ni a, hospital lun tak leh mipuiin an hman tangkai tak a ni a. Hlimen-ah sawn chhim phe section bik tui enkawltute hi an awm a, thawktu an indaih lo em em a. Dawmdawi-in pahnih an awm si a, pipe han chhiat leh repair tur a awm te hian kan buai em em thin a. Pek loh theih loh an lo ni bawk si nen, kan talbui lek lek thin a. Chuvangin, Pu Speaker, khawngaihin a Minister hian min hriatsak sela, sawlai Hlimen thleng te sawn a ni a, tui semtu leh thawktu indaihlohna saw vawiinah hian remchangah lain ka han highlight ve a ni.

Demand No. 32 - Horticulture Department:

Tin, Horticulture hi tawite pahnih khat lek han sawi ve ka duh a. Grapes chungchang kan sawi ta sa sa a, tah hian zawhna ka nei a, Minister-in khawngaihin windup hunah min chhang sela. MIS Scheme atang khan grape lei phalna kha kan nei ta reng em? Tin, Government of India khan min phalsak a nih chuan, engzatnge min phalsak, allocation fund kan neih theih nan khan a working capital kha engzatnge ruahmanna an neih, tih te pawh kha hriatchian law law a thain ka hria a. Khang kha grapes chungchangah ka zawt ni sela.

Zau kan mamawhna te hi chu a hmingte nen, a location nen kan la thlen leh dawn a. Kawng sial, tihchangtlun, thawmthat ngai kan ngah em em mai a.

Tin, Lamchhipah sawn iskut kan ching thar a, a ram leilungin a lo ngeih em em mai a, tunah hian a pung zel a. Saw pawh saw kan Minister zahawm tak hian min hriatpui sela. Sawhthing min ngaihvenpui ang chiah khan iskut pawh hi min buaipui a ngai dawn a. Sawhthing hi chu pakai lo law law ila a thain ka hria a, amah nen kan sawi dun nasa tawh a. Bial tan nakinah pawh kan la dawr leh zel turah ngai ang.

Demand No. 38 - Rural Development Department:

Tichuan, a tawpna atan ka sawi duh chu Rural Development a ni a. A hming atang hian a chiang em em mai a, rural te tih hmasawna tur development a ni. (**Speaker:** Minute 2-in a pel ta a, a zo thei dawn tawh em? Awle. Pu Speaker, ka zo tep e.)

Tichuan, Pu Speaker, tawitea sawi ka duh chu, PMAYG chungchang zawk hi a ni a. Hei, kan awm ve chinah experience tlemte chauh nei kan ni a, kan hresual, kan hre tlem pawh a ni mai thei a. Kan awm ve chinah insak tanpuina kan ti a. Amaherawhchu, a dawng thenkhatte, a beneficiary list a awmte hi chu ‘khawilai nge an sak ang aw’ tih te leh, ‘inthar an sa dawn em ni’ tih tur khawpa building nei tha te, tin, lirthei pawh lei thei leh nei theite an ni a. A peka inpek, chhungte hnen atanga dawn te kha chu kan va huam tel lo a. Chutiang chuan, ‘anni aia dawng awm ngawih ngawih hi chu an awm asin maw le’ tih hi ka nei ve nual mai a. Chuvang chuan, tuna BDO pawh ka phone a, ani hnenah pawh, ‘Pathian leh mipui zarah he biala ka awm ve chhung chuan, a chang tur, a dawng tur diktak chauhin an dawng tur a ni’ tiin ka hrilh a, ani pawh a lawm khawp mai a. Chuvang chuan, hemi list kan thlan kawngah pawh hian fimkhur ila, dan hi zawm ila, a chanvo dawngtu turte chhuhsak lo ila. (**Speaker:** Khawngaihni. Hei chhun chawlh a hun dawn tawh a, kan sawi zawh tir law law dawn em ni ang? Awle, sawi zo rawh le.)

Chutiang chu kan dinhmun a nih avangin, he sawrkar atang hi chuan beneficiary thlan kawngah te pawh uluk lehzual ila. A dik em; dawngtlak an ni em, tih kawngah pawh kan verify peih te pawh a tulin ka ring a. Thil hi a nihna tur ang hian tih zel mai tur; dik taka tih hi a har lo. Dik lova tih hi thil har zawk a ni a, tihruk ngai hi thil har zawk a ni. ‘Dikna i uar ang u’ tih hi PMAYG chungchang comment tawite ka han siam a ni e.

Pu Speaker, hun min pek belh a ka lawm hle mai. Tichuan, demand tha tak kan Minister zahawm takten an rawn putlul hi tangkai taka hman a nih theihna turin ka thlawp e. Ka lawm e.

SPEAKER : Break a lo hun dawn tawh a. Kan PHE Minsiter felzia a tukah, hriattir a nih veleh a tukah a rawn bawhzui vat zel tih te kha an rawn sawi a. Hei mi zawng zawng hi a lo duat tih kha a ni a. Kan bialah khian Changzawl atanga tui lakna Thanglailung khua pekna pipe rei tawh lutuk, hlui tawh lutuk, tube a engtin emaw kan tih hram hram hi ka sawi zing tawh angreng a. Amaherawhchu, wawinah hian hlawhtlinna kan la hmu lova, duat bik te hi chu an lo awm deuh a nih ka han ring deuh a.

Power hi han thlak thleng an duh a kan technical official lam ten, grid-ah te thlak thleng an duh a. Pi Lalrinpuii, kan Health Minister zahawm tak hmalaknain refreshment-in recess room ah khan a lo nghak che u a. Lunch kan ei ang a. Shutdown an lak dawn avangin a

lum lutuk dawn a hall chhung kha chu. Recess room-ah ei phawt ila, chumi zawhah i lut khawm ila tih kha thu hnuhnungber a ni a. Tichuan kan lutkhawm leh dawn nia.

(Recess at 1:02 PM)

2:00 PM

SPEAKER : Le, tunah chuan member zahawmtak Pu R. Rohmingliana ilo sawm ang.

PU R. ROHMINGLIANA: Pu Speaker, ka lawm e. Demand ka sawi hmain; hei, sawina hun i neilo bawk a. I bial Suangpuilawn ka han tlawh a, an khua khi a fai hle mai tih kha Mizoram pum huap hriatah hian Pu Speaker, nangmah kaltlangin ka'n sawi hmasa ber teh ang. A lawmawm ka ti.

Demand No. 20 - School Education Department:

Pu Speaker, a hmasa bera ka sawi duh chu, hei Mizoram ah sorkarin sum tam tak sengin school kan din thin a, school zirtirtute hlawh tam tak tak kan pe a. Amaherawhchu, hlawh tam tak tak kan pekna zirtirtute school ah kal lo hian kan fate, kan tute hi engatinge private school man chawi ngaihnaah hian kan la luh tir tlat mai, hman atanga vawiini thleng hian, tih hi ka ngaihtuah thin a.

‘World-class education’ tih te kan sawi thin a, tul pawh a tul a, a mamawh pawh kan mamawh a. Amaherawhchu, kan hnam hi a la naupan em avangin hei hi thil har tak tur a ni a. Tumna a san chuanm muangchangin kan la kal chho zel turah te pawh ngai ila. Vawiinniah chuan Pu Speaker, kan school-te hi zirtirtu indaihloh kan sawi nasa em em mai bawk si a, an hlawh a tam bawk si a, lak zung zung theih a ni bawk si lova. Kan State sum leh pai dinhmun enin thil harsa tak tur a nih te pawh ka ring a.

Chumi rual chuan, kan syllabus te hi kan en that a ngai ka ti a. Kan syllabus hi a hniam deuh em? Mizoram chhunga kan siam a ni a, hei aia sang deuha siam te hi a tul em, tih rilru te chu ka nei deuh a. Kan fate, kan tute vai ram leh hmun dang school tha deuhah te dah thei helai chhung atang te pawh hian kan awm nualin ka ring a. Chungte chuan an syllabus te han enpui ta ula, hmun dang syllabus te nen a inthlau viau em tih laia te pawh keini ho hian kan enpui te pawh a tulin ka hria a. Chuvang chuan, kan standard tisang tur pawh hian kan syllabus te hi kan ngaihpawimawh a tul hlein ka hria a ni.

Pu Speaker, a tir lama sawi tura ka ti deuh kan House Leader a awm loh avang khan, hei a rawn lut tawh a, ka'n sawi lawk duh a chu – Kan House Leader khan budget session hmasaah khan thil lawmawm deuh mai kha a sawi a, ‘opposition bial, ruling bial kan thliar lo ang’ a ti a, ka lawm khawp mai a; vawiinniah pawh kha thu kha a la ken reng ka ring a. Amaherawhchu, kan Minister-te hian a thu hi an zawm lo deuh nge, tih lai chu ka nei a ni. Kan CM zahawm tak, kan House Leader thu leh hla hi kan minister-te khan min hriat sak sela a pawimawh hlein ka hria a. Hei, nimin lamah te, nimin piahah te demand kan sawi a, pawimawh ni a kan han hriatte a then chu min react sak lem hlei lo a.

Tin, nikum lam budget session lama mite pawh kan hlawhtling lem hlei lo a. Kan han ngaihtla kan han ngaihtla a, ruling bial lamah chuan development eng eng emaw chu a lo awm Chiang a ni, kan biala awm lo hi. Chuvang chuan, Pu Speaker, kan House Leader-in

nikum lama a sawi kha kan minister-te hian min chhinchhiah sak sela, kan House Leader thu hi awih deuh sela thain ka hria.

Tichuan, Pu Speaker, ka bial lamah ka'n lut ve ang a. Ka bialah chuan zirtirtu hi an indaihlo lutuk a ni mai; zirtirtu pakhat chauh awmna pawh kan nei teuh, middle school te, primary school te. Tin, nikum, Ni 29.4.,2024 khan ka bial chhung Lungsen khuaa Govt. Middle School-II kha a kang ral vek a, khang te kha vawiinniah hian sak a la awm lo a ni, Pu Speaker. Heng te hi min sak sak thei ang em aw, kan Minister zahawm tak hian? Hei hi vawinah karawn au chhuah pui duh a ni a. Girl hostel-ah, Girls hostellers te nen inawmpawlhin class te an kal thin a, an khawngaihthlak hle mai.

Tin, Pu Speaker, ka bial chhungah nikum atang khan, “matric leh class 12 distinction pass zawng zawng chu lap-top ka pe zel ang che u, MLA ka nih chhung zawng chuan” ka ti a. Nikumah pawh ka sem a ni. Tichuan, distinction a pass zawng zawng kha MLA fund-in citation kan siam a, ka signature awm khan kan pe ve a ni; kuminah pawh hian pek leh kan tum a ni.

Amaherawhchu, engatinge Aizawl khawpui atanga matric leh pawl 12 distinction pass kha an tam em ema, keini ang bial atanga an tlem kan tih chuan, zirlaite an thiam lo bikah kei chuan ka ngai lo; zirtirtu an awm tha lo a ni, kan nei tlem a ni. Hmanni lawka pawh Sesawm Primary School ah zirtirtu 3 an awm ve a, kan lawm em em a, mahse, hmanni lawkah pahnih min phawi chhuah sak leh a, tichuan, pakhat chauh an awm a; tiang kha a ni zel mai a. Tin, high school zirtirtute ang te pawh, lehlamah chuan result anrawn chhuak ang a, result bu kan han en ang a, ‘an school chu an va ti tha lo ve’, tih kha kan judge dan a nih pheichuan, school tha tur chuan zirtirtu tha te min han pe ve sela tih kha, Pu Speaker, vawiinniah hian ka'n sawi duh a.

Tichuan, Pu Speaker, lawmawm ka tih ve deuh thunga chu, teacher's quarters zirtirtute awmna tur kha. kan Minister zahawm tak hian minrawn phone a, minrawn siam sak ve a tum niawmin ka hria a, a lawmawm ka ti a. Kan mamawh ngawih ngawih a ni, keini bial bik angah chuan In chuang a awm ve lo. Zirtirtute khawpui atangin emaw, hmun dang atangin zu dah ila awmna an nei thin lova, an tan pawh a buaithlak em em mai a. Chuvang chuan, quarters ang chi te hi min pek tam deuh theih chuan keini bial ang atan chuan hmasawna ropui tak a ni dawn a ni.

Demand No. 21- Higher & Technical Education Department:

Tichuan, Pu Speaker, Higher & Education chungchangah hian ka bial chhungah mai nilo, hei, ka bula thu Pi Prova-i bial West Tuipui te nen kan inzawm thla vek a, college pakhatmah kan nei lo a ni. Mi harsa tak tak awmkhawm kan ni a, khulai intawm tur khuan college pakhat kan va mamawh ve em, Pu Speaker! Khawpuiah sum nei lo zawk kan kal a ngai a, awmna kan zawn a ngai a, mi Ina awmin ‘hnathawk chungin college ka kal thei ang em’ te kan ti a. Chuvang chuan, college min pek theih chuan a lawmawm ngawt ang.

Demand No. 25 - PHE Department:

Hei Aizawl leh khawpui dangah te pawh kan tui pump te hi kan fimkhur lo hle mai; Mizote hi kan inzirtir nasat a ngaiin ka hria a. Lui sangha tura hrai te hi a la tam em em mai a, heng te hi na zawka action lak dan te hi awm sela thain ka hria a ni.

Tin, sorkar hmasa khan solar-water pumping te hi min rawn tihsak a, a lawmawm khawp mai a, thingtlang hmuntinah. Amaherawhchu, kum khat lek a ni a, vawiinniah chuan a khawl chhia te, eng eng emaw a awm tan a, hei hi a rang lama min siam sak thin turin PHE Minister zahawm tak kha kan ngen ni sela.

Demand No. 32 - Horticulture Department:

Ka bial chhung Lungsen khuaah BHO hmun a awm ve a, office te, quarters te a awm a. Mahse, thawktu pakhatmah an awm lova, Lunglei lamah te an attached vek niin kan hria. Hei, thlaite hi, ka bialchhung chu ka sawi fo tawh a, potential tha tak kan nei a ni. Thlai tam tak hi chu an han ching a, an han nghak ro a, a chi a chhuak mai. Mahse, chutiang chi chhuah ve theilo tam tak a awm ve thung a. Zikhlum te hi a chi lei zel a ngai si a, heng sem te hi kan van dawng ve ngai lo em, Pu Speaker. Hetiang thlai chi te hi ka bialah hian min sem uar sak deuh teh u? Kan taima a nia kan bial khu; a thar pawh kan thar chhuak hnem.

Demand No. 38 - Rural Development Department:

Pu Speaker, nimin lamah e-POS chungchang te, NERGS chungchang te kan sawi a. Internet connection hi 'kan mamawh takzet a ni', tih hi vawiinniah hian ka rawn sawi leh duh a. Ni-100 inhlawhna chungchangah te pawh upload a ngai thin a, upload hleih theih loh te hian a awm fo mai a. Heng te hi min ngaihtuah sak thei sela kan duh hle mai.

Pu Speaker, BDO thut hmun pahnih kan nei a, Bunghmun leh Lungsen. Bunghmun lamah chuan kawng a chhia tih te pawh kan hria a. An motor te a tha lo em em mai a, a buaithlak hle mai. Staff an tha bawk silo, an tlem em em a ni. Gram Sevak-a an tih ang chi pahnih an awm a, LDC pakhat, driver pakhat leh peon pakhat chiah tunah khuan an awm a, an hah lutuk. Ni-100 inhlawhna te upload reng a ngai, net a tha bawk si lo. Zanlaih te tlanglamah BDO office bulah te khan an chho a, an thut chilh thin a ni, hmanna ka kal pawhin. Chuvang chuan, helamah hian hmasawna a rualkhai theih nan thingtlang lam hi min han ngaihtuah deuh ula. Pu Speaker, cold storage te pawh hi kan mamawh hle mai.

Tin, thil pawimawh em em, Zawhna & Chhhanna-ah zawhna lo chhuak lawmawm deuh maia kan House Leader chhanna kha tha ka tih deuh mai ka sawi duh a. CSR chungchangah, 'tupawhin kan ti thei e' a tih kha, ka lawm hle mai a. Mizoram officer pawimawh tak tak, mithiam tak tak an awm a, vawiinah pawh hian MCS pakhat, (a hming chu ka sawi lo ang a) ka lawm hle mai a. Ka bial chhunga Lungsen BDO area khu aspirational block a ni a, khulaiah pawh khuan CSR kan ti ve a nia. Chu chu Central lamah SSCH kaltlangin HDFC bank te puihnain khaw 10-ah tunah hian solar street light te kan vuah thei dawn a. Vawk leh ar vulh tanpuina te, Anganwadi te, school thawmthatna te kha CSR atangin Lungsen Block Area-ah kan ti thei dawn a ni. Hengte hi lawmawm ka ti a. Chuvang chuan, a bik takin RD lama kan officer-te, Directorate lam te, Block lam te pawhin helam kawngah te pawh hian beng min var saka, hma min laksak fo turin ka'n chah duh bawk a. Kan Minister hian ama department enkawlpuitu officer tha tak tak a nei a. Hetiang kawngah te hian kan minister te pawh hian theihtawp han chhuah se, kan zavaia tan a that ka va'n ring em.

Pu Speaker, vawiinah hian kan Minister zahawm tak tak pahnih demand kan sawi mek hi pass ka rem ti e. Ka lawm e.

SPEAKER : Member zahawm tak Pu Lalramliana Papua ilo sawm ang.

PU LALRAMLIANA PAPUIA: Pu Speaker, ka lawm e.

Vawiinah Demand, kan Minister pahnih chan kan han sawi turte hi kan luhkhung zar zar ang a. Department kan lo sawi len lohte pawhin min lo hriatthiam kha kan dil lawk deuh bawk a ni.

Demand No. 20 - Education Department;

Demand No. 21 - Higher Education and Technical Department:

He department pahnihte hi ka sawi kawp vek mai ang a. Kumina kan BE hi nikum lam nen uluk deuhin kan han khaikhin chuan, tlem kan thaw ta deuh em maw, tih turin a awm a. Nakinah i veilama mite pawh khan an lo sawi chhuak leh mai thei a. Hei pawh hi ka'n zirchiang ve a, eng emaw chenah chuan kan BE te hi a tlem ta deuh a nih hi, a tihna te pawh ka nei a. Amaherawhchu, hengte pawh hi kan finance management kalpui dan chungchangah nimin lama kan sawi ang tho khan, Revenue and Settlement Department te, Food, Civil Supplies Department te pawh hi fir leh inrenchem zawka management kalpui theih tur nia hriatna avang zawkin GIA ah te pawh an lo intitem ta deuh a ni tih kan hmu a.

Tin, heta thil tum pawimawh tak pakhat chu, kan state atanga fund allocation bakah hian Central funding source kan neih sum kan hmuh a tam leh a, tlem a danglam hian hei hi a danglam lo thei lo a ni tih te a lo lang chho a. Chuvang chuan, tun budget-a kan neih chin chin atang pawh hian hmalakna tam tak ruahmanna a awm thei dawn a ni, tih te a lo langin ka hria a, a lawmawm ka ti a.

Tin, kan Minister hi a bik takin lawmthu han hrilh hmasak ka duh a. Kan bialah zirtirtu indaihlohna te, kawng hrang hrangin school tlakbalna te kan sawiin kan thlen thin a. Department lian tak a ni a, thingtlang kilkhawr ber thlenga hnathawktu awm chu Education Department hi a ni a, Health Deptt. nen hian. An indaihlo em em chungin vawiin thleng hian theih chin chinah zirtirtu pawh min hnawhphui sak a. MLA kan han nih tan tirh lak chuan tunah chuan nuam tak a ni tawh a ni. Zirna inah te pawh; indaih tawk tih te chu awm tak tak lo mah sela; chutiang dinhmuna te chuan min han hlang chho te hi ka lawm em em a. Han en zui ngai tam tak erawh kan la nei a, heng te pawh hi a hma tiamin min ngaihtuah sak zel ang tih ka ring tlat a. A hmaa kan ngenna te leh kan lo beiseina te min tihhlawhtlin sak dan ka ngaihtuah hian, amahah beiseina sang tak nei chungin hengte pawh hi kan changtlung chho zel turah kan ngai a ni.

Tin, vawiin a kan sawi duh pakhat chu, UDISE record hi inngahna atan hian a hman tlak tlur lohin, 'kan education-ah hian', ka'n ti deuh tawl teh ang; (a eng emaw zawngin min lo ngaihsak lo ta ula, kan official te pawhin) Ka bial chhunga school hrang hrangah hian surprise-visit hi ka nei zeuh zeuh a, chuta ka hmun chhuah tak chu, surprise visit e ti lovin, ka kal dawn a ni tih hre ru reng chung pawha naupang kohkhawm tur lam neilo school hi an awm a ni. An UDISE record-a kan en chuan, kumtir enrolment-ah eng emaw zat an lo nei a, mahse, tun dinhmuna nei ngang lote pawh an awm a ni. Chuvang chuan, school dinhmun hre ber tur pakhat hi chu MLA-te kan ni. Chuvang chuan, kan minister-te hnena a dinhmun dik tak kan lo sawi hi min pawmsakin, min ring ula a dikin ka hria a.

Tin, rawtna leh thil tul danga hmalakna tur suggestion kan lo siamte pawh hi rintlak viau turah ngai ula a thain ka hria. Education-ah leh Health ah pheih chuan thingtlang bial nei ka nih avangin, ka inti-strict khawp mai a, a kan pawh ka kan peih a, ka kalna apiangah

ngaihven pawh ka ngaihven a ni. Chuvang chuan, hei hi siam that tul khawpa ka hriat avangin ka'n lo zir chiang zel ang a, department te nen tha taka thawk hovin. A then chu kan fan tawh chinah amalgamation tih ngai tura ka ngaihte pawh an awm a, restructure ngai tak tak school-te pawh an awm a ni. A then chu zirtirtute leh khawngtlang thawh dun theilo tlat avanga school tlabal, zirtitu dang nen te han siksawi kual ila chuan, khawtlang pawhin kha school kha an chhawm nun leh mai thei tur kan nei a ni; tiang khan a history nen lam kan lo zir ve a. Khang kawngah pawh khan kan thawhho that chuan tha takin hma kan la ho thei ang tih hi beiseina sang tak ka nei a ni.

Tin, kumin lamah engnge kan an ang, ka hre lo a, building leh structure lampangah kan budget estimate-ah kha chuan chuti lutuka dah san a awm lo nain, Central funding leh a awm ang ang atanga hmalakna tur chu tam tak kan nei leh tho turah ka ngai a. School tlabal tak tak nei hi kan ni deuh fur mai a, thingtlang lam, keini ang bial te phei chu. Ka sawi thin a, Lungrang South te phei khu chu, a bang kha 'khawih suh aw, a tla ang' tih tur te a ni a, awma chin hnuailam phelsepa pin tawh te a ni a. Khang zawng zawng kha 'sorkar kal tawh khan engatinge an lo hnutchhiah le' ka ti a, ka tlawh tum pawhin ka na ngawih ngawih a ni. Khatiang chi la nei te kan nih avangin hmalakna tur chu kan ngah khawp mai. A tul chuan he House-a sawi vek lo hian department-ah te pawh a detail deuhin kan la inhrilh turah ngai ila. Enzuipui ngai tak kan ni Lunglei South hi. tih kan sawi duh a ni.

Thil pakhat leh, school building piah lampanga ka ngaih pawimawh chu, an furniture lak tlak tawh loh lutuk hi a tam a ni school chhungah hian, blackboard pawh ni silo, green board pawh ni silo, rawng neilo board te pawh hi kan nei tawh a ni, tuna kan school-ah te pawh hian; rawng sawi tur ber awm tawh lo ang chite. Hengah hian kan Minister-in min thuam that sak zel a, smart-board te a theih theihnaah min pe a, blackboard te, greenboard te pawh kan nei chho zel dawnin ka hria a, a lawmawm hlein ka hria.

Higher & Technical-ah hian thil pakhat chauh ka sawi teh ang. Keini chhim lam leh Mizoram tan pawha institution pawimawh em em mai ka bial chhungah sawn pakhat kan neih, Mizoram Polytechnic, Lunglei saw kan hre vekin ka ring a. Tun hnaiah kan buaina te pawh kan hotu sang ber thlengin min hriatpui vek a ni. Vawiinah hian he kan rorelna zahawm takah hian eng chen nge sorkarin hma min lakpui tawh? Saw kan buaina, mimal ram nei leh sawlai institution awm te inkara kan buaina awm hi a history sawi vek tawh lo mai ila, eng chen nge min chin chhoh sak tawh a, engnge kan hmabak? Engtia chin fel theih nge ni ang? Khawngaih takin min ngaihven sak rang ula, hlauthawng reng reng a sawti lai students te an awm pawh saw a bialtu nihna ang pawn ka rilru a hah ve em em thin a ni.

Chuvang chuan, kan thuneitute'n sawlai kan ram buai chungchang saw chinfel a nih theih nan te, kawng laih avanga leiminin hostel eng eng ilo a tih chhiat te pawh saw engtin nge hma kan lak chhoh ang? Kumin chu tih tak takin hma i la teh ang u, keipawh a tul anih chuan 'MLA fund te pawh i tan ve a ngai e' an ti a nih pawhin, ka theih ang chin chin ka lo tang ve ang. Nikumah te pawh an school furniture thenkhat zirlaite tan kan lo pe ve tawh bawk a, theih ang angin kan bial chhunga zirna-in awm na na na chu thawm chhoh ve zel keini pawhin kan tum a ni.

I & PR te pawh hi sorkar tana thawktu pawimawh tak an ni a, department an indaihlo hle a ni tih te kan hria a. Staff indaih zawka an thawh theihna tura kawng min zawn sak zel te pawh, Zoram pum huap angin hei hi chu ka'n sawi bawk a ni. Thil pakhat, communication

chungchangah mobile network tower hi Allocation of Business-ah I & CT hnuaiia awm tho anih avangin, ka bial chhunga Khawmawi vel saw biak pawh tlang harsa tak mai an ni a, chhim kila awm te pawh saw tih changtlun dan a awm em tih te pawh min hriat sak kan duh bawk a ni.

Demand No. 38 - RD Department:

Pu Speaker, ka hun zawng zawng hi RD Minister chungah hian lawmthu sawi nan hmang dawn ila, ka hmang zo thei mai awm mang e ka ti a, lawmthu sawina tur ka ngah em em a. Keima mimal tan phei chuan (midangin min thik lo se) ‘a khawnpui anih ve mai hi maw’ ka ti a, RD department hi. Kan bial chhunga hmalakna eng emaw laklawh riau kan neih leh ka mangan tawpah te pawh hian, a hnena ka sawi ngam chiah loh pawh hian Pathianin min ruat sak emaw ni aw ka ti a, ka tan remchang tak te hi a lo awm ve leh hlauh thin a ni; ka lawm em em a ni, a chungah hian.

RD department-ah hian thil pakhat chauh sawi duh ka neih chu, ka bial chhunga Sairep kawng saw project rotling kan kalpui mek a, rotling a ni lo ang tih a hlau khawp mai. Kei pawhin a hmunah ka va tlawh tawh a, a theih ang angin minister hnenah report chu ka pe ve a. An balu hman tur chin te pawh ka sawipui a, a proportion te pawh duhthu ka zam ve a ni. A hna hi department a enkawl a ni a, ‘project rotling ah min chhuah sak rawh se’ kan tih kha min hriat thiam sakin ka ring.

Demand No. 25 – PHE Department:

PHE department-ah pawh hian hmasawna tam tak tun term chhung hian ka bial chhungah kan hmu tawh a. JJM hnuaiia hian ennawn ngai tam tak, kan member-puite’n an sawi ang khan kan nei a ni. Solar plate a tlem deuh avanga tui pump tha mumal theilo te, solar pump ringawtin min chawm theih lohna hmunah gravity hmanga tui lakna kan la rin tel ngai chin eng emaw zat a awm a, chei thar a ngaih avangin kei ngei pawhin ka fund atangin gravity pipe line maintain-na tur leh ruahmanna hrang hrang kan kalpui a ni. Thualthua-ah tanky, gravity pipe line-a lo kal kan dawh khawlina tur te kan mamawh em em a, hmundangah te pawh. Nakin hun thawl zawkah mumal deuh te pawhin lehkha te pawhin kan la inhrilh leh turah ngai ta ila.

Demand No. 32 - Horticulture Department:

A tawp berah chuan, Horticulture department hi kan kut-hnathawktute tan an hlu em em a, experiment ang deuha thil kan kalpui chhung hi a rei ta hle mai a. Tunah chuan output eng emaw hlawhtlinna tak te pawh hi kan neih a hun ve tawhin ka hria a. Heng kawngah hian Horticulture Department pawhin thahnemngai lehzuala tan min lak thar sak zel turin ka’n fuih ve khanglang duh bawk a ni e.

Tichuan, wawiina kan Minister pahnihte demand kan sawi – Dr. Vanlathlana Demand Nos. - 20, 21, 26, 48 leh Prof. Lalnilawma Demand Nos - 25,32, 38 te hi he House hian a pawmpui theih ngei nan kei pawhin ka thlawp a ni e. Ka lawm e.

SPEAKER : Member zahawm tak Lt. Col. Clement Lalhmingthanga ilo sawm ang.

LT. COL. CLEMENT LALHMINGTHANGA: Pu Speaker, ka lawm e. A bul tanna atan testimony ropui deuh mai, tawite si, member zahawm tak Pu C. Ngunlianichunga

testimony; ani pawh ka hrilh tawh tho a, chawhma lam khan common recess room-ah ka va luh zawk khan ani hian 'hun ka bawhpelh tawh dawn lo' tih a lo sawi a ni. A tawi hle naa, ropui ka ti a, helai hmunah hian share loh theih niin ka hre lo a. (**Hon. Speaker:** A ri a va mawi em!) Ni e. Chuvangin, share lo theilo ka ni. Ani teh meuh khati lampanga a lo pianthar tawh tak si ah chuan member dang zawng zawngte tan pawh tunah chuan pianthar a hun tawh tak zet a ni tih kha a rawn tarlang duh a. Ani hi session tan tirhah khan dik leh diklo pawh hre lem lova ka lo zui thina anih kha. Chuvangin, vawiinah hian ani testimony kha han share lawk ka duh a ni e. Khati zawng kha keima chanchin ni lovin Pu Speaker, Pu C. Ngunlianchunga testimony ka share anih avangin ka hunah paih lovin ani thusawi hunah khan, ani ai thusawi ka nih avang khan ama hun hman angah min lo paihsak mai turin kan ngen bawk che a.

Demand No. 20 - School Education Department:

Kan Minister zahawm tak hian change ropui tak tak a rawn thlen a, lawmthu sawina tur tam tak a awmin ka hria a, kan Minister hian a-nachang a hre khawp mai, sawi tur a tam khawp mai a, chung zinga tlem te han sawi ka duha chu - a hmasa berah chuan, Aikal tih tawp hi, a bik takin elementary level-ah chuan a pawimawh a, zirtirtu atan zirtirtu qualified leh interview te nen uluk takin suitable person thlan a ni thin a. An han zirtir dawn ta a, a tak takah chuan anni ni lo zawk tute emaw remchangin a han zirtir ta thin hi, zirtirna hi kan naupangte upbringing atana pawimawh lutuk mai, an khawvel nun rawn inzirtanna pawimawh em em hunah zirtirtute qualified nilo zawkin a han zirtir hi a pawi ka ti a. Tunah chuan qualified select ngeite'n an han zirtir thei dawn ta hi a lawmawm ka ti a, lawmthu ka sawi duh bawk a.

Tin, zirtirtu indaihlohna nasa em em mai phuhrukna atana casual teachers thahnem tak mai lak a ni te; zirtirtu indaihlohna tam tak SEDP atanga lo lak thin te, term a lo tawp takah chuan khang ho aiah casual teachers in ai an rawn awh ta a, a lawmawm ka ti a. Tunah hian lak leh tur 234 zet mai earmark a ni a, a lawmawm ka ti leh zual a. Tin, request ka neih kan Minister zahawm takin min lo hriatsak se - heng casual teachers kan lakte hi a theih hram chuan anmahni khuaah leh anmahni awmna hnaih thei ang berah dah nise. A chhan chu casual teachers te hi an hlawh a tam lova, hmun dang, an khua atanga hla deuh takah te emaw an lo dah anih phei chuan. Ka bialah khian hetiang example tur hi a awm a, a then te phei chu nupa tein an pem a ngai a. Kha khuaah khan in luahtur an va zawng chawp a, in lua man nen. khata an va kalna man nen phei kha chuan an harsa em em mai a. Kha harsatna kha hriain, anmahni khua remchanna hmunah dah theih hram nise. chutih rualin teacher quarters hi kan indaih lohna a nasa a, tunah hian teachers' quarter hi eng chen chiah nge sak a nih tawh tih te thleng khan zawhna leh ngenna ka siam nghal duh bawk a.

Tin, Health and Physical Instructors School atana kan lakah hian lehkhathiam qualified satliah ringawt ni lo, hetiang lama thiamna bik nei, hetiang lampa training pe thei tur te kha lak an ni em, tih ka zawt nghal duh bawk a. Ka biala Ruantlang High School hi an performance a tha thei em em mai a, nikum khan pakhat chiah fail an nei thung a. Ka bial chhunga High School zingah chuan an result a that theih em avangin anmahni zawh tawk aia tam sikul naupang luh rawn dil an awm thin a. Zirtirtu an indaih si lova, tunah hian zirtirtu regular pathum chian an nei a; casual pakhat - IT leh Hindi ah pakhat ve ve nen an nei a ni. English teacher an neih loh avangin headmaster-in class te hi a la thin a. An performance a lo that tawh laklawh avangin tlak hniam an hlau a, thahnem an ngai a. Tlem lai deuh phei kha chuan teachers ho leh zirlai nu leh pate bakah student thlengin contribution

te khawnin teachers te an lak belh a. Chutiang chuan an bei hram hram a, a bialtu MLA tan pawh hian kawng hrang hranga puih theih a chakawm khawp mai a. Amaherawhchu, kan MLA fund hi thildangah te hmanna tur a tam a, a na zawng a tih theih si lova. Hengte hi min hriat sak se. Hetiang Ruantlang High School ang school dang pawh a tam a ni.

Tin ka bial chhunga zirnate khi a rawih tawh hlawm a, entirnan: ka bial chhunga Jail Venga school phei chu hmanni lawka cyclone remal avang khan a school chhuat eng emaw chen kha a min tel a, a school pumpui a min te a hlauh awm e mem bawk si a. Chuvangin, DC atangin tanpuina kan han dil rum rum a. DC lam atanga tih theih chin a limit ang reng a, lung te min rem sak a, a theih chin chinah kan dawl a. Chungte pawh chu tun fur lo thleng chho leh tur atan chuan a rintlak vak tawh dawn lova. Ruah te a sur leh phei chuan khangte kha, example zinga pakhat a ni a. Tin, Vengthar lama school pakhat phei chu school naupang infiam velte tan pawha hlauhawm khawpin an sock-pit leh septic tank te a chhia a; an khuh a, a dalna an siam ringawt mai a ni. Chutiang khawp chuan invenna siam a ngai a.

Tin, Higher Secondary zirna lampang hi kan tlachham em em mai a. High School an kal chho a; college ah pawh a ni, college an zir zoa, PG zawm turin Aizawl lamah chhuk a ngai a. Aizawl-ah chhungte an nei a nih lem loh phei chuan, sum senga lehkha zir te a harsa a. A bik takin higher secondary ah pawh chhungkaw tam tak pawisa senga kal theilo an awm a; thingtlang lam hi helai atanga kan ngaihndan ang ai mah hian an lo harsa a. Chutiang te chu min hriatpuiin, khilam ah khian Higher Secondary hi min dah belh sak ka dil bawk a. Chu chu ka biala school naupangte tan Aizawl lam pan a harsa a, Aizawl-a sum senga rawn kal hi er tak meuha er a ngai a ni, chhungkaw tam tak tan chuan.

Demand No. 25 - PHE Department:

Ka bial Champhai khawpui tui lakna pui ber chu Tuipui khi tunah chuan mi kan lo pung zel a, kan kham khawp tawh lova. Kan tui kham khawp lohna phuhru tur hian PHE hma laknain Ruantlang-ah greater water supply scheme, solar hmanga 24 hours tui tihchhuah theihna, mi 7000 zet kham khawp tur buatsaih mek a ni a, lawm thu ka sawi a. Chutih rual chuan khimi bul lawkah khian Zotlang tui lakna tura khuah mai tur remchang Thingthupui Lui, tuihna tha tak mai a awm a. Chu tui chu khuah chuan natural gravity-a pump ngai miah lova lak mai theih, Zotlang leh a bul vel New Champhai te pawh a chawm thei dawn a. Hengte hi tihhlawhtlin theih nisela. Chutih hunah chuan khilaia tui harsatna phurrit tam tak a chhawk thei dawn a. Vantlangin tui kham khawp hniang hnar taka an lo hmuh theihna tura hma lakna ropui tak a nih dawn avangin min lo hriat sak se ka duh bawk a ni.

Demand No. 32 - Horticulture Department:

Ka bial hi grapes chinna hmunpui a ni a, grapes bakah sapthei, apple, plum, theite thlengin a tha a. Chuvang chuan horticulture lam eizawna atana hmang chhungkaw tam tak kan nei a ni. Tuna amendment bill kan neih – fruits beer leh thil dang dangte tih changtlunna tura inngahna tlak hmun anih avangin, horticulture lam hian min ngaih ven lehzual se tih kha ka ngen duh bawk a ni.

Tichuan, kan Minister zahawmtak pahnihte demand hi Mizoram tana chhen fakawm tak anih theihna turin ka thlawp e. Ka lawm e.

SPEAKER : Tunah chuan, Member zahawm tak Pi Prova Chakma ilo sawm ang.

PI PROVA CHAKMA: Pu Speaker, ka lawm e. Hei waviina kan Minister zahawm tak takte pahnih Dr Vanlalhlana leh Prof Lalnilawma te demand sawiho hi a chakawm khawp mai a. School Education lam hi ka thawhna hluite a ni bawk a, sawi a chakawm khawp mai.

Demand No. 20 - School Education Department:

Pu Speaker, CSS Employee regularise tumna a awm avangin lawmthu ka sawi hmasa phawt duh a. Tichuan, Pu Speaker, (nangmah kal tlangin) hmannah kan Education Minister khan ama ka atang ngeiin ka dawng a, Smart Classroom kan school awm chhunah min tihsak dawn a, lawmthu ka sawi a.

Mizoram hmun hrang hrangah hian ataff indaihlohna a sang khawp mai a. Kan bial hi 'Educationally Backward Block' tia puan te kha a nih avangin, a bik takin min han ngaipawimawh se ka duh khawp mai a. Kan bialah hian Govt. middle school ah headmaster awmlahna school 4 lai a awm a. Tin, Govt. school ah hian single-teacher awmna school a awm bawk a. Tin, school pahnih ah regular teacher an awm miah lo bawk a. Khangte kha dah khah theih dan a awm em, kan minister zahawm takin min lo chhinchhiah sak se.

Tin, tunah hian chhuti, school chawlh lai a ni mek a, April Ni 7 hian an tan leh dawn a. Zirilaibu hi a hun takah sem a ni thei dawn em tih kha ka zawhna ni se. A hun taka Zirilaibu hmuh a nih loh chuan school naupang leh zirtirtute pawh an lo inthlahdah thin a, hei hi zirtirtu ka nihna anga ka hmuh dan a ni a. Tichuan, nikum lama school-zawng zawngin mid-day meal an dawn 3rd quarters, October, 2024 thlenga an lo laiin, ka bialah chuan January - March pawh kan la dawng lo a ni, DCSO Order ah kha chuan, kan bialah hian upto December, 2024 thleng an lo dawng a. Pu Speaker, midday meal hi ka ngaipawimawh hle a. A chhan chu, ka biala ka thawh thinna hmun ngeiah te pawh school naupangte khan midday meal hi an chaw ah an ring mai thin a. An nu leh pate hnathawk tura chhuah a ngaih thin avangin an fate cha wei mumal lovin kha midday meal kha an ring mai thin a ni. Chuvang chuan, midday meal hi a hun takah pek ni thin se a tha khawp ang.

Tin, chuan, Annual School Sports te kan nei ve thin a. Amaherawh chu, department lam atanga sports material kan dawn te a tam loh avangin, hengah hian hma min lak sak se, Minister zahawm tak hian min lo chhinchhiah sak se. Hei hi MLA fund atang han tih te pawh a awm viau na a, mamawh a tam em avangin kan indaihlo hle mai a; a theih chuan keipawhin tih ka lo tum tho ang a. Chu chu Pu Speaker, nangmah kaltlangin, Education Minister hian sports material te pawh hi school tinah hian min pe thei a nih chuan a lawmawm ngawt ang.

Tichuan, nikum, 12th March, 2024 ah pawh vawikhat ka sawi tawh a. Ka bial chhunga Devasora ah hian middle school a awm loh avangin an fate tan hnaivaiah school kalna tur a awm lo a. Department lam atangin PAB kha approved a ni tawh em hriat a chakawm khawp mai a. A remchan chuan windup hunah kan Minister-in min hrih theih chuan ka lawm hle ang. A theih hram chuan dah theih ni se tiin ka ngen nghal bawk a ni.

Demand No. 48 - Information & Communication Technology Department:

Pu Speaker, kan Chief Minister budget speech-ah khan Kai App chungchang kha sawi a ni a. Kai App chungchangah hian ka biala heng khaw 7 – Ugdosuri, Samoksuri, Kalapani, Balakiasuri, Thanzamasora, Litisuri, Diblibagh ah te hian signal hi a tha lo em em a, Kai

App hmanh tur chuan signal that a ngai dawn a, signal a that loh chuan attendance pawh lak theih loh ang a. Chuvangin, hengah hian Information & Communication Technology lamin a rang thei ang berin hma min lak sak se tiin ka ngen duh bawk a.

Tichuan, tun hnaiah khan casual teacher primary school bikah hian an awm nual a, kan bialah erawh chuan khangho zingah khan an hna rawn zawm lote an awm a, an zawm loh chhan pawh language-problem a awm a. Pu Speaker heng problem hi a awmlah nan locality mi appoint theih dan te hi a awm em tih kha ka zawt ni sela. Kan bial educationally backward block a nih avang hian a Mizoram pawh literacy rate ah pakhatna kan tling pha lo a. Pakhatna kan nih theih nan ka bialah hian chak takin hma min lak sak a ngaiin ka hria. Nichinah khan MLA zahawm tak, Thorang Bialtu khan college kha chu min lo dilpui tawh a, ka sawi ve lo mai ang a. Min dilpui avang khan a chungah pawh lawmthu ka sawi a ni.

Demand No. 25 - Public Health Engineering Department:

PHE ah hian Mizoram pumpuiah indaihlohna a sang hle mai a. A bik takin ka bialah hian PHE Staff hi an tam lo hle a; hmanni lawkah kan inngahna ber plumber kan neih chhun chu February, 2025 ah khan a pension tawh a, tunah mi pahnih lek an awm tawh a. Hei hi dahkhah theih dan te a awm em tih kha kan Minister-in min lo chhinchhiah sak se.

Tin, term hmasaa JJM hnuaiia tui connection pek hman loh kha heng khaw 9 lai - Zohmun, Borsegojasora, Khojoisuri, Bornasuri, Saisen, Nakuksora, Durusuri te hian tui connection an la nei miah lo a. Hengte pawh hi Pu Speaker, nangmah kaltlangin kan Minister zahawm takin min lo chhinchhiah sak se.

Demand No. 38 - Rural Development Department:

Rural Development ah hian hmunphiah stock-na godown pakhat chauh kan nei a, kan indaih lo hle a. Pu Speaker, nangmah kaltlanga ka sawi duh chu, godown pakhat dang min dah belh sak theih chuan a lawmawm ngawt ang.

Tin, RD hnuaiiah tho hian library sakna tura hmalak 273 a awm mek a. Tlabung-ah hian 5 kan nei a, kan biala BDO hmalaknain mini-library tunah hian kan nei a. He House zahawm tak kaltlangin kan BDO leh a staff te chungah pawh lawmthu ka sawi duh a.

Demand No. 32 - Horticulture Department:

Pu Speaker, horticulture department-ah hian Bana-kaih policy hnuaiiah ah food processing kan ti dawn tih kan hria a. Hengah hian kan bialah pawh thei chi hrang hrang - theihai, cashewnut leh coconut te kan ngah hle a. Khatah khan rualkhai takin, ka bial atang te pawhin outsource tur kan ngah ve tih kha min hriatsak bawk sela.

Sawi tur chu a tam khawp a; mahni tawng lova sawi hi chu tlemin kan buai ve deuh a ni. Tichuan, Pu Speaker, kan Minister zahawm tak tak pahnihte Demand-te hi ka pass ka remti e. Ka lawm e.

SPEAKER : Tunah chuan member zahawm tak Pu Lalrintluanga Sailo ilo sawm ang.

PU LALRINTLUANGA SAILO: Pu Speaker, vawiin chu ka'n surprise duh deuh hlek che u ang a; a hmasain eng emaw appeal siam ka duh a. House Leader hnenah pawh

hian tun maia recess lai khan kan Health Minister hnenah Universal healthcare programme-ah ka tel hman lo thu ka sawi a. Helai ah ram tana ka thawhpui PAMRA office kang chhe vek kha tanpuina ka han pe a. Hei an lo sawi a, an hotupa pawh he House zahawm taka member lo ni tawh Col. Lalrawnliana hovin an ni a, kan CM ah pawh beiseina an nei a ni tih kha ka'n tarlang hmasa duh a. Kei pawhin a hmingin cheng nuai 3-in ka han tanpui a. Tin, kan member zahawm tak Pu Lalmuanpuia Punte pawhin nimin lamah cheng sing 5 a lo pe tawh bawk a, Member zahawm tak Pu K.Laldawngliana'n pek a tum mek bawk a. Anni hi remna avanga lo hawng members pung tawhlo an ni a, member 700-800 dawn ah 250 chuang an lo thi tawh a. Chutiang dinhmuna ding chu an ni a. Anmahni building nilo mah sela, an document zawng zawng a kan chhiat avangin, khami han collect leh tur khan cheng nuai tam tak a ngai a. "Kan House Leader, kan CM zahawm tak min lo hrilhsak thei la, House kaltlangin" an ti a Pu Speaker, chu chu ka'n sawilang a ni.

Aw le, vawiinniah hian a dam zawng deuh hlekin thil ka'n kalpui duh a. 'Lawmna tak mai thinlunga ka neih hi Isua min pek a ni' tih ang deuh hlekin vawiin nia kan demand sawi tur changtute pahnih hi pastor fapa ve ve an ni a, a lawmawm danglam ve hrim hrimin ka hria ni. (**Hon. Speaker:** Nichina kan member zahawmtak Lt. Col. Clementa'n kan member pakhat testimony a sawi khan a lo hmin ta deuh che a ni lo maw? Ngaihthlak a va nuam ve.) Ni e, a ni mai thei. Ani hi mikhual chamrei an sawi ang deuh a ni a, kan Lt. Col.-a pawh hi ngampa sawt riau mai a. Tin, kan member zahawm tak Champhai North bialtu Er. Gin-a (Pu Laltea zawk maw ni kha), ani pawh hi a ngampa sawt riau mai a, a lawmawm viauin ka hria a. Term lehah an la tling zo anih pheih chuan an rawn ngampa viau turah kan ngai deuh a ni. Aw le, Pu Speaker, demand lamah ka'n lut duh a.

Demand No. 21 - Higher & technical Department:

A pahnih hian ka'n khaikhawm deuh mai ang a. Ni e, nichinah khan kan member zahawm tak Pi Prova sawi ang khan, kei pawh Education hi ka tui em emna a ni. Lehkha thiamlo hi min ti a; Pu Speaker, lehkha thiam tak kan ni a, Pu Nguna nen hian; kan zir sang vak lo a ni. Sap thufingin, 'Education is all-round development,' a tih hi kei ka ngai pawimawh em em a. Chumi avang chuan kan Education Minister pawh hi keini ang advise hi a pawm ve duh anih chuan, nichina Pi Prova-i sawi ang khan a department leh Aizawl khawpuia state hotu lawk ber-ina kan hmuhpui loh, nitina kan teachers leh kan faculty te file chu mihring - human an enkawl si a. Heng ah hian Kai App hi introduce a ngai hluah hluahin a, chulaia chu ka'n ngen duh a.

Chutih rual chuan hei, Aizawl West College, sorkar hmasain hmun chep tak kar atanga Aizawl West lehzuah, kan CM, kan House Leader te area lamah sorkar hmasain kan han sawn a. A sawnnaah khan mawh pawh ka phur ve nasain ka hria a. 2019 helai budget session neih lai khan minute 25 khulaiiah khuan traffic jam avang khan ka thinrim ka'n ang deuh a. Chumi avang chu a ni ka ti lo a, a tukah khan a sawnna tur kan zawng nghal a ni. Chutiang tiat chiah chuan Mizoram University tur pawh Look-East nilo in, Look-West kan House Leader hoa kan neiha Luangmual area lama kan han dah leh tur te hi, 'a changkan thlak mang e aw' ka'n ti deuh a nih chu. A lawmawm hlein kan hria a ni.

Tin, Aizawl West College hi RUSA atang hian sum an nei niin ka hria a. Engnge kan thlen chin hi nakinah kan Minister zahawm tak hian a wine-up hunah min tarlan sak se ka duh khawp mai a. Chutih rual chuan term hmasaa kan Education Minister kha pastor fapa tho kha a ni a; hei, ka dinglama hi a thu a; vawiina kan Opp. Leader hi. Kan education hian

hma a sawn ka ring. K um 5 kan pastor fapain a enkawl a, pastor fapa thoin Pu Speaker, kum 5 a enkawl leh dawn a, a challenging hlein ka hria a. Ka bialah hian a elastic ka lo pawt mar dawn a ni. Hei, Secondary school Dampa bialah pakhat mah neilo kha term hmasa ami khan 5 min pe a, Science stream 1 nen. Tuna mi hi pastor fapa tho a ni a, eng chen nge hma min lakpui ang tih kha a tehfung lian tak turah chuan kan ngai deuh a ni. SDO hi chu kan lo nei tawh a, a takin kan function chiah lo a, pensioner pension mai tur hi, pastor thenkhat thingtlang bial atanga Aizawl-a sawn luh ang deuh hian kumtin hian kan inthlak zut mai a. Khatianga lo deuha kan Minister-in min tihsak theih chuan ka lawm khawp ang.

Demand No. 20 - Education Department:

Chutih rual chuan hei, kan Education Minister hian a rawn ti thin a, kan PA te hnenah ngenna te a rawn siam a. Ka biala khaw 33-ah hian Education Department quarters kan neih mumal hi ka hre lo a. A list a lo nei deuh duah anih pawhin khawngaihin Pu Speaker, nangmah kaltlangin, ka bial bik tal hi chu quarters awm tawh anga helaia tarlan a awm anih chuan min pe thei se ka duh khawp mai.

Keini hi in hriat angin All India education lama intihsiaknaah hian a bik takin kan literacy percentage tehna ah pawh a pawt hniam tu kan ni ziah a ni. Chuvang chuan, helaiah hian tan lak kan ngai hle a ni tih hi min hriatpui nawn ka duh tel a. Kan Education Minister phei chu tun village council inthlanah khan a rawn campaign chhuak zak a, a tha khawp mai a. Mahse, min hneh ta em em chuang lo nachungin thahnem min rawn ngaihpuie sela ka duh khawp mai

Keini bialah hian chakma area a tam a, language problem kan ngah em em a ni. Kei pawhin ka kokhawm a, all party, all NGO-te, chuta an duh no.1 chu – ‘a pawl hniam lampang atangin mizo subject lak ni se’ tih kha kan han pass ve ngawt a. A chhan chu, Mizo subject hi kan zirlo tawp a ni; Bengali in an han tan a, Hindi in, high school atangin engmah thiam lovin an chhuak phung mai a. Chuvang chuan, peon tak ngial pawh hi dan fel tak nei kan lo nih tawh avangin, hna hniam thleng hian mizo subject a lo pawimawh si a, chakma hi an lut thei ta miah lo mai a. Tin, kan hnam, kan ram mipui kan unity atan pawh thil tha nia ka hriat avangin, kan House Leader hian khawngaihin min lo ngaih pawimawh sak sela. Sipai thuawih thei tak ang deuh an ni a, ZPM ho hi chu. Hetah, sipai-ah lal taka awm Lt. Col te pawh lo ni thin mah sela, a bula petty officer khan a control tho ang deuh khan Pu Speaker, helai hi kan ngai pawimawh a ni tih hi ka sawi duh tel a ni.

Demand No. 26 - Information & Public Relations Department:

Pu Speaker, Information hi chu kan chakin ka hria. A public relation laia hi kan MIS leh staff te hian Information Officer ni hian an inhria a ni. Public Relation Officer nih hi he sorkar hian a policy-a a tel loh pawhin ka thusawi atangin lo zep lut se ka duh khawp mai. Public relation hi a pawimawh em em a, ka ngai pawimawh hle a ni tih ka sawi duh a. Chuvang chuan, heng hi rawtna ang reng deuh hlekin vawiin niah hian ka'n tarlang duh a ni.

Demand No. 32 – Horticulture Department:

He department hi ka sawi chak in ring a, mashe zu-zawrh tur lam kha ka sawi dawn lo. Pu Speaker, ka sawi duh zawka chu - Khawchhak lam Thailand-ah te, Vietnam ah te, Malaysia ah te kan han kal ve a, hei kan House Leader hian a hriak lampang kha a ngai pawimawh a. Khalam ai mah chuan vawiin ah China te, Malaysia te, Taiwan te, Vietnam te ho hi

bamboo hmanh tangkai hnam an ni a, factory pawh an nei lian hle a. Naktuk ah hian kan CM, kan House Leader ber hi (hmannia ka zin hawna mi kha ka la neiin ka hria) bamboo atanga an siam mawza ka present dawn a ni, Pu Speaker i remtihhain. Chutah chuan mawza te, towel te, t-shirt leh blanket tha tak tak mai kha an lo produce nasa em em mai a, a takin ka han hmu a ni. Thla hnih dawn ka han cham a, November-December thla khan. Anni pawh Mongolian thlah an ni a, a ringa rek kiu thu lek lek-te te kha an thiam em em mai a. A zu siam lama kal vak lo khan horticulture hian helam hi ngaihtuah zau deuh se, a raw materials ngaihtuah sela problem pakhatmah awm lo. Kumtluanin kut-hnathawktute'n an vat a, a ro a, kan duh lai takin kan han hal a. Tichuan, thlahnih-khatah cheh chhum reng a ngai a, kum hnihnaah chuan a khat leh tlat a ni, kan bamboo a raw materials kan neih hi. Chuvang chuan, hnam changkang zawkte'n an la hman tangkai loh kan Mongolian-puite'n an hman tangkai tawh, khawvel an dominate-na bawka hi i hmanh tangkai ang u, tih hi ka han sawi duh a. Hengah hian tan lak a ngai hlein ka hria a.

Tin, ka kal tumna chhan hi ka thianpa underground-a ka awmpui, Mizo army zinga thleng sang ber Maj. General Lalhmingliana zawn chhuah tuma kal ka ni a. Amaherawhchu, a retire hnu ah khawi emaw island-ah a awm an tih avangin ka zawng chhuak hman lo a. Pu Speaker, a zinna tura kha min pun theih chuan zawn chhuah pui ka duh a ni, April thla leh mai ah hian.

Chutih rual rual chuan, nichinah Pi Prova bawh khan a sawi a, a practica- in ka bialah khuan ka bial mipuite entawnah ka ti a; cashewnut hi kan ram tan a tha a ni. Nikum khan ka ching ve a, a processing hi a buaithlak deuh a. kum khatah mihring aiin a sang thei a, a chi ah harsatna pakhatmah a awm lo bawh a. Kan bial chhung Silsuri ah quintal khat in duh anih pawhin kan Minister khan min lo chhinchhiah sak sela, hmun hniam deuh hleka tha chi a ni a. A rah lah chu inruksak chi a nilo. A hmin deuha an hriat a kai vaih chuan hmui zawng zawng a pan mai a, ven ngai miah lo kha a ni a. Khatiang kha khawvelah pawh thil man to ni bawh si a ni a, hei hi kan ram tan introduce tlakah ka ngai a ni. Subject pakhatah professor lai ni mahse Pu Speaker, kan Minister hi ka han advise duh a ni. (**Speaker:** Minute 2 in a pel ta e. I zo dawn tawh em?)

Demand No. 38 - Rural Development Department:

He department hi nakinah pheih chuan, 'Administrative' tih a lo tel dawn ta bawh nen thingtlang department kan neih chhun in ni a. Kum khat chhung Sorkar hlima han inlawm nan a material component, Kohhran-Upa pawh pawl dang hnena pek duh miah loh kha chu han in relax deuh tawh ula, pawl danga kha rawn en deuh ta ula, material component a nihna ang ngei hian han sem ve tawh ula, tiin ngenna ka han siam duh a.

Demand No. 25 - Public Health Department: Hetah hian Sorkar hmasa khan Central Scheme JJM atangin ka biala khua 33-ah tui kan nei vek a ni. Amaherawhchu, Central danin a a phut ang khan 55% kha public contribution a nih dawn avangin mahni khua theuhah khan a phumna tur lei an lo lai a ni. A pipe kha polythene pipe a ni a, pipe tha tak chu a ni. Amaherawhchu, a chungah motor a lo tlan a, pipe kha an phum thuk a ngai a. A bik takin kan VC-te khan an lo enpui tha lova, repair ngai tam tak a awm a. Heng hi a siam that dan a awm em tih kha windup hunah min han tarlan sak se ka duh a.

Tin, Pu Speaker, water-harvesting te kan sawi thin a, heng hi lungngaih vak tur a ni lo; kan inkai kun deuhin ka hria a. Pu Muanpuia kha ka han thlawp duh deuh hlek a, Pu Laltea

sawi ang deuh hlek kha chu ngaihtuah tur a ni lo. Kan naupanlaiin Aizawl tlangval kan ni a, kan High School kal chhung zawng zawng hian tui taia put a ni, nileng zankhuain. Engatinge a awmlah kan tih hian, thil mak vak a ni lo; a hmangtute hi kan sual ta vak pawh a ni lo. Development a lo kal a, metal kawngin a lo khuh zau a, concrete-in a khuh zau a, helaia tui lo dawngkhawh thin leiah a luh loh avangin Sorkarin tan kan la dawn a ni. Tlangchhip lama tui khuah lam a ni lo. Kan Tlawg Lui dung vel hi humhalh tha ila kan zia mai ang. A liam duak duak a nih hi.

Chuvang chuan, ‘Kan Pathian hi, mi khawngaih thei tak a ni a. Chutah chuan i inngat ang u’ tiin he Demand pahnih, kan Minister-te Demand hi rilru leh thinglungtakin ka thlawp a ni e, Pu Speaker.

SPEAKER : Tunah chuan Pu Rasik Mohan Chakma ilo sawm ang.

PU RASIK MOHAN CHAKMA: Pu Speaker ka lawm e. Hei vawiina kan Minister zahawmtak tak pahnihte Demand sawi honaah ka tel ve thei hi ka lawm a.

Demand No. 20 - School Education Department:

Hei Chakma area School-ah Mizo subject introduce kha thla hmasa khan kan sawi tawh a. Eng emaw lai kha chuan ‘SEDP zirrtu pawh kan pe ang che u’ an ti a, mahse, an ti hman ta lova. Tin, kan House leader, Hon. Chief Minister hnenah pawh lehkha kan submit a, a file chu a kal mekin kan hria a. Hei chu a Sorkar policy angin min laksak ula. Tun hma kha chuan an pawm chiah lo, Mizo zir hi. Tunah erawh chuan all stake-holders - zirraite, NGO te, khawtlang hruaitute kan sawi pui tawh a, an pawm a ni. Tun hma pawh khan lo pawm pawh nise, kan ti tak tak thei lo ang. Helai Lunglei te, Aizawl te atangin zirtirtu kan dah ang a, awm tha si lovin, hlawh ringawt an la ang.

(Hon. Dy. Speaker-in Chair a la a.)

Hemi decision kan siam dawn khan Chakma area khua awmte nen kan rel ho a, ‘pawnlam atanga zirtirtu indah lovin, local area mi lak nise’ kan ti a. Bul tan phawt kha a tha a. Amaherawhchu, ‘zirtirtu 2 kan dah a, an zir duh lo’ ti zawng emawa min laksak chuan engtikah mah kan hlawhtling lo ang. Cabinet decision laiin policy a siam anih chuan, As a government policy angin kan kalpui tur a ni. Kan naupangte Mizo tawng zir an duh chuan hei hi sorkar hi a lawm tur a ni. Pu Deputy Speaker, hei hi a lo hlaawtlin chuan, i dinglama thute pawhin an achievement pakhatatah an sawi thei dawn a ni.

Shillong ah zirrai Chakma hmeichhe naupang khan Khasi language subject ah letter a marks hmu a, State Education Minister-in sawi fuihna programme a siam a, “Kan tawng te kan hnam te midangin min ngaihsan sak hi thil lawmawm tak a ni” a ti a ni. Chutiang chuan, sorkar ang pawhin tiang zawnga policy neih tam a tha ka ti a ni. Chuvangin, hei hi tih tak zeta ngaihtuahna min neih sak turin ka ngen duh a. Chakma mipui hian an pawm tawh a, Mizo tawng zir a ni tur pawh hi. Hei hi achievement lian tak a ni tih ka sawi duh a.

A dawt leh ah chuan teachers recruitment-ah hian kan minister chungah lawmthu ka sawi duh a; ka fak a. Zirtirtu advertisement awm khan mithiam deuh deuh pawhin an apply duh lo; ‘kan hmu chuang lo ang; min la tak tak lovang’ tih rilru an pu a. Ka hau a, ‘Ti rawh u; in thiam tak tak a nih chuan, minister-in a thiam thiam kan la ang a ti a, kan en chhin ang’

ka ti a, ka apply tir a. An exam zawhah khan min hmu leh a; ‘a fair chuan kan hmu ang’ an ti a ni. Result a chhuak a, thenkhat chuan an hmu a. Dik takin kalpui zel se. Miin thiam tak taka an inhriat pawha a la hmu thei lo a nih chuan, a phenah eng emaw a awm hi rinhlel awl deuh a ni a. Recruitment reng rengah hian hetiang hi ni lo se. tun atang chuan kan mizo subject, tunhma chuan ‘working knowledge of Mizo’ an ti a. Tunah pheih chuan, matric-ah pawh mizo subject lak a ngai a ni. Kan hre sa a, chakma area school ah khawiah mah mizoram sorkar pawhin mizo subject a introduce lova, engtin nge an zir theih ang? Sorkarin ruahmanna siam lo chuan zir ngaihna a awm lo a ni. Hetiang chungah mizo subject compulsory-a tih chu a dikin ka hre lo a ni.

He thil hi chu sorkar pawhin ngaihtuah nawn se. Working knowledge tak tak pheih chu, keini pawh kan lehkhah zir lai khan, mizo tawngin, ‘ka vel ang che’ an tih pawhin ‘Aw’ te kha kan ti mai a, ti khawp khan mizo tawng kan thiam lo a ni. Lekha kan zir zova, sorkar-hna ah te kan lut ve a. working knowledge zir nan thla 6 pawh a ngai lo; Chakma eng officer mahin, mizotawng a thiam loh avangin a hna ah harsatna a tawh kan hre lo a ni. Chuvangin, working knowledge neih hi a har lo. Engpawh nise, mizotawng introduced hnu ah erawh chuan, mizo subject hi compulsory anih pawhin a pawilo; tunah erawh chuan a la hma deuh a ni, Pu Dy. Speaker. Chuvangin, population tam tak kha denial absorb opportunity ang khan kal ve hret hret se kha mi provision kha; dah tho si, tlema relax deuh siin inhriatthiamna nen kalpui theih hram ni se a tha awm e.

Demand No. 21 - Higher & Technical Education Department:

Higher Secondary school-ah hian science & commerce stream hi a theih anga tam introduce a ngai a. Hei hi policy zawngin, khawi emaw khua duhsakna bik lovin; at least sub-divisional emaw, block headquarters-ah emaw pakhat theuh ti zawngin adopt ila a thain ka hria. Chawngte hi tunah hian educational-hub angin a awm tawh a, college kan nei a. Marpara te, Tuipuibari te leh hmun dang dang atanga zirlai lo kal an tam lutuk. Amaherawh chu an subject duhthlan commerce emaw, science emaw zir dawnin kan higher secondary school neihah a awm tlat lova. Hei hi kan mamawh ngawih ngawih a; policy angin ‘headquarters zawng zawngah science & commerce awmna higher secondary school kan nei ang’ tih emawin adopt dan awm sela, mipui tan rawngbawlna, education develop-na atan policy tha tak a nih ka ring a ni.

Demand No. 25 - Public Health Engineering Department:

Prof. Lalnilawma demand-ah sawi ta ila Public Health Engineering hnuai ah Jal Jeevan Mission - central sponsored scheme kan bazar ah water supply kan nei a, a lawmawm hle mai a. Pipe PVC fibre hman hian problem kan nei tawh a, kan harsatna hi engtinngan kan sutkian ang tih hi tih tak zetin ngaihtuah a ngai a. Pu Dy. Speaker Boropansuri hi tun hma chuan khawp lian tak a ni a, JJM uncovered area-a awm a ni a. Hetah hian tunah hmalakna a kal mek a. JMM atanga pipe kan mamawhte kan dilin covered area anih loh avangin min pe thei ta lova. A awmzia chu, JMM hian village zawng zawng ni lovin, in zawng zawng an cover tak avangin a daih ta lo a ni. Chuvangin, additional source kan zawn loh chuan a tihngaihna a awmlo a ni.

Demand No. 38 - Rural Development Department:

Pu Dy. Speaker, kan hon. Minister hian ‘BADP hi a tawp dawn nge; a tawp dawn anih chuan engtik thleng nge’ tih kha official-a min hriattir theih dan awm sela. Tin, ka hriat danin, vibrant village introduced a ni tawh a, China border-ah chuan nasa takin Central

sorkarin hma a la a. Hei hi BADP thlakna tur a ni em? A nih chuan, Bangladesh leh Myanmar border hi cover thuai turin North East-a kan RD Minister te pawhin sawihoa Central Ministry nawr dan te hi a awm em? He ka rawntna hi a pawm tlak a nih chuan hmalak dan awm sela.

Demand No. 32 - Horticulture Department:

Horticulture hi kan area atan chuan a beidawnthlak ka ti a. A mak ve khawp mai; an ngaihtuahnaah hian a tel ve lo reng reng! Kum 5-7 kal ta ah khan engmah hmalakna a awmin ka hre lo. Minister atangin district leh block quota em pawh hi a awm lo em ni? Chawngte-ah sawn Horticulture block office kan nei a, a hming talin block quota te chu awm ve awm a ni a. Mahse, naia sen pawh hmalakna a awm lo hi chu thil ni thei a ni lo. Chuvangin, hei hi chu special takin min ngaihtuahsak theih dan awm se ka ti hle mai. (Dy. Speaker: A pathum zingah khan i tel leh ang e.)

Chuvangin, kan Minister zahawm tak tak pahnihte demand hi a tha ka ti a. Mizoram pumpuia mipuite hmasawna tura hmang-tangkai thei turin duhsakna ka hlan a, ka pawmpui bawka ni. Ka lawm e.

DEPUTY SPEAKER: Champhai North Bialtu Pu H. Ginzalala ilo sawm ang?

PU H. GINZALALA: Pu Dy. Speaker, ka lawm e. I veilam atangin member zahawm tak mai Pu Lalrintluanga Sailo khan keini Champhai North lam hi min comment tha duh lo khawp mai a, kan inthiamlo viau tho a nia. Nimin lam khan sawi loh tur ka'n lo sawi ve bawka ni a, a pawi khawp mai. Dampa sanctuary-ah ramsa chi khat, a hming pawh ka sawi ngam tawh lo kha eng zat nge awm kan tipalh a. A pawi khawp mai a; min lo hrethiam sela. Eng ang pawhin min lo comment tha duh lo pawh ni sela, keini chuan kan tihsual hi kan inhria a, sipai sam-met ang maiin kan dawh deuh voh voh tawh mai dawn a ni, min tihdan apiang mai hi.

Demand No. 20 - School Education Department:

Hei, Chakma area-ah Mizo tawng introduce tur chungchang kha sawi a ni a, a tha khawp mai a. A tul ka ti a, kei pawhin. Hei hi chu Education Department lam pawhin kan ngaipawimawh viau niin ka hria a, kan hnam, kan ram develop-na atan thil tul tak a ni a. Tin, hnam hian hma a sawn dawn chuan language atanga intan a nih avangin, hei hi an accept a pawimawh khawpin ka hria a. Mizo nationalism hian hma a sawn chho zel dawn a, Pathian hmanrua a ni mek a ni tih khan kan comment duh a. India ramah literacy percentage-ah hian a sangber pahnihna kan niin ka hria a. An rawn sawi tak ang khan Chakma area-ah hian percentage hi a lo hniam ve bawka, hei hi Education Department hian challenge-ah la ila. An ni ho, western belt kan tih mai khu attention kan pek that theih chuan India ramah hian pakhatna kan nih chhoh leh theih hi a rinawm khawp mai.

Tin, Education sector-ah hian a buaithlak khawp mai a, transfer chungchang hi. A Minister chauh pawh a ni lo a, keini MLA-te pawh kan buai vek mai a ni. A concern Minister pawh, (tawng mawi lo ni lo sela; fiamthuim) 'transfer Minister' te kan han ti a; keini te pawh transfer MLA-te kan ni ta ber mai a. Hetah hian rawntna angreng deuha ka sawi duh chu, system mumal tak hi siam ila a thain ka ring a. Tunlai thiamna, IT lam te, software hmang tein hemi transfer chungchang hi ti thin ta ila a that ka ring a. Mihringin kan tih hian complaint leh sawiselna a tam a ni. System nghet deuh kan dina kan create theih kha chuan

kha system khan a transfer mai dawn a ni. Human intervention hi chu a awm lo thei lo; amaherawhchu, minimal a ni tur a ni. System 50% tal emaw a factor-ah hian awm se, 60-70% thleng pawhin. Khatah khan phunnawina a awm loin ka ring a. Tin, politics pawh a inrawlh lo deuhin ka ring a, kan politics pawh a thianghlim phah viauin ka ring a ni. Engtin nge kan tih ang tih tak pheih chu ka sawithiam chiah lova. Amaherawhchu, a system create hi chu a tul a ni. Chuvangin, kan sorkar hian hei hi lo ngaihtuah sela a thain ka ring a ni.

Demand No. 21 - Higher & Technical Education Department:

Tin, education sector-a ka ngaihndan hi ka sawi thin a. Kan bial Champhai-ah pawh Higher Secondary School hi pakhat chiah kan nei a ni. Kan inhnawhtawt thin khawp mai a, kan indaih lo hle mai. Pu Dy. Speaker, hemi chungchangah hian ka ngaihndan ka sawi thin a. Sorkar inrawlh loh tawp hi thil theih a ni lo a, amaherawhchu, education-ah hian kan kalphung tha zawk tur nia ka rin chu, (kan zirtirtu ah te pawh a ni ang chu) zawi zawia kan tihlem a ngai a ni. Entirnan: zirtirtu pangngai sorkar hna ngeth khan nuai chuang an hlawh deuh vek mai a; private-ah, employment generate-na ni bawkah cheng sing 2-a mi pakhat thawh theih hi mi pangain an thawk tihna a ni. Sorkar tan sunsen kha a inthlau ta lutuk a. Khatiang zawng approach hi kan neih a pawimawh khawp mai a.

Chuvangin, ‘communitisation’ kan ti dawn nge, theih chen chen a nih chu; (‘privatisation’ te pawh kan ti ang a) khatiang khan kalpui ta ila education quality te pawh a that chhoh zel ka ring a. Hei, tunah hian Social Welfare lam atangin khatiang thinlung pu deuh takin Champhai-ah ruahmanna te kan lo siam a, a Minister changtute pawh hian min lo hriat sak sela, ruahmanna kan rawn siam chu - a infrastructure tur hi a hranpain Education Department atangin kan hmu thei mai bik si lova. Social Welfare lam atangin school building tha deuh tur (a hmingte chu eng pawh lo nise) ka’n rawn rawt a. Kha kha a lo chhuak a nih chuan, kha a infrastructure kha private-ah kan hlan ang a, public-private partnership mode in din thei ila education ah hian revolution hi a thleng theiin ka ring a ni. Kan thenawm State-te pawh ka sawi thin a, kan unau Manipur-a mite zirna lama an san em emna chhan chu thildang a ni lo; sorkar sikul vang a ni miah lo a ni; private school ah hian an inzirtira an competitive em em mai a ni. Central lamah te pawh exam result a chhuahin mi 20 atanga 50 an hming a lang ziah a ni.

Chutiang zawnga kan kal chu a tul khawp mai. Sorkarin infrastructure tum ila, a building te, water connection te, internet ang chi te, approach road te khatiang khan. Tin, a tul anih leh zirtirtu lamah te pawh kan pui ang a. A management leh thil dangah hi chuan private hian take-care se, a zawng zawng erawh chu kan sawi pawh a ngai lovin kan hria a. Khatiang a nih chuan education lamah hian hmasawanna nasa tak kan hmuh theih ka beisei a ni. Zirtirtu indaih loh chung chang te, khawtina kan mamawh a ni a. Amaherawhchu, kan Education Minister khan min lo hriat sak se, Champhai Polytechnic quarters sak te, khatiang mamawh kha kan nei teuh a, a hranin kan inpe leh thei a ni. Ka sawi tlukah min lo ngaihsak sela, kan indaih lo viau tho a ni.

Demand No. Information & Communication Technology Department:

Tin, IT lam te pawh a ni ang chu, Champhai hi ‘tourism destination’ a ni kan ti fo a. Thil theih dan kawng a awm a nih chuan, khawpui lian tak kan lo ni ve ta a, 3D theater hi kan mamawh ta khawp mai. Hei hi Ministry of Information & Broadcasting lamah te pawh khan tih theih dan a awmin ka hria a, chung te pawh chu min lo explore pui sela a thain ka hria a ni.

Demand No. 32 - Horticulture Department:

Kan rama potential a thatna em em chhan chu horticulture lam a ni a; kan fooding pattern erawh hi chu kan thlak chhoh deuh hret hret a ngai a ni. Tuna kan fooding pattern ah hi chuan a thlum leh a mawm lam te hi kan uar em em a. Chutah chuan, horti-sector lamah hma kan sawn a ngai a nih chu. Kan hriselna tur chuan kan fooding pattern hi kan thlak a ngai a ni; hma sawn tur chuan kan fooding tlak a ngai a ni ringawt mai a ni. Kan tribal foods hi kan kalsan tial tial a ngai a ni. Vawksa kan ei tam lutuk te pawh hi a diklo a ni.

Kan bialah pawh hian hma kan la a, serthlum leh kiwi tiak te kan mamawh teuh a ni tih thu kha ka sawi tawh a, he House zahawm takah hian, minister leh department lamte pawhin min hriatpui tawh viauin kan ring a. A hun takah tun fur hmain eng emaw tak hi chu kan beisei tlat dawn a ni tih, he House zahawm tak ah hian ka'n sawi duh a ni.

Demand No. 38 - Rural Development Department:

VVP hi, Ni e, member zahawm tak khan arawn sawi a, Vibrant Village Programme hi Mizoram-ah hian introduce a chakawm khawp mai. BADP thlaktu tur a ni a, pending work tlem awm vang nge ni, khalaiah khan eng harsatna nge kan la neih? BADP a pending work hi a rang thei ang berin clear ila, helaia Vibrant Village Programme hi a rang thei ang bera kan enjoy hi a tha dawn khawpin ka hria a. Kan thenawm state Sikkim-ah te pawh an lo enjoy tawh a, keini hi kan tan deuh hlek a la ngai a ni.

Demand No. 25 - PHE Department:

Lawmthu sawitur ka nei a. Hei, balhla horticulture lam atangin kan dawng a, lawmthu kan sawi a. Tin, lawmthu sawi tur bawk, Tualpui-Water Supply Scheme ah khan NABARD ah min telh ve a, kan hotute'n; ka lawm khawp mai a, lawmthu ka'n sawi bawk a ni. Tui indaihlohna khua, tui harsat deuh deuhna khua kan nei ve bawk a; Aiduzawl, Selam leh North Diltlang te pawh hi min hriat sak turin ka duh bawk a. Champhai khawpui kan tuilakna hi tunah hian a collapse tep a. Kan Hon. CM te pawh in minlo hriat sak se a thain ka hria a. Tuipui kan pump chho a, a chhiat vaih chuan Champhai khawpui chu kan buai viau ang. Chuvangin, kan hotute'n Ngur-Vapar Rain Water Harvesting Dam Project kan buatsaih hi min ngaih pawimawh sak em em avangin lawmthu ka sawi duh a. Hei hi a funding kan zawng mek a, a rang thei ang bera tihpuitlin thuai thuai kan chak hle a ni.

Tin Horticulture leh PHE hi an convergent theihin ka ring a. Thenkhatah PHE tui lakna hmun tur te pawh hi survey uluk deuh ila, 'survey that hi a chanve zo tluk a ni' te kan ti ve thin a ni. A in-take te, a kalkawng te, a reserver te intawm vekin, a pumping line erawh chu a hran vek te pawhin a tih theih ang a, PHE intake zawng zawng leh a pumping zawng zawngte va ring si khan horticulture pawh hian an pump ve theih dan tura hi ruahmanna siam ila, renovation a awm thei maiin kan hria a. Helai chungchangah hianin ngaihtuahna i seng tlang teh ang u, tiin ka'n sawi leh duh a.

Pu Dy. Speaker, approach road chhe em em hi a buaithlak ka ti a. PHE ang pawha kan buaina tur chu approach road a ni dawn a ni. Kan sawi thin danah chuan, 'remoteness is hazards' tih a ni a. PHE pumping station te chu khutah luimawngah a ni vek mai a, a remote em em mai a. A kalkawng hi a buaithlak em em mai a, maintenance issue hi a nasa em em mai a ni. Kha kha a nih a vangin, a kawng hi tha zawka kan tih a ngai. Grading a that phawt chuan blacktop lem loh pawhin a kal a kal ve thei a ni tih hi keima experience atang pawhin ka hria a. Helai ah hian department lam te pawh hian (**Dy. Speaker:** I zo thei

dawn tawh em aw?) Pu Dy. Speaker, ka zo a ni mai. Approach road chungchanga kan mentality hi kan thlak ngam a ngai tawh a ni. Remoteness is hazards.

Aw le. vawiinnia Pu Vanlalhlana demand leh Prof. Lalnilawma Demand te hi ka thlawp a, he House hian a pass-pui hi ka duh dan a ni e. Pu Dy. Speaker, ka lawm e.

DEPUTY SPEAKER: Zirna lampang an han sawi a; Ni e, kei pawh hian mawlmang taka ka'n ngaih tuah thin hian PS atanga ME school nen ka bial chhungah pawh khuan a awm thluah mai a, a tawpah Higher school pahnih chauh mai khu a awm a; khutah pawh khuan kan leng ve vek mai dawn em maw ni chu aw! A hlawhchham hi kan tam awm mang e, ka ti a. Mahse, hei, kan la zir zel chu a ni a, a tha e. Aw le. Tunah Serlui bialtu zahawm tak Pu Lalrinsanga Ralte ilo sawm ang u.

PU LALRINSANGA RALTE: Pu Dy. Speaker, ka lawm e. I awm huna tan ka lo ti a, I thut huna han sawi hi a nuamin ka hria a. Tin, district lam inang te kan ni bawka, han sawi tur te hi a awm ve nual thin a. Vawiinah kan Minister zahawm tak tak pahnihte demand kan han sawiho leh thei a; vawiin pheichu sawi a hlimawm dawn hlein ka hria a. An chan tur tak department chang ve ve an niin ka hria a.

Demand No. 20 - School Education Department:

Hei, School Education minister hi kan lo hriat chian, term hmasaa helaia thuho tawh kan ni a, thil tam tak hi kan sawi dun thin a. Nimahsela, vawiinah chuan a dreams, a lo suanguahna - school education chungchang a ni emaw, Higher ah a ni emaw a rawn hmang chho thei dawnin ka hria a, ka lawmpui tak zet a ni. Tin, mitha, midik a niin ka hria a. Hei, School Education minister hi kan neitha thei riau mai a, term hmasa khan ka hmaa thu kan opp. leader hi a ni a; hei tunah Pu Mathlantea a ni leh a. Education minister hi hmingtha tak maia chhuak hi an vang thin hle mai a; Pu Chhantea hi hming hliauna nei lem lova rawn chhuak kha a ni a. Pu Mathlantea pawh chutiang ni thei tur chuan duhsakna kan hlan duh a ni.

Hmanni khan Education Department-ah casual teacher an la niin ka hria a, an la fair khawp mai a; a bul hnai lawka thu fate pawh an lut lovin ka hria a. Huaisen tak, dik tak leh fel taka zirtirtu a la thei kha fakawm ka ti a. Khatiang chiah khan kan Opp. leader Pu Chhantea term hmasa khan zirtirtu, MR teacher mi 880 chuang a la a. Result a rawn chhuak a, MNF party zawk kha an phun luai luai a, ZPM zawk khan lawmthusawina press release te kha an rawn chhuah a. Chutiang khawpa Education Minister tha pahnih kan nei thei leh, vawiina House-a an awm dun hi a lawmawm hlein ka hria a ni.

Tin, Pu Chhantea hian term hmasa khan zirtirtu nghet mi 153 vel leh SAMAGRA hnuaiah mi 500 vel kha felfai takin, DPC kaltlangin buaina awm miah lovin a la a, a lawmawmin ka hria a. Khatiang chiah khan kan Education thar hian hma a rawn la chhunzawm a, a huaisenna a fakawm hlein ka hria a ni

Tin, Pu Dy. Speaker, ka sawi fo tawh thin SAMGRA hnuaiah tunhma 2003 chho bawr vela zirtirtu lak an awm nual a, chutah chuan advertisement mumal chiah lova lak te pawh kha an awm a ni. Amaherawhchu, ka sawi duh chu, February Ni 13, 2015 khan Mizoram Education Mission Society Executive Committee-in Dan ang thlap, rem a tih leh phalna a pek State Project Director hnuaiah a niin tul a tih anga casual vacancy te hnawhkha

theihna kha a awm a. Hei hi ka sawi duh chu, kan Minister-te hi kan indemsak thin a, tuna kan Minister nilai pawh hi nakinah dem a hlawh ang tih ka hlau a; a buaithlak thin khawp mai a, kan Minister-te tan khan.

MLA ten kan bialah SSA a lo thawkte eng emaw avanga ban ni thut te, tin, thihna avanga chawl te, loh theih loha khatiang post ruakah khan school-in indaihlohna avangin zirtirtu kan mamawh em em a, MLA ten kan han nawrchilh thin a. Khatiangah khan dan ang thlapin hemi society hnuaiia State Project Director-in a han dahsak thin kha a lawmawm a. Heng pawh hi vawiinah Pu Dy. Speaker, i dinglana thute hian kan Minister-te pawh hi nakin lawkah chuan an bialah mamawh-harsatna ah khatiang boruak a lo awma an la ti duh a nih pawhin, hei hi chu kan inhriatthiam tlan a thain ka hria a ni.

Tin, ka sawi tawh ang khan, advertisement mumal lo deuha a tir lama han lak chhoh tam takte pawh a awm ang; khang hote kha kum tam tak lo thawka chhungkua lo chawmte an nih avangin, an ngheh theihna turin kan Minister-in hma a lakpui kha lawmawm hlein ka hria a, an thla a muangin ka ring a. Hengah hian kan Minister-te huaisenna leh inpekna, midang tana khawngaihna a lantir te hi a ropui ka ti takzet a a ni.

Tin, School upgradation chungchangah kan Minister pawh hian engtin chiahin nge tunah hian a kalpui dan chiang fek fawkin nakinah wind-up-naah min la hrilh thei se. Kan nghakhlel tlang takzet tawh a ni. NR atanga kan inhlawhna job-card atang tein an cut a, chutianga chawm school chu kan ni a, kan MLA fund te nen. Chuvangin, thingtlang School tam takin hmasawmna thar kan hmuh tur hi kan nghakhlel takzet tawh a ni.

Tin, Pu Dy. Speaker, hei cyclone remal leh rial tla khan nikum lam khan ka bial chhungah Vairengte – Bilkhawthlir ah te school tihchhiat a ngah khawp mai a, hengte hi hma min laksak thuai a tulin ka hria a. Khawngaihtakin hengte hi furpui a thlen leh hmaa siam a nih ngei theihna turin assurance min pek theih pheih chuan ka lawm ngawt ang.

Hei, department lian na na na chu, ‘an file pawh mihring an ni’ tih kha kan sawi tawh a. A harsa em em a, kan tanho that a ngai a. Kan education system leh kan rama zirna a that theihna tur chuan i dinglam leh veilamte kan tanrual thata, kan Education Minister hi kan thlawp that hle a ngaiin ka hria a ni. Chutah chuan hei primary leh middle school te, high school-ah te pawh a ni ang a, institution-a administration kengtu ber headmaster kan tih te indaihlohna a nasa hle mai a. Hengte pawh hi a theih anga hma a rawn lak theih chuan a lawmawm khawp ang.

Demand No. 21 - Higher & Technical Education Department: -

Tin, Higher-ah pawh hian Mizoram State University Bill te kha kan han pawm ta a, a lawmawm hlein ka hria a. Kan minister a chak tha a, hemi a hlawhtlinna tura hma a lak zuina kawngah pawh a tul leh pawimawh anga sorkarin kan thlawp thiam a pawimawh hlein ka ring a ni.

Tin, Higher-ah hian RUSA hnuaiia Asst. Professor tam tak an awm a, hengte hi dinhmun tha zawka an luhna tur leh an ngheh ve theihna turin Sorkar hian ruahmanna neihpui thei se a thain ka hria a, theihtawp chhuaha hma laksak turin ka ngenpui bawka a ni. Tin, College velah Asst. Professor indaihlohna a nasa khawp mai a, hengte hi sorkar hian he ram hmasawmna tak tak chu Zirna hi a ni tih hriaa, Higher Education lam te pawh hi

ngaihtuapui an tulin ka hria a, chutiang tur chuan theihtawp kan chhuah theih ka beisei bawk a ni.

Tin, Pu Dy. Speaker, scholarship la lalo zirlai 4000 chuang an la awmin ka hria a, hengte hi an khawngaihthlak takzet a, miharsa te te an ni a, an zirna chhunzawm zelna atan pawh an mamawh takzet a ni. Scholarship la lalote hian an lak vat theihna turin kan Minister hian chak takin hma la thei se a lawmawm ngawt ang.

Tin, ICT tawite han sawi ka duh chu, Phaisen khu Assam nena kan inrina hmun pawimawh zet mai a ni a. Khulaiiah khuan signal a awm lova, kan police duty-te pawh hian phone an hman duh chuan tlang deuhah te han kal a ngai thin a, a buaithlak khawp mai a. Helaiiah hian tower dah theih dan a awm chuan a lawmawm ngawtin ka ring a ni.

Pu Dy. Speaker, kan Education Minister hi a fakawm ka ti a, a department chante hmalam a panpui zel ka beisei a ni.

Demand No. 38 - Rural Department Department:

Pu Nitea hi a fakawm hlein ka hria a. Vawiinah hian ka sawi chuan ruling lam hian min thik palh ka hlau deuh a. Amaherawhchu, minister chak, minister tha, i veilam leh i dinglam enhrang miah lo a nihna hi sawilan tulin ka hria a; ani pawhin lo ngaihaw lo ta se. Nikumah sorkarna an han siam a, sorkarin sum ruahmanna an neih hmasak berah, ‘Pu Nite, Saihapui-V khu ramri dep, kan buai vakna kha a ni a, hall an la neilo a. Khu khu Mizoram ah kan lakluh hret hret leh, Mizoram khua dik tak a nih tawh avangin, hall an neih a ngai e’ tiin kan han bia a. Ani chuan, ‘E, a ni maw? Theih tawp kan chhuah dawn nia’ a ti a. Material Component atangin nuai 15 (ka’n sawi vek mai ang a, min lo thik lo ula) 1st installment-ah nuai 15 min pe a, tunah hian nuai 7 release a ni tawh a. Tichuan, MLA fund nen ka converge dawn a, nuai 10-in; tiang khan RD leh MLA fund hmang kawpin hall kan sa thei dawn a ni.

Vawiina ka sawi duh chu, hetiang kan fund te hmang tangkaia khawchhung development kan khawih theihna turin kan Minister-in a department atanga min converge thei hi a ropui ka ti a, Pu Nitea hnenah hian lawmthu ka sawi a. Pu Dy. Speaker, nangmah kaltlangin, kan RD Minister zarah Saihapui-V in halltha tak kan nei thei ngei turah kan ngai a, ‘kan lawm takzet a ni’ tih kha ka’n sawi leh duh a ni.

Tin, RD hi thinglang khua bialtute tan chuan kan development department pawimawh ber a ni a, hei PWD kawng lo hi a tam khawp a, thinglangah bialah chuan heng anga hma min lak sak tute an nih avang hian kan RD Minister tur diktak ni in ka hria a, Party la na vak lo, ram leh khua in a development a neih theihna tur chuan diktaka kal mai thin a niin ka hria a, churang chuan lawmthu kan sawi duh a, tunah hian RD hnuaiah material component ah DEC-ah 40, BEC-ah 30, VEC-ah 30 a ni a, chungah pawh chuan DEC leh BEC hi chu engemaw party worker han induhsak a ni emaw, an mahni office in a mamawha an lo inthawh ve hi chu a tha ka ti a, ka sawisel miah lova, hetiang ah pawh hian a theih hram chuan a bialtu MLA te nen kan bial chhunga hmun pawimawh deuh lai an khawih theihna tura ruahmanna kan siam tlan kha a tulin ka hria a, VEC erawh hi chu eng party VC leh VEC pawh nise a dan dik thlapa an chanvo a nihna anga an khawih hi atul hlein kan hria a ni.

Tin, hei, Rurban ah hian engnge kan thlen tak zel ka hre lova, term hmasa khan RD Minister ni thin Pu Ruatkima nen khan Rurban hi kan buaipui vak tawh a, kan bialah dah tura min assure avang khan beiseina sang tak kha kan nei a. Tunah hian engnge a thlen tak zel? Rurban hi kan nei thei dawn ta nge, dawn ta lo tih te hriat a chakawm a.

Tin, RD-a kan sawi duh hnunng berah chuan, MLA fund nena tikhawp leh khan nge ni dawn ka hre lova; thil dang zawng hian ruahmanna min siamsak ve theih chuan, Phainuam ah Community Hall kan mamawh takzet a. Phainuam Community Hall sak theih dan tur SASCI hnuaiah emaw min siam sak ve thei se a lawmawm ngawt ang. (**Hon. Dy. Speaker:** A hnawh luh theih dawn tawh ang em aw?)

Demand No. 25 - PHE Department:

Hei Pu Dy. Speaker i bial lam te ka la sawi dawn a, i tan a pawimawh si a; minute hnih-khat ka lo pelh pawhin mi i hriatthiam kha ka'n beisei a ni. Tin, PHE department hi, kan Minister bawh hi a fakawm khawp mai a. Amah hi a pa-lian zek zawk a, a fit tha bawh a. Tui pump khawl a chhiat pawhin a hmunah a thlen chilh zel mai a. Hetiang Minister kan nei thei hi a lawmawm hlein ka hria a ni.

Helaia ka'n sawi duh chu, Vairengte hi PHE SDO hmunah hian kan pawimawh takzet a ni, khaw lian Mizoramah pawh khaw lian pawl ber kan ni tawh a, district hqrs. tih loh ah chuan a lian ber pawl kan ni a. Chuvang chuan, SDO Civil hmun a nih mai bakah ramri khua a ni a, ramri hmasawna, ramri venhimna tha ber chu ramri khuate development pek hi a ni a. Chuvang chuan, SDO kan neih theihna turin ruahmanna min siam sak thei se tih kha ka'n sawi duh bawh a.

Tin, Vairengte ah hian CIJW School a awm a. Tin, ramri buaina avangin IR ah Company Hqrs. te kan han nei thar a. Mi kan tam tawh a kan tui tlan khuan min zo tawh lo a ni. CIJW School te hian Vairengte tuilak hi min tlanpui vek mai a. Chuvang chuan, tui lakna thar ruahmanna min siam sak theih chuan a lawmawm ngawtin ka ring a. Chutiang chiah chuan Bilkhawthlir pawh hi kan tuilak kan kham loh bakah, kan tuihna a tawp deuh a, a lakna hmun hran siam a ngaiin ka hria a. Hei hi min tihsak theih chuan a lawmawm ngawt ang.

Demand No. 38 - Horticulture Department:

Pu Dy. Speaker, i bial thil ka'n sawi ang a. Horticulture chungchanga han sawi ve hram duha chu, Kolasib hi Mizoram-ah chuan hmun pawimawh ber a nih ka ring a. Kolasib District ah buaina a chhuah chuan Mizoram pumpui mai hian harsatna kan tawh thin a. A bik takin, kan Dy. Speaker hi Kolasib District min enkawltu a ni a. Horticulture ah hian District Horticulture Officer leh staff-ah hi kan duh-khawplo takzet a. Chuvang chuan, Kolasib District hi min thum chak hle a tulin kan hria a ni. Chumi karah chuan Bilkhawthlir ah hian Block Horticulture Office kan nei a, kan hawng tawh a. Amaherawhchu, staff awm loh vang nge kan inkhar reng mai a. Kut-hnathawktute'n tangkai taka an hman theihna turin he office hi kan hawn ngei theihna turin staff te min dah sak se. Kolasib District kan pawimawh zia hriaa duhsak taka min enkawl kha kan beisei a ni e. Pu Dy. Speaker, ka lawm e.

DEPUTY SPEAKER: A pawimawh tak kha a hnung lamah i han dah deuh a. Kha, vawiin hun lawmawm tak mai ah thu lawmawm tak mai a awm a. Chhun chawlh chhung khan khi tah Assembly Annexe Conference Hall ah mipuiina kan nghahhlelh em em

Universal Health Care Scheme kha kha kan House Leader, Kan Chief Minister ni bawkin (a hawanna i ti mai ang) tlangzarhna a nei a, a lawmawm takzet a. Kei pawhin a thusawi kha ka lo ngaithla fuh viauin ka hria a. Registration tih hnu kha chuan a chhawr tangkai tur tan chuan engmah tih a ngai tawh lo; damloh chiah a ngai a ni. Scheme tha tak a ni.

Aw le. Tunah chuan, West III bialtu MLA, Pu VL Zaithanzama ilo sawm ang u.

PU VL. ZAITHANZAMA: Pu Dy. Speaker, Ka lawm e. Ka bula mi Pu Chhuana hi kei aia din hmasak tum a ni a, mi ko hmasa si a. 'Ka lawm e' ka ti mai a ni ang chu.

Hei vawiinah hian sawi nuam tak tak minister pahnihte Pu Professor Lalnilawma Demand leh Dr. Mathlantea te demand kan sawi ho a ni a. Sawi nuam kan ti par par viau mai a. A hmasain lawmthu in bul ka'n tan ang a.

Demand No. 20 - School Education Department:

Zirtirtu kan lak belh tawh a, lak belh leh zel kan la tum hi he Demand No. 20 kan sawina ah hian lawmthu, a bul tanna atan ka hman duh a ni. Tin, chu bakah zirtirtu awmna tur quarters sak a ni te hi lawmawm ka ti a. zirtirtu khawngaih thlak tak tak transfer order an han hmu a, an awmna tur khua ah in luah tur awm silo, quarters awm bawk siloa harsatna tawkte hi ka lo tawng ve zeuh zeuh tawh a. Chuvang chuan, he thil pahnih hian min ti lawm kher mai.

Aw le, Pu Dy. Speaker ka bial pawn lam, Sainik Sikul lam hi kan sawi kai daih teh ang. Mizoram-in Sainik Sikul Chhgingchhip ah kan nei ve a, India ram pumah hian Sainik Sikul 33 a awm a, chung zinga pakhat chu he sikul hi a ni. Tun hmain Manipur-ah a awm a, admission a har em em a. Kan fate, kan hmelhriatte an luh theihin kan lawm em em thin a; tunah Mizoram-ah ngei kan lo nei ve ta hi lawmawm ka ti a. Tin tuna kan neih ve hi a lawmawm zualna pakhat chu, hmeichhe zirna, Girls' Cadet Sainik School awm hmasakna ber hi he school hi a ni. Tun hnuah chuan hmun dangah pawh an dah zel tawh turah ngai ila. Mizoram-in kan neih hma a neite kha chu mipa naupang tan vek a siam a ni a. He Chhgingchhip Sainik School erawh hi chu hmeichhe zirna Girls Cadet hmasa ber India ramah a ni.

Tichuan, he school ka'n sawi duhna pakhat chu, ka rin ai hian kan hlut lo a. Mizote hi mahni thil neih hlutna chang hre vak lo, ram pawn atanga lakluh hmanga intihchangkan tumte pawh kan angin ka hria a; thil dangah pawh a ni tho mai. Chutiang rilru kan put hi kan paih hret hret hi a ngaiin ka hria. Hetiang school tha kan han nei a kan han ngaihsak vak lo hi mak ka ti a ni. Mizoram-a awm a nih avangin Mizoram domicile quota hi 67% a ni a, amaherawhchu, hei hi kan luah khat ngai lo a, State pawn atangin min rawn luah khat sak thin a ni. Kan quota ngawih ngawih pawh luah khat turin awareness hi kan inpe tha lo em maw ni chu aw ka ti a. Ka lo ui ve em em a, chuvanga he thu hi rawn sawi chhuak ka ni nghe nghe a.

Kum kal ta 2024 khan he school hi All India Sainik School National Game ah overall champion an ni nghe nghe a. Hei hi a mak em em a; sports infrastructure an nei thalo em em mai a, football, basketball leh volleyball khelhna chauh an nei a, thildang engmah an nei lo a ni. Chung an neih chhun pawh chu size tlinglo vek a ni. Chuti chung chuan All India Sainik School National Game ah overall champion an ni thei hi an chhuanawmin,

fak an phu a ni. Kan tu leh fate tan khi khi thil tangkai tak leh Mizoram tan pawh rohlu a ni thei dawnin ka hria a. Chuvang chuan, kan hlut erawh hi chu a ngai; ngaihhlutna chang kan hriat loh chuan state pawn atangin khi sikul tha tak zar hi min zo khalh dawn a ni. Basketball-ah phei chuan India ramah Sainik School intihsiakna ah hian kum thum an champion tawh a. Tuna naupangte khi an fel hle ti ila, a sual awm lo e. He sikul hi Mizoram tan ro hlu tak ni thei hi, ka sawi tak ang khan kan duh angin kan hlut lo mai a. Tuna a lan dan chuan 67% quota nei hian 50% vel chauh kan luahkhat fo. Chuvang chuan tan lak a ngai hle a ni. Tin, 2023 khan Subroto Cup Mizoram aiawhin an kal ve nghe nghe a ni.

Chutihlai chuan harsatna hrang hrang an nei a. An harsatna chu kan solve sak vek thei kher lo ang a. Tui, rain-water harvesting an neih loh avangin an buai thei hle a. GIA an dawn an sum neih ve chhun atanga 35-40% pawh tui lei nan an hman a ngai thin a. He an harstana hi kan State Government hian kan solve sak theih chuan a tha hle awm mang e. Tin, quarters an neih tlem avangin zirtirtu lak belhah harsatna an tawk tih report ka dawng bawh a. Covid hunlai khan central atangin GIA an hmu tha lo hle a, wawi thum lai an hmu mumal lo a ni. Amaherawhchu, tunah chuan pek an ni tawh a, kum khat erawh chu a lapse ta a ni ber awm e.

Demand No. 20 - School Education Department:

Sikul chungchangah Sorkar sikul zirtirtute kha kan han dem deuh viau a. An thlavang hauha aw ka te pawh hi awm ve hrim hrim se ka duh a. Sorkar sikul zirtirtute hi an khawngaihthlak hle mai a. Naupang tha an chang lo a. AN naupang chan ve te pawh a mak khawp mai, an nu leh pate hi. Private Sikula kan kala kan ngaihsak ang hian Sorkar Sikula kan kal tir hian kan ngaihsak nep tlat. Zirtirtute mai nilovin, nu leh pate pawhin mawh kan phur viau a ni.

Chuan, ka sawi fo thin pakhat chu - Naupang khawvel hi ngaihtuah a ngai a ni. Hmeichhe dinhmun chawikan te kan ti a, Thalai-khawvel te kan ti a, Naupang-khawvel hi kan ramah hian a chep hlein ka hria. NGO-te hian sikul compound hi nek kan chak a ni. Veng tin hian kan innek siak deuh. Kan hmun awl neih chhun hi a ni a, kei, ka lo ro ve viau thin a. Khawtlang hian sikul compound nek hi kan intihhmuh em aw tih mai tur a ni a. Chuvang chuan, sikul compound kan la neih chhun ang angte hi chu humhalh a, tun dinhmunah sikul tha tak kan din mai thei lo a nih pawhin, kan tu leh fate'n sikul tha tak an la rawn dinna turin a compound lo humhalh te hi a tha hle awm e. Pu Dy. Speaker, Sikul tha tehna chu - naupang thiam thei lo thiam tir hi a ni.

Demand No. 25 - PHE Department:

PHE hi ka intineitu deuh a. A chhan chu, Phase-I leh Phase-II sawn Aizawl West-III constituency saw a paltlang ruah mai a. Chuvang chuan, helaia han sawi loh kha a remin ka hre lo a. Ka'n sawi hram dawn a ni.

Tui pump tur a tlem avangin 2021 khan kan buai tawh a; 2023 khan kan buai leh a. Kumin hi Aizawl tui tlan ber Tlawng Lui tui tlem ber tum ni hiala ngaih ni awmin report-te ka lo dawng leh nghal a. Phase-II hi kan han nei hman hlauh hian min chhan hram hram ni hian a lang a. Amaherawhchu, Phase-I leh II hi chu a main ber chu a la ni. Litre maktaduai 9 lai Phase-I pawh hian a la pump chhuak thei a. Phase-II - litre 16 maktaduai, Phase-III litre 2.44 maktaduai chauh a ni. Amaherawhchu, hei hi awm lo se chu kan dinhmun chu a tha lo hle dawn a ni.

Hmanni ah a changtu Minister hian Phase-I leh Phase-II tui pump-na a hmunah tlawh a tum a, min rawn hrilh ve a. Mahni bial te a ni bawk a, ka zuk zui a. Hna an lo thawk nasa hle mai a. Tui pump tur a tlem deuh tawh avangin Tlawng Lui chhak ah an an khuap a, km 2 zet. An khuap li pung mai a, lawnglengin kan han chho a. He li tawp ah hian a dang an khuap leh ang a, tichuan, tui pump tur an siam belh dawn a ni. Hetianga theihtawpa kan tan avang hian kan nghei lo hram hram a ni a. Tui renchem leh tui hna tihpun kawngah tan lak hi kan mamawh takzet a ni.

Tin, Khatla Chawnga Road chungah Phase-II tui pump laia current a'n tawp thuta tui rawn invaw letina a siam nghawr na tak hi a awm thin a. Hun rei tak chhung, kum eng emaw zat chhung he House-ah pawh hian ka complain tawh a; House lo ah pawh ka complain a, min siam sak thei lo a. Kan Minister chak tak hian hmanni lawkah min siam that sak ta a. Chhungkaw tam tak mut tui lo kha tui takin an mut theih pah ta a. Ka lawm tak zet a, lawmthu ka'n sawi a ni.

Tin, thil pakhat, ka bial chhung a ni bawk a, han dil ve hram ka duh a. Pump House No. 2 kalkawng, a thlang lam leh a chhak lam Lawipu lam atanga kalna chhe em em mai, department pawhin kal nan an la hman reng tho si; mipui paw'n an hmang a. Khu khu min siam sak thei se kan va ti tehlul em, tiin ngen ngawl takin ka'n dil a ni.

Tin, zawhna pakhat - Tawi atanga tui kan lak thlak gravitation kha an peih dawn tawh em tih kha ka'n zawt bawk e.

Pu Dy. Speaker, Kan Minister zahawm tak tak pahnihte demand hi tha ka ti a, ka pawmpui e. Ka lawm e.

DEUTY SPEAKER: A hun dil dan I thiam hle mai. Pakhat te tein i dil a. Tunah South II bialtu MLA zahawm tak, Pu Lalchhuanthanga ilo sawm ang.

PU LALCHHUANTHANGA: Pu Dy. Speaker, ka lawm e. Tunlaiin *financial business* kan ti a, kan Minister-ten an demand an rawn pharh a, demand tam zawk kan lo sawi ta a. Chutih rual chuan MLA ten kan bial chhung tan demand kan lo sawi ve a; kan demand sawi hi a inang tlang khawp mai a. Chung kan sawi lar deuhthe chu - kawng tha lo te, sikul leh office building nei lo leh neihchhun pawh chhe lutuk te leh thawktu zirtirtu neilo te, indaihlo te a ni a.

Pu Dy. Speaker, kan ram hian State kan nihna kum 40 deuh thaw kan lo thleng ta a. Tuna kan MLA-pui teina kan demand sawi hi a la basic need hle mai a, kawng lehlamah chuan a lungchhiat thlakin ka hria a. Khang kum 40 deuhthaw kal tawhah engnge kan lo thawh, he Session-ah hian tawngkam tha ringawt mai hian thu hi kan lo sawia thil hi kan lo ti thin nge tih kha, ka rilruah a lang a. Rilru pawh kawng lehlamah chuan a na ve lek lek a ni.

DEPUTY SPEAKER: Ngawi lawk rawh aw. Dar 4:00 PM a ri tawh a. Kan chhunzawm tir zel mai dawn em ni ang? (House-in chhunzawm tir a remti a.) Tihdan thlak deuhin Dar 5:30 PM thleng sawi ila. Tichuan 5:30 PM atanga dar 6:00 PM chhung chawlh ni se, Dar 6:00 PM ah chhunzawm leh ni se a tha kan ti mai em? (House-in tha a ti a.) Aw le. Chhunzawm rawh LE.

PU LALCHHUANTHANGA: Tichuan kan demand sawi te pawh kan Minister-te tan pawh hian phurrit a lian hlein ka hria a. MLA ten demand kan sawi a, Kan sawi tam bawk tawh si a. Chutiingin pawisa hi a awm thut thei bawk si lo a, a luhai thlak dawn hlein ka hria.

Demand No. 38 - Rural Development Department:

Rural development department-a RD Block ramri siam dan hi tihdanglam a tul hlein hria a. Hei hi chu department mawhphurhna phei chu a ni chiah lo ang a, GAD lam pawh a ni maithei a. Hei, kan member zahawm tak Pu Zira bial te phei hi chu, a bial hi RD Block pathumin an pawt a, (pangnga zawk maw?) khang kha a ni a, a buaithlak khawp mai a. Hei hi siam rem deuh hlek a nih loh chuan hmasawna hnathawh hi a buaithlak hlein kan hria a ni. Tin, MLA tan pawh han tih vak ngaihna a awm lova. Chuvang chuan, kan RD Block te ramri hi tih fel deuha, development hnathawh nan pawh khairual zawka hnathawh a nih theihna turin RD Block ramri hi siam rem ni sela a thain kan ring a ni.

Demand No. 21 - Higher & Technical Education Department:

Lunglei Pukpui a Engineering College dinna tura building sak saw Congress hunlai a mi tawh kha a niin kan hria a. Term hmasa ah khan Subject Committee kha a hmunah te kan va kal a. A building pawimawh tak tak chu sak nimah sela, building sak loh hi a la tam khawp mai a. Tin, a kalkawng a thalo a, power supply a awmlo a, tui supply a la awmlo a, pawisa tam tak sen ralna sawti sawn a awm ta mai mai a, a pawu hlein ka hria. He project lian Zoram tana rotling tur hi engtin nge kan kal zel dawn, engtia kalpui zel tur nge a nih tih hi kan Minister hian a wind-up hunahrawn react thei sela.

Tin, NIT kan nei mai dawn emaw kan ti a, Lengpui ah. Heng te pawh hi engnge ni a dinhmun? Forest clearance tih vel avangin harsatna kan tawh niin ka hria a. Kan dinhmun hi kan Minister hian minrawn hrilhfiah sela. A pawu khap mai a, ramina zirna tha leh sang kan neih ve mai tur ang chi te tihian a thuanawp zel mai a, a pawu khawp mai a.

Tin, hei Mizoram-in Mizoram State University thar kan han nei dawn a ni a. Heng te pawh hi a bul tan atang hian felfai taka hma lak theih ni sela a lawmawm khawp ang. Ka bialah Gov't Model Comprehensive School a awm a, hmun hma an nei tha khawp mai a, a lawilen te pawh a nuam a. Hei hi department hian Auditorium ang chi te emaw, Sorkarin a mamawh building ang chi emaw te kha minrawn bun sak thei sela a tangkai dawn khawpin kan hria a. Sawtiang hmun hma tha leh lawilen nuam saw hmun dangah hian a awm kherin kan ring lo a. Kan Minister hian minrawn enpui se ka duh a.

Demand No. 25 - Public Health Engineering Department:

Kan PHE Minister hmalakna hi tha ka ti a. Hei, tunlai phei chuan tui supply te pawh kan dawng tha a ni ang, kan phun lo viau a; a hmalakna chak tak hi lawmawm kan ti a. Ka'n sawi duh chu, veng chhunga tuikhur kan lo neih thin ho hi thawm that a tulin ka hria a. Tin, ka bialah ngei pawh khatiang tuikhur siam tur ang chi te a awm ve a. Helamah te pawh hian kan PHE Minister hian hma thar, kan tuikhur neih sa han thuan that te, tuikhur dang han siam ang chi te pawh hma min lakpui theih chuan a lawmawm khawp ang.

Tin, ka bial lamah term hmasa lamah te bial enkawlin kan lo awm ve tawh a. Kan bial chhunga zirna-in te kha a lo tlabal em em mai a. A then phei chu fur lain class a lak theih loh a, inchung far te avangin kan buai hle a ni. Amaherawhchu, hei Kimtea Enterprise hi rangva zuar a ni a, an company lamah min lo sawipui a, rangva tha chi kha sikul 6 laiah

min chih sak a kan lawm hle mai a, he House zahawm tak kaltlang hian lawmthu kan sawi a ni. Tin, chung kan sikul chung kan han khuh te chu kan sawi nghe nghe ang e - Tlangnuam Primary Sschool I, Tlangnuam Primary School III, Salem Veng Primary School, ITI Middel School leh Kulikawn Primary School te an ni.

Demand No. 25 - Horticulture Department:

Zoram hi Horticulture tana potential tha tak a ni tih kan hria a. Hlawk zawk leh tam zawka kan tharchhuah theihna turin department hian tan han la leh zual sela ka ti a. Purun leh alu ah te pawisa tam tak kan seng thin a, he lamah te pawh hian tan lak dan a awm em, tih kha ka'n sawichhuak duh a. Department hian hma thar han la thei sela.

Tichuan, Pu Dy. Speaker, kan Minister pahnihte demand hi tha ka ti a, ka pawmpui e.

DEPUTY SPEAKER: Tunah Mamit Bialtu Pu H. Lalzirliana ilo sawm ang.

PU H. LALZIRLIANA: Pu Dy. Speaker, ka lawm e. Vawiinah hian Minister chhuanawm tak takte pahnih Prof. Lalnilawma leh Dr. Vanlalhlana te demand sawi theia ka awm hi a hmasain lawmthu ka sawi a. Hei, kan Minister-te hi minister-te zingah pawh mi viak tha, mi smart em em maite an ni a. Mimal ang tak pawha kan bial te min duhsakpuitute pawh niin ka hria a, an chungah hian a hmasain lawmthu kan sawi a ni. Amaherawhchu, min lo hrethiam se kan duha chu, demand pahnih ve ve bak hi ka cover hman kan inring lo a, sawi chipchiar deuh hlek ka duh si a.

Demand No. 38 - Rural Development Department:

Nikum Ministry hmasa chhung zawng (kum 5 chhung) ka au tawh a. Tun Ministry ah pawh nikum khan ka au chhuak tawh bawk a, tunah hian kan au leh ang a. Ka wawi 7 auna tur a ni dawn ta a ni. Aizawl South-II MLA zahawm tak khan RD Block chungchanga ka bial minrawn veipui thu kha kan hria a, lawmawm ka ti hle a, a chungah lawmthu kan sawi a ni.

Hei, Mamit Constituency hi khaw 30 bawr vel kan awm a, a constituency chhungah khuan RD Block pakhat mah a awm lova. Kan biala khaw hrang hrangte hi RD Block 5 ah tunah hian then hran kan ni. Tlangnuam RD Block hnuaiyah hian Lengpui khua hi a awm a, Reiek RD Block hnuaiyah - Lengte, Nghalchawm, Rawpuichhip, Hmunpui, khulai bawr zawng zawng Dapchhuah tih te a awm a, khaw 7-8 bawr vel. Tichuan West Phaileng RD Block khu Dampa Constituency chhunga awm a ni a, a hnuaiyah khaw 6-7 bawr vel a awm bawk a. Tichuan, Kawrtethawveng RD Block ah hian chutiang bawk chu a ni a. Zawlnuam RD Block ah hian Mamit leh a chheh vel khu an awm bawk a ni.

RD Block pangaah kan bial hi thenhran a ni a, kan bial chhungah pakhatmah kan nei lo. Vawiinah hian kan Minister zahawm tak hi a bik takin kan ngen leh duh a. State hrang hrangte data te ka'n collect a. Mizoram-ah tunah hian RD Block 28 kan nei a, Nagaland-in 74 bawr vel an nei a; Meghalaya-in 46 an nei bawk a. Tripura-ah hian RD Block 58 vel an nei a, Arunachal-in 129 bawr vel, Assam-in 239 bawr vel, Manipur-ah 70 bawr vel; Sikkim, keini aia State te daih pawhin RD Block 33 a nei a ni. Chuvangin, scope a awm a, kan la explore full lo a ni. Vawiinah hian kan RD Minister zahawm leh smart tak hian possibility min han explore sak sela. Mamit khaw chhung takah a theih loh a nih pawhin, khulai chhehvel - Luangpawl te, Sabual te, Dampui ten kan chhawr tangkai tura dah ve dan a awm a ni.

Ka sawi fo thin - RD Block hi development intanna a ni. Ka bial chhung Phaizau te, Dampui te hian MLA ka nih hma khan RD Block kan nei tih pawh an lo hre lo reng reng; an chhawr tangkailo; Zawlnuam-ah daih a nih avang khan an zu kal ngai lo hrim hrim a ni. Tun hnu ah chuan eng eng emaw te kan han insawihmuh avanga zuk bekbawr ve tura kan tih avangin an inpawh ve ta zawk a. Chu chu kan dinhmun a ni. Khawngaih takin kan Minister zahawm tak hian hei hi min lo chhinchhiah sak sela ka duh tak zet zet a ni.

Tichuan, RD hnuai hian tunhmaa kan RD kawng, 'Pu Thangtea Road' an tih mai Phaileng to ICL Kawn, Dampui kawng khu a ni a. A kaltlang ve theih tawh thin a, kawng hnai te a ni a. Thal lai chuan an ti pawp nawk nawk a, a kal leh theih mai thin bawk a ni. Khulai khu khawngaih takin min lo hriatsak sela, sum tam pawh a ngaih ka ring lo. RD hnuai hmalak tawhna a nih avangin heng te hi min han thualthat sak leh theih chuan kan lawm ngawt ang.

Tin, Rawpuichhip to Hmunpui hi kawng ruhro, kawng kaltlang sa, RD road hlui a ni. Hei pawh hi min han thual that sak bawk sela. Khu khu Hmunpui khua electric 11 kV luhna a ni leh nghal a, tunah khuan a line chhe siamtha khuan an buai char char ringawt mai a ni. Khulai khu a kawng te han siamthat ve a nih chuan electric line thlengin harsatna a awm dawn lo a. Khu khu khawngaih takin min lo hriatsak bawk sela. Kan duh ber erawh chu - RD Block neih ve hi a ni tih kha kan main theme, kan chorus a ni. 'Kei zawng ka zai zel dawn ka ram tan' an tih ang deuh khan, 'Kei zawng ka au zel dawn ka bial tan' ka ti a ni. Tiang khan RD Block hi a kum 7-na a tan ka rawn auchhuahpui leh a ni e, Pu Dy. Speaker.

Demand No. 32 - PHE Department:

Tunah hian Mamit khawpuiah project lian pahnih a kal mup mup mai a. Pakhat chu AMRUT II hnuai 3.11 crore man tuilakna, MNF ministry hmasa ber a ni mai ang chu 2007-2008 vela kan lak kha a ni a. A hlui tawh a, a pipeline te a lo chhia a, a lo puak a. Chuvang chuan, a pipeline chhe zual thlakna tur km 2 bawr vel kha AMRUT II atang khan kan han hmu a, wawiini thleng hian nuai 165 chiah pek kan la ni a; nuai 146 chu pekloh kan la ni. A pipe han lei nan leh a material han chhawpchuah nan khan a ral a ni deuh der a. Tunah hian heng la pekloh balance hi khawngaihin rang takin min han pe se chuan kan zo vat ang a. Tuna a thar - Augmentation of Greater Mamit Water Supply Scheme kan neih mek Part I phei chu kan zo tawh a, raw water lakna kan ti fel vek tawh a, tunah hian Part II clear-water kha beih leh mek a ni. Chu pawh chu, a pipeline-in Mamit khawpui chhung a rawn thleng chho tawh a. Tunah hian khawpui chhungah pipeline te, tanky phei chu an siam zo vek tawh a, April thla tawp phei hi chuan pump theih an inbeisei tawh a ni.

Tuna kan harsatna hi electric thalo te a ni a, kan neih ang chhun chhun pipeline chhia repair mek karah current that tawk lohna avangin kan pump hlei thei lo a, Mamit khawpui chhung khu tunah khuan tui kan harsa chho viau a ni. Amaherawhchu, thla hnih-khat hnuah he project te kan han zawh fel chuan kan hnianghnar hle turah kan inngai a. 135 LPCD tura design a ni a, tuna augmentation hi. Kan neih sa 40 LPCD hian min la chawm thei tura ngaih a ni a. Chuvangin, an that ve ve hunah phei chuan 175 LPCD kan nei dawn a. Khawpui dang zawng zawng, Aizawl ai pawhin kan hnianghnar dawn a ni. Hei hi kan nghakhlel khawp mai tih kha wawinah ka'n sawi duh a. Kan pawisa la hmuh loh hnathawktu department ten harsatna an tawh AMRUT II atanga sanction awm tawh si hi UD&PA hnuai atanga tih tur niin ka hria a, a funding a hi. Hei hi khawngaih takin min hriatsak sela, kan Minister khan.

Hna tluang taka thawh a nih theih nan JJM hnuaiah khua kan cover chho tha viau a. A bik takin Lengpui khu a department lam hian a population leh tuna infrastructure kan neihah khuan an in manage thei a ni, an ti a, amaherawhchu, a takah a ni silo a. Hei hi khawngaih takin department lam te pawhin min han enchian sak sela. A population leh tuna facilities khu, 'la pek belh chi a la nilo, an la indaih a ni' min tih sak bawk si a; a physical-ah, a reality-ah an indaih bawk silo a, an tlachham bawk si a. Khulai taka khu min zuk zirchian sak turin ka'n ngen a ni.

Demand No. 21 - Higher & Technical Department:

Pu Dy. Speaker, keini bial hi Ministry hmasaah pawh kan sawi fo thin, 'kan bialah chuan a tam ber chu, awmlo hi a ni' kan tih thin kha a ni a. Vawiinah hian chu chu kan la rawn din chhuahpui tho a ni a. Kan Minister zahawm tak hian min ngaihtuah a. A bik takin Mamit College-ah khuan term hmasaah khan geography subject kan introduce a, zirtirtu pahnih kha MLA fund-in ka chhawr char char a. Mahse, a hnu ah zirtirtu pakhat kha sorkar atangin min han tihfel sak ve leh a. Tichuan, hmanni lawka circular chhuakah khan geography subject kha pah leh tura tih a ni a. Mahse, kan hotute'n min han consider sak leh a, min han dah sak leh a. Chutah chuan, tunah hian zirtirtute pawh kan la duh belhin kan ring a. Tin, hei hi core subject-a lak theih tura min ruahman sak kan duh hle a ni. An han zir ve a, core subject-a lak theihloh a nih avangin zirlai te a ti chi-ai deuh hlek a ni tih min han hriat sak se ka duh a.

Tin, Mamit College khu District-ah chuan kan college neih changtlung ve ber a ni a. Arts chauh nilo Science emaw, Commerce emaw tal hi dah belh theih ni se. Commerce-ah ngat phei chuan infrastructure lamah chuan engmah dah belh a ngailo, a building-in a tlin a, lecturer pek kha a ni mai. Tin, +2-ah Commerce subject kan nei si a, anni zir leh zelna tur khu a khaihlak ru riau a. Hei hi khawngaih takin min ngaihtuah sak sela ka'n ti a ni.

Demand No. 20 - School Education Department:

School Education hnuaiah hian sorkar hmasaa upgradation kha tunah hian grant-in-aid-ah High School II, Mamit leh Hmunpui hi an awm a, provincialised tura chhawpchhuah kha a ni a, an nghakhlel em em a ni. Heng te hi hlawhtling thei se kan duh hle a ni. Mamit HS II bika hi a building a tawih tawh em em a, MP fund-in nuai 5 an hmu a. Tunah khuan a zirtirtute leh khawtlang thahnemngai contribution leh hnatlang te nen an han bei chho a. Hindustan Petroleum a ka thawh lai khan CSR atangin kum 15 kal ta vel kha a ni ang e, repair kan tih sak a. Chu chu an rin chhoh char char a ni a. Tunah hian chu MP fund leh contribution atang te chuan han tih chhoh that mek a ni a. Hengte hi min hriat sak sela. MLA fund atang te pawhin la tihpui dan te pawh kan zawng tho ang a. Minister hian min lo hriat sak sela ka ti hle a ni.

Tin, Rawpuichhip-ah hian Pu Muanpuia te nen kan sawi thin a; kan mamawh tak zet a ni, Higher Secondary hi. Khulai bawr khu a buaithlak lutuk a. Rulpuihlim, Pu Muanpuia te khua te, Dapchhuah te, Hmunpui te, Rawpuichhip te, khulaiah a feeder an tha a, tin, an awmna khu a lai lutuk a ni. Aizawl-ah kal vek theih a ni si lo a, Mamit-a rawn kal vek thei an ni bawk si lova. Khulaiah khuan, a logistics te ngaihtuahin a awm viau a ni tih kha min hriat sak sela, chance hmasa berah hei hi min tihsak sela kan duh hle a ni.

Tin, a hmaa ka rawn sawi zawk tawh, kan thiante pawhin an rawn sawi zawk tawh, Chakma Area ah khan primary level emaw, middle level emaw tal Mizo-tawng subject insist hi ti ila a thain ka hria a. Chu chu nakin zel atan pawh thil pawimawh a ni ti ka'n hria a ni.

Khangte kha ka'n sawi theih tawk ni sela. Pu Dy. Speaker, hun min pek belh avangin ka lawm e. Kan Minister zahawm tak tak te pahnih Demand hi ka thlawp a, tangkai taka hman a nih theih nan ka pawmpui e. Ka lawm e.

DEPUTY SPEAKER: Pu Zira hi a aw hi a tha a; chawhnu tlai lamah pawh battery thun thar ang deuh hi a ni a, a la ri ring tha reng a ni. Tunah MLA zahawm tak Tuichang bialtu Pu W. Chhuanawma ilo sawm ang u.

PU W. CHHUANAWMA: Pu Dy. Speaker, ka lawm e. Vawiinah kan Minister viak tha tak tak Dr. Vanlalhlana te leh Prof. Lalnilawma te Demand kan sawi dawn a. A hmasa berah chuan School Education chungchang hi han sawi ila.

Dermand No. 20 - School Education Derpartment: -

Kan sorkar tirh khan MSSSB kha 'induhsakna kawng a inhawng zau em mai' tiin kan han ti tawp a ni a, Sorkarin. Chumi hnuah chuan zirtirtu kan han la ve ta a, Primary School ah hian zirtirtu 648, Middle School ah 371 leh High School ah 350 lak an ni a. Keini ah chuan a tling leh tlak apiangte lak kha a ni a, tunah hian tu pawh an lawm niin kan hria a. Politic ramah inrawlhna awm lovin, a tling leh tlak apiang an tling mai a ni. He zirtirtu lakah hi a thianghlimin a fair em em a ni.

Chu mai nilovin, indaihlohna a la nasa a, ka bial lamah pawh Primary te, Middle School te High School te pawh a la ni vek mai. Chungah chuan, zirtirtu 234 chu lak thar tur a ni leh te hi a lawmawm hlein ka hria. Tin, pawimawh deuh mai pakhat chu – Naupang midday meal engzatnge pek an nih thin tih te endik nan Automated Monitoring System hman a ni a, a lawmawm hle mai. Tin, cook te hlawh ₹100/-a tihpun a ni a. Tichuan, thlatin ₹3000/-an la ve ta a ni a.

Tin, lawmthu han sawina tur pakhat ka neih chu - Adult Education Wing hnuaiia hma lakna hrang hrangah ka bial Khawzawl-ah pawh hma lak mek a ni hi lawmawm ka ti khawp mai. Tichuan, kan Minister changtu hian lo hria se ka duh chu, Vaivakawn-ah khuan nikum furah khan Vaivakawn Vengthlang-ah lei a tawlh vak mai a, primary school kha lei che zingah khan a tel a, thiah a ni a. School naupang 20-30 nei ve thin an ni a, an chhawr tangkai em em a. Hei hi min lo hriat saka, engtin emaw min tihsak a duhawm khawp mai.

Tichuan, ka bial chhungah hian DEO leh SDEO ten office an nei lova, school building hlui tawh tak an luah thin a ni. Vawikhat ka tlawh a, a fai th a. Amaherawhchu, a chhung ka'n hawi vel a, inchung liang leh a bang inrina zai zaihan a khi tlang vek mai a. Hei fur leh thal thlipui a han tuar leh tur hi huphurhawm tak niin ka hria a. School Education tan hian sum demand hi a tam hlein ka hria a, a crore ₹1727 lai a ni. Chuvangin, office building atan school building chhe tawh tak kan luah hi kan Minister chak tak hianin, 'hei te hi chu office building sak nan lo va hmang keuh te u' a tih theih ka ring a ni. Chu mai a la ni lo, DEO leh SDEO quarters an la nei lo bawk a, min transfer sak vaih phei chuan a lo kal leh turte tan in luah tur an zawn zak zak a ngai dawn a ni. Chuvangin, hemi an office sak pah hian an

quarters tur chu awlsam takin a sak theih ngei ang a. Hei hi kan Minister hian min lo chhin chhiah sak turin ka'n ngen tlat a ni.

Tichuan Higher lamah Khawzawl College-in mamawh tam tak a nei a ni. Khawzawl College khi a tlahniam zawngin a kal em aw tih turin a kal a ni. A chhan chu, thawktu manpower leh zirtirtu lamah pawh indaihlohna englai pawhin a nasat reng thin vang a ni a. Damlo hi damdawi pek loh chuan dam a har em em a ni. Chutiang chuan inkhai chhuak leh tur chuan mamawh kha minrawn pek a ngai a. LDC hi a pension hnuah post a ruak reng a, hnawhkhah a tul em em a ni. College ve riang ruangah LDC nei lo chu a pawh khawp mai. Tin, English zirtirtu Asst. Professor pakhat kan mamawh belh khawp mai; chu chu min lo hriat sak sela. Tin, Librarian kan mamawh bawka, Computer Operator thiam tak an awm lo bawka, a pawh khawp mai. Hei pawh hi min lo hriat saka, kan mamawhte hi min pek ngei kan duh bawka a ni.

Demand No. 32 - Horticulture Department:

Prof. Nilawma chan lampangah. Kan District hi Agriculture & Allied activities lamah hian kan kal nasa a; Tuichangral khi hnathawk nasa bial kan ni a. Heng tomato te, zikhlum leh thei chi hrang hrang lakhuihthei te an thar nasa em em a ni. Amaherawhchu, thil awm rei thei lo an ching nasat avangin kan farmers te hian mamawh chi hrang hrang an nei a ni. A bik takin tomato leh zikhlum chinna ah hian eng eng emaw mamawh, tui pekna tur pipe te pawh a ngai thin a. Heng an mamawhte hi subsidised rate-a pek a va tha em.

Tin, sawhthing kan ching nasa bawka, kuminah pawh a hralh tam ber district 3 zingah kan tel a ni. Amaherawhchu, a chi buaipuina leh an sawngbawlina tur damdawi hi farmers te hnenah a rang lama pek chhuah theih ni se a lawmawm ngawtin a rinawm. Tin, Sialhawk leh heng a chhehvel zawng zawng khua hi lakhuihthei ching an ni a, quintal singkhat chuang te an thar thin a ni. Amaherawhchu, heng hi a hmin tawh hnu phei chuan a kungah a awm rei thei lova. seng tawh hnuah erawh chuan a awm rei thei lo khawp mai. Chuvangin, Horticulture lam hian heng hi chu min ngaihtuah zelin kan hria a, kan bial hi chuan Horticulture hi kan hmang tangkaiiin kan chhawr em em bawka a ni.

Demand No. 38 - RD Department:

Kum 2024 khan Khawzawl DRDO office-a thawk Asst. Rural Engineer chu Champhaiah sawn a ni a. He ARE hi RD Department chang nilo, Khawzawl Department dang dangin DPR te, plan leh estimate lian tham leh project hlawm lian deuh siam tura an hman ber leh an rin ber a ni a. A awmlah hian RD Department chauh nilo office dang engineer nei ve lote kan buai phah hle mai thin a. A bik takin Khawzawl District hi kan hnufum phah em em a. District thar pathumte zingah pawh 3-na kan niin ka hria; kan hnufual e mem a ni. Chuvangin, thawktu kan mamawhna hi khawngaihin min finfiah saka min dah sak turin kan duh a ni.

Demand No. 25 - PHE Department:

Khawzawl khawpui hi Chawngtlai, Changeltui leh Tuichang - Water Pumping Scheme hmangin tui in tur pek a ni a, kan rinpui ber Tuichang pump house awmna Dendum hi Tuichang atanga km 4 bawr vela hla a ni a, a panna kawng hi a chhe hle a. Tin, he kawng hi loneitute kalkawng a ni a, Khawzawl khawpui chhunga mi deuh zawng zawngin a an hman a ni. Chuvangin, he tui hi Khawzawl mipui, mihring 15000 vel rinpui ber a ni bawka a ni. A kawng panna hi siam a ngai khawp mai. A theih chuan, lungte pakhata sava pahniha

vawm thlak ang a ni dawn a ni. Fur lai hian a pumpna khawl te a chhiat chuan siam tura zu kal tur hian motor 4 wheel a ngai a, motor pangngai a kal thei lo a ni. Chutiang khawp chuan motor tha deuh bik anih loh chuan a kal thei lo a ni. He kawng hi kan siam chuan kan changkan phah lawih dawn a ni. Nichina ka sawi ang khan, PHE sum demand hi a tam hle mai a, crore ₹285 ngawt mai a ni a, heta tang hian crore 3 lek te hi chu, “Dendum kawng siam nan hian lo va hmang leh mai ta che u,” min ti se a.

Pu Dy Speaker, Vawiin a kan Demand sawi ho a hi a tha ka tiin, pass ngei turin ka thlawp e. Ka lawm e.

DEPUTY SPEAKER: Tuirial Bialtu MLA Pu K. Laldawngliana ilo sawm ang.

PU K. LALDAWNGLIANA: Pu Dy Speaker, ka lawm e. Vawiinah kan Minister zahawm tak tak Dr. Vanlalhlana leh Prof. Lalnilawma Demand pawimawh tak mai kan han sawi ho thei tur hi ka lawm hle mai.

Demand No. 20 - School Education Department:

A hmasa bera kan sawi duh chu, kan ram hmel lanna ber mai, zirna leh thiamna min petu a ni a. Bial neitute chu kan ngaihndan a inang tlang khawp mai a, zirtirtu indaih lo te, school that tawk lo te avanga kan harsatna kan sawi tlangpui a. Chuta kan sawi hmasak ber duh chu, zirtirtute kan inenfiah a ngai hle mai. Kan tu leh fa te kan kal tir duh loh hi sorkar schoolah hian kan chhiatna chhan a niin ka hria. Tun Ni 14.3.2024 khan Kawnpui PS-I kum 100 lawmna kan zuk hmang a, chutah pawh chuan ka sawi a, “kum 100 kan ni tawh bawk a, English Medium school-a let turin tan ila ho ang u” kan ti a, committee pawh kan zuk din ho a. Kan Minister zahawm takin min lo chhinchhiah sak sela, model school atan kan ti dawn a, fund atanga theih ang tawk tawka hma laka sorkar school tih changtlunna tur kan zuk puang a ni tih kha kan sawi lang hmasa duh a ni.

Sorkar hmasaa Minister leh tuna kan Minister te hi ka fak khawp mai a. Ka bial hi min ngaihsak a, hmasawna tam tak kan hmu a, a lawmawm ka ti khawp mai a. A bikin school upgrade tur hi kan lo nghakhlel hle a ni tih kha kan sawi lang tel duh bawk a. Tunah Mualkhang Govt. MS min sak zawh sak tawh a, SSA hnuaiyah school 31 bakah mipa leh hmeichhe toilet te min sak sak tawh bawk a. Tin, minor repair ringawt pawh hi school 37-ah min tih zawh sak tawh bawk a. Tin, zirtirtu indaih lohna hi school 60-ah casual teacher min pe bawk a, min duhsak khawp mai a, an hnenah lawmthu tih tak zetin Pu Dy. Speaker, nangmah kaltlangin ka sawi duh bawk a ni. Tichuan, kan hmachhawp Govt. HS, Hortoki leh North Chaltlang-a quarters sakna te min hriatsak sela tih te kha kan sawi tel duh bawk a.

Zirtirtu lehschool chungchang hi ka sawi fo thin a, a dik khawp mai. Kan Minister-in min lo chhin chhiah sak atan thil pawimawh deuh ka rilrua awm chu - zirtirtu hi indaih ngaihna a awm lovin ka hria a. A chhan chu, 2008 bawr vel pawha Sub-Divisional Office kan hawn te pawh khan a post hi kan create chuang reng reng lo mai a. Zirtirtu awm apiang hi a zitirna hmunah awm lovin, office-ah kan attached zel mai a ni. Tun hma in Saitual te, Khawzawl te, Hnahthial te pawh kan han hawng ta a, post create lovin zirtirtu bawk kan attached zel a ni. Hengte avang hian harsatna kan tawh phah niin ka hria a.

Tin, zirtirtu kan indaih lo hle mai a, a nghet lo ringawt pawh hi 160 an awm a, nghehna awm miah lo school 110 ngawt a awm a. Tin, headmaster neih miah lohna school 652

ngawt a awm a ni a. Dik tak chuan sorkar thar, kalphung-thar ZPM sorkar pawh hi, headmaster tur hi awm miah lo se an buai ve ngawtin ka ring a ni. Chuvang chuan, heng hi ngaihtuah a ngai; headmaster an awm a ngai. Hotu ber awm lo chuan school kha a tha thei ngawt dawn em ni, kan ti deuh hlek a ni. Tin, Pu Dy. Speaker, scholarship te pawh hi zirlaite hnena a hun taka pe thei tura hma kan lak a ngai hle a ni.

Demand No. 21 - Higher & Technical Education Department:

Hmanni lawk khan Mizoram State University tur Bill kan pass a. Hei hi kan pass tawh bawk a, chak takin kan Minister zahawm takin hma la se. Hei hi a nghahhlehawm hle a ni tih kha ka'n sawi lang tel duh a.

College casual teacher 2020 Covid laia an lak tam tak kha kan ban ta teuh mai a. A then phei chu kan revoke a nih kha (engnge a subject ka hre talo); kan kan ban ta teuh mai a, amaherawhchu, tunhnaiah casual teacher kan la tho bawk si a. Pu Dy. Speaker, khatah khan qualify vek em ni kan lak tak, khangte kha engtin nge an lak dan leh interview dan te, tih te kha ka rilruah a awm deuh hlek a, min lo feedback theih chuan ka lawm ngawt ang. Thenkhat nupui, pasal, fanau chawmin an lo thawk rei tawh si a, kan ban ta tawp mai a. Tin, college-a thawk thenkhat kha stop-gap arrangement an ti a, transfer chiah loh te khan an han dah tlang a. Khangte kha lak kir leh tur an ni em; an college ngaiyah an awm leh dawn em, tih te kha min lo chhinchhiah sak sela. Tin, Govt. College hrang hrangah contract basis-a lak Asst. Proffessor qualify bawk, sanction post pawh awm vek mi 36 te kha regularized tumna tun hnai ah a awm em tih te min lo chhinchhiah sak bawk sela. Tin, RUSA teacher te pawh hian dah ngheh hi an lo nghakhlel tawh khawp mai tih te pawh kha.

Higher & Technical Education bikah hian buaina deuh kan nei a. Kawnpui College-ah MLA apiang a chairman-ah min dah a, kan zuk meeting thin a ni. Kan MLA fund atangin hnathawktu tur kan pe reng ringawt mai a, khawtlang hruaitute'n an lo ti tawh si a. Hei hi engtia kalpui zel chi nge? An ngaihtlak thapin ka ring a, tunah hian. Ka sawi dawn ka tih tawh avangin. Mizoram University hnuaia kan kal zel dan tur te pawh hi a nihna ang te hi min hrilh se, tih hi ka duh khawp mai a. Kan kal zel dan turah harsatna tam tak kan tawh a ni tih te pawh hi min lo hriat sak sela.

Demand No. 26 - Information & Public Relations Department:

Tunlai kan thu leh hla, kan buaipui ber titute hi an ni a, kan fimkhur zual deuh a ngaiin ka hria a. Information public/mipuia kan pekna hi a dik tawh tawh lo. First information-a dik thin loh avangin mipui kan phili a, kan buai tlat mai a ni. Chuvang chuan, thudik hi puan chhuah thin ni se a thain ka hria, department hotute pawhin. Thudiklo kan tihchhuah avangin harsatna kan tawh thin a, kan moral a ti chhia a ni. kan moral te, kan society te a that zawk theihna turin Information & Public Relations pawimawh lutuk hi kan Minister-in lo enkawl uluk zual deuh se, tih kha ka'n sawi tel duh bawh a ni.

Demand No. 25 - Public Health Engineering Department:

He khawvela piang tawh zawng zawng, mihring pawh, rannung pawh ni se, a tel lova kan awm theih loh department a ni a, tui tel lovin kan khawsa thei miah lo a ni. Hei hi kan ngai pawimawh tlang a, kan sawi tam tawh a. PHE department-a JJM scheme hnuaia hnathawh project 852 awm kha, engzat nge zawh ni tawha, enghzah nge zawh loh la awm tih kha ka rilruah a awm deuh bawh a. Khami kal zelah khan ka bialah pawh malsawmna tam tak kan dawng a. Hmanni lawkah Zanlawn solar pumping an zawh tak chungchangah khan kan

Minister chungah, Pu Dy. Speaker, nangmah kal tlangin lawmthu ka sawi duh bawk a. Tunah hmachhawp Lungmuat leh North Chaltlang te kan mamawh ngawih ngawih; min lo chhinchhiah sak sela, solar pumping kha kan dil ngawt a, min tih hlawhtlin sak ngei kan beisei tlat a ni.

Tin, AMRUT scheme hnuaiiah hian Kawnpui Hmar Veng, Phunchawng ram tui pek leh sem chhuahna tur kha kan la thawk thei chiah lo a, engtik hunah nge kan thawh theih ang tih kha kan sawi lang tel leh duh bawk a ni. Tui chungchang hi ram pumpuiin, kan Minister pawh khan a sawi a, 'tuiah kan buai ta e' a ti a, a dik ka ring a. Tunah pawh hian kan harsa a. Chuvang chuan, tuihna humhalh chungchangah te, tui khawl chungchang te kan inzirtir uar a ngai a; tui renchem pawh hi kan inzirtir a tul tawh a ni tih te hi ka ngaihtuahnaah a awm bawk a.

Demand No. 32 - Horticulture Department:

He hi kan hriselna tur atana thlai leh thei department a ni a, a pawimawh khawp mai a. Kan Minister hi Pu Dy. Speaker, nangmah kaltlangin lawmthu ka hrilh leh duh a. Kan bial chhunga chhungkaw 225 velah thei leh thlai, a tul ang anga tih tur min pek sak tawh a, a chungah lawmthu kan sawinawn duh a. Tun hnuaiiah hian Kawnpui, Serlui-hnar-zau tan lei tha te, thlai chi te, low cost green house kan tih te pawh min tih sak leh mek bawk a. Kan mamawh em em mai vegetable chi hrang hrang, heng -Lungdai, Serkhan leh Zanlawn ah te tunah hian hmalakna a kal mek a. Tin, sorkar kal tawh zawng zawngte'n kut-hnathawktute mamawh em em tui pipe te, sprayer ang chi te kha subsidy-a lei leh theih tura kan ngaihtuah a ngai a ni.

Demand No. 38 - Rural Development Department:

Ka bial chhungah PMKSY, BDO kal tlangin hna tha tak, hlawk thlak takin kan thawk a, kan VC te nena thawhhona tha tak nen a kal a. Ni-100 inhlawhna job card hi keini bialah hian 6113 kan nei a, hna hrang hrang 583 hmangin kan thawk mup mup a ni. Tin, SASCI hnuaiiah library hmun tam takah sak a ni a, 273 sak turah ka bial chhunga khaw 14 ngawtah min sak sak a, bial aiawhin Pu Dy. Speaker, lawmthu kan sawi bawk a ni. Amaherawhchu, khaw pakhat an lo theihngilh a, hrehawm lutuk, Lungmuat. Lungmuat khua hi tih leh hmasak bera tih atan min lo chhinchhiah sak dawn nia.

Pu Dy Speaker, kan Minister zahawm tak nen pawh kan sawi tawh a, tunah hian kan mamawh avangin Serkhan Hall sak, a bul tan tawh hi MLA fund nena converge turin. Hemi avang hian ZPM pawhin VC an lak phah a ni, 'kan Minister nen kan ti dawn' kan ti a. Chutiang chuan VC thar kan neih, Hortoki-I ah pawh Hall, sorkar nen tangkawpin kan sa dawn kan ti a, Hortoki, hall nei miah lo khua ah VC thar a awm bawk a ni. Heng pahnih hi MLA fund nen kan tang kawp ang a, tih hlawhtlin ngei theih ni se tih kha ka sawi theih chu a ni a.

Pu Dy. Speaker, kan Minister zahawm tak tak pahnih demand-te hi tha ka ti a, ka pawmpui e. Ka lawm e.

DEPUTY SPEAKER: Pu Dawngtea hi ka bial thenawm, ka thenawmpa a ni a, thu a han sawi hi chu, a sawi tur hi an sawi khalh a hlau deuh thin nge, a hmanhmawh thei angreng khawp mai. Tunah chuan, Lunglei North bialtu Pu V. Malsawmtluanga ilo sawm ang.

PU V. MALSAWMTLUANGA: Pu Deputy Speaker, ka lawm e. Kan Minister chhuanawm tak tak - Dr. Vanlathlana leh Prof. Lalnilawma demand ka'n sawi dawn a ni a.

Demand No. 20 - School Education Department:

Kan hriat angin sorkar chuan a kumkhatna atan Year of Consolidation (inrenchem) a kalpui a. Chuti chung chung chuan education reforms a tum miao avang leh, he Zoram khai chhuak tur hian zirna a pawimawh zia hriain zirtirtu 1507 an la nghal hi, Minister a chhuanawm hlein ka hria a. Chu chang a ni lo a, House Leader leh kan Finance Minister ni bawk a fakawm hlein ka hria a, an chungah lawmthu ka sawi a. Kan ngaihthlak tawh ang khan, political fitness pakhatmah awm lovin lak an ni. Primary school teacher 461, middle school teacher 348, high school teacher 457, higher secondary teacher 241 lai mai lak a ni hi a ropui hle a. An chhuanawmin, 'Zoram tan a va hlu em' tiin bul kan han tan a ni.

Pu Dy. Speaker, Pathian leh mipui zarah bial enkawl te kan han nei chho a, bial kan han fang a. A bik takin, school kan han tlawh hian school sak that ngai (quarters te chu sawiloha lum a ni a) a tam em em ringawt te, computer tak ngial pawh min diltu hi, ka bialah pawh school tin hian min dil emaw tih mai tur hi a ni a. Ka sawi tum chu, sorkar hmasa te hmalakna chu ka sawi lo ang a; hetiang taka zirna ngaihthah a lo ni thin hi a mak hlein ka hria a ni.

He House zahawm tak kal tlanga zirtirtute ka han chah ve duh chu, Pu Dy. Speaker, i remtihain, ka pa chanchin hi ka sawi ve duh hrim hrim a. Ka pa hi middle school headmaster-a pension a ni a, state award leh national award a lo dawng tawh nghe nghe a. In chhungkhur mamawh leina kan neih loh lai pawh hian school tan chuan sum leh pai, a hlawh a sawr chhuak thei reng a ni. Ka han sawi tum zawk chu, tuna zirtirtu tam takte, kan moral reforms hi a va tul em! hlawh nuai tel te, sing tam tak te kan nei a, question paper print-na tur pawh thawh khawm hlei theilo rilru kan pu hi kan insiamthat a ngai hlein ka hria a. Zirtirtu fel leh thahnem ngai tak tak awm tho mahsela, tihte kha thuhma ah ka nei duh bawk a ni.

Tin, Pu Dy. Speaker, kan School building sak that ngaite a tam hle mai a. Heng hma lakna hrang hranga zinga NESIDS kaltlanga ₹4205 lakhs lai proposal a kal te, quarters mamawhna bial tinah a sang a; SASCI kal tlanga zirtirtu quarters sakna tur ₹3150 lakhs lai mai a kal te, infrastructure leh zirna kawng hrang hrangte'n hma kan sawn theihna tura PMJDK hnuaia ₹12271 lakhs chuang tuna project proposal kal mekte hi a ropui hlein ka hria a. He sorkar hian education reforms hi a va tum chiang em, ka ti a ni.

Pu Dy. Speaker, kan Minister chungah hian lawmthu ka sawi duh bawk a. ZPM sorkar hnu hian Lunglei District ah Boys Toilet ringawt pawh 23 chuang Girls Toilet 36 leh school major repair ngai 20 chuang siam a ni a. Chutiang chu sawi tur tam tak a awm a. RMSA hnuaiah teachers quarter Khawmawi leh Ralvawng ah te sak mek a ni a. Tin, Tlabung lam Science stream building sak mek te, chutiang chuan hmun hrang hrangah hma lak a ni a. Lunglei mipui aiawh pawhin lawmthu ka sawi duh bawk a ni. Tin, ka bial Hmuntlang-ah school sak that a ni tawh a, Mualthuam North, Sekhum, Thiltlang, Pangzawl leh hmun hrang hrangah ka bial chhungah ringawt pawh School sak that piah lamah toilet sak a lo ni tawh a. Heng ZPM sorkar hnua hmalakna hrang hrang avang hian bial aiawh pawhin lawm thu ka sawi bawk a ni. Tin, zirtirtu quarter hi bial dang ang tho khan ka bial chhungah pawh mamawhna a sang em em a. Kan Minister-in min lo hriat sak se, tiin ka chah bawk a ni.

Tin, MLA tinte kan Minister hian min ngen a. Hmun dangah eng angin nge hma an lak ka hre chiah lova. Ka bialah chuan school adopt kan nei tawh a, Serkawn school-pui kum 1903-a lo din tawh kha MLA ka nihna angin ka adopt a, financial year thar atang hian thla tin ₹20,000/- (singnih) support na tur ka pe ziah dawn a ni, tih pawh ka sawi lang duh a. He school hi kan hriat angin kawng hrang hrangin hma lak chhoh a ngai nasa em em a, kan Chief Minister lo ni tawhte kal tawhna a ni a, Pu Thenphunga te, Pu Laldenga te kal tawhna a ni. Kan mi ropui tak tak leh politician ropui tak takte a lo hring chhuak tawh a. Tin, kan Minister ngei, a pa Pu C. Biakmawia pawh a lo kal tawhna a ni a. Kei ngei pawh hi he school chhuak ka ni te hi ka inchhuang ve em em a ni. Heng adopt school kan kalpui turah hian mamawh tak takte kan la nei ang a, kan minister hnenah pawh kan la thlen dawn a ni a. Tin, Mualthuam North High School sak thatna tur ₹119,21,000/- lai ruahmanna a awm te hi, a chungah lawmthu ka sawi bawk a ni. Khangte kha min lo ngaih pawimawh sak turin Pu Dy. Speaker, ka chah duh bawk a ni.

Demand No. 21 - Higher and Technical Education Department:

Kan hriat angin Lunglei lamah Politechnic tha tak mai kan nei a. Amaherawhchu, sorkar hmasa lamin a ram chungthu ah ruahmanna felfai tak a lo kalpui lo a ni ber a, he ram luah man hi a ram neitu ten an dil a, court ah case file a ni a. Kan hriat angin executive order pawh a pe chhuak a, ₹98,05,033/- lai pek ngai a ni a. Sorkar hmasa-in a ngaihthah avangin harsatna lian tak kan tawk a ni. Chutih rual chuan, tun sorkarin theih tawp a chhuah chho hi a lawmawm hlein ka hria a, chin fel ngaite a ching fel thuai dawn ni pawhin a lang a ni.

Tin, Lunglei Government College leh JB College saw college upa tawh tak an ni a, Lunglei-ah chuan kan chhawr ber college an ni. Faculty indaihlohna a nasa em em a. Chu chang a la ni lova, Lunglei Government College phei chu Boys leh Women hostel cook-te duh angin a indaih lova, mamawhna a sang em em a. Khangte kha min lo hriat sak ta se. Tin, an bus saw tunah hman theih lohvin a awm a, dispose emaw, auction emawa tihfel a la ni lova. Hengte pawh hi sorkarah thlen a ni tawh a, kan minister pawhin min lo hriat sak ta se. Aw, Pu Speaker, an tifel tawh anih chu. A lawmawm hle mai; lawmthu pawh ka han sawi nghal a ni. Tin JB College saw mipui kan pung zel a, a campus a thang thei ve si lova. Saw ka bial chhung ngei Serkawn-ah sawn hmun tha tak mai an nei a, hengte pawh hi a theih ang anga hma min lakpui turin ka ngen leh duh bawk a ni.

Tin, Ni 3.2.2019 khan Prime Minister kha sorkar hmasa khan Engineering College an lo hawn tir tawh kha a ni a; ka bial chhung tho a ni a. Pu Dy. Speaker chhawrna a la awm lova, ti sawn a tawih ringawt mai dawn a ni. Lunglei mipuite chuan kan vei em em mai a ni. Hei, Pathian khawngaihna zarah ZPM sorkar a rawn piang ta a, Lunglei mipuite kan lawm hle mai a. House ah pawh a sawi tawh a ₹25 crore chuang special takin saw Engineering College run na tur sum a dah a. Chu chang a ni lova, PMJVK-ah ₹1483/- lakhs chuang tunah hian project a kal mek a, he sorkar chungah hian lawmthu kan sawi bawk a ni.

Demand No. 38 - Rural Development Department:

Kan hriat angin Library mamawhna khaw hrang hrangah a sang em em a. Ka bial chhung khaw 4 – Sekhum, Mualthuam North, Zotlang leh Serkawn-ah te min sak sak hi minister chungah lawm thu ka sawi bawk a. Chutih rual chuan, RD Block Haulawng-ah, helai hmunah ngei pawh hian ka lo tlangau pui tawh a. Kan mamawhna min hriat sak reng turin ka han ngen nawn leh a ni.

Tin, Pu Dy. Speaker, material component ah ringawt pawh hian khaw 9 chuangah PCC kawng leh kawng hrang hrangin hma min laksak a, a chungah lawm thu kan sawi bawk a ni.

Demand No. 28 - Horticulture Department:

Kan minister hi a chhuanawmin a fakawm hlein ka hria a. Department hma lakna, Tlawng Lui-zau ah te amah ngei a hmunah kalin ni sensa hnuaiah a rawn kal a ni a. Mausem, ka bial chhungah pawh a rawn kal tawh a, ka bial chhung Mualthuam North ah hian kum 2017 atang khan dragon fruits lo ching chhoin an uar chho zel a. Tunah hian chhung kaw 100 chuangin eizawna atan an hmang mek a. Tunah hian kum khatah hian quintal 450 vel thar thin ang a ni a. Chutiang zelin Haulawng te, Ramlaitui te, Sekhum ah te tunah hian an uar chho zel a ni. Tin, Lungmawi lamah balhla kan thar tha em em a, Mausem ah vek hian balhla te, lakhuihthei te thar chhuah mek a ni a. Hengah hian mamawh hrang hrangte kan nei ve ngei dawn a. Ka bial mipui kut-hnathawktute tana ka dilna hi kan minister-in min lo ngaih pawimawh sak turin ka ngen bawk a ni.

Demand No. 25 - PHE Department:

A tawp ber department ka han lut ang a. Pu Dy. Speaker, min lo hrethiam hram la. Hei Lunglei lam atang hian incharge kan indah ve a. Chu chu PHE hi ka mawhphurhna a ni a, he tah hian ka han lut leh hram ang e.

Kan hriat angin kan Minister hian theih tawp a rawn chhuah a, a zuan a zang em em a. Lunglei mipuite min ngai pawimawh a, kan Chief Minister-in min ngaih pawimawh tluk zetin. Tlawnglui tui pump-na te a hmunah ngei min rawn tlawh sak tawh a. Chu chang a ni lo va, Tlawng hnara Sairep khua pawh a han tlawh tawh a. Sairep khua pawhin Tlawng hnar an lo humhalhna-ah pawh lawmthu a lo sawi tawh a ni. Tunah hian Mat pump-na tur Greater-water supply scheme phase-II, inthlan dawn apianga kan tlangaupui thin, party tinin kan tlangaupui thin kha ₹380 lakhs chuang DPR siam a ni a. Hei hi State project ngaih pawimawh zinga min dah sak hi kan Chief Minister chungah Lunglei mipui aiawhin lawmthu ka sawi a. Kan sawi fo tawh angin, AMRUT 2.0 kal tlangin ₹997 lakhs tunah kalpui mek a ni bawk a.

A tawpna tak taka ka han sawi duh chu, tunah hian Lunglei hi thal apiangin tui kan harsa em em a, chawlhkar thum danah tui kan dawng chauh a ni a. Tui dawn apiang hian in bual chauh dawn ila chu, kan balin kan rim a tui vakin a rinawm loh a ni. Chutiang te chu a ni a. He Greater-water supply scheme kan hman lai mek hi hawn a nih khan mi 66000 chhawr theih tura ruahman a ni a. Tunah hian mi 157000 chuang kan lo ni tawh a. Heng te hi ngaipawimawhin SASCI ah Sorkar hian ₹5570 lakh chuang min dah sak a, tuna hmalakna awmah hian lawmthu ka'n han sawi nawn leh a ni. Tin, Sekhum, ka bial chhungah solar pump kan mamawh hle mai a, tuna awmlai hi tlemin han repair deuh te a ngai a, min lo hriat nawn sak leh ta se. Khaw dangte pawh a ni tho a. Tin, Ramlaitui ah hian tanky lian mamawhna a sang hle a ni.

Engpawh ni se, kan Minister chhuanawm tak takte Dr. Vanlalhlana leh Prof. Lalnilawma te Demand-te hi tha ka ti a, pass-pui ngei turin he House hi ka han ngenpui bawk a ni e. Ka lawm e.

DEPUTY SPEAKER: Tunah Hachhek Bialtu MLA zahawm tak Pu Robert Romawia Royte ilo sawm ang.

PU ROBERT ROMAWIA ROYTE: Pu Dy. Speaker, i chairman-na hnuaiah thusawi thei tura vanneihna ka chang hi ka lawm khawp mai a. I nihna avangin helai opposition lamah i thu lo thei lo va. Kan ngaihndan pawh a inang tawh viauin ka hria a. Inthlan leh hunah hian eng ticket-in nge i din ang aw, tih te rilruah ka lo ngaihtuah ru neuh neuh a. Tin, nimin lamah kan ri luai luai a, vawiin chu a light deuh hlek zawnga thil sawi te pawh a thain ka hria a.

Tun Assembly ah hian he House ah hian tlangnelna riau ka nei a. Pu Dy. Speaker, kan House Leader Chief Minister zahawm tak hi kum 2014 daih tawha MP Independent, common candidate ang deuha ka din khan ZNP hotupa a ni a, ka tana campaign kha a ni a. Khata a campaign-naa min duhsakna te kha ka hre thar a. A thusawi pakhatah khan, “Pu Robert Romawia Royte hi thlahtute atanga Pathian tih chhungkua, Pathian ram thawh lawm an chhungkuain an thawh te pawh kha, mi tam tak chuan kan thawh phalloh te pawh a ni ang a” te kha a ti a, kha kha kan phuloh tawp a ni a. Khatih lai khan thawh lawm te kan han thawh a, ACB ten ‘diklo pakhatmah a awm lo e’ an lo tih hlim te kha a ni bawk a. Khatiang taka ka nel ve leh min duhsaktu a ni a. Kan innel lutuk ang tih te pawh ka hlau lek lek a.

Tin, Pu K. Sapdanga te pawh ram hruaitu hlun a ni a. ZPM MLA zatve aia tam mah hian CM atan an duh ngat kha kan zingah hian a awm a ni, te an ti a. Tak tak phe chu a ni lo mai thei a, a ni mai thei bawk a. Engpawh ni se, khalam kha chu sawi thui lo ila.

Thuhma ka neih duhna chhan Pu Hlana a lo chhuak hlauh a. Pu Hlana hi 2014-a MP candidate tur, opposition party ho an thutkhawma keimah min rawttu kha a ni tih, nichin lawk khan ka hre thar a, amahin min hrilh a. Chutiang vel chu a ni a, he House-a i dinglama thute hi min duhsaktute an nih hlawm avang hian tlangnel tak hian thu hi ka sawi ve mai thin a ni. Tin, Pu Muanpuia Punte lah ka thianpa a ni a, opposition lamin an tih ber hi ka nel ber, ka hlauh loh ber a ni bawk a. Kan nguai tawh deuha intih thawvannan chung chu ka’n sawi hmasa duh a ni.

Demand No. 48 - Information & Communication Technology Department:

Kan Minister zahawm tak Dr. Vanlalhlana Demand ICT leh Public Information hi ka sawi kawp duh a. A chhan chu, he Department pahnih hi awm kawp se ka duh khawp mai a. Recess Room ah pawh, ‘hetia amalgamation leh integration lam te in ti law law a nih chuan dah kawp a chi lo maw’ te ka lo ti a. ICT Department hi kum 5 lai ka lo enkawl ve kha a ni a, kan budget pumpui pawh crore 4 - 5 vel kha a ni thin a. Department dang nena amalgamate emaw a nih loh hi chuan budget han tihlen vak hleih theih ni pawhin a lang lo a. Chuvang chuan, Information & Public Relations nen hian a documentation chungchangah leh thil hrang hrang, information pek chhuah chungchangah te tunlaih digital platform hmanga kan tih zel tawh avangin awm dun sela a va tha awm em, tih hi ka rilru-ah a awm a ni.

Tin, SASCI hnuaiah khan State tam takin an hmuh loh laiin kan hun ve laiah khan kan official smart tak takte zarah 72.25 crore emaw ni kha kan hmu hlauh mai a. Untied Fund ang chi, SASCI Part-I ni lovah; (a part hming kha ka hre mai ta lo a) kan hmang hman mang lo a. Crore 22 emaw, crore 25 emaw ni kha chu tender te kan chhuah hman a, Sorkar

a tawp a. Crore 50 kha Supplementary Demand angin kumin 2023-2024 khan a lut chho a. Tunah chuan K-Deposit-ah nge a awm a, engtinng a awm tak tih a hriat mai loh a. Hei hi hman vat a tha ang em tih bakah, a status hrim hrim hi ka han hre chak deuh a, kan hunlai thilte a nih avangin. Minister zahawm takin ruahmanna tha tak a siam ka ring a, chu chu min han sawifiah sak sela.

Tin, Government PR chungchang hi a pawimawh khawp mai a. Hengah hian Sorkar thil a nih chuan opposition lam MLA te, Kan Opp. leader te thu leh hla leh kal velna-te sorkar thil a nih chuan, party politics kha chu kan chhuah a ngai lo a, sorkar lam pawhin an chhuah ngai chuang lo a. Opposition pawh ni se, sorkar function a chief guest nih te pawh a awm ve thin a. Hengah hian Government PR ah hian kan chhuah ngai lo han tih deuh te hi awmin ka hria a, professor pakhat ka biakah chuan. Chu ngawt chu a dik dawn em ni? BDO Chairman-na hnuaiah te, DC chairman-na hnuaiah te, Government function-ah opposition MLA te kan tel changte pawh a awm a. ZPM sorkar hnuaiah pawh hian inthliar lovin kal dial dial ila tih kha ka'n rawt duh a.

Tin, Advertisement Bill hi nimin nge ni aw, tukin zing lamah nge ni khan ka sawi zawk tawh a. hei hi a tam tham lo thin a. Mahse, ngaihtuahna lian tak tak hmangte kan lo nilo theilo a, a minister leh department head te pawh. Tam lo mahse, kan Chanchinbu mite advertisement bat sak loh hi kalphung tharah ni chho sela. Kan hun laite khan kan lo bat sak thin ang tih te ka ring a, khang kha chu thil hlui ni ta sela. 'Advertisement Bill na na na hi chu i pe zung zung ang u hmiang' tiin ka rawt a ni.

Demand No. 20 - School Education Department:

Education chungchangah, rei tak education-ah te pawh ka lo thawk ve tawh a. National Policy, 2020 hi an buatsaih chhoh lai te pawh khan Sports minister kan nih ve avang khan a copy te min pe ve ziah a, sawikhawmnaah te pawh tel ve chang kan han nei ve zeuh zeuh a. He House ngeiah pawh hian ka sawi tawh a; Education huam chin hi he Policy hian a rawn tidanglam nasa khawp mai a. Education Policy, 1986 te pawh a awm a, RTI Act te pawh kan nei a. Chutiang zawng zawng rawn conform deuh tho si hian Education Policy, 2020 ah hian thil a rawn huam zau khawp mai a. 'Sports hi Education a ni tawh a ni' tih kha chu kan hre vek tawh mai a. Mahse, chu mi hawi zawng chuan kan education hi a kal a ngai khawp mai. Kan theih ang angin sports facilities hi a complex a kan dah thei lo a nih pawhin, policy in a sawi ang khan a khua ten an intawm tur ang chi, MNF hun laia PMJVK hmanga Kawrthah Football Field kan siam ang chi te, Chawngte Football Field kan siam ang chi te, khatiing education institution-in an intawm theih ang chi education facilities tha kha kan siam zui zel hi a va ngai em.

Thenkhat education facility a ni tih hre mang lote pawh a awm theih a. Hall ang chi te, kan hmanna purpose kha education a ni emaw, education mi ten an hman tangkai khan, kha kha education resource a ni tih PMJVK Scheme ah khan chiang takin a inziak a. Tiang zawng khan Education Minister hi RD lam atang te emaw, Sports lam atang te emawa an facilities mamawh hi kan puih hi a ngaiin ka ring a. A chhan chu, Education Policy kha kha kan analyse chian chuan, gap hi a nasa tlat a ni. He infrastructural gap hi gap-funding scheme ang chi hmanga kan tih loh chuan education lawng lawng atang hi chuan kan mamawh hi kan phuhruk zo loh a hlauhawm a.

Tin, regularization leh court case chungchang te sawi ka tum a, ka sawi thui lo vang a. Zirtirtute dah ngheh chungchang emaw, an puala scheme siam chungchang emaw, SAMAGRA zawk nge, court case awm mek a awm niin ka hria a. Hengah hian zirtirtute an thawk thaa an qualified a nih chuan, khang buai leh a delay zawng lo hian court-in dah ngheh tur zawnga judgement a neih chuan han tihsak hram te hi a tha ang em tih te ka rilru ah a awm a.

Tin, transfer chungchang ah hian a Education officer-te pawh an ni thovin ka hria a, ka nihna hlui chu ani tho na a. Education Commission ten transfer chungchanga mithiamte ngaihdan recommendation te hi kan zirchian a ngai a. Zirtirtu transfer zut loh te hi Education Commission leh expert ten an recommend-na te kha a awm a ni tih kan hriat a tha a. ‘Ani chu a awm rei tawh; Aizawl ah chuti zah a awm tawh’ tia transfer chhuah tum ringawt ang chi te hi education expert te leh Commission ten antih zawng a ni chiah lo deuhin ka hria a ni.

Tin, upgradation chungchang kha an rawn sawi a. A tula an notified tawh a nih chuan, thil ngaite kan Minister hian a hre chiang viau a, a buaipui tho chungin, kha kha kan bial lamah te pawh upgradation nghakhlel ve tak tak khawtlangin an lo chawm fat fat te, zirna tha tak tak petute an awm nual mai a, ngaih pawimawh ran ni sela tih kha ka’n sawi duh a.

Demand No. 21 - Higher & Technical Education Department:

MZU (Mizoram University) kan nei hlutzia hi sawiloh theih niin ka hre lo a, he House zahawm takah hian. An result te a tha a ni mai lova, an practice te a tha a; an ranking engkim hi a tha em em a, chawimawi tlak an ni. Chutiang chiah chuan, State University Bill pass tu ah kan han tang bawk a, kan zavai hian hei hi support zui zel ila, budget tam zawk, sum tam zawk state university tha tak Mizoram University el phak kan siam hi kan ram kan hnam dinchhuahna tur a nih ka ring a ni.

Demand No. 25 - PHE Department:

Minister zahawm tak Prof. Nitea demand - JJM scheme hmanga Mizoram dung leh vanga vaibelchhe sangchuanga hnathawh te hi a ropui ka ti khawp mai a, danglamna a siam a ni. Tui in tur chungchangah hi chuan Mizoram-ah revolution a thlengin ka hria a. Kan Minister hmasa te pawh han ti ila, kan PHE Minister hmasa Pu Tawnluia te an fakawm hle a. Tin, tuna kan Minister chhuanawm tak Prof. Nitea’n a rawn chhunzawm a, tha takin impact pawh anei a.

Kan bialah pawh on-going project te a awm a, vawiin ah te pawh ka’n zawt vel a, ‘an ti tha khawp mai’ an ti a, ka lawm hle a. ‘Tha zui zel rawh se’ ka’n ti duh a ni. Chutih mek lai chuan, Zawlnuam hi town (khawpui) a nih avangin JJM khan a cover ve si lova. 1990 vela tui supply hawn cyclone in a tihchhiat tawh, a changa rubber hmanga an han zawm ang chi tui lakna a ni a. Luipui kam a ni na a, khaw lum hmun te a ni a. Zawlnuam town tan hian tuilakna ah hian repair works sum tam tak pawh a ngai lo ang; hei hi kan PHE Minister hian min chhinchhiah sak sela. Thawh tlan a ngaih pawhin ka theih ang angin ka tang ve ang tih kha ka’n tiam duh bawk a.

Demand No. 38 - Rural Development Department:

Nichinah recess room ah ka sawi na a, ka sawi nawn leh duh a. Mualthuam khua hi Kawrtethawveng hnuai, Zampui thlang lam langkaih kama awm a ni a. A khaw bul lawkah

hian Langkaih a luang a, Langkaih balu thatzia chu kan hre vek a ni. Mualthuam atang pawhin km 1 emaw bak a ni lo ang; Langkaih balu lakna kawng khu MLA fund atangin nuai khat pawh tling lovin ka tihpui a, duhthu erawh a sam lo a; furah te a ping leh mai ang a. Khulai Langkaih balu lak theihna tur kawng khu nuai tam a ngai lova. Pu Dy. Speaker, 'material component' an tih hi term hmasa lamah khan ka lo hre ngai reng reng lo mai a; tunah kan bialah chuan a lo pawimawh khawp mai a; chung atang te chuan min tihsak turin kan Minister ka lo ngen tawh a, ka'n sawi nawn leh duh a ni.

Demand No. 32 - Horticulture Department:

Kan Minister hian department pawimawh tak tak a chang khawm hi amah pawh a fit a, a lawmawmin ka hria a. Horticulture Department ah hian sawi tur tam tak nei mah ila, thil 2 chiah ka sawi duh a. Pakhat chu (**Hon. Dy. Speaker:** I tawp dawn tawh em aw?) Aw tawp thei nghal deuh mai e.

Kuhva hi 'Horticulture Department ah hian awm rawh se' tiin ka rawt duh a ni. Kan hunlai khan han inpuang ta mai ila, Soil & Water Conservation Department ah hian kan lo dah a, kan tihsual niin ka hre ve tlat. Kan pute'n Hnam Run atang hian min hnawt chhuak lo ang chu maw. Chuvang chuan, Horticulture Department-a a awmlo hi pawina tam tak a awm a. Hei, kan House Leader sawi kha kei pawhin ka sawi ve leh Agriculture Minister hmasa te pawh ka lo sawi hmuh a ni a. Drone system hmang lo chuan kuhva tam hi tihngaihna a awm miah lo; han leih phak ani lo. Kuhva tui han leih emaw (**Hon. Dy. Speaker:** Kan zo thei dawn tawh em aw?) A tam danna kha drone hmanga tih a a ngai a, kan House Leader hian a hmu fuhin ka hria a, a scheme pawh a awm a ni. Mizoram sorkar insen lutuk ngai lovin heng te hi nei ta ila, drone hmang khan tui kha leih ila, kan kuhva tam te hi a zia ang tih te ka rilru ah a awm a.

Tikhan ka duhtawh mai ang a. Kan Minister pahnih - Dr. Vanlalhlana leh Prof. Lalnilawma demand te hi lawm takin ka thlawp a, pass ngei ka rawt a ni e. Ka lawm e.

DEPUTY SPEAKER: Hrangturzo bialtu MLA zahawm tak Pu Lalmuanpuia Punte ilo sawm ang.

PU LALMUANPUIA PUNTE: Pu Dy. Speaker, hun a hmawr tawng ang reng tawh a, han pel hret lui dawn ila recess tur a ni tawh bawh si a. Ka'n sawi zung zung ang a.

Demand No. 25 - PHE Department:

Pu Dy. Speaker, PHE hi, tui hi a buaithlak khawp mai a. Tuihna a kang tial tial a, khawvel hmuntinah global warming hrin a nih hmel a. Ka biala Keitum-ah hian JJM hmalakna tuikhuan chu tuihawkin a hreuh a. Fur hmaa ven a nih loh chuan, tuikhuah hi chhe vek thei dinhmunah a ding a ni ti an ti a. Bungtlang-ah hian an tui lak ber Darnam kha a tirah an tifuh lo a, tuihna tlem deuh kha lak turin an lo ti tlat mai a. Chu chu an kham lo a, tunah hian a kang a ni deuh mai a. Chuvang chuan, Mat kan va dawt thleng law law a nih loh chuan a chhakah gravity pump-a tih luh theihin km 3 velah a awm a. Hei hi min ngaih pawimawh sak theih chuan a lawmawm khawp ang. North Vanlaiphai pawh an tui lakna hian a chawm zo tawh lova, tunah hian Rawlehlawn Lui lak belh turin contractor hian a thawh leh mek a, hei hi min tur ran sak turin Minister hi ka'n ngen a ni.

Tin, Biate leh Lungdar khi East Lungdar te hian tui chu an nei tha a, hmanni lawka an hawn thar Lungdar ah khaw 3 chawm tur, Leng leh Sailulak te nena intawm vek kha a tha a. Biate pawh hian an nei tha viau na a, an pump house a hla a, Tuipui-a zu pump daih kha a ni a, a thawktu an nei tlem a. Tuipui-ah tui an zu pump a, a han haw chho a, anmahni bawkin an sem leh a ngai a. Hei hi a thawktu min pek belh theih chuan a lawmawm hle ang a.

Demand No. 32 - Horticulture Department:

Mau hi Forest Deptt-a awm tur ni awm tak hi Horticulture-ah hian a awm tlat mai a. Engpawh ni se, a awm avangin kan sawi mai ang a. Nichin chawhma lama zawhna-a an sawi, Pu Zoramthanga Mau kha mau tha tak mai a ni a, a san pawh a sang a. Amah erawh chu, an rawn lakluh hlim khan a awmna tur a climate mil lovah te an ching hlawm a. Khang kha chu China ramah pawh thlasik vur a tlak chum chumna snow-fall area-a chin chi a ni.

Mizoram-ah pawh khi, anmahni Pu Zoramthanga te huan Sihphir-ah te chuan a tha viau a, Champhai-ah te pawh khan tha duh tur a ni reng a ni. Kan thianpain, “Pu Zoramthanga-mau hi chu a tha khawp a, a kawping pawh hi a pan pawl a ni” a ti. Chuvangin, hei hi tihfuh chuan chhawr tangkai theih, sum kan lakluh theihna tur mau tha tak niin ka hria.

Tin, Mizoram pum hi ZPM policy kan siamlai pawh khan Zau-system kha kan han ti reng reng a, crop-zone a siam hi ni sela. Tuichangral zawngin grape emaw, sapthei emaw, tiang khan a ram hi then ta ila chuan a tha duh dawnin ka ring a. Entirnan: Kolasib leh Mamit District-te chu an lui zawng zawng Cachar lama luang lut a ni a. Luikamah balhla ching vek ta ila, lawngin thiar thla ila, Bairabi rail head-ah motor a insawh dup leh insawhduk awm miah lovin market tha takin kan thlen thei dawnin ka hria a. Khatiang deuh hlek khan, a area-wise hian then hlawk hlawk ni sela. Khi, ka bial Vanlaiphai-ah khian natural grapes a lo awm hlauh mai a, ramhnuaiah ram-grapes an tih mai a awm a ni. Chung te chu china, keimahni natural, a ram grape a ni a. Grape pangngai ang chiah tho hi a ni an ti a. Ramhnuai thingah te a lo to ve thin a, em khat khat te pawh an lo thin awm e. Chuvang chuan, khi khi zir chiana kan rama tih pun atan a tha khawpin ka hria.

Tin, Tuichang bialtu Pu W. Chhuanawma sawi ang khan, Tuichangral khi hnathawk rim an ni a, an mizo em em bawk a. Campaign lai pawh khan chhunah hian puitling hnathawk rualte chu campaign-naa kawm tur an awm mang lo. Thlen inah kan awm a, tlaiah leh zingah kan vak chhuak thin. Chutiang khawpa thawk rim an ni a. Tunlai hian N. Vanlaiphai-ah zikhlum hmun chhungkaw 40 velin an bei leh dawn a. Hmanniah Minister hnenah hian ka han sawi a, a chi pawh sorkar atanga pek theih a tum a, lawmthu ka sawi a ni.

Demand No. 38 - Rural Development Department:

Agri-link road kan tih hi Central atanga scheme an rawn tih dan policy-ah hi chuan, lo eng emaw zata zau nei tawh, thar chhuah pawh nei tawhte link-na tur ang policy kha a nih deuh tlat a. Mizoram-ah chuan la neih loh ram va link-na tur deuh a nih zawk si avangin beisei angin pawisa kan hmu tha thei lo nge? RD hi rural develop-tu anih avang hian link road hi uar ta ila a that ka ring khawp mai.

Tin, khawthlang lam pang bawk, Mamit District khu kan la mawl a, kan la changkang lo deuh a, link road pawh khawtin khuan kan nei chhe ang reng khawp mai a. Hei hi min ngaihpaawimawh sak se ka duh khawp mai. Chu bakah Kawrtethawveng atanga Thaidawr thleng Langkaih Lui hnarah PCC flooring kawng siam tawh a ni a. Chuta tanga Zomuan

Tlang, Zampui tlangdung hmawr chhoa kawng laih pawhsa khu min ngaihpaawimawh sak sela kan Minister hian. Zampui lam nena Zomuan Tlang, Mizoram lam chiah ni si khu PCC flooring-in han chhunzawm ila, khunglai Kawrte-Tuidam-Zawlnuam lam atanga kal ngai lo khan khulalah khuan hnaitein a inkalpawh theih a ni. New Kawnpui-a police duty post tur tan pawh Tuipuibari lama inphurh kual ngai lovin khuta tang khuan hnaitein a kal mai theih dawn a, khu khu min ngaihpaawimawh sak thei se. Tin, Rawpuichhip - Hmunpui kawng khu hmanlai kawng hlui Jeep Road a la awm reng a. Thalah chuan a kal thei naw naw a, furah chuan kal ngaihna a awm lova, Lengpui lamah kal kual a ngai a. Khu khu han ngaihpaawimawh thei bawk se ka duh khawp mai.

Demand No. 20 - School Education Department:

School Education hi, zirtirtu fapa zirlai pawla kum 20 chuang inhmang tawh tan chuan, sawi tur hi ka ngah ang reng khawp mai a. Zirtirtu lak hi a khaw mite an tha ber. Written test ti tha vur vur, Rulpuihlim-a thawk peih chuang silo kha chu a tha chuang lo. Tin, generally-a ka han sawi ve duh mai mai chu, zirtirtuah hian thiam thei tak hi an tha vak lo; zirlai thiam theilote hriatthiamna an nei lo. Anmahni anga thiam awl turah an ngai a, an zaidamnain a tlin lo deuh fo a ni. Tin, a thiam thei, topper chin ho hi chuan hna tha nghah nan an ti tlangpui; an rilru a nghet vak lo bawk.

Chuvang chuan, a reality-ah chuan written test-a pakhatna ni vur vur ho hi chu zirtirtuah chuan an rilru a nghet vak lo a nia. Hna tha dang competitive te an exam a, an kalsan leh daih zel. Chuvang chuan, a hmuna awm peih an tha ber. Written test-a pakhatna Lengkhua-a awm peih miah lo ai chuan, third division Lengkhua-a awm peih kha a tha mai a ni.

Ka bialah hian sikul dinhmun ka rawn siam vek a, chhiar chhuah mai ka tum a. Amaherawhchu, hun a chep tawh avangin Pu Dy. Speaker, ka chhiar chhuak tawh lo ang a, nakinah ka pe mai ang a. Heta ka sawi tlukah kan Minister hian min pawm sak se ka duhkhawp mai.

Tin, nichina Mamit bialtu Pu Zira'n a sawi ang khan, Rawpuichhip-ah Higher Secondary an mamawh a, khumi tlang dung khu a feeder pawh an tha a ni. Rulpuihlim, Chungtlang, West Lungdar, Dapchhuah leh Hmunpui-te hi High School nei ve fer fur vek an ni a. Chuvang chuan, khulalah khuan Higher Secondary hi dah a nih theih chuan a lawmawm ngawt ang. Tin, Mamit College chungchang a bialtu MLA rawn sawi kha ka rawn support duh a. Higher Secondary-ah Commerce a awm a, khulai khu Arts ringawt lovin Science emaw, Commerce emaw ka rawn thlawp rualin, Commerce kha ka duh pui zawk a. A chhan chu, Higher-ah khan Commerce a awm sa avangin kha kha an tan a tha zawk. Khawthlang lam khu kan sawi ang khan, kan la hnufual viau mai a, ngaihtuah bik chu kan ngai deuh a ni.

Aw, Pu Dy. Speaker, wawiina kan Demand sawi Dr. Vanlalhlana Demand leh Prof. Lalnilawma Demand-te hi a tha ka ti a, pass ngei tur ni se ka ti a, ka rawn thlawp a ni e. Ka lawm e.

DEPUTY SPEAKER: Aw le. Tunah chuan kan hun tiam kha kan thleng tawh a, kan chawl rih ang a; dar 6:00 PM ah kan chhunzawm leh dawn nia.

(Recess at 5:30 PM)

6:00 PM

SPEAKER : Aw le. Member zahawm tak Pu C. Ngunlianchunga ilo sawm ang.

PU C. NGUNLIANCHUNGA: Pu Speaker, vawiin ah kan Minister duhawm tak tak te pahnih; kei pawh hi Chief Minister ni ta ila, ‘an concern-ah hian an ni bak hi an awm chuang lo ang a’, ka’n tih mek lai chuan, mihring hi anmahni fel loh vang leh that loh vang ni lovin, sorkar thar apiang chauh a ni a, kumkhat a kal a, chutih mek lai chuan thil zawng zawng hi a la famkim thei lo a ni. Helai members ten kan bial theuh kan sawi atangte pawh hian kan minister-te pawh kan zirtir phei chu an ngai hauh lo ang a, inzir nan lo hman ve te pawh a that ka ring a.

Demand No. 20 - Education Department:

Question ka siam nual a, kan bial ah Samagra Shiksha atangin School building repair a ni a, hei hi kan Minister hian a va hmu phak hauh lova, kan zawhna te ziaka chhanna kan hmu a. School building repair chungchangah hian duhthu a sam lo em em mai a, kan Minister ngei pawh hi kal se a lungawi lo ang; chutiang chu a ni a. Kan sorkar thar hi mipuite hnena kan inzawrhna angin kan kalphung hi a danglam dawn a, ‘kan tha dawn a ni’ tih kha an la tum rengin ka ring a.

Lammual ah State Day of Prayer kan hmanna ah khan, kan party aiawhin thusawi ve tura ruat ka ni a, chutah chuan, “Kan ram Politics ah hian Pathian ram lo thleng rawh se” tih kha tawngtai thupui tur a ni. Rawtna ka siam belh a, ‘politics ringawtah ni lovin, politician-te ah thleng rawh se’ tiin i tawngtai tel teh ang u, ka ti a, chu chu kan mamawh khawpin ka hria a. Vawiinah hian kan hotute fel hle mahse, an hnuaia thawktuten duhthu an sam tawk lo hle mai a.

AOC Primary School II, Pu Speaker, (house property-ah a thlalak pawh ka rawn dah tawh kha) Zawhbelhna ah khan a chhaklam side-drain siam tur te kha vawiina zawhna min chhanna ah chuan, ‘siam vek a ni’ a ti a. Kan Minister hian a hmu lova, official ho hian an chhan tir a ni a. Engpawh ni sela, zawhna kan zawh hian a dikin min chhang hram hram se ka duh a. Keimah ngei a hmunah kalin, kan biala hnathawh kha tupawhin hna hi thawk rawh se, a hna tha se ka duh a ni. Chu mai chu a ni. Keiniin kan select ang, kan thlang ve kher ang kan tihna lam a ni lova. Chumi kawngah chuan kan Minister hian tun aia strict zual zawka hma a lak ka duh tak zet a ni. School building sakah hian, (sawi tawh hnu baw) kan minister hi a thu chauh a, a hre vek dawn lova. Ka biala Mualbu UPS School a tlu a, nikumah khan; tun thleng hian an la sa lova. Thawktute ka’n zawh chuan, ‘a thar sakna tur proof a ni tawh e’ an ti a. An sa thei ang emaw chu ka hre lova, sa thei turah ngai ila.

Chutih rual chuan, ka bialah tho Saikhawthlir-ah UPS school an sa a, naupang pakhat mah an awm lo a ni. Kan Minister pawhin min chhinchhiah sak se ka duh a; Zawhna ah pawh ka zawt a, a chhuak ta lova. Saikhawthlir khua ah zirtirtu pawh 3 awm angin report kan ngaithla a. Kan minister hian min hriatsaka ka duh chu, zirtirtu awm dan report a peknaah te pawh khan diklo a tam khawpin ka hria a. Helamah tie-up tih te kha network awm leh awm loh chu a nilo, awm pawh ni se, keini chu a hmet tur pawh an awm lo. Chutiang chu a ni a. Helai hi enchian deuh leh vil deuh kan ngai a ni.

Nimin lama Supply Minister zahawm takin, ‘kan moral reform hi kan ngaihpawimawh ber a ni’ tih a sawi kha a dik ka ti a. He zoram kalsiamah hian kan moral hi reform a ngai; education-ah pawh a ni a, kawng engkimah hian a ni. A entu te pawhin a dik lo kha chu ‘a diklo’ ti mai sela. Headmaster te pawh kan han zawt a, ‘min ziah sak mai rawh; min ziahsak mai loh chuan’ an ti tlat a, kan ziah mai ni, an ti a, an lung a awi lem lo a ni. Headmaster te pawh kan Minister hi chuan a tih tir chu ka ring hauh lova, school thenkhatah chuan party fund-te pawh an pe niawmin an sawi a ni. Khaw pakhatah chuan cheng ₹19,98,000 atangin consultancy firm nuai 3 an la a, tichuan party fund-ah nuai 3 an pe a an ti a; nuai 13 leh tih chauh a ni a, a hna in a tuar lo thei lova. Khang te kha a lo awm reng em, kan minister hian a hriatpui reng em tihte kha ka’n sawi duh a ni.

Provincialise chungchangah zawhna te pawh kan inzawt a, sorkar hmasa atangin leh nikum session-ah te pawh ka sawi a, district council area bikah hian school eng emaw zat provincialise a awm a, dual function a awm a ni. District Council-ah pe law law teh u kan ti a, i dinglama kan thut lai te pawh khan Finance-te nen pawh kan sawiho a. Amaherawhchu, thiltih a harsa a, kan hotu thenkhat tawngkam hmang ta ila, bang chhak bang thlanga sawn mai kha a ni a, thil har a ni hran lo. District Council-ah kha education pawisa kha va corporate sela a zo a ni mai a; pawisa pek belh ngai pawh a ni lova. Tunah hian school pakhatah zirtirtu inanglo, enkawltu inanglo LADC emaw, MADC emaw, CADC emaw hnuai a awm leh State Govt. DEO hnuai a awm an awm tlat mai te hi, kumthar lo kal turah hi chuan siamrem hram hram ni sela, tih kha ka’n sawi duh a.

Casual Teacher eng emaw zat sorkar thar pawhin a la niin ka hria a, hengte pawh hi eng emaw enpui deuh lo chuan, school khatah an lo thawk a, hlawh inanglo lutuk hah zawk fe te kha an lo ni thei nen. Henglai te pawh hi thahnemngaihna a nih rualin, enpui deuh a tha viau lo maw, tih kha ka ngaihtuahna ah a awm a ni.

Demand No. 48 - Information & Communication technology Department:

ICT ah hian, kan bial lam hi border area leh tlema hnuafual deuh te kan ni a, internet-ah hian kan hniam em em mai a. Heng te pawh hi kan minister chak tak hian min ngaihpawimawh sak sela. Tin, sawitu tam takin tunhma sorkar lo kal tawh kha ‘school ngaihsaklo lutuk; engnge maw an lo tih le’ tih ang lek lek te khan kan sawi a, vawiinah hian kan tun hun kan thlenna hi kan hotu hmasaten thi leh thau pawlha hna an lo thawhna rah a ni. Chumi rah chu mihring kan changkang zel a, hma kan sawn zel a, thil kan duh chho zel a. Zirtirtu tam tak te an lo pension a, UT hun leh State-ah khangte kha a ni a. Dam chhung hian indaih hi chu a awm hmeh loh a ni.

Chutih rualin, a kal tawh inchirh theh vak vak te kha chu awm vak lo sela ka va ti em.
Pu Speaker,

Demand No. 25 - PHE Department:

Pu Speaker, Pu Col-a khan min han ti na a, PHE-a kan Minister-hi a polite ka ti a, fel pawh a fel a. Nikum budget-ah khan ka sawi tawh a, Rulkual ah solar pumping kan mamawh khawp mai a, tunah hian combine-in Runkual-Vaihne-Paithar-Saikah tan kan hun lai khan NABARD atangin pump a ni a, a pump-na tur kha an lo thlang uluk lo a, kan indaih lo deuh hlek a, thal-ah kan harsa em em mai a. Rulkual-ah tui pump tur tha tak, hnaite si ah a awm a. Chung te chu nikum lamah khan ‘telh hram kan tum dawn nia’ a ti a. Ka va leng

a, mahse a leng ta ngang lova; kumthar lokal turah chuan min ngaih pawimawh sak se ka duh khawp mai a.

Lawngtlai hi khawpui thang chak tak mai kan ni a, tunah sawn Chengkawl Lui leh thalah Tuipui an pump a, kan indaih lo khawp mai. Sorkar hmasaah pawh khan kan sawi thin a, 'hma kan la mek e', tih kha a ni a. Khang te kha chak zawkin hma min laksak turin ka'n ngen duh bawk a. Tin, kan biala thingtlang khaw thenkhatah solar pumping tih a ni a. Thal chhungin a tuihna te duhthu a sam zo lo a. Hemi enkawlna chungchang thu ah hian tan min laksak deuh kan ngai a ni. Keini hi thingtlanga awm kan ni tih kha kan sawi nawn leh duh a ni.

Demand No. 38 - Rural Development Department:

PMAY Gramin thlan chungchangah RD Minister-in ZPM office-a a sawi kha ka lo ngaihthla ve a. A guidelines ang diak diak kha chuan a har deuh maithei a, amaherawhchu, khatih rual khan ngaihthiamna nen hemi chungchangah hian a theih hram chuan a phute, 'miretheite hian mirethei-insakna hi hmu hram hram thei sela' a tih kha. Party mite pawh duhsak chin chu a awm ve ang, 30% te chu duhsak sela; ka va relsak theih chu a ni lo a, ka genna a nih chu. 70% tal hi chu a rethei leh a phute hian hmu se a van tha dawn em.

Tin, niminah khan finance chungchanga zawhnaah khan a changtu kan House Leader zahawm tak khan 'a minister-in a la sawifiah thei turah ngai i la' a tih kha, ka'n zawt nawn ang a, min react sak theih chuan. MG-NREGA-ah December atanga hnathawhna hlawh la lalote hi kan House Leader pawh khan a hre fuh lo deuh niin ka hria a; network that loh vang ang deuh te khan a sawi a. A minister hian a hrechiangin ka ring a. Kha kha chu block level atanga tih a ni a, an mangang khawp mai. Kan bialah phei chuan MG-NREGA lak tur atang hian an lo ba lawk a, NRE lakin an rul ve leh a. Nimin lama kan ngaihthlak tak ang khan, batna tur pawh an hmu lo lek lek tawh a ni. Chutiang chu an ni a, an khawngaihthlak khawp mai. Tihran sak dan awm se.

Pu Speaker, pakhat chiah - MG-NREGA staff ten January atang hlawh an la lo, an hlawh a tlem bawk si, an khawngaihthlak hle mai. Ngaihtuhsak theih dan awm hram hram se kan duh em em a ni. Tin, RD atang hian Library building sak niin ka hria a. Hei hi a enkawl zuina tur concern department-ah dah a nih mai loh chuan; building han sak ngawt kha, kalsan leha enkawltu mumal an awm loh khan hnawmhnawkah a chang mai thin si a. Chuvang chuan, helamah pawh hian kan Minister hian hma min han lakpui sela, min han hriatsak sela. Pu Speaker, tlem chuan ka'n pel a nih kha. Ka lawm e.

SPEAKER : Member zahawm tak Pu TBC Lalvenchhunga ilo sawm ang.

PU TBC LALVENCHHUNGA: Pu Speaker, ka lawm e. Vawiinah kan Minister, thalai leh viak tha tak takte demand kan sawi ho hi a ngaihnawmin hle mai a. Mahni bialte tan sawi hun kan nei mang thin lo a vawiin chu kan bial chhunga kan mamawh te a zawr zawrin thlur ve hman hram kan duh a.

Demand No. 48 - Information & Communication Technology Department:

ICT ah hian hmalak tharna lianpui tur chu a awm lo tih kan hria ang a. Chutih rual erawh chuan, kan Minister leh kan Chief Minister ten an lo sawi tawh angin, beisei lian tak mai ka neihna kan ICT Department hmalakna e-Office hi engtikah nge kan hman tan theih ang,

kan sorkar efficiency hi engtikah nge kan tihpun theih ang, tih hi ka lo beisei em em leh Minister hnen atanga reaction ka ngaihthlak chak a ni a.

Demand No. 32 - Horticulture Department:

Tin, Prof. Lalnilawma department-a Horticulture bikah hian kan bial chhungah Horticulture Centre, Sairang ah a awm a. Covid lai khan chhawr tangkai kan tum viau a, cold storage pawh chamber 4 lai kan nei a. A sorting leh grading theihna hmun leh conveyor belt te nena awm vuahsa thlap khu engtiang taka tangkaia hman tum nge a nih tih leh, engtiangin nge kan hman tangkai chhunzawm zel dawn tih kha ka han zawt bawk a.

Demand No. 25 - PHE Department:

PHE Department Minister hnena ka ngenna ka lo thlen fo tawh leh ka bial chhungah kan mamawh em em, Tlawng Lui kama cheng e ti lo chuan Sairang ah tui thianghlim in tur duh thala kan la hmu thei lo a. Khu Sairang Water Supply Scheme AMRUT hnuiaia mi khu eng tikah nge kan zawh theih ang? An thawk muang ang reng em em mai a, kan zu enpui ngial a. Tumkhat phei chu an hmanraw hman a chhiat thu te complaint-in kan zu en tawh a. Rora chhe tak tak, balu ah pawh lei to khatiang chi te kha an lo hmang nghe nghe a, a contractor-te pawh kan notify tawh a. Khatiang chi te kha eng nge kan hmalakna leh, eng tikah nge tui hnianghnar kan neih ve theih ang tih lai kha ka zawhna a ni a.

Tin, ngenna ka thlen duh bawk chu, ka bial chhunga Zonuam, Tanhril leh Rangvamual-ah te tanky reservoir kan indaih lo em em mai a. Hei hi ziaka kan thlen tawh mah ni se, a rang lama min ngaihtuhsak turin ka han ngen a. Chumi piah lamah chuan kan la neih ve lohna Phungchawng Mel 10 lamah khuan tui connection a la thleng pha ve lo hrim hrim a. Khu laiah khuan reservoir bakah a connection leh distribution line te kan mamawh ve hle bawk a. Kha kha mamawhna ka han thlen hmasa a.

Vawiina kan demand sawi hoah hian demand pawimawh ka tihzual deuh deuh pahnih ka nei a, chu chu ka rawn thlurbing ang a.

Demand No. 38 - Rural Development Department:

Kum thar atang chuan 'Rural Development & Administration' tih a ni tawh dawn a. Department pahnih demand hi kan en chuan, vawiina pass tura kan chhawp chhuah zingah hian Mizoram-ah a aia chang tam department hi paruk chauh a awm a ni. Heng department-te hian heng khuate hi a huam vek piah lamah, RD Department hi awm lo ta sela thingtlang mite tan kan budget pass hi awmzia a awm awm lo mang e tih theih deuh thaw a ni a. Thingtlang mite specific needs, an mamawh ngawih ngawih han khawih ve theihna leh direct tak maia wealth redistribution an han tih, sum leh pai thingtlang mite hnena kan transfer ve theihna awmchhun budget ti ila, kan sawi sual lo in ka ring a.

Kuminah hian cheng crore 600 leh tih a pahnih hian a awm dawn a ni a. Hemi kawngah hian Finance Commission grant kan tih te, material component leh NREGS te converge-a mumal zawka material component tlem te kan han inchuh a, salaries leh wages component atanga kan sem zai thin ho hi mumal zawka planning neih a awhawm hlein ka lo hmu a. A chhan chu, kan material component neih a tlem si a, district leh village level-ah, annual work pawh siam thiam mang lo VC-te kan nei a. Chutih lai mek erawh chuan, SIRD te leh Training Centre-te erawh chu crore eng emaw zat atan kan han dah ve leh bawk a. Heng kan training centre-ah hian elected representative kan neih te village level-ah anmahni

khawtlang tana an ruahmanna te ngaih pawimawh a nih a, awmze nei zawka kan kal theihna turin vawiina kan insem ang a. VEC in 40%, BDO in 30%, BRO in 30% kan tih mawl hlawm tawp te hi hetiang lo kal theih hun a nghahhleawm hlein ka hria a.

‘Hei hi chu party worker-te chan ve chin tur, hei hi chu VC-te chan tur, hei hi chu department chan tur’ han tih ang chi te vawiinah hian kan sorkar department tam zawk hian work executing agency emaw kan la inti a, mahni department officer leh sttaf-te hna kan la inpe a. Mahni party-ah te hmasawna oriented ni lovin, chanpual beisein a hna hrim hrim hmuh duhna lam leh a semzai lamah kan la kal thui em em a. Hei hi annual work plan kan neih te NR website-a kan thlir chuan data-ah hi chuan kan felfai em em a. Amaherawhchu, audit system social audit en ila, kan hnathawh hmalak upload hi kan la nei mang lo a ni. Vawiin thleng hian 1% upload pawh hi a la awm lo a ni. A finish thlalak hi chu kan han hmu ve leh baw a, chu pawh tam a la ni lo. Hetiang khawpa auditing system transparent, accountable sorkar siam theihna hmanrua kan nei chung hian kan hman dan hi a theory hian a la ni deuh niin ka hria a. Paper work-ah hi chuan tha viau zel mah ila, grassroot level-ah hian kan hman dan leh budgeting-a kan estimate siam dan thlengin hei aia uluk zawk leh mumal zawka siam theih dan hi awm se la.

Horticulture-ah te pawh han sawi kai lawk ta ila. Link road eng emaw zat beisei kan nei. Agriculture-ah kan nei a, chutiang bawkin RD-ah pawh kan nei. Kan rate hman erawh a inang lo vek mai a ni. Khang te avang khan kum kha leh chen atana link road kan laih zozai te kha approve sector awm mumal si lo. NEC a ni emaw, NESIST a ni emaw central scheme danga approve sector awm lem lo, amaherawhchu heng allocation hmun dang atanga kan pawh thin tam tak kal vel hi paved a nih loh avangin laih tlang ringawt chu a lo har lem lo a. Sum siam nan, kum khat pawh daih lo a min lehngal a, fur khat pawh daih lo. A min leh nghal mai a, formation cutting nen, earth work nen a ngaite bawka thawh leh ngai thin hi mumal taka kan siama, kan material component piah lamah heng kan Central Sector Scheme atanga kan thawh ho reng reng hi nghal zel theih ni sela. Kawng changtlunga siam ni sela, tih kha rawtna ka han thlen duh a. A chhan chu, fur khat chhungin a chhe leh nghal zel a, siamna tur a rawn thlen kha chuan a bul atanga tan that leh a lo ngai tawh thin a. Chuvangin, sum chuangtlai kan seng nasa hlein ka hria a ni.

Hemi bakah hian, RD Department hnuai CSS kan neih ho - Integrated Water Management te, NRLM kan han tih ang chi te hi tam tham tak a ni. Kan ngaihtuah chuan a tlem maithei, kumtin crore chuang kan seng ral ve a ni. Hengah te, rural livelihood kan han tih ang chite pawh hi State Startup Mission te, Mizoram Startup Mission te nena kan kal chuan si loh chuan, a hrang thliah hian sum kan seng si ang a. Han siamchhuah tur emaw pawh kan Self-Help Group te heta tanga han tihchangkan tur emaw, khami kaidaa kha kan la hmuh hmaih niin ka hria a.

LESDE Department hi entrepreneur-te nena han sawikawp dawn chuan NR ringawt ah pawh hian kan admin. cost a lian em em mai a, hengte pawh hi a salary package atan hian em ni central sector scheme leh sponsor tam tak hi kan lakchhuah, tih mai turin a hlawah leh administrative cost-ah kan keng lian a, a salary chauh alawm kan lak chhuah kan tiha mihring kan lak chhuah tawh chuan, an inrelbawlna, office expense neuh neuh leh thil dangte kha a lo ngai tel tawh thin si a. Hei hian kan sorkar a ti lian em em mai a, awmze nei zawka kal theih a chakawm hle mai a.

Khang kan sawite kha RD Department hian khaw tin, chhung tin a khawih a, a dap hneh em em mai a. Thingtlang mite tan chuan kumin kan budget pass turah hian kan tana sum awmchhun tih theih deuhthaw a nih avangin ka ngai pawimawh em a. Kan administration system-ah hian department amalgamation te a han nih takah pheih chuan mumal zawka kalpui theih a itawm a.

Demand No. 20 - School Education Department:

Aw le. Pu Speaker, a tawpna atan, education ka ngaih pawimawh em em he House-ah pawh ka lo sawi ve thin a ni a. A changtu Minister a taima bawh a, sawi tur tam tak nei ve nei niin ka inhria a, budget allocation hi kuminah hian 13.5 % a ni a. Kan sum hman tur atanga 13.5% te hi education atana dah a ni a. Nikumah khan 16% chuang a ni a, nikum ah te kum hmasa lehah te khan kan budget pumpui atanga 12% vel kan dah thin a.

Kan budget allocation education-ah hma a sawn a, a lawmawm pawh ka ti a. Chutih rual erawh chuan, hmasawna tur tam tak kan la nei a. Ram leh hnam din chhuahna tur chu education hi a ni tih hi ka sawi ve thin leh ka tlangaupui ve thin a nih miau avangin, waviin niah hian tlem han sawi leh ka duhna chhan chu, kan zirtirtute hi han thlir ila, kan teacher pupil ratio hi PS ah pheih chuan 1:14 a ni a, Aizawl ah hian 1:12 a ni. Zirlai 12 ah zirtirtu pakhat, MS ah pheih chuan zirlai 9 tan zirtirtu pakhat. Amaherawhchu, school zawng zawng han en ila, single teacher pawh 100 dawn kan la nei a ni.

Khatiang a nih avang khan, kan distribution hi eng tikah nge kan zawh fel dawn, eng tiangin nge kan tih ang tih kha ka zawhna a ni pah fawm bawh a. A chhan chu, zirna atan hian mahni bial chhungah pawh han sawi leh ta ila, eng emaw zat chu ka han allocate a, kumin chhung khan MLA fund atangin kan bial chhungah hian 15.54% tehmeuh education atan hian kan seng ral a. Heng bakah social-related nen pheih chuan school PCC flooring board, fencing, roof, retaining wall, verandah fencing tih ang chi te. Phunchawng primary te model school atan kan dil a, a building renovation te ka han dil a, kan han pe leh a. Tunah pawh building kan han siam tha a, electrification zawng zawng keimahni sum atangin kan ti leh a. Khungte khu zirtirtu 2 chiah kan nei a, kan dil ngar ngar a, pakhat kan neih belh a, zirlai 100 chuang kan nei si a.

Ka bial chhunga Luangmual han sawi ta ila, Luangmual ah chuan zirlai 36 kan nei a a zatve chu kg 1-2 te an ni; zirlai 20 pawh awm lohnaah zirtirtu 8-9 kan la nei ta a. Zonuam-ah te 190 lawihah zirtirtu 6 chiah kan nei a, ECC helper telin. Khatiang a nih lai khan, kan neih that vena Ainawn school ah zirlai 200, model school Chawnpui PS te, khang kan neihna ai khan hmun thenkhat Rangvamual te pawh Mizoram pumah kan han lar hluai a ni a. Pu Speaker, nangmah kaltlangin ka han ngen duh a, khung te pawh khu a sakna a zatve pawh kan la hmu lova, thawh khawmin a zatve chu kan zo ve dawn tawh a. Khung te khu engtin nge kan tan theih ang? A bik takin zirlai kan neih tlemna leh kan neih tamna ho distribution hi kan official te hian an hre sual em ni aw ka ti a, ziak pawhin wawi tam ka thlen tawh a, Tanhril PS-III ah zirtirtu kan mamawh thu ka thlen a, School-II ah zirlai 16 chauh neiah pahnih minrawn pek belh leh a, tunah pheih chuan a tam lutuk tawh a ni. An mamawhnaah min pe thei lova, a mamawh lohnaah te minrawn pe a, kan han thlen leh a. Helai hi kan Education Department-a statistic kan neih hi a mumal lo emaw ni ka ti a.

Kan bial chhungah hian theihpatawp teh meuh meuh kan chhuah a. Computer hi 13 kan sem tawh a, printer 18 kan dah a, Water Cooler hi Law College te nen pheih chuan 34 kan

dah tawh a ni. Hetiang bakah hian kumin leh nikum chhunga zirlai neih tha ber hnenah hian cheng nuai 1 theuh lawm man kan siam a. Public education hi siam that tumin MLA level-ah pawh hiankan tan ve a, kan bial chhunga school 17 ah signboard a thar hlak te kan han pe a, fencing pawh hi school 4 kan zo tawh a, PCC flooring hi zawh vek hman kan tum a. Khatiang khan theihpatawp tak meuh meuhin kan chei a ni.

Ka han sawi leh duh chu, zirtirtu kan mamawh ngawih ngawihna leh zirtirtu ratio kan han en hian ka bial bikah HS chu hma kan sawn a, ka lawm khawp mai a, tunah hian pangngai takin kan nei ve tan tawh a. MS a bik takin school 5 lai mai amalgamate tura thlen te pawh ka nei a. Hengte avang hian, zirna kan ngai pawimawh tak tak a nih chuan, zirtirtu kan sawn danah pawh hian harsa lutuk lo mai sela, 'Within the division, Within the constituency', pakhat hnuaia mite hi chu min han transfer sak mai sela, bial dang atang pawhin min laksak lo mai sela. Entirnan: Luangmual atang pawh hian min laksak leh sela pahnih-pathum pawh, kan la insem nawn leh thei ang a. Chutiang chiah chuan Chawnpui ah te zirlai tam deuh deuh kan neihna Tanhril PS-II te pawh zirlai 16 chauhah zirtirtu paruk te minrawn pe leh lawi a. Khatiang chi te kha chu min han tihfel sak zung zung sela hma hi chu kan sawn kan ring a.

Theihpatawp tak meuh meuh kan chhuah ve zel ang a, keimahni lam atang pawhin (**Speaker:** I hun a pel deuh ta e.) Awle Pu speaker, kan sawi chhonzawm tawh lo mai ang e, khang te kha ka dilna te ka ngenna te nangmah kaltlangin Education Minister pawhin khawngaih takin min lo chhinchhiah sak sela, min lo hriat sak sela kan duh a.

Vawiinnia kan Department kan Minister pahnihte Demand te hi ka thlawp a, tangkai taka hman a nih theih nana Pass ngei a nih theih na atan ka rawn thlap thu ka rawn sawi a ni e. Ka lawm e.

SPEAKER : Aw le. Member zahawm tak Dr. K. Beichhua ilo sawm ang.

DR. K. BEICHHUA: Pu Speaker ka lawm e. Tuna kan demand sawi tur hi mi lehkhathiam tak tak, professor leh doctorate degree nei ngat an ni a, a wind-up lam pawh hi tawitea an tih thiam ka ring a. Tin, Pu Speaker, House Leader hi ni ila chuan ka wind-up tawi thiam viau ka ring a ni.

Demand No. 20 - School Education Department:

School Education demand hi BE 2024-25-a a tlak hniamna hi 12.57% a ni, BE 24-25 leh RE 24-25 punna hi 7% a ni. Pu Speaker, CSS kan beisei tlahniam ta vak hi kan Finance Minister budget speech-ah khan a rawn tarlang tawh a, Education Department pawh chutiang chuan a pawimawh nasa mai si a, Samagra te, Poshan-midday meal kan tih te. Hei hi a chhan kan Education Minister hian mipui hriatah pawh hian sawi thei se a lawmawm hle ang a. Tin, Pu Speaker, BE 24-25 leh 25-26 tlakhniamna hi 12.57% lai a ni a, RE-ah tuna kan BE-ah kan tih tlem vak hi a lo sang leh mai ang tih erawh chu kan rin dan a ni. Tin, Education Department hi Pu Speaker, kan hriat angin department lian tak a ni tih a budget atang pawh hian a hriat theih a. Kan budget pumpui ah Finance hi a tam ber a, Education-in a dawt a, 9.6% a ni. Chuvang chuan, department pawimawh tak a ni tih kha kan hre thei a.

Pu Speaker, nimin lama Zawhna leh Chhanna ah kan hre tawh a, school upgradation chungchangah pheih kha chuan a changtu minister tak pawh khan ninawm lamah a kai tawh a ti hial a ni kha. Hei hi Pu Speaker, tihian ngaihtuah ta ila - heng School khawtlangina kan din, kan fate hmun danga zir hleitheih silo tia thahnemngai taka kan lo din ve te hi an zahawm ka ti a. Engpawh ni se, Sorkar hian theihtawpin tan la leh zel se, a lawmawm viauin ka ring a ni. Chutiang chuan, kan school syllabus te pawh hi ka ngaihtuah thin a, job-oriented-a kan kal te pawh hi a hun tawh a ni. Vawinah kan fate lehkhah kan kan zirtir a, MA, BA an chhuak teuh a, hna hmu hlei theilo hi an tam a, helai hi burning issue a ni deuh tawhin ka hria a ni. Kan rilru ah tuna kan kaldan te, engtia kal hi nge tha ang tih te pawh hi kan ngaihtuah uluk hi a tul hlein ka hria. Tin, zirnaah hian Hindi hi India ramah hian a pawimawh ropui si a, spoken Hindi ang tal hi chu school-ah hian kan introduce tan a tulin ka hria. National level-a kan thlen tur ang kan thlen theihloh chhan pawh hi Pu Speaker, Hindi kan thiamlohna hi a ni tlat. Chuvang chuan, Hindi hi ngaihpawimawh a tha hlein ka hria a ni. Kan Minister zahawm tak pawh hian helamah hian rilru nei se a lawmawm hle ang a.

Tin, School Education ah hian transfer policy kan neih loh chuan tupawh a minister lo ni ta se, a tan a luhai thlak dawn lutuk. Pu Speaker, chuvang chuan, transfer and posting chungchangah hian rules emaw, policy emaw mumal tak kan neih chuan hun lo la kal zel turah pawh a tha dawn hlein ka hria a ni.

Tin, Pu Speaker, thingtlang lamah pawh a ni a, khawpuiah pawh a ni tho a; kan zirtirtu tha tak tak an awm lai hian, zirtirtu tlawmngai, social activities-a inhmang tam lutukte hi, zirnain a tawrh phahin ka hria a. Chuvangin, helam pawh hi ngun taka kan en a tul awm mang e.

Demand No. 21 - Higher & Technical Education Department:

Pu Speaker, head hrang hrang han en hian hmasawna tur ruhrel lian tham dinna tur hi kan budget atang hi chuan hmuh tur a vang hle mai a. Chutihlai chuan, ram hmasawn tur atan leh sum lakluh tih tamna tur hmanraw tha ber chu education hi a ni bawh si a. Chuvang chuan, helai hi uluk taka kan ngaihtuaha hma kan lak hi tulin ka hria a ni. Kan BE 25-26 tlakhniam chhan ber pawh hi object head hrang hrang - medical treatment, OE, minor civil and electrical works leh scholarship tea kan dah tlem zawk vang a ni hlawm a, kan estimate chhungah hian inkhung leng thei hram tura beisei kan ni ngei ang a. Amaherawh chu, heihi chu RE-ah department-in kan rawn belh tlangpui deuh vek kha a ni. Head hrang hrang han en hian hmasawna ruhrel liantham dinna tur hi Pu Speaker, beisei tur a awm vak lem lo a ni. Chu chu tuna kan dinhmun hi a ni ta a.

Tin, Pu Speaker, kan Minister hnenah hian personally pawhin ka thlen tawh a; Siaha College khi UT hun laia college kan neih kha a ni a, tunah hian Commerce leh Science stream khi kan mamawh ve em em mai a. Chuvang chuan, ‘Sorkar kal tawh zawng zawng khan an ti lo alawm’ ti mai lovin, khi lai khi chhim tawpa awm an ni a, an ni khi an pawimawh a ni. An tan Aizawl-a lehkhah rawn zir te pawh hi thil harsa tak a ni tih min hriat saka, khilai khi ngun taka min ensak turin ka ngen a ni.

Demand No. 26 - Information & Public Relation Department:

Pu Speaker, BE 25-26 punna hi nuai 83.42 a ni a, a punna percentage pawh hi a sang viau a. Pu Speaker I&PR Department ten Diary note-bu min pek thin kha tun kumah hian a awm

mang tlatlo mai a, he kalphung tharah hian consolidation, inrenchemna kan kalpui ah hian diary pawh hi a tam min pe thei dawn tawh lo em ni, tih te rilru ka lo nei a.

Tin, budget discussion ah te pawh ka lo sawi tawh a, Siaha I&PR Office khi a tlabal khawp mai a, tun fur hi a tuar chhuak ang em tih vel a ni a. Engpawh nise, hei hi minrawn theihngihl sak lo se. Tin, a thawktu pawh an awm tawh lo tluk a ni a. I&PR officer hei, ka MLA-pui Pu Hrahmo fanu hi a awm a, a hnuaiyah thawktu an awm mang lova, 4th Grade pakhat nen I&PR Officer hian hna a kawp deuh vek a ni. Staff lam indaihlohna hmun dangah pawh a nasa tih kan hria a. Amaherawhchu, keini chu kan awmna te a hlat avangin min lo duhsak deuh se, Pu Speaker.

Demand No. 48 - Information & Communication Technology Department:

He department BE 24-25 atanga BE 25-26 pung cheng nuai 15.04 leh a pun chhan thawktute hlawh, salary leh wages tlem a pun vang a niin a lang a ni. Chutiang chuan object hrang hrang han en hian expenditure-ah kan ruahman aia tam hman vang niin a lang a, tin, SNS ah sum hman a ni bawka. Chutiang dinhmunah chuan a awm a.

Pawimawh deuh nia ka hriat chu, Pu Speaker Mizoram chhungah hian thingtlang leh khawpui inkar digital gap zau lutk hi department hian uluk taka kan en a tul tawh hlein ka hria a. Tunlaih chuan reporting system hrim hrim hi thingtlang a ni emaw, thingtlanglo a ni emaw inthawn zel ngai thil a nih avangin, kan Minister zahawm tak hian helamah hian hma min laksak a pawimawhin ka hria. Digitisation lama hmasawna hi thingtlang kilkhawr leh khawpui a rualin a thleng thei hauh lovang a tih chu hriatsa a ni a. Pu Speaker, hriatsa a ni mahse, a gap hi kan tihzim deuh chu a ngai a ni.

Demand 25 - PHE Department:

PHE ah hian hmasain lawmthu ka sawi duh a. Nikum khan kan tui pump-na a chhe tlat mai a, nasa takin kan pahnihin kan buaipui a. Eng hunah pawh phone ila, amah hi a lawm zawk emaw tih tur khan min respond thei reng a. Hetiang minister efficient tak kan nei hi a lawmawm a, a chungah lawmthu ka sawi a.

Tin, nichinah Education Minister hnenah pawh khan lawmthu ka lo sawi lova. Khawngaih takin Pu Speaker, tunhnai hian zirtirtu pasarih Govt. Siaha College leh school-ah min pe dawn a, khang avang khan lawmthu a chungah pawh ka sawi bawka a ni.

Tichuan, PHE Department hi kan lo kal tawh chin kan Zawhna & Chhanna atanga kan hriat angin, power bill ba tam ber No. 1 an ni tlat mai a. Rulhsak tawh teh pawh a ni a. An power consumption hi a sang viau a ni tih kha a hriat a. Mahse, a bat lampang erawh kha chu tlema tih hniam ve deuh chu a ngaiin ka hria.

Tin PHE hian kan khawpui hrang hrang lian zelah hian T-cluster kan dah sak thei thin lo hi ngaimawhawm ka ti a. Heng avang hian minimal pawisa intum chawpa lei a ngai ta thin a ni. He thilah hian kan department lam te pawh hian theihtawpin hma lo la se tih hi Pu Speaker kan Minister hnenah ka thlen duh bawka a.

Demand No. 32 - Horticulture Department:

Horticulture hi BE 24-25 atanga 25-26-a a tlakhniamna hi 11.82% lai a ni a, RE 24-25-a a punna chhan tlangpui pawh central scheme SMS atan a hman te, NABARD IRDF loan atanga link road leh collection center sakna sumrawn awm avangte pawh a ni ang a.

Horticulture hi Pu Speaker, kan hriat tawh angin, hei kalphung-thar sorkar chuan ‘D-A-H’ tih hi an kalpui ta a. Tunah hian kan hand-holding-a kan tihtheih leh kan ngaih pawimawh chu hmunphiah, aieng, hmarcha leh sawhthing te a lo ni a. Horticulture product thei lampang hi kan hand-holding ah hian kan telh mang tlat lo mai a. Tin, a purchase board, a marketing board lam hi agriculture chan a lo ni ve leh deuh bawk si a, kan va’n ti khawhar dawn ve tih te ka ngaihtuah a. Mahse, kan Minister zahawm tak hi mi hlim thei ve hrim hrim hi a ni a, mahni chan tawka lungawi thiam tak mai a nih avangin kan Chief, kan House Leader, Finance lam changtu hian a hriat tho ka ring a, a duhsak bik hle a ni tih kha Pu Speaker, ka rawn sawi bawk a ni. (**Hon. Speaker:** Minute 2 in a pel ta e. I zo thei dawn tawh em?) Pu Speaker, ka zo mai dawn e.

Demand No. 38 - Rural Development Department:

Rural Development hi memberte rawn sawi tawh ang khan, BADP hi border area lama awmte chuan kan hmachhuan ber leh kan engkima engkim hi a ni a. Kan hriat ang khan, kumin lamah chuan BADP te pawh hi tawp turah ngai ta ila. Amaherawhchu, keini border area-a awmte hi engtin nge kan kal chhoh leh zel ang tih te kan rilru ah awm ta se. Heng Vibrant Village kan tih te hian min huam tel vek dawn em? BADP ai ah hian engtin nge sorkar laipui hian border area-a awmte tan hmaa rawn lak dawn tih kha kan RD minister hian khawngaih takin min hrilh fiah bawk se.

Aw le. Pu Speaker, vawiina kan demand, kan Minister pahnih – Dr. Vanlalhlana leh Prof. Lalnilawma te demand hi ka pawmpuiin, ka support e. Ka lawm e.

SPEAKER : Aw le. Tunah chuan kan Opposition Leader-in sawi tur a neih chuan ilo sawm ang.

PU LALCHHANDAMA RALTE, OPP. LEADER: Pu Speaker ka lawm e. Kan Minister zahawm tak takte pahnih demand kan han sawi ho a, a phurawm khawp mai a. Vawiin chu nidang aiin kan boruak pawh a nuam a. Kan hlim a, kan thusawi pawh a mar tha tlang deuhin ka hria a ni. Hei, fiamthu ka’n thawh a, recess room-ah. Kan House Leader pawh, ‘a tawpah a tlang kir rawn siam bik lo la; a tlang kir a awm chuan, naktuk lamah kan in um na lutuk palh ang’ ka’n ti fiamthu a. Chutiang vel chuan, kan inngam khawp mai tawh tih kha, thlakhat deuhthaw han thutkhawm takah chuan. Demand te a indawt dan angin Pu Speaker ka’n sawi ve zung zung ang a.

Demand No. 20 - School Education Department:

Hei, Mizoram sorkar department zawng zawng zingah pawh department lian ber, thawktu pawh ngah ber leh a cover pawh zau ber kan ti a. Kuminah hian an budget nikum lam an phak lohna cheng nuai 24,84,343,000 dawn zet mai hian an budget hi a tlahniam tlat mai a. A chhan kha chu kan minister-in a rawn sawi ang a.

‘Education’ kan tih hnuai hian School Education te, SCERT, MBSE te. SAMAGRA te, Directorate pali vel an awm a. Heti zata an tlahniam ta hi hlauhthawn deuhna ka nei a. Pu Speaker, Education hi No.1 ah dah a tul tia ngaihtuahna hmang ve ka ni a. Ka’n pangchanpuina chhan pawh sorkar kal tain sikul eng maw zat vantlang enkawlte upgrade tura ruahmanna a lo siam te kha kan sorkar pawhin a principle-in tha a ti a. Amaherawhchu, a technical lamah eng emaw han tihfel ngaite ruahman aa ni. Tun tumah pawh kan Minister-in House ah Rules te a rawn lay tawh a, khang han tihpuitlinna tur sum te kha a daih ta lo

mai ang tih te ka hlau a. Tin, court case vang te leh sorkar pawhin a duh ve hrim hrim avanga SAMAGRA lama thawktute dah nghet tura a inruahmannaah sum hman belh a ngai hmem dawn bawk si te pawh kha kan thlaphan ka hlau a.

Pu Speaker, kan sawi langsar lo deuh mai MR teacher-te chungchang hi, kan sorkarin a hminga education enkawltua ka thut hlindah zirtirtu indaih lo lutuk siamremna atan a theih chin chinah Dan anga qualified, train chhuakte piah lamah MTET kan tih ang te kan la neih tam tawh loh avangin, eng emaw chen han thlah zalen hreta, a recruitment-ah pawh hriatthiamna neih leh a khaw mi ngei emaw, a khaw thenawm te emaw duhsakna, an post-a kal lo an awm lohna turin kan han ti a. Hrangturzo Bialtu MLA pawhin a rawn sawi ang khan, khami tuma mi 900 dawn kan lakah khan, zawm duh lo pawh awm lovin zirtirtu chungchanga harsatna zualpui kha a kiang a ni. Khang kan ziritrtute kha, an hming pawh hi kan lo phuah fuh tawh lo deuh a, ‘MR teacher’ tih hi. Tunah MR te kan han tibo ta a, a hming thar te pawh pek an hun tawh a.

Tin, an lawmman a tira kan pek ahun laia tha ve kha, vawiinni ah chuan a bei tham ta em em a. Tin qualified an ni a, an dinhmun pawh sorkar hian attention tha zawk kan pek a tulin ka hria a. Hmun tam takah phei chuan headmaster charge te pawh la an ni a. Tin, casual teacher tharte pawh an lo awm a, an aia junior zawkte ai khan an hlauh a tlem lek lek tawh maithei a. Hei hi ennawn ngai niin ka hria a. Chuvang chuan, pawisa a awm theih chuan kan House Leader hian Education lam hi uar hret se kan duh a.

Tin Education hnuaiia Inspecting Officer te hi 2030 bawrah chuan enge maw zat an pension dawn a, tlu deuh rup thei a ni. Chuvang chuan, recruitment thar hi eng emaw zat kan mamawh dawn. A teacher hrim hrim kan indaihlohna piah lamah a official lamah pawh a ni a. Tin, NEP-2020 hmanga kan hmalakna ah department pawh an inbuatsaih viau tih kan hria a. He quality education tih hi tha zawka kan neih theihna tura an inbuatsaihna, SCERT atang te, MBSE atang te syllabus ruahhman pawh national standard an han ti a. Chutih rual chuan, vawiin ni ah All India level exam – NEET a ni emaw, JEET a ni emaw ah te kan la lang tam lo a. Education huangchhunga mithiamte’n an enkawl a, hengah hian ‘a khawi lai pawp’ tih hi an rawn hmuhchhuah pawh ka’n beisei deuh a. Helamah hian ngaihtuahna nasa zawk an neih tulin ka hria a ni.

Tin, zirtirna kan pek tur chungchangah pawh tunlai khawvel hmasawn zira zirlaiin subject an thlan tum te, a bikin environment lam leh IT te piah lamah Mizo nunphung, hnam ze mila kalna tur zirtirna pawh session hmasaah khan kan Minsiter khanin, “a theih chen chen introduce kan tum”, a ti a.

Fiamthu thutak deuha sawi ka’n duh a. Hei, kan thing leh mau chereu te leh kan kan environment that loh avangin tuihna awm te pawh a tlem kan tih laiin, Hrangturzo bialtu leh i vei lama Dampa bialtu te hian ngaihtuahna dangdai tak an nei a. Environment te pawh zirtir thar an ngai lehin ka hria.

Demand No. 21 - Higher & Technical Education Department:

“Mizoram State University Bill” kan han passed a. Rei vak lo ah ruahmanna awmze neiin kan kalpui dawn ang a. Higher & Technical-ah pawh ₹34,67,18,000-in kan budget nikum lam kan pha lo leh tlat mai a. University kan sual dawn a, sum leh pai tam tak a ngai a; college lamah indaihlohna nasa em em a awm bawk si nen. Chuvang chuan, kan House

Leader hian education sector na na na hi chu department dang pawhin lo thik lo mai rawh u ka ti a ni. Kan ram, kan hnam din chhuahna tur atan Human Resources Development lam hi chu na zawka kan kal hi a tul ka ti a. Tin, kan Minister-in nakinah remchangah a rawn react theih chuan NIT, Lengpui Mizoram-ah institution ropui tak kan nei a. Tunah hian mi in luahin an kal a, a nihna tur, an zahawmna tur angin an awm lo a. An campus ruahmanna thui tak kal tawh eng emaw environment lam harsatna forest clearance lamah te hian nge hmasawmna nge kan neih tawh, tih te.

Tin, technical course lam kan pekna Lunglei Polytechnic leh Aizawl Women Polytechnic te pawh hi vawiin ah hian upgrade deuh an ngai em? Duhsak deuh an ngai lo maw? An kal zelna turah placement-ah te pawh kan thalaite tan scope nei tha an nih avangin duhsak an ngai hle mai.

Demand No. 26 - Information & Public Relations Department:

Print media leh electronic media, cable tv te hi eng emaw chen chu kan beng berah kan hmang a, I&PR nen pawh an thawk ho tha a. Kan ram pum democracy-ah ‘A ke pawimawh an ni e’ ka ti a. Anni hi organized an ni a, a tha viau a.

Amaherawhchu, I&PR leh kan Minister te tan pawha chona thar awma ka hriat chu, tunlaih chuan Youtuber-te hian followers leh subscribers te an ngah em em a, nuai tam tak tak te an nei a. An thu leh hla hi mipui hian a kawi, a ngilin kan zawm emaw tih mai tur hi a ni a. Hei hi organize fel deuh, professional deuha an kal theihna tur leh Sorkar hnuaiah hian hamthatna nei ve law lawa an kal loh hi chuan, thil hi reilote ah hian sorkar policy a ni emaw, thil dangah pawh hian mumal zawka kaihhruaina a awm loh chuan kan ram, kan hnam thanna turah hian harsatna awm theiin ka hria. Tin, kan journalist-te harsatna neih ve chhun, advertisement bill te pawh vawiinah kan sawi tawh a. Department lam te, Finance lam te pawhin an lo ngaih pawimawh ngei ka beisei a ni.

Tin, I & PR hi sorkar order angin April 1 atang hian Printing & Stationery Department nena inkawp tur an ni dawn a. Department awm kawp ngailo awm kawp tur an nih dawn avangin Sorkar pawhin uluk zawka enkawlin, mipuiten a an chhawr tangkai theihna turin department thawk dun thar turte hi nasa taka kan zira, an grievances te pawh kan ngaihtuah a tul awm mang e.

Demand No. 48 - Information & Communication Technology Department:

He department hi a lian lo a. Mahse, he department chungchang sawi dawna ka rilrua lo awm chu, kan fakhla siamtuin, “Aw Bethlehem Judai rama mi, Juda khawpuite zingah i te ber tawp lo e. I chhung atangin awptu a lo chuak dawn”, a tih ang deuhvin, ICT department hi te viau mahse, vawiin ni ah chuan department zawng zawngte leh mipui kan che vel hi ICT kaltlang vek a ni tan tawh a. Chuvangin, he department hi nasa zawka kan address a tul ka hria a ni.

A hminga he department minister-a kan awmlaia Covid-19 avanga harsatna kan tawh lai pawh khan ICT te tanpuina avangin online class te, test te kha naupangin class thulh mahse, in atangin an zir thei a ni. ICT tangkaina kha, khatih lai khan India ramah Board Exam zawng zawngte pawh dan pangngai anga nei awmchhun ni thei khawp khan ICT te kan hmang tangkai kha a ropui ka ti a. Sorkar hmasaa kan ICT minsiter tena ruahmanna an lo neih thin - SASCI hnuaia district leh block te OFC (Optic Fibre Cable) thlunzawmna te

leh State data centre siamna tura sum leh pai eng emaw zat dah a ni te kha, eng chen nge kan hman tawha, heng kan hmasawna tur atan hian engnge a thlen chin tih kha ka zawt tel duh bawk a ni.

Demand No. 25 - Public Health Engineering Department:

He department pawh hi a pawimawh em em mai a. Tui hi kan khawsakna zawng zawngah a pawimawh em em mai a ni. Kan tui lakna source a tlem zel a. Hmanni ah kan PHE Minister-in Tlawng Lui tun dinhmuna a tlem dan a sawi khan kan phu zuk a ni. Chuvangin, Aizawl hi Aizawl ah bik han sawi ila, thingtlang pawh a ni vek a ni. Urbanization a lian a, mihring kan tam tawh a. Tuna tui kan pump, Aizawl Greater Water Supply Phase-1 leh II, Setlak tui pump tih te emaw, Tawitlang atanga gravity- lak tih teho hi mipui min chawmna thei tur a ni em; mi pakhat hi luite tui engzat dawng thei ang vel nge kan nih tawh? Hun lo kal leh tur han thlir in leh kan water source te han en hian department hi kan zam viau em, tih te ka rilruah a awm a.

Tin, kan biallam Sakawrdai-ah kumin October thla ah YMA General Conference kan thleng dawn a. Chutah chuan, Chengkawl Lui pumping scheme tunah hian kan kalpui a, kan zo tep a. Khi khi min zawh sak hman ang em? Mihring sing dawn vel mikhual dawn ta ila, wawiina kan intake neih te, kan water supply neih te, distribution line te hian min zawh loh chuan, mikhualte kan ti hawihai palh thei a. Ram pum huap a nih avangin, hei hi kan Minister-in min lo chhinchhiah sak thei se. Tin, Aizawl Greater Water Supply Scheme hian Aizawl chhehvel kuate min thlen kim theih hun kan nghakhlel hle a ni.

Demand No. 32 - Horticulture Department:

Pu Speaker, Horticulture budget hi ₹1,555,55,000 lakhs velin a tlahniam hlauh mai a. Mizoram department-ah hian Horticulture hi department thang chak bera ka ngai a ni a. A chhan chu, kuthnathawktute thian tak tak, horticulture huanga kan thali leh thei Mizoram- a awm ngai ni chiah lote tui zawk, thianghlim zawk, tha zawk, hlawk zawkin an chaw lut a. Kan thlaite hi han en ila, horticulture hi department promote tlak tak niin ka hria a. Allocation of Business-ah hian agriculture ah chuan an farm panna tur link road te a awm a. Hei hi horticulture ah te pawh hian awm ve thei se; link road te pawh hi a mamawh hlei hlei an ni lo maw aw ka ti deuh a ni.

Demand No. 38 - Rural Development Department:

He department hi keini thingtlang tan phei chuan, 'kan department' kan tih kha a ni a. LAD nen April Ni 1 atangin department khatah an awmdun dawn lehngal a; thingtlang bialtu tan phei chuan hei hi kan department tak tak a ni dawn a ni. Anni hi kan mipuite economy inngahna pawh an ni a. Achhan chu, NREGA - Ni 100 Inhlawhna khawihitu angin thingtlang mipuite pawhin kan en an ni a. Ni 100 Inhlawhna November, 2024 atanga la pekloh kha kan pe thei dawn hnai em? Central lam atanga la rawn release loh nge, kan state finance ah a tang, tihte pawh mipuiten an hre chakin ka hria a. Khalai kha kan Minister-in han sawi sak bawk sela. **(Speaker:** Minute 15 a kawka ta e. I zo thei dawn tawh em?)

Pu Speaker, ka zo tep. Sorkar hmasa lamah te pawh PMSY hnuaiyah Watershed Committee kan ti a, chutah chuan mipuiaah kuthnathawktute an inthlang ve a, society in, chuta tanpuina sum chu anmahni ah Watershed Committee Society khan an thawk thin a ni. Sorkar thar a lo nih hian tlem a zia a dang ta deuh a, Watershed Committee te khan hna an chang ta

manglo tlat hi ennawn deuh ila. A tira kan celebrate boruak hi zo deuh tawh sela, a thu kal dan tur dik hian kal tawh ila, tih kha.

A tawpna atan Pu Speaker, RD Block hi Sorkar hian siam belh kan tum dawn em? Nagaland ah te chuan RD Block 30 chuang zet an nei a, hmun dangah te pawh 70 chuang neite an awm bawk a. Keini erawh chuan kan ngah lo khawp mai a. Development tehkhawng, India rama kal turah hian RD Block a len leh tet aimah hian, RD Block based hian a kal fo mai a. Heng te hi kan ram kal zel turah hian tih belh a tha em? Kan ram hmun tinah hian mamawhna a awm si avangin, ram kal zelah a pawimawhin ka hria a ni.

Pu Speaker, hun min han pek belh thin a, ka lawm a, kan Minister duhawm tak tak te pahnih demand hi House in lungrual taka an pass turin ka thlawp e. Ka lawm e.

SPEAKER : Kan House Leader i sawm ang aw.

PU LALDUHOMA, CHIEF MINISTER: Pu Speaker, chawhma lamah khan Dampa bialtu Member zahawm tak khan kan PAMRA te vanduinawna tawh thu kha a sawi a. Anni ho hi kan ram tan nunna thapa tih takzeta beitate an ni a. Member hi pun lam pan lo, tlem lam pan tial tial an ni a. Hei, Maumual lama an harsatna te pawh rem kan han ruat ho a, kan Revenue Minister-in theih ang tawkin hma a laksak a. Tun tuma kangmei an han tuarah hian tih theih nei tam lo mah ila, CM Relief Fund atang hian cheng nuai 1 pek a ni a, DM & R Minister hian cheng nuai 5 pek a tum bawkin ka hria a. Tin, helai bazar thla hi chhungkua 40 bawr vel eizawna a ni a, chu chu kan AMC lampang hian an titawp niin ka lo hria a. Sak that tum a ni emaw chiang takin engmah information dawn ka nei ve lo a. Hemi chungchangah hian Sorkar min rawn dem deuh uai uai te pawh an awm a; hei chu AMC thuneihna huang a ni a, kan inrawlh thei lova. Kan party te chu nise, tihdan kawng te pawh a awm ang a. Amaherawhchu, kan party te an lo nilo bawk si a. Chuvang chuan, helai ah hi chuan Sorkar chuan kut kan thlak theilo a ni tih kha ka'n sawifiah duh bawk a ni.

Pu Speaker, tun tum kan session hi a rei a, kan hah tlang viau mai a. Zirtawp zanah zanriah eiah ka sawm vek che u a. Thingtlang lam pawh kha hawng lo hram ula, nupui neiin nupui, pasal neiin pasal, neilo-in neilo in rawn hruai ang a. Tichuan, hlim takin zanriah kan ei ho leh ang a, a tlangkir te kha ka'n tuaimam ang a. Amaherawhchu, pawisa rawn pai hmem deuh hlek tawh rawh u tun tum chu; fine chawi tur neilote in awm leh palh takin. Kan Master of Ceremony, kan chairman tur hi Pu B. Lalchhanzova a ni ang a, kan Dy. Speaker Pu Famkima nen, anni pahniha tha an tih ang angin min kaihruai ang a, a hlim thei ang bera hman kan tum ang a. Item nei thei turte pawh kha rawn inbuatsaih ula a tha ang e. Dar 5 PM ah tan ta ila a tawh ang em le? Aw le. Dar 5 PM ah i tan ang aw. Hetia kan han insual lek lek hnua zanriah han ei te hi tha deuh mai a nia. Nuho te pawh, an han kalkhawm a, an pasalte leh an thenawmte an han rel tak tak a; chumi hnua Pathian-thu an han sawikhawm hi chu, ngaihawm deuh mai a nia.

Vawiin hi a nuam khawp mai a, lawmthu deuh hliir kan sawi a. Kha, Pu Robert-a pawh kha tunhma lam kan nunhlui te a rawn chhir chhuak a, a lung te pawh a leng ve deuh a nih ka ring a; a lo lungleng ve thei a ni maw, te ka ti deuh a. Kan han campaign tak tak chu, "A tul phawt chuan i tan chuan helicopter ka hire mai ang," a ti thin a ni. Nula leh thlangvalte tan pawh hian han inngaihawm tan tirh lai, inhriatchian tak tak hma hi a ngaihawm duh viau a ni e.

Tin, kan Opposition MLA khan lawmthu an sawi deuh vek a, a thente pheih kha chuan ruling MLA-te thik kha an hlau a. Khati khawp khan mipui-sorkar a nih zia vawin chu a langin ka hria a ni. Opposition MLA tena khati khawpa duhsakna dawng leh ruling lam mitmei veng khawpa an awm kha, ka hriat vawikhatna a ni a, a lawmawm ka ti khawp mai.

Demand No. 48 - Information, Communication & Technology Department:

ICT ah hian point khat chauh. Signal thalo kan sawi a, tower kan mamawh a ni. Central-a ICT changtu hi Pu Ashwini Vishnaw a ni a, ani hi IAS officer atanga politics a zuang lut a ni a. Vawi hnih-thum kan inkawm tawh a, bureaucrat hlui ho hi chu kan han innel nghal mai zel a. Hemi tower kan neih theih zat hi an lo titawp ti tuai tawh a, India ramah hian. “Nangni chu a tul zat zat karawn pek belh ang che u,” a ti a; ka lo mangnghilh deuh a, kan bawhzui vat lova. Chuvang chuan, kan MLA hmun kilkhawr bialtute khan in mamawhna lai tur kha proposal rawn siam ula, kan ICT Minister hnenah han thehlut ula. Tichuan, hmun 50 bawr vel identify tum ta ila, chumi chu peihfel hnu ah Delhi lamah kan kalpui dawn nia.

Demand No. 38 - Rural Development:

RD ah hian Community Hall kan sa thin a. Ka sawi fo chu, thingtlang hmun thing leh mau tam em emna ah pawh cement-a sak talh kan tum a. A bang brick kan han ti a, hman tlak loh Community Hall hi a tam em em mai a ni. Hmanah pawh ka sawi tawh thin a, an han sa zova, public meeting neih nana hman theih miah loh khawk lutuk, a pum ve ringawt a, tikhan a tawl zui leh a. A bangah te hi chuan dap thum-bawh kaih sawih te hi han hmang ila, a mawi the reng nen; a tlo pawh a tlo a, rukruk lakah pawh a him a, hreipui nen lo chuan lut mai mai theih pawh a ni lova, thum bawh kaih sawih te chu. Chuvang chuan, heng hi khawchhung ho hian Pathian-in min pek hmanraw awmsa hman remchan dan hi ngaihtuah thiam se a tha ka ti a. A ceiling ah te pawh a tha em em a. British hunlaia an sak mau ceiling te kha tha tak tak hmuh tur a la awm a ni.

Tin, kan RD Block ramri chungchang buaithlak zia kan sawi a. BDO te tan tak hian a buaithlak a. BDO pakhat bialchhungah hian MLA pahnih-pathum te; hmun pakhatah pheih chuan pali kan awm a nih kha. Kha kha BDO tan khan thawhpui vek a lo ngai ta a, a buaithlak khawp mai a. Chuvang chuan, kan Opp. Leader rawn sawi ang khan, tih belh hi a ngai hle mai a. Tunhma atanga ka ngaihpawimawh chu - District Hqrs. hawn belh ai chuan, RD Block hawn belh hi kan mamawh zawk; mipuiin an chhawr zawk ka lo ti thin a. Theih chu ni se, Assembly Constituency-wise hian awm thei sela chuan hnathawh a awlsam zat mai ang. Hei, District Planning kan han tih zawng zawngte pawh hi khatiang zawng khan kal thei sela; village atangin block-ah ti khan a lo kal chho a ni a. Tin, tuna a awm ang ang pawh hi a ramri han siam fel theih chin chin hi chu siam fel dan ngaihtuah a tha khawp ang. Tin, RD Block chauh a nilo, kan department dangah pawh, SDO theuh theuh ramri inanglo te an awm a, a buaithlak khawp mai a ni. Hei hi chu a theih chin chin chinfel tum ni se a tha ang e.

Tin, Champhai lampang kha hmannah khan Ring Road siamna tura crore 20 dah thu chauh kha sawi niin ka hria a. Khimi Khankawn-Champhai inkarah motor-in kawngpui nuam takah kan kal a. Khua kan lut dawn ta tihah zim a ta em em a, a hrehawm ta em em a. Khimi inkar atan crore 6 dah a ni tih kha ka'n sawi tel duh bawka a ni.

Demand No. 20 - Education Department:

Kan literacy rate a hniam thu kan sawi a, a hniamna lai bik pawh a awm a. Hmanniah ka sawi tawh a, khang lai bika kan MLA-te khan tan lo la ula, department nen theihtawp kan chhuah tlang dawn nia kan ti tawh a, hma kan sawn viau a. Kan Education Minister hian wawiina sawiah a la phal lo deuh hlek a, kan hmasawn dan thenkhat, naktuk lamah kan sawi dawn ni awm tak a ni. Tichuan, tan kan la chho ang a.

Tin, kan Chakma unaute'n Mizotawng zir an duh a, Mizotawng zirtirtu tur an duh thu official takin an rawn thlen a. Hmaichhanah pawh an MLA ten min rawn hmu a, kan process tir mek a; a lawmawm ka ti khawp mai a. Tawng hriatloh hi a buaithlak khawp mai a. Pu RM-a te pawhin, "ka vel ang che," an tih pawhin, 'aw' an ti zel mai a ni a. Tawng hriatloh chuan a buaithlak tlat a ni, kha kha. Vai ramah Mizo tlangvalin sangha a lei a, a phuhlip nawh thlak a duh a, a kawchhung paih a duh bawk si a. A sawi thiam si lo va, 'A re bhai, post mortem ka ro' a ti ringawt mai a. Khatiang kha tawng thiam loh chu a pawina a ni.

Tin, a zirtirtuah pawh hian 'local area mi zirtir thei tur kan indaih a ni, kan nei a ni', an tih te pawh kha, department hian chhinchhiah se a tha ngawtin ka ring a. Hmundang daiha mi posting an hmuh ve leha transfer dan kherh leh ngar ngar tur dah khan awmzia a nei lo vang. Chuvang chuan, heng hi ngaihtuah that a tha hle mai. Tin, a bik takin kan CADC saw potential ngah a ni a, horticulture-ah te, agriculture-ah te; project tha tak tak din nan kan it viau a ni. Chuvang chuan, Administrative District te hi min dil duh miah lo a. Min dil ula, kan pe mai thei che u asin. Sawlai saw Administrative District awmna tur awm takah kan hotute hian an ngai a ni. Amaherawhchu, kan ti zung zung thei ang, ka tihna lam chu a ni lo a.

Tin, Education hrim hrimah hian thuang-hniha kan kal a ngai a. Sorkar school theih ang tawka kan siamthat a ngai. Tuna kan school han en hian a building chhe lutuk, a environment hrim hrim chhe lutuk avanga rilru pawh pawt hniam duai thei tur; a chhung furniture leh engkim kha a hniam sa hrim hrim a, chutah zirtirtu kan indaih lo em em bawk a. Chutichung chuan, competition exam-ah tling turin kan inbeisei lawi bawk si a. Kan Higher Education te, kan college thleng hian chutiang chu a ni deuh fur mai a. Chuvang chuan, hei hi theihtawpa kan thuamthat a ngai a, sorkar pawhin pawisa kan ui loh a ngai a. A tul ang zelin pawisa pawh kan ngaituah belh turah ngai ila. Chu chu kan hmalakna tur kawngpui pakhat a ni. Chumi hrulah chuan PPP Methol a kan kal hi a ngai a; chu lampanga rawn rawtna te pawh kha a awm a.

Hmanniah Seventh Day School hotute an lo leng a, Sorkarin a upgrade zingah khan an lo awm a. "A, min upgrade leh lo mai rawh u; a ngai ang khan kan awm leh ang e," an rawn ti a ni. A chhan chu, sorkar a han inrawlh tak chinah khan Managing Committee khan thu an nei ta mang lo a, an school kha a chhe dawn tan ta tlatin an hria a ni. Chu chu a nih ve tlat avangin, 'he thil hi engtin nge kan kalkawp tir ang' tih hi kan Educationist ten ngun taka an ngaihtuah a tulin ka hria a. Sorkar zirtirtu pakhat kan laka a pension thlenga kan senso tur ai hi kohhran school emaw, public school-ah emaw Grant-in-Aid pe ta ila, a pawisain, thui tak chuan kawngro a su ang. Dik chiah chuan trained nilo zirtirtu emaw, qualification hniam zawk emaw hlawh tlem zawkin an ruai a, pass percentage ah kan phak ngai miah lo a ni. Hei hian ngaihtuahna a ti thui khawp mai. Chuvang chuan, sorkar school chei that a nih rual rualin, a management hi chu tualchhung kuta daha, nichina Pu Laltea rawtna ang khan a infrastructure te hi va tihsak thei ila; a nih loh pawhin sum tein va pui

thei ila. Kohhran school an management leh administration-ah te va inrawlh miah lo ila; syllabus te, a supervision leh inspection kan tih chuan a tawk mai; examination te an kutah awm sela. Kohhran school ah chuan an zirtirtu tur uluk takin an la a, zu in mi an chhawr ngai lo. Sorkar school ah chuan a ngawl vei pawh kan ban hlei theilo chu a nih hi maw le. Chu chu a nih tlat avangin, khang nena thawh ho dan kan ngaihtuah a ngai a. Tunhma, District Council hun laia an lo kal dan anga kan kal leh te pawh hi a theih chin chinah a tul viau ang. Chumi rilru pawh chu kan put tel chhoh zel a tha ang. A management hi a tha a, sorkara an luh chiah hian a buai thin. Dik chiah chuan appointment ah pawh political appointment te a lo lut a, tikhan a buai chho zel tlat a ni. Senso tlem zawk, school tha zawk kan neih theih dan te pawh thuang hniha kan kalpui a tha awm e.

Tin, Sainik School hi pakhat chauh kan nei a. Kan sorkar tirh lampang khan Chief of Army Staff, General Upendra Upadhaya khan Mizoram House ah min rawn chibai a, lawmpuina te min rawn hlan a. Chumi tum chuan Assam Rifles sawn tur chungchang leh Sainik School te kan sawi a. ‘Sainik School min pek belh teh u a’, ka’n ti ngawt a, a lo har nasa mai a. State khatah pakhat bak pek te kha an lo ti hlei theilo a lo ni a. Chuvang chuan, kan neih chhun hi kan tihthat viau a ngai a. Hman deuh khan kan han tlawh a, an DIG te nen nilengin hlim deuhin function kan han neihpui a, an discipline pawh a tha khawp mai a. Tin, Mizoram sorkar pawhin kan theih ang angin kan pui zel a, hmanni lawk pawh khan tanpuina crore 1 kan pe a ni. Tiang chuan, khimi school khi hman tangkaina chang kan hriat chhoh zel a tha hle ang.

Tin, ADC area chhunga school kalphung siamthat chungchangah, a area-a kan memberte’n an sawi a, kha kha bawhzui a tha ka ti a. A kalphung, a system siamthat a ngai a ni, sawlai saw. A then District Council hnuai, a then Mizoram sorkar hnuai, pu inang lo, hlawh inang lo, khatianga kan thawk tlang pheng phung hi a tihdan tur la sawiho ilangin, kan education department te nena siam rem a thain ka hria a; a kalphung tihdanglama, kalphung thara kal a ngaih ve na lai tak a ni awm e.

Tin, posting & transfer chungchangah hian, a policy duan tur te hi kan han ti ngial a, a tha tho. Amaherawhchu, human factors te a awm ve a, local factor te a awm ve a; mihring kan ni a. Khami ngaihtuah lo lek khan a awm theih ngawt bik loh. Transfer hun te pawh hi naupang admission lak hun lai nilo sela, exam lai te nilo sela. Khatiang khan mihring kan remchan dan ngaihtuaha kan kalpui a tha ka ti a. Tin, miin school an lo din a, hlawh mumal mang lovin khawtlang hmangaihna avangin zirtirtu-ah an lo tang fat fat a, a lo puitling ta a. A lo puitling ta cheng a, khawdangah transfer an ni ta daih a, ‘Ani min sawn sak hi chuan kan school a chhe dawn,’ ti ngawih ngawih khua te hi an awm a ni. ‘Ani hian kan school a hmangaih’ an ti a, NGO hruaitute, kohhran-upa te hial an lo ni tawh a ni, kha khuaah khan. Khawtlang hmangaihna tak tak nen rawng an lo bawl a. Kha khawtlang awmna pawh la hre ngai miah lote kha a aiah an rawn lut a. A rawn lut a, lawm hek suh; an chhuak a, lawm hek suh, khawtlang lawm hek suh. Khatianga kan tih khan a zirna-in khan a chhiat pui nge, a thatpui zawk tih kha kan ngaihtuah tel a ngai a ni. Chumi ngaihtuaha tel miah lova kan tih rikngawt hi chuan, a zirna bera khan a tuar thei. Heng element ngaihtuah chung hian kan kalpui a ngai hle a ni.

Tin, NIT hi a tangkai tur angin kan la hmang tangkai thei lova. Vawikhat kha kan sorkar hnu khan an hotupa ber kha Delhi atangin a lo kal a, NIT a hna lak chungchang velah thil fel lo kha a lo awm viau emaw ni dawn ni? Tichuan, sawtah Zemabawk-a a kal tur kha,

thleng theilo turin MZP ho tam tak mai kha an pungkhawm a, an lo dang tih ka hria a. Tichuan, ka phone a, ‘lo la kal rih lo la, ka va kal hmasa phawt ang e’ ka ti a. Tichuan, zirlai tlimpui zingah ka’n lut ve tawp mai a, asir inah hruaitute nen kan han inbia a. “Kan institution pawimawh a ni si a, an hotupa ber kan tih lungnihloh chuan kan tan pawh a pawh thei a. Lo dang khawmawi ve mai mai ula, duh leh eng emaw deuh te pawh intiam tir ula, chhuah hram teh u a. Function hmanng theih miah lova a hawn chuan a tha lo ang,” kan inti a, kan zirlaite’n min hrethiam a. Tichuan, a mah ka phone a, “Hei, a tihdin chu an lo tiding che ang a, harsatna lian i tawh ka ring lo; i kal tlang thei mai ang. Eng emaw commitment i siam ve te pawh an phut a, i siam theih chin chin i siam ang a. Tichuan, function zawhah ka bungalow ah i lo kal ang a, kan inkawm dawn nia,” ka ti a, function zawhah a lo kal a. Zirlaite demand pawh ‘ka ti ang’ tiin a intiam a.

Tichuan, khata tang khan inhmelhriatna thatak kan nei chho a. A tir takah chuan kan chawi tura an tih kha clearance la hawt lo khan an lo ti ve bawk a ni, kan sorkar te khan; Forest tan chuan a thinur thlak ve a ni, kha kha. Chuvang chuan, kan intawng kawlh a, crore 22 chawi tura min tih kha kan han bei ngat ngat a, crore 14 ah an tla thla a. Tichuan, a minister nen Delhi ah kan han sawidun leh a, ‘min waive sak rawh, a vai hian’ ka’n ti a. ‘Team ka rawn tir ang a, chumi zawhah kan inbe leh dawn nia’ a ti a. Team a rawn tir a, crore 3 ah an tlatla leh a. Kha bak kha chu, ‘a complete waiver kha chu a ngamawm bik tawh lo’ a ti a ni, a minister khan. Tichuan, kan hrethiam a ni. Engpawh nise, Mizoram sorkar ni lovin, ‘hei hi chu NIT in chawi ve tur a ni; in contractor te atang pawhin insawk thla ve mai tur a ni’ kan ti a; Aw le, an ti a. Tichuan, anmahni pek turah kan dah ve ta deuh nghe nghe a ni. Chuvang chuan, khulai problem khu chu nei tawhlo turah kan inngai a ni.

Demand No. 32 - Horticulture Department:

Hei, a minister-in balha tui deuh mai min khilai a vawiin chu, a lawmawm khawp mai. Pipe hi kan sawi leh thin a. Kei, ka mimal ngaihnan hi department te hian tipuitling thei tak maw. Pipe hi kan mamawh a, pipe ka mamawh rei zia hi ka hria a, kei ngei pawh hian ka huan atan hian pipe hi a chhia a chhiain ka zawm nasa thei khawp mai a. Subsidy-a lei tur ringawt pawh kha kan han hmu theilo thin kha a ni a. Chuvang chuan, subsidy-a lei tur na na na hi chu, ‘engahnge an duh tawka lei tur hi kan chhawp loh’ ka ti a ni. Vaibelchhe tam a ngaih ka ring lo reng reng. Duh duha subsidy-a lei tur kan dah ngat chuan, tumahin an hralh ru lo ang. Hralh ruk a ngai lo; tunge lei chuang ang? A hlauhawm lo reng reng. An mamawh bak tumahin an la lo reng reng ang; a hnawk mai mai. Chuvang chuan, hei hi chu a department hian lo ngaihtuah sela, pawisa ngai zat turte pawh rawn estimate chho sela, kan tih theih mai ka ring a ni. Pipe hi duh tawka kan pek theih chuan, huan neitu tam tak hi chu an intodelh ve thei dawn a ni. Heng avanga che theilo hi an tam khawp mai. Leilet te pawh a ni tho mai.

Tin, a coil pakhat pahniha then kha kan la ching em aw? Kha kha chin tawh lo tur kan tih kha. Coil khat na nan an coil hniha chantir kha a ramhlui-zia a ni; kha kha chin loh tur kan ti a nih kha. Tin cold storage pawimawh dan kan hre dawn chauh a, hand-holding hnuaiyah chuan thlai thar tamna a piangah, kan theih chin chinah dah kan tum ang a.

East Tupui bialtu MLA zahawm tak khan, “Min ngai pawimawh ve teh u a,” a ti deuh a, inbiak dan a zir te pawh a ni zel ang chu. Tichuan, Cherhlun kha, Jejea a awm maw? Inthlan laia keimah ngei pawhin ka tiam Cherhlun - Ngawizawl WRC tur kha, tunah hian crore 2.7 kan dah fel tawh e, khami atan khan. Tin, thlai chi man tur kha kan beisei deuh

a. Hei hi chu deaprtment ah i beisei lo teh ang u a; MLA te hian i pe ve mai ang u. Kei pawh ka bial thlai chi chu ka fund atangin ka la pe ziah a ni, opposition kan nih lai atang tawhin. Chuvang chuan, heng hi thil tam a ni lova, kan biala thlai chi mamawhte hi chu kan fund atangte pawh hian han ngaihtuah ve ila a tha viauin ka ring.

Tin, cashew nut hi a tha tih kha kan ngaithla a, Dampa bialtu MLA zahawm tak atang khan. A rilruah fenny kha a awm tel deuh emaw ni aw ka ti a. Goa ah chuan cashew nut atang hian fenny an siam a, zu a ni a. Ka huanah khuan kan ching ve tak tak a, a ngeihin a rah nasa a. Han lo ila a itawm em em a, a ei tlak der si lova. Kan hawmhaw ah a tui a kai vaih chuan a reh thei tawh si lova; a sazu pumpui lai te chauh kha ei tlak a ni a. Goa-ah chuan a theia kha an sawr a, fenny-ah an hmang a, an hmingthan phaha khawvelah. Keini chuan a cashew nut, a sazu pumpui lai tea kha kan ei duh chu a ni mai si a. Kan han lo ve a, a sawngbawl kan peih lo a ni. Thir bel lianpui, Assam Rifles ar kanna, kel kanna tiat velah khan balu chhuan sata vil ngat ngata chawh kha a ngai a. Tichuan, han kheh leh te kha a ngai a, a buaithlak lutuk a, ka ti peih lovin ka suat a. Thil suat har tak a ni, a bul retah pawh hian han kit thlu ila a lo chawr leh a, reiloteah kawng hi a rawn thleng nghal zel mai a, paih leh a ngai a. Kum engmaw zat khatia tih hnuah khan a thi thei tawh a ni. Kan ram chu a ngeih thlawtin ka hria a, uar duh tan chuan uar chi niin ka hria; a thar rang ve bawh a ni.

PU LALRINTLUANGA SAILO: Pu Speaker, khawngaihin. Cashew nut processing machine portable a tam mai a, Bangladesh-ah khuan; chu chu kan information atan a tha khawp mai.

PU LALDUHOMA, CHIEF MINISTER: Mahse, zu-ah a siam theih tlat mai a, kan ti vak lo ang a, keini chuan.

Tin, thlai chi leh planting material ‘a hun loa supply’ tih kha kan hre thin a, tun hmain. Hei hi kan sorkarna hnuaiyah chuan a awm tur a ni tawh tih kha hre thar leh ila. A hun a pelh tawh chuan supply tawh loh mai tur. Awmzia a nei lo. A hunah ngei ngei, kan pe dawn anih chuan kan in ready tur a ni ringawt mai a ni. Tin, sapthei hi uar kan tum a, ‘passion fruits’ an ti a. Kan uar tak tak hunah phei chuan Mizoram hi ‘Land of passions’ tih te kan la hlawh ang a, a mawi ngawt ang.

Ka sawi tawh a; kan zin reng reng hian VIP ho present-ah i hmang zel ang u kan ti a, hmanni an lo kal thleng khan sapthei bawh kha kan pe a ni. An tem ve tan a, an hre ve tan a. Reliance Fresh company te hian Kolkata ah retail shop hmun 131-ah kan sawhthing te nen an zuar tan dawn a. Tunah hi chuan a season a pelh tan tawh avangin lei tur kan hre vak lo a. India khawpui zawng zawngah an zuar dawn a ni, kan sapthei hi. An hriat vek vek chuan kan chawm seng lo ang, Kolkata khawpui ringawtin pum khat theuh an ei pawhin, MLA bial 10 velin kan chin a ngai ang. Chuvang chuan, potential kan nei tha a. Hmanniah MIFCO ka han tlawh a, kan Sapthei sawrna khawl te kha a lo la tha a, tunah khian khawl kan pek belh dawn a. MIFCO chairman, Pu Thazuala hian a tuipei a, a ching tur pawh an tipung dawn a ni. Sapthei hi kan sum hnar lianah hman kan tum mek a ni.

Mau hi kan sawi ang khan, mau chungah hian thuneitu an tam viau mai a. Forest plantation area a nih chuan, Forest-in thu an nei a, forest area a nih loh chuan, horticulture-in thu an nei ve thung a. A plantation leh a ram to te pawh kha a ni ang chu, kih veleh khan Commerce & Industries-in an chang ve thung a ni. Kih an nih chiaha process a nih khan,

tiang chu a inkhaidiat dan a ni a. Hengho hi kan hand-holding hnuaiiah hian kan telh vek a; kan telh lo emaw kha kan ti lek lek a, kan telh vek a ni. Tunah pawh hian component pahnih zingah hian horticulture hi a chang tam pawl an ni dawn a ni. Support price kan pek bik thlai chi 5 (buhhum telin) kan identified crop an ni a, a bak kha Hand holding-ah hian an tel lo a ni reng reng lo, an tel vek a. Tunah pawh hian kan Hand-holding sum hi an dawng dawn a, CM special package-ah hian crore 20 kan dah a, a tlem berah mi 2000 a cover dawn a. Mahse, nuai 1 veka sem a nih dawn loh avangin a tak takah chuan chu aiin progress partner kha a pilot project anih avangin a hlawhtling tur thlan te kha an ni a.

Lawngtlai West-ah te pawh khan ka rin danin a hlawhtling thei tur an thlang ve ni maiin ka ring a. Lo dawng thang tawh te kha chu lo awl ve deuh tawh pawh ni sela, a awm ve tho ka ti a. ZPM ho hi a taima, kut-hnathawh ngaina kan ni a. An lo thlang deuh anih pawhin, a endiktuten tlinga an ngaih kha chuan a tha a, kan pawm mai turah kan ngai a. Kan thlai hrang hrang hi hand-holding hnuaiiah hian an lut vek zawk a ni. Eizawna atana han tih theih ang chi zawng zawng hi handholding-ah hian an leng a, a cover chho mek vek a ni.

Hand-holding atana kan sum dah pawh hi tuna selection kan han siam atang hi chuan kan hmang seng dawn rih lo a. Lehlamah sawhthing leh hmunphiah vel leina tur kha kan kep thui thei dawnin kan hria a ni. Chumi bakah chuan central lamin min rawn tumpui an tum deuh ni te pawhin kan hria a; kan Agriculture Minister Delhi-ah a thang mek a, MIS atang hian crore 30 vel bawr chu an rawn beisei haw dawn niin kan lo hria a. Hmannia lo kal Dr. VK Paul nen kan inbia a, ‘crore 100 tal te chu min pek belh ang chu le’ ka ti a, kan lo ngaihtuah dawn nia a ti bawk a.

Kan thlai thar leina leh hetiang velah hian hek viau mah ila, mipui tana kan tih a ni a. Kuminah hmunphiah leh sawhthing a tlahniam a. ZPM hi lo sorkar hlauh lo pheii ila chuan engtin tak hian nge an awm ang tih hi ngaihtuah phak loh a ni; an mangang dawn lutuk a ni. Keiniin hloh pawhin, sorkar sum sengin kan rate angin kan lei sak a, lei zawh sak vek pawh kan tum a ni a. Chumi atan chuan a tul ang zelin pawisa pawh kan dah turah kan inngai a ni.

Vawiina kan sawihona a hlimawm a. Lawm takin kan Minister-te pahnih demand kan pass thei dawn niin a lang a, a lawmawm hle mai. Ka lawm e.

SPEAKER : Tunah chuan, Minister zahawm tak Dr. Vanlalhlana'n a demand kan sawihona te rawn wind up-in, sawifiah ngai a tih te rawn sawifiah sela. Tin, a demand-te House-ah pass rawn dil nghal bawk turin ilo sawm ang u.

DR. VANLALTHLANA, MINISTER: Pu Speaker, ka lawm e. Nizan lampang record an break tha viau tawh a, pelh loh hram chu tum ila.

Kan staff, kan officer-te theihtawp chhuahin achievement an neihte an rawn tarlang a. Helamah keiniin rei hlauvin kan han nawr liam puat thin hi a hrehawm ka tihpui deuh hlek a. Theihtawpin, kum tluanin thil tam tak, keini chuan ‘heti hian ti teh u’ kan ti a, a chungah, ro kan lo relpui a ni a; a hna thawk tak taktut kan officer-te an zahawm ka ti a. Chuvang chuan, tawi taka tih tum siin hmaih neih loh hram ka rawn tum dawn a ni.

Pu Speaker, vawiina ka demand hi member 26 lain min han sawipui a, School Education hi kan sawi kim vek a, Higher & Technical Education hi mi 20 in kan sawi a, Information and Public Relations hi mi 8-in. Tin, ICT hi mi 8-in an rawn sawi bawk a ni. Vawiin chu kan hlim tlang viau mai a, boruak pawh a tha a, a lawmawm ka ti khawp mai a. Pu Speaker, ka Department chante hi 4 a ni nain, pahnih - Education leh Information anga then theih a ni a. Kan hre theuh a, School Education leh Higher & Technical Education te hi then hran an ni a. Tin, I&PR leh ICT a hranin an kal ve leh a. Chutiang chuan, theih ang angin department kan lo enkawl a, mahni insit a na duh khawp mai a. Kum khat chauh kan la sorkar a, thil danglam tam tak hmuh tur emaw pawh kan la nei lova. Amaherawh chu, sorkar inel kan ni a, sorkar thar chuan thil buaipui duh te kan nei a. Chumiah chuan a tha zawk, a dik zawka kal tumna erawh tam tak hmuh tur a awmin ka ring a ni.

Demand 20 - School Education Department:

School Education Department hi nichina kan hriat ang khan kan budget a tla hniam nasa khawp mai a. A nuaih ang zawk pawhin ₹24,843.43 lakhs in a tlahniam a ni. Hetah hian sawi tur a tam hle a. SAMAGRA lama tlahniam nasa lutuk hian min pawt chhia a ni a, kan vanduai khawp mai a. Nikum kan sorkar tirh kum 2024-2025 ah budget-ah chuan kan dah tawh na a, PAB-ah kan kal a. Chutah chuan, kum dangah chuan hna thawh zawh hman loh a kum leha thawh chhun zawm tur kha, ‘hei chu in lo thawk zo mai ang a; a kum thar leh atan hei hi kan pe ang che u’, tiin pek thin a ni a. Nikumah khan Central sorkar chuan, ‘in thawh zawh loh ho hi chu kan pe rih dawn lo che u, in budget tih hniam nan kan hmang dawn’ an ti ta tlat a. Nikumah pawh khan a tirah khan kan budget hi a rawn tlahniam a ni. Amaherawh chu, kum a lo kal a, min pek belh leh te pawh a awm a.

Chutiang chuan, tun tumah pawh hian ₹256 crore bak hi a dah theih loh e, an ti a. Budget kan en chuan, kum 2023 chhoah chuan crore ₹520 vel a ni a, nikum lamah khan crore ₹400 velah a tla thla a, kuminah phei chuan crore ₹256-ah min cut ta a. Dah belh kan tum ngial a; system ah online-a tih luh vek a ngaih avangin, khu lama kan dil belhkhawm zawng zawng khan crore ₹256 bak a pelh theih tak loh avangin, budget kan tih hniam a ngai ta a, chutiang chuan harsatna kan tawka a ni a.

Amaherawh chu, hei, kan hotute Delhi lama meeting an rawn haw a, ‘in hnathawh zawh loh thawh tura tih dah rih te tender tur te kha han ti zo zung zung ula, mid-term PAB te a la awm leh ang a, chungah chuan in mamawh dan azirin kan inpek belh leh dawn nia’, tiin kan in thlah a ni a. Amaherawh chu, a la chiang si lo va, a budget system kha a fel loh avangin kan dah thei rih lo a, chu chu budget hniam chhan a ni tih kha ka’n sawi hmasa duh a ni.

Tin, Pu Speaker, School Education Department hi Civil Secretariat Directorate of School Education te, Samagra Shiksha, tin, Directorate of SCERT, MBSE leh Mizo Language Development Board angin office hran theuhin hmun hrang hrangah an awm a, ngaihven tur pawh a tam thin khawp mai a. A chang phei chuan ngaihsak loh bik kan ni ang tih te kan hlau a, kan han inko khawm rawp rawp thin a. Kan han sorkar hnu-ah hian review meeting kan han nei chho ta a. Ka hresual a nih loh chuan, a hma-in la tih ngai loh niin ka hria a. Quarterly-review meeting kan nei a, chutah chuan tuna ka sawi hrang hranga mite khan keimahni chan theuhah - Samagra ten an hmalakna an rawn sawi a, SCERT in an hmalakna an rawn sawi a. Chutiang chuan quarterly-review meeting kan nei a. Engtin nge hma kan lak theih ang; kan scheme neihah te engtin nge convergence kan tih theih ang; nasa zawkin zirna hian engtin nge hma a sawn theih ang tiin ngaihtuahna kan seng thin a.

Chutah chuan, Mizoram Reforms Committee-a kan Education Consultant te, kan Working Chairman te leh a changin kan member hote an rawn tel a; chutiang chuan ngun takin ngaihtuahna kan seng thin a. Tunah pawh a 4th quarters tur, Annual tawp ber tur chu tun thla tharah hian nei leh tumin kan inbuatsaih a. Hei hian thui takin min puin, min tichak niin kan hria a. Hetah hian kan hmalak ve-ah chuan hlawkna tam tak kan hmuin, min tiphur hle a ni.

Tin, Memberte'n kan sawi Communitization PPP Mode chungchang kha, NERC hian implementation schedule an siam a. Kum 3 chhunga ZPM Policy-a kan neih, kan manifesto-a awm hi tihpuitlin dan tur kan ngaihtuah a. Chutiang chuan schedule ah kan dah a. Kuminah hian thil tam tak awm karah PPP Mode te, Private School va ngaihven (va control te pawh a ni ang chu) khatiang te kha kan dah a. Chumi a nih avang chuan Education Reforms Committee hian hmachhawpah kan nei a. Kan hriat atan ka rawn tarlang ve leh a ni.

Hindi:

Tin, Hindi chungchang hi kan Consultant Rev. Dr. K. Thanzauva hian a vei khawp mai a. Ruahmanna leh rawtna a rawn siam a, Education Reforms Committee-in kan ngaihtuah mek a. Tin, kan indaihlohna te pawh a nasa khawp mai a. Hetah chuan tarlan a tul lutuk lovin ka hria a. Amaherawh chu, Sorkar school ah pawh kan indaihlo a. Chuti chung chuan lumpsum School kan neihah te kan lo va indah a, a tha tho a. Sorkar School ngeiah hian Hindi Teacher kan nei tur a ni tiin, tunah hian ruahmanna kan siam mek a. Kar leh tuan khi transfer season kan neih, a kharna tur a ni a. Sawi duh pawimawh riau nei kha chu kar lehah khian in rawn len a ngai dawn a. A bak chu interview pawh kan hawng vak dawn lo a. Zin ka tum pawh ka thulh phah a, chutiang chuan insiamrem kan tum a ni tih kha min lo hriatpui dawn nia.

Zirtirtu lakbelh:

Kan han sorkar hnuah Primary School zirtirtu 648, Middle School Zirtirtu 371 leh High School Zirtirtu 350 kan han la a. Hei bakah hian tunah hian Group D (PE) mi 36 lak kan tum a, tunah hian kan buaipui mek a. Tin, Circle Education Officer (CEO) 4 lakna tur leh Lab Bearer post 2 lak turin tunah recruitment process kalpui mek a ni a. Tin, Special Educator post 193 siam belh a ni a, hei hi a remchan dan anga hnawhkhahna dilte pawh a la ni dawn a ni. Tin, Pu Speaker, 'casual teacher mi 526 in an join lo' tih kha chu a dik reng a ni. Amaherawh chu, Primary School-a dil khan Middle School-ah a lo dil tel a, Middle School-a dil khan High School, tikhan High School leh Middle School an han dil kawp a, an tling kawp ta si a; a thiam ho kha chu duh thlang khan an awm a, a kawkalh ta nuaih mai a. A then phei chu Primary School, High School, Middle School dil thei vek kha an lo ni a. A tha tha kan lak avang khan an tling kawp sung mai a. Chutah chuan join lo kha an tam ta a ni.

Tunah erawh chuan panel atangin kan han inla chho a. High School ah hian 12 chiah a awl a awm a ni. Chu pawh chu tunah hian panel atangin kan han dah leh ang a. Middle School ah 29 chauh; a then an lo bang ve leh a. An join tawh hnuah pawh a then chuan hna dangte an lo hmu leh a, chutiang chuan a kal a. Primary School ah erawh chuan post lak kan tum zat aia tlem khan an dil avangin a tam thei ang ber kan la tawp a. 139 in an rawn join lo a, tunah hian 234 lak tumin kan buaipui mek a ni.

Kan lak danah hian han tarlan ka duh leh chu, interview mai ni tawh lovin, practice teaching kan ti a. Nichina ka sawi, (ka chhanna pawh a ni zel a) Zirtirtu tur an ni a, chuang chuan, a ziah lam ringawta thiamte, keini pawh zirtirtu kan nia, kum 20 experience kan han nei ve a. A ziah thiam em em, zirtir thiam silote an lo awm avangin practice teaching kan neih tir thlap a, Interview Board hmaah khan topic thlan bik awm zing atangin zirtirna an nei a. Chutiang chuan uluk takin kan la a. Political interference (MR teacher lak te pawh an ni ang chu) awm lova lak an ni a. Heng kan zirtirtute hi kan chhuang viau a ni.

Midday Meal:

Tin, naupang chaw-chhun chungchang ah, PM-Poshan ah hian Automated Monitoring System hman thar a ni a. Hetah hian kan headmaster-te an khawngaihthlak khawp mai a, nitin update a ngai a. An zin pawhin report an pek a ngai a, a thenah pheih chuan tower hnaih deuh signal awmna ah nitin an kal te a lo ngaih phah a. Amaherawhchu, hei hi thil tha zawk duh vang a ni a, central lamin min nawr vang pawh a ni a. Keini tih ni chiah lovin khu lampangin naupang te'n chaw-chhun an dawn hi 'an dawng ngei a ni' tih hriat nan min rawn nawr avanga ti kan ni a. Tin, kan han sorkar a, kan chaw chhumtute an hlawh a beitham em mai tiin kan CM-in, 'pek belh an ngai a ni' a ti a, kan va dil over pawh a nilo. Over han ti ila, dil ngut ngut pawh ni lovin. Aniin, 'tihdan i ngaihtuah ang' a rawn ti zawk a, kan lawm khawp mai a. A hmaa central-in 900/- an rawn pek bakah 600/- pek a ni thin a, sorkar hmasa ah. Tunah chuan, 2100/-, a let 3 aia tamin kan pun ta a, State share-a kha. Tunah chuan cook ten thla tin 3,000/- an hlawh theih phah a ni.

School Building sak:

Hmasawmna ruhrel tam tak thawh a ni a. SEDP hnuaia hna pahnih la thawh chhunzawm mek a ni a. Tin, NABARD RIDF hnuaiah pawh tunah thawh tan tum a ni a, buaipui mek a ni a. Article 275 1 hnuaiah khan hna eng emaw zah a awm bawk a, chu chu kalpui mek a ni bawk a ni. Tin, Pu Speaker, hei kan vannei a, Chief Minister-in min tuipui a (hei chu a sawiloh theih loh a). Hei pawh hi kan Chief Minister-in, 'Mathlan, school sak belh ang' a rawn ti a, NESIT OTRI hnuaiah school 71 sakna tur crore 44.25 hu kan han hmu leh a, a lawmawm kan ti khawp mai. Tunah hian DPR buaipui mek a ni.

Teachers' Quarters:

Tin, SASC I hnuaiah teachers' quarters sak nan crore 31.50 hmuh a ni leh a. Hei pawh Mizoram PWD hnuaiah hlan a ni a. Chutiang chuan, kalpui chhoh mek a ni a. Teachers' quarters chungchangah khan rawn sawi a awm nual a. Ni e, sak a lo ni nual tawh a hei hi, 2010-11 atang khan a awm a, hriat pawh a ngaiin ka hria a. Hetah hian thingtlang atangin VC te leh a chang chuan kan MLA-te pawh an rawn kal a. Chutiang chuan, 'kan khua-ah quarters kan nei velo, min pek a ngai' an ti a. Amaherawhchu, kan han enchiang a, project siam tura kan han tih dawn pawh khan kan lo en lemlo te pawh a ni ang a; SAMAGRA ah hian teachers' quarters hi kan lo sa teuh tawh mai a, a unit ang zawng pheih chuan 322 lai kan lo sa tawh a ni, tam deuh kha. Han en ila, Tlungvel high school ah te hian unit 5 sak a ni tawh a. Tin, East Phaileng ah te unit 3, unit 2 tih te pawh a tam mai a. A tam deuh kan tarlang lawk ang a - Thingsai High School unit 4; Chalkunga High School, Bukpui unit 4; Diltlang High School unit 3; Bethel High School, Pangkhua unit 3; Pu Speaker, i bialah pawh Vanbawng high school beh chhanin unit 3 lo sak a ni tawh a, Thingdawl high school unit 3; Modern High School, Lungtian unit 3; Sawikunga High School unit 3, Cherhlan High School unit 4, Tawipui South High School unit 3, Tibaraghat High School unit 4, Bungmun High School unit 4, Zino High School unit 3; chhiar vek dawn chuan ala tam mai a.

Hei hi tunah hian kan staff-te hnenah ‘a dinhmun engtin nge a awm lo hrechiang rawh u’ tiin kan inzawt a; 2010-11 vela lo kal chho tawh a ni a. Chutiang chuan, mimalin midangin an lo luah nge; school-in an luah; eng atan nge hman a nih, tih hi record fel tak neih kan tum a. Chutiang a nih chuan, a thenah chuan quarters pawh kan neih belh leh kan ring a. Ka hriatah chuan, (a khua chu sawilo ila) mimalin an lo luah daih mai a ni; midangin an lo luah daih a, chungte pawh chu zirtirtu ngei ten an luah dan kan ngaihtuah ang a. A luahtu tur takin an luah ang a, hmun 322 ah quarters kan lo nei der tawh a nih chu; A khua zawng chuan 172 a ni a. Chutiang chuan hma kan la chho ang a.

Chu mai bakah kan neihlohna hmun 62 ah pawh tunah hian tih leh kan tum a; a dang pawh tunah hian project ziah lai kan nei a, thehluh leh tum kan nei a. Chutiang chuan, a tahtawla um kan tum ang a. Keimah ngei pawhin mitin ka hmu a, a hreawm ka ti khawp mai a. Nu, la valai tak leh chhangchhe tak maiin dap-in a lo luah a, naute hnute pek ngai, sen tak mai a pawm a; chutiang chuan zirtirtu hna kalsan a hreh bawk si a. Hmun khawhar tak maiah zirtirna hna a thawk a ni a, ka rilru a khawih khawp mai a. Teachers’ quarters hi kan tih angai a ni; kan neih tam a ngai a ni.

Adult Education:

Tichuan, Pu Speaker, Adult Education hi tawi tein. Pu W. Chhuanawma bialah hei tunah kan kalpui mek a. Keini hian Pu Tetea department chan ang deuh, skill development kan kalpui a, critical life skill te, occupational skill development te kan kalpui a ni. Mi tam tak an eizawna turte kan lo buaipui sak a, chutiang chuan hna kan lo thawk a. Tin, Meichher Chanchinbu hi kan hria ang a; a upa tawh khawp mai a. Thu leh hla ngaihven hote phei chuan an hre khawp mai a. Meichher chanchinbu hi kumin a golden jubilee kum a ni a. Chumi atan pawh chuan kan inpuahchah mek a ni.

Physical Education:

Tin, Physical Education hi kalpui mek a ni a. Directorate atanga kal pui a ni a hei hi chu chutah chuan Zone 146-ah Primary School tan tin Middle School tan 126-ah zonal sports buatsaih a ni a, High School tan District 11-ah District Sports tih a ni a. Tin, Higher Secondary School atan Mizoram ah pawh Higher Secondary School Sports buatsaih a ni bawk a Cchutiang chuan Sports-te hi kan kalpui a. Tin, Sports & Youth Services Department-te nen MoU kan sign a. Hetah hian kei niin Samagra Shiksha hnuaiah sum eng emaw zah kan lo nei a, academy pawh kan nei nual a ni. Nakinah a chiang zawk pawhin a sawi theih awm e, academy kan neih te. Tin, talent identification, khatianga kan sportsmen han zawn chhuah kawngah te kan tang ho thei dawn a, a lawmawm ka ti khawp mai a.

Co-curricular Activities:

Pu Speaker, hetah hian tlem sawi duh ka neih chu, ‘kan zirlaite sports lam panga inhmang tura kan tih tam chuan nakin zelah kan ram tan hian a tha dawn a ni’ tih zirchianna te pawh a awm a. Khutah America lamah te zirlai an zir chiang a, khulai America-a sei lian hote leh Asia ram atanga pem thla hote inkarah khan, Asians ho hi zirna an ti thei em em mai a, Maths subject an thiam a, an tha em em a. Amaherawhchu, ‘co-curricular activities’ kan tih sports lama competition awm thei angah khan an lo tel tam lo a. Khulaia America-a sei lian ho khu khatianga competition-ah te an lo tel tam a an hlawhtling zawk tlat mai a ni; a thiam thei zawk chu Asians kha an ni a, a hlawhtling zawka kha chu khu lai mi kha an ni a. Chuta an zirh chhuah chu, sports lama inelna kaltlang khan an lo hlawhchham fo a, an chak lo a; an han ti leh a, an chak lova. A changin an chak a, an chak reng bik lova; kha

khan chhelna amahniah a siam a. Chumi ngaihtuahna nen chuan ‘Sports hmang hian kan zirlaite pawh kan tih chhel a ngai khawp mai’ tih kha rilruah kan nei a, kan Sports Minister nen pawh kan tui viau a ni.

Samagra Shiksha:

Tichuan, Samagra Shiksha-ah hian, nichina ka sawi ang khan kan budget a tla hniam nasa a, hlawh pawh a hma aiin 2020 atang a chhiar chuan 30%-a min rawn peka hi a tla hniam tawh a. State Sorkar pawh kan tan leh nasat a ngai a, a manganthlak khawp mai a.

Tichuan, Samagra-a ka luh chian lutuk hmain, Pu Speaker nichin a transfer and posting chungchang kan sawi a kha mi tam takin in sawi a, heti hian ka rawn react ni mai ta se.

Transfer and posting:

Transfer and posting Rules hi 2008 leh 2022-ah kan nei tawh a, a hman a lo har te pawh a ni ang a, keini pawh kan han siam a, kan han ti a. Hman kan han tum a, hman theiha remchang tura hi hman ngam tura buatsaih ang tiin, tunah hian kan inrawn zau mek a. Political deuh te pawh a nih avangin, party lampangte pawh inrawn a ngai a. Chutiang chuan, kan consultant kaltlangin inrawnna te kan nei chho a. Chutiang chuan ruahmanna, ‘state dangah engtin nge an tih’ tiin a draft kan neih sa; nikum khan kan nei nghal deuh vut mai a a draft a kha. Amaherawh chu, state danga an tih ang remchang deuh zawk te kan hman theih ngei ngei tur hi nei ila, chuta tang chuan ke i pen ang tiin ngaihtuahna kan seng a ni. Ka tan phei chuan a hahdamthlak dawn lutuk a; office leh in lam hunah te pawh a ni ang a.

Nichina kan chawlh lawk lai pawhin transfer lehkha kan dawng a, kan hun 60% vel dawn hi transfer-ah kan seng a, chu chuan kan ngaihtuahna a pawt peng a. Chu chu han reh duak ta sela, thil dangah ngaihtuahna sawrbingin hma la ta ila kan productivity pawh hi a sang zawkin ka ring a; kan nghakhlel viau a.

Tin, tunah hian kan SDO te, kan DEO te ruahmanna siama anmahni area-ah rationalization-a an lo kal theihna tur draft certification hi kan siam tawh a. Vawikhat kan en tawh a, a vawihnihna tur hi tunah ennawn kan tum leh mek a. Kan Chief Minister ho pawha sawiin, thuthlukna kan siam tawh a. Kan DEO leh SDO-ten anmahni area chhungah school tlabal lutuka a lo awm khan anmahniin ruahmanna an lo siam ang a, chu chu kan han enpui ang a, an ruahmanna ang chuan kalpui a ni thin dawn. Emergency-ah phei chuan power eng emaw zah pek an ni dawn a. Pu TBC a, member zahawmtakin a a rawn sawi harsatna te pawh kha midang pawhin kan nei vekin ka ring a, kha pawh kha awlsam taka sut kian a nih theih kan beisei a. Tun atanga thla hnih-khat chhung chuan hei hi tih chhuah ngei kan tum a ni.

Samagra:

Pu Speaker, Samagra hnuaiiah hian Vocational Education kan kalpuia hi a ZPM em mai a, han tarlan hmasak ka chak a. High School 145 leh Higher Secondary School 22-ah hian tunah hian kalpui mek a ni a. Sixth subject, belhchhah tu atan hman a ni a, chungte chu: - Agriculture, Apparel design, Automative, Beauty and Wellness, IT and IT Enable Services te chutiang chuan kalpui a ni a. Hei, tunah pawh hian a tharin lak leh kan tum a, kan la tha leh dawn a ni. Kan lak that leh chhan chu, a zirtir thiam, a thiam sa an lo awm a nih chuan kan hmang leh mai ang chu. Amaherawhchu, a zirtir thiam helampang ti ngeite kha lak kan tum a. Tunah hian advertisement a chhuak tawh em ka hre chiah lova. Kan Polytechnic

chhuak ho tan te leh thil dang ITI chhuakte pawh a ni ang chu, chung ho tan pawh chuan hna a awm pawh ka beisei a ni.

Tichuan, 10-Bagless Days tih hi hman a ni a. ‘Nun kawng siamna Bu’ tih a ni a. Kum khat chhungin ni sawm, thil dang an zirlai ni miah lo puanthuite leh thil chi hrang hrang inlama sekrek khawih te leh thildangah khan zirna an dawng dawn a, rilru leh taksa hriselna lamah te, life-skill hrang hrangah chutiang chuan kalpui chhin a ni a, hei pawh hi kalpui chhin zel tura tih a ni.

Nichinah khan kan tarlan tawh - Samagra hnuaiia zirtirtu kan lak zat hi nikum chhung kham mi 155 a ni a. ICT at School tih hi kalpui a ni a, school 629-ah ICT Computer set, projector, printer, scanner, internet connection leh generator te pek anni tawh a. Kumin 2024-2025 ah hian school 309 thuamfel a ni tawh a ni. A dangte pawh la tih leh kan tum a, school 229-ah hian interactive flat panel te, smart-class room ang chi leh theih ang ang a remchan dan anga pek an ni a. MLA te’n an rawn sawi - flat panel, interactive panel kha a thenah kan dah a, a thenah kan dah chiah lova. Tunah hian lehkhaw sem tum a ni a, chumi nen chuan a kal kawp thei ang em tiin kan inen a, mamawh angin kan inpe ang a. Tlem a chuang a nih pawhin, school lian deuh cover ngai an la awm a nih chuan pek leh kan tum dawn nia.

Hetah hian kan hriat ngai erawh chu, ‘ICT’ kan tih, Computer School te pawh a niang chu, school-a computer kan peka hi. Computer centre kha kum 5 chhung tan chauha tanpuina pek a ni a. Computer instructor a awm vek a, a then a tawp tan a. Tunah hian 30 chuang a tawp leh dawn a, ‘min chhunzawm sak rawh’ an ti a, central lam atangin kan dawng tawh si lova; an lo thawk tawh mai ang a. Computer-te pawh a lo hlui ve tan a, a thar pek leh dawn khan a buaithlak viau mai a; MLA-te kan lo tan theih chuan a lawmawm khawpin ka ring a. ‘Ruling kan ni hlei nem’ in tih ngawt ka hlau a. Term hmasa khan kan bialah chuan school zawng zawngin computer leh printer an dawng vek a, a mamawh pek belh ngaiin an dawng a, kan tang ve tang tang a ni. Pu Chhantea kha kan tanpui ve nasa a ni. Theih tawp kan chhuah a, tang tlang ila computer neilo hi an lo kal nasa thin si a. Kan lo thawm tha thei hram a nih chuan, in puinha te kan ngen a ni.

Aizawl - Smart City project hnuaiia Aizawl area AMC chhunga primary school zawng zawngin computer leh printer an dawng a, kan lawm khawp mai a. Pu Sapa leh thawhpuite chungah lawmthu kan sawi a ni. Hei hi kan sawi duhna chhan chu, ICT hnuaiia hian middle school chin chung lam chauh a dawn theih a, primary chinah a dawn theih lova an niin Aizawl area-ah min lo pek sak a, kan lawm tak zet a. School 597 ah hian pre-school kalpui mek a ni a, chutah chuan Early-Childhood Care & Education (ECCE) kan ti a, Nursery ang a ni ber a, school a remchang apiangah hawn belh te pawh kan tum a. Sum kan neih dan a zirin hetah pawh hian ECC helper pek an ni a, chutah chuan kalpui a ni.

Hetah hian sawi belh lawk ka duh chu, kan sorkar hnu-ah kan strict ta hret a, school kal tur hian NEP policy-ah a lo awm a, Class-I ah hian kum 6 chin tih a ni; kum 6 ai hniam chu admit loh ni se tiin nikum khan thutlukna kan siam a. Hei hian kan enrollment pawh a tibuai khawp mai a, nu leh pa tam tak pawh an rawn mangang a. A thenah chuan ECCE kan neih lohna a ni si a, an fate naupang tak tak, a then chu loa an feh san ngai te an awm a ni, enkawltu a hranin an neih loh avangin; khatianga an fate enkawlna ang deuha lo ngai tawpa lo dah tawp, kum 6 la tling chiah lo pawh an rawn dah an awm a, chutiang chuan harsatna an tawk ve a. Thil tam tak a chiah chiah hman theih loh ni mahsela, kum 6 chin

hi chu admit hram ila kan ti a, kan enrollment pawhin a tawrh phah deuh a. Chu chu kan hriat atan kan tarlang ve leh a.

Tin, PM-SRI, ‘PM Schools for Rising India’ tihah hian school 33 ministry of education-in a rawn thlang fel tawh a, an vannei khawp mai a. PM- SRI-a an puante ho hi Samagra atang chuan kan va pui theih tawh lo thung a. A hranin nuai 80 te an dawng a, building te an sak belh a, thil thar tam tak an dawn belh a, an in enkawlina atan sum an dawng teuh mai a. Tunah hian kan tih theih zawng chu kan um tawhin kan hria a. Tih belh lehna tur kan zawng a, minister-ah pawh min hriatthiam a ngai a ni; UDISE khat lo deuh, pahnih ah, school inhne reng sia hi ‘min phalsak teh u, min pe teh u’ tiin, DO letter te pawh amah kan hmuh pahin kan han pe a, ‘kan lo ngaihtuah ang’ an ti a, engnge a result erawh chu kan hre thei ta lem lo a.

Samagra hnuaiyah hian intodelh tih kan kalpui tawp mai a, ZPM-te hi intodelh atchilh kan ni a. Intodelh hi kan High School zirlaite atangin tan tur a ni kan ti a. Hmanni lawk khan a kharna hun te kan hmang a, rilru te pawh a khawih tel khawp mai a. Zirtirtute leh zirlai thusawite hmuh khan min ti phur zual a, hei pawh hi chhonzawm leh kan tum a. Kan tum ber chu - pawl 9 atanga pawl 12 te pawh a ni ang a, chutianga school an kal hrim hrim chuan an pass emaw, pass lo emaw zirna hian mahni kea ding thei turin zirlaite hi a lo thuan chak tur a ni, tih kha kan duh dan a ni a. School zawng zawngah kan ti thei lova, pilot project-in kan kalpui chhin phawt a, school naupang hnenah. Group pakhatang panga te kan dah a, ₹2,000/- te pe in kan han tihpun tir a, cheng sing chuang chuang te an hlep a. An thusawi te a ngaihnawm khawp mai a, min tiphur hle a ni.

Vidya Samiksha Kendra nikumah khan han hawng thei hlauh mai a. Hei hi sorkar hmasa pawhin hma an lo lak tawhna a ni a. Control and Monitoring centre kan han nei a, ‘desk-mode system’ ti khan a Chiang ber a. Ka sawi fo thin angin, vskmizoram.com tih kha a ni a, hetah hian thil tam tak kan hmu thei a. Zirtirtute leh zirlaite attendance kan hmu thei a. Tin, tunah hian Samagra Siksha hnuaiyah eng hna nge thawh mek awm, tih te kan en thei bawk a ni. Amaherawhchu, school hming chauh a lang a, engtiangin nge hna thawh a niha, engzat nge estimate, eng tiangin nge thawh tur tih te kha a la lan loh avangin, tunah hian order khauh tak kan inpe a. Helaiyah keimahni mai ni lovin, mipuite’n kan lo monitor-a hna tha zawk kan lo neih theih nan hma kan lo la a.

Pu C. Ngunlianchnung, MLA pawh kha, a bialah sawn hna a chhe thin khawp mai a, hman atanga kan lo buaina thin tawh a ni. Chu chu, ‘engnge tha zawka, engtin nge kan siam that theih ang’ tiin ngaihtuahna tam tak kan seng a. Tuna spill-over a awm pawh hi ka thiamloh te pawh a ni pakhat a; tlemin hna pawh kan han thawk chaklo hret a, kan han pechhuak tlai hret a. A tha zawk kan beisei vang a ni a. VSK hmang hian khawvel thiamna pung belh zel IT hmang hian monitoring tih that zawk kan beisei a, chutiang chuan hma kan la mek a ni. Tin, Real Time Attendance System leh Leave Management System-te pawh kan bilh tel zel a, a tangkai kan ti takzet a ni.

Textbook:

Textbook chungchangah sawi loh theih lohin sorkar hmasain ‘heti zat hi lei a ngai’ an lo tih kha kan inbuatsaih mawp mawp a; textbook 4,96,000 chuang kha April thla khan kan inpeih hman a ni. Amaherawhchu, vendor-te atangin engzat nge an mamawh tih kha a lo lan loh avangin, an niin tam mangkheng kha an lo duh ta si a. Chutah chuan Samagra

Siksha atanga free textbook kan lei leh anni te nena han tih khan, print belh ngai kha a awm ta teuh mai a; kha kha minrawn beihna tam tak a ni a. Press Conference kan han siam pawha hre duhlo der tlat kha an awm a. An thalai hruaitute phei chu anrawn leng a, ‘in hunlaia in sem hun kha i enlet ang u’ tiin kan lo sawi nghe nghe a. Kan tum lutuk vang pawh a ni lo a, a demand te a lo sang viau mai a. Chuvang chuan, i insiam tha ang kan ti a. Kuminah hian a hma thei ang bera sem kan tum a, trip tam tak arawn thleng tawh a. Naktukah hian Printing & Stationery Minister, Pu Maroa pawh hian arawn sawichiang theiin ka ring a. Tunah hian sem theih turin kan inkau a; a then phei chu a chhuak tawh nghe nghe niin ka hria a. Chutiang chuan class tan hmaa inpek ngei kan tum. A copy pawh a tam viau a, nuai 10 vel kan print ta nghe nghe a. Chutiang chuan kan buaipui a, ‘kan tang viau a ni’ tih ka’n tarlang ve leh a ni.

SCERT:

SCERT hi elementary education curriculum buaipuitu ber a ni a. Text book buatsaihin in-service training te an nei a. Kan officials-te an tang a, an inchhiar zau a, thil thar an ngaihtuah thiam khawp mai a; an fakawm ka ti a. Kan sawi duh chu, kan zirlaite hian an zir hnem lutuk a ni; an mamawh bak bak kan zirtir a ni tih hi rei taka tang khan ngaihtuahna a lo awm tawh a. Nikumah khan rationalization an han bei a. Tichuan, kumina kan textbook pawh hi nikum ai chuan kan print tam a ni. Amaherawhchu, a phekan ang zawng chuan a tlahniam a; a lehkhabu kan print chu a tam daih a, lehkhabu zat pawh a tam zawk a. Chu chu rationalization kan kalpui vang a ni a. Chutiang chuan, kan officials ten ngaihtuahna tam tak an seng a, an hmalakna kan hmu a ni.

Tin, Diksha - digital platform an siam a. YouTube-ah te, local tv channel-ah te, PM e-VIDYA ah te chutiang chuan thil tha tak tak, inzir theihna tur tam tak a awm a. Covid lai phei kha chuan mi tam takin an hlawkpui a. Covid avang khan keimahni ah pawh kan than phah tel bawka ni. A Directorate ang pawhin thil tam tak kan neih belh phah bawka, Virtual Reality laboratory hi SCERT office-ah sawn kan nei a, Nilaini leh Ningani ah school naupangte tlawh theih turin kan hawng a, a hmuhnewm khawp mai. Space-ah te lawnin, thil hrang hrang kan bulhnaia awm ang main, thil tam tak inzir nan a tangkai khawp mai a.

Tin, Jai Pitara nikum khan kan tlangzarh bawka, chu chu ‘thiamna thul’ tih a ni a. Naupangte’n a taka thil an zir theihna turin an zirlai bakah thil a chiang zawkin practical- a an zir theih nan a naupang leh zual tan siam a ni a. Thil tharlam deuh mai Random examination Elementary level pawl 3 leh pawl 6-ah an kalpui a. Kan tih chhan a awm a, zirlaite all India level ah zawhna inang hmangin test an ni a, NAC te kan ti a Barak te kan ti a, kan hniam fo thin a; chumi atan chuan inbuatsaih a ngai a ni. School an duh duh anrawn thlang tawp mai a. Chutiang chuan, pawl 3 pawl 6 ho hi anrawn test thin avangin, kan tih a ngai kan ti a. Nakumah erawh chuan kan thlak hret chu a ngai tawh a, a class a kha anrawn thlak tawh avangin. Engpawh chu ni sela, zirtirtute kan inthlahdah loh nan tihtel a ngai bawka. Chutiang chuan random exam kan kalpui a.

Hei report mawi deuh mai, kan NCERT official ten report card anrawn siam a, chiang leh zual te pawhin website ah a hmuh theih ang a, chiang tak pawhin kei pawhin ka la en hman chiah lova; tiang hian, zirtirtute an inthlahdahloh nan random examination an nei zel dawn a, a hma ni 2-3 ah exam tur kha an hre thut a; kan officer te an va kal a, an exam an va veng a, chutiang chuan district level ang tein report siam a ni a. Kan zirlaite an thiam em, zirna an dawng tha em, tih te kan enfel zel dawn a ni.

Mizoram Board of School Education:

MBSE hi Covid-19 avang khan anni pawhin an syllabus te an han siamrem chho ve leh a; an ‘rationalize’ tih kha a technical term tak chu a ni a. Technical leh college entrance ah hi chuan national testing agency in syllabus an la revise loh avangin, kan han nghak hret a; tunhnaiah hian NTA chuan a rawn revise ta a, keini pawhin kan syllabus kan revise ve leh a. Tin MBSE hian examination leh question design thar a buatsaih a, nichina kan sawi fo, ‘State dang kan va pha lo ve’ kan tiha kha, an zawhna hi a ni thei ang em tiin; a ni pawh kan ring a. Kan zawhna kalphung hi state dang nen a inthlau deuh a ni tih ngaihtuahna a awm a. A chhan chu, tuna kan syllabus tam takin kan sawia kha, kei pawhin kan syllabus hi a ni ang a tih ngaihtuahna ka nei thin a.

Amaherawhchu. NCERT kha keiniin hnam-ziarang awmthei tur ang tein kan lo siam danglam a, danglam lutuk pawh a ni lova. Chu chu CBSE ah hian hman tho a ni; kan syllabus hi central lam te nen hian a danglam em emlo. Chutah chuan, engnge ni ta ang? Kan zirtirna kan pek dan te, exam kan hmachhawn dan te hi a ni ang e, tiin ngaihtuahna a awm a. Hei kuminah hian HSSLC, 2025 exam hi syllabus thar leh exam question design thara kalpui a ni a, national exam pawh pha turin kan insiam rem chho bek bek a. A hlawhtlinna hi vawi leh khatah hmu vek lo mah ila, kan thatpui ka beisei viau a. Hetah hian kan MBSE official te pawh an thawkrim khawp mai. 2023-2024 academic session chhung khan matric leh higher secondary te, MTET exam te an conduct a, pass percentage MTET chauh hi ka tarlang duh a. Mizoram Teachers Eligibility Test hi zirtirtu ni tur tan chuan elementary bikah an pass a ngai a ni. Hetah hian 32.0% chauhian an pass thei a. Chuti a nih chuan, pass a harsa a, unqualified teacher hi an awm teuh em tih hi rilruah a awm ta deuh tlat a. MTET a ngaih hnu ah hian unqualified teacher kan lo la indah a nih chuan, ngaihtuahna kan sen that a ngai a. Pass a har em em a; an pass chhuak ta cheng a, a qualified zawkte’n hna an hmu lo a nih chuan, ngaihtuahna kan sen thar a ngai a ni tih hi ka rilru ah a rawn lang a chu chu kan sawi ve leh a ni.

Tin, High school zirlaitext book, hei (kan Minister hmasa kha a sawi loh theih loh a) Pu Chhantea ten hma an lo la a, Dr. Thangmawia ten theihtawp an lo chhuah a; science leh maths textbook mizotawnga leh kan han nei chho a, high school ah te, class XI ah te physic, chemistry, biology leh mathematics textbook, english leh mizotawngin lehkhabu pakhatath khan entawn theih turin dah a ni a. Tunah hian class XII neih leh tum mek a ni a, chutiang chuan kan MBSE official ten theihtawpin hma an la a. Chiang zawka mahni tawng ngeia lehkha an zira an hriatthiam theih nan hma lak chhoh zel a ni.

Tin zirlai mitdel leh mit chaklote tan lehkhabu, hawrawp pangngai chhiar theilote tan MBSC hian Braille textbook (mitdel text book) siam thar a ni a, hei hi kan lawm takzet, a. A buaipuitu leh a ngaihtuahtute mitam tak an awm a, mimal tak pawhin lawmthu ka’n sawi a. Tin, hawrawp lian deuha text book print te kan nei chho ta a, nikum khan lawm takin kan tlangzarh nghe nghe a ni.

Pu Speaker, School Education-a upgradation chungchang kha sawi a awm a. Upgradation kan han kalpui a, cabinet-a lut leh turin tunah kan umzui leh a, tunah file a kal thui leh viau tawh a. A rules kan nei fel tawh a, school a tlem thei ang ber paih kan duh a, dan angin kal vek ila. Nakinah eng emaw sawisel palh a awm kan hlau a, tiang chuan hma kan la a ni. A tam thei ang ber dah luh kan tum a. Amaherawh chu, criteria phalo lutuk school building pawh neilo te, zirlai pawh neilo te, a private lutuk te kha chu kan ti theilo a ni.

Tin, Pu speaker, hetah hian kan pro-adhoc te pawh a ni ang a, adhoc te pawh tlema zawng kan la nei ang a. Tin, kan lumpsum-grant-in-aid, lumpsum school kan tih hote hi revision provision kan neilo a ni. Chuvang chuan, heta kan lo dahluh tawhte a thente chu khawtlangin an lo din a, tute chhungkua emawin an lo la chho ve leh a, khatianga tih te pawh kha a awm ni te pawhin an sawi a. Chuvang chuan, enthat leh theih turin tunah hian ruahmanna i siam ang kan ti a, kan kalpui mek a. Chuti a nih chuan, a then kan paih ang a, a then kan dahluh belh ve leh ang a. Chutiang rawn sawi kha kan tam si a, ‘ka bialah hengho hi tanpui an ngai, min lo hre teh’ tih ang kha a tam khawp mai a. Kha kha kan lo hriat atan ka’n tarlang a.

Tin, Cyclone Remal avanga harsatna tawh Pu RS-a bial Vairengte te. Bilkhawthlir leh hmun dang dangah a rawn sawi a. Theih ang chen chen siam kan tum a, tunah hian a fund pawh hi tlema zawng, crore 4 vel hi kan dawng thlang thei ang em tiin beiseina sang tak nen kan awm a. Chutiang a nih chuan theih ang chen chen Cyclone Remal-in a tihchhiat ho kha chu rawh tihbelh kan tum ang a; a bak eng emaw han sih belh theih te kan nei a nih chuan, rawn tihbelh leh kan tum ang a. Amaherawhchu, school pakhatan tan nuai 2 bak kan pe thei lova, chu chu min hriatthiapui erawh kan ngai a ni.

Higher & Technical Education:

Hei hi a budget a tlakniamna a tam lutuk lova, PM-Usha thin khan danglamna a rawn siam a, kan hrethiam maiin ka ring a. Higher & Technical Education Department hnuaiiah hian college pangngai bakah Hindi College te, Mizoram Polytechnic, Lunglei te, Women Polytechnic Aizawl te, IASE Aizawl te, chutiang chuan kan enkawl mek a ni a. Technical lampang atangin SMATEE entrance test te tikhan kan buaipui a. RUSA hnuaiiah hian thil tamtak kan enkawl bakah National Apprenticeship Training Scheme te buaipui a ni a. Pu Speaker, State University Bill kan pass a, kan phur tlang em em te kha kan lawm takzet a. Min tichak a, min tiphur a. He University hi tha taka kan neih chho zel theih nan tanho te pawh a ngai ang a.

Heta ka sawi duh a chu - Lunglei leh Champhai lampang atang khan nawrna kan neina khawp mai a. MLA te an rawn tang bawh a, chutiang chuan lehkhah te kan dawng a. Kan hriat ngai erawh chu, cluster of colleges ang nilo chuan, keini sum chuan a daih dawn silo a, cluster of colleges-a kal mai a ngai a. Cluster of colleges turah hian school 5 awm a ngai a ni. Department inhnaih te te awmkhawmna kha school pakhat a ni a, Arts bik ang chi - BBA, Commerce, B. Com, Economics, Management tih te a ni. A nih loh pawhin khatiang chi thildang Science ang chi awm theihna panga neih a ngai a, tin, km 5 bial chhungah an awm ngai tih a ni a. Chumi a nih avang chuan, Aizawl pawn kha tihtheih a ni ngang lova, kha kha kan hriat atan ka’n tarlang ve leh a ni. State University atan hian a hma pawha kan sawi tawh ang khan, Finance Commission-ah sum eng emaw zah kan dil a, tin, kumtharah hian PM-Usha hnuaiiah hian eng emaw zat kan dil theih ang ang chu dil belh leh kan tum bawh a ni.

Tin, NEP, 2020 hnuaiiah SWAYAM – ‘Study Webs of Active Learning for Aspiring Minds’ tih a ni a, online a course zirna a ni. Kan sawi lemlo naa, India ramah a tichhe ber pawl kan ni a. Amaherawhchu, hei hi kan duh thu a ni chiah lova, Mizoram University hnuaiia kan college te hi awm an nih avangin, Mizoram University hian credit-ah zirlaiten anmahni mark tihsanna atan an la hman theih loh avangin leh additional-a a la kal chauh avangin kan zirlaite’n an la la duhlo a, an la inziaklut duh chiah lo a. State dangah chuan

an mahni course pangngaia tihluh a nih avangin, SWAYAM-ah hian sang takin an lang a, keini erawh kan la hniam viau a ni.

Tin, NEP, 2020 sawi takah chuan, Pu Zira rawn sawi Mamit College chungchang kha, tumlo mah ila kan tih tho tho a ngai dawn a; Pu Beia, Siaha bialtu zahawm tak pawhin a rawn sawi ang khan, sawlam pangah sawn multi-disciplinary college kha kan din a ngai dawn a, college pakhatat Arts, Science, Commerce leh B. Ed zirna te kan neih chhoh a ngai dawn a; college kha kan tihtawp a nih loh chuan, kan dah a ngai dawn a; chu chu kan hmachhawp a ni. Tin, Pu H. Rohmingliana te, Pi Prova Chakma ten an rawn ngenna kha, a college kha chu a har dawn a. Sawi ang khan, khatiang college lian kha kan siam rup rup a ngai dawn tawh si a. Tin, Pu Dawngtea leh Pu Rs-a te pawhin an bial an rawn sawi, ‘Vairengte, Darlawn’ tih te pawh kha, a harsa tawh dawn a ni. Nakinah khulam atangin an policy an thlak thut emaw, Central Sorkar an inthlak te a nih loh chuan, khang kha an tih tum dan a ni a.

Central Sorkar-in policy a nei a, a rilru berah chuan - higher education, college chin hi chu mi zawng zawng tan a nilo; a thiam thei deuh leh heti lama kal tum tan a ni a. A bak hi chu skill development-ah hian an kal tur a ni, tih kha an ngaihdan a ni a. A hahthlak thin khawp mai; MLA-te pawh kan hah thinin ka hria a. ‘Kan fapa III Division-ah a pass tho na a, zir ve se kan ti a, college a luh theih nan min lo ziah sak’, an han ti a, kan ziah a. Kei chu ka chhui let nasa a, kan ziah ho hi. 1st semester an kal a, 2nd an kal a, an pamtul leh a. Chutiang chuan, college hi kan mamawh viau na a, mi zawng zawng tan a nilo a. College va pana, va inzir kha a harsa viau nain Central lam pang policy-ah chuan, college lianpui an duh ta a nih chu.

NAAC Accreditation hi India ramah a tha ber pawl kan nei a. College 19-in tunah hian NAAC Accreditation A+ te kan nei a, ‘A’ pawh pathumin an nei tawh a. Tehna ah pawh India rama a sang ber pawl kan nei a. A sang ber han tih ngawt pawh, a inthlak ve reng thin a. 82%-in tunah hian an nei a. Hetah hian kan inchhuang viau a ni. A dil a hautak a. Kan college hotute, kan zirtirtute an fakawm takzet a ni. CM-Bana Kaih scheme-ah hian college 21-te Institutional Challenge-ah Mizoram Elevation Hub hmangin kan lut a. Hetah hian kan beisei a sang viau mai a, Innovation Challenge bik ah khan. Chu chu ka’n tarlang ve leh duh a.

Tin, RUSA hnuai ah zirtirtute eng emaw zah kan la nei a. Rawn sawi sak kha an awm nual a, RUSA hi. An file hi DP&AR-ah kan han kal tir a, engnge a chinchang tur erawh a file kan la dawn chiah loh avangin, kan la hre thei lo a. Theihtawp erawh chu kan chhuah a ni tih kha ka’n tarlang duh a. DP&AR lamin a Dan lampang atangin an lo en ve leh ang a; ‘hei hi a tih chi em; a tih theih ang em’ an rawn ti ang a. Chu chu kan ngaihchang mek a ni.

Tin, Pu Rintluanga Sailo, Dampa Bialtu zahawm takin Aizawl West College chungchang a rawn sawi kha, a remchang viau bawh a. Students Common Room leh Canteen/Cafeteria tur kha sak zawh tawh a ni a. Tunah hian SASCI hnuai ah crore 30.40 kan han hmu thar hlauh mai a, khulama new campus atan khan. DPR te siama a tul angte bawhzui mek a ni.

Tichuan, PM-USHA scheme hnuai ah hian kan vannei khawp mai a. Heng college – Govt. Champai College, Kolasib College, Lawngtlai College leh Johnson College te hian crore 5 theuh tun Sorkar hnu ah hian an han dawng ve hlauh mai a. Champai College leh

Kolasib College-ah hna thawh ñan tawh a ni a. Lawngtlai College leh Johnson College-te hi tender tura buaipui mek a ni.

Tin, ‘Gender Inclusion and Equity Initiatives’ tih a ni deuh duah a; chutah chuan, a district anga an rawn thlanah Mamit-in an han dawng hlauh mai a. Tunah hian Zawlnuam College leh Mamit College-ah hna ñana thawh mek a ni a. Chu bak ah chuan, Lunglei District leh Aizawl District-in crore 10 ve ve tunah hian an dawng a. Hei pawh hi kalpuia buaipui mek a ni a. DPR te kan han siam fel ang a, kan han tender chho ang a. Kan lawm takzet a ni, hetah pawh hian. Tunah hian kan fund release tur pawh hi crore 11 chuang a ni tawh a, chumi hmang chuan hna thawh mek a ni.

NIT-ah kan lut leh nghal ang a, NIT chungchang hi sawi ngei ngei a ngai a. Ni e, a hma ah khan lo buaipui a ni tawh a, forest clearance neih a har khawp mai a. Hetah hian ‘kan Rajya Sabha MP pawh a lo au nasa ñin a’ a lo ti a. Amaherawhchu, kan han Sorkar a, sorkar hmasa khan intiamna a lo nei a, ‘A theih ang anga penalty pek a ni ang’ tih a ni a; crore 22 a ni a, intiamna awmah tak pheh chuan. “Tihpun belh a nih pawhin, kan pe ang”, tih kha a ni na a, kan sorkar tir khan kan lu a hai khawp mai a. “Heti zat zat kan pe thei lo ang; s mangan thlak em mai”, tiin kan Chief Minister nen kan zin dun hlauh mai a. Chutah chuan, a niin DO Letter min ziah sak a, Forest Minister-ah kan thawn a, aniin a han ngaihthuah chho ta a. Kan Chief Minister hian a vei a, kan Lok Sabha MP pawh Minister hmu turin a hranin a tir leh a. Tiang khan, ama CMO añang hian an rawn ngaihven ñin a.

Tin, Pu Lalthansanga, (Pu Chatea) kan EFCC Minister zahawm tak pawh hi a ñang khawp mai a, hetah hian. An rawn endik ta a, kha kan dilna kal zelah khan. Endik a nih khan, anni khual ñha tak thlenin an lo thleng a, higher & technical lampangin cultural items te kha kan lo neihpui baw a; LO te kan lo pe a. An zuk haw a, an lawm khawp mai a. Chutah chuan, crore 14,22 añangin crore 14-ah; a han tla thla leh kha, crore 3.8-ah a tla thla a. Chutah pawh chuan crore 1.8 kha, ‘Compensatory Afforestation min pek theih chuan kan tihnam leh ang’, an ti a. Hei, Pu Chhanzova’n ram min han pe ve leh a, tunah chuan crore 2-ah a tla thla ta a. “Heti hi chuan a tih theih dan pawh a awm tawh ang”, tiin, anmahni pawh pek dan ngaihthuah ula, kan ti a.

Amaherawhchu, anmahni pawh hmanni ah an rawn leng a. direct tak chuan a rawn sawilo a, midang an rawn tir a; harsa an tih thu te an rawn sawi a. Amaherawhchu, ‘a tih theih dan tur i zawnng ho ang’ tiin, thuho leh turin tunah hian kan inbuatsaih mek a. He thilah hian kan Chief Minister hma lakna hi sawi hmah chi a nilo a. NIT, India ramah pawh state tin a an neihloh kan nei thei a, hmalakna awm chho tura hi kan phur khawp mai a, beiseina sang tak nen tunah hian kan thlir mek a ni.

Mizoram Engineering College lamah kan lut ve leh ang a Mizoram Engineering College hi 2018-a lo sak chhoh niin, 2019 ah hawn a ni a; Prime Minister-in a hawng a. Amaherawhchu, engmah hma lak a lo nih loh avangin, kan han sorkar a, kan ngaihven khawp mai a. Minister ka zuk hrilh a, ‘hma min lakpui a ngai a ni’ tiin kan han sawi ve phawng a. A fin phah deuh rauh leh nghal a, kan chesual zawk nge pawh ka hre lo a. Lehkha rum tak mai kan han hmu ta a, nikum November Ni 11 ah khan. “January 2025 chhunga class in tan loh chuan, crore 26 kan pek che u hi, nakina state sorkarin sum a dawn turah hian kan cut ang” an rawn ti ta mai a, kan mangang khawp mai a. Amaherawhchu, State sorkarin he engineering college a din theihna tur, a taka a kal theihna tura hma kan

lakna kan zuk hrilh chuan, an ni pawh an lo nem ve leh a. Sanction post 63 siam a ni tawh a, a laka pawh kan han dil leh dawn a, file a kal mek a.

Tin, tunah hian kan PWD, Power leh kan PHE officials, kan hotute an lo va kal a, an lo va endik tawh a ni tih te kan hria a, kan lawm takzet a. Chhim lampangin an lo nghahhlelh em em Mizoram Engineering College hi a taka kalpui kan tum khawp mai a. 16th Finance Commision ah pawisa kan dil a, SASCI ah kan dil bawk a. Engtin nge, kan hmu thei ang em chu kan la hre chiah lo a. Amaherawhchu, beiseina sang tak nen tunah hian proposal te siamin kan um zui a, hmuh ngei pawh kan inring a ni.

Polytechnic chungchangah khan kan lut leh lawk ang a. Women Polytechnic, Aizawl hi mi tam tak chherchhuah an ni a, mi thiam tak tak thiam thil nei tha tak takte chher chhuah an lo ni tawh a, international placement te pawh kan lo nei tawh a ni. Tin, hei LESDE lam a an sawi fo mai, skill competition ah India rama pakhatna latu pawh kha WPA chhuak hi a ni a, international thlengin tournament-ah a tel nghe nghe a ni.

Mizoram Polytechnic, Lunglei chungchang hi sawi a ngai leh thin a, a hrehawm khawp mai a; rilru te pawh a na a ni, dik tak chuan. Zirtirtu kan ni a, file hluite haia kan han ti chu, ka rilru a na leh thin a. 2012 ah khan Mizoram Polytechnic hian khin a tawk ta a. ‘Hei hi, heti chin hi kan ram a ni e’ tiin an han khing a. Chutah chuan, 2022 ah khan judgement a rawn chhuak a; a file pawh Civil suit No.1 of 2012 tihah khan Lunglei Court website hmang khan a en theih a. Chutah chuan, a kal char char a, 2012 kuma court-a inchiah ni si kha, 2021 ah court ruling a rawn chhuak ta a. Chumi rawn chhuak ah chuan, ‘nature of disposal’ tihah khan uncontested khan a lo awm char char a, a hrehawm khawp mai a. Tichuan, 2022 ah judgement a rawn chhuak a, khatah khan sorkar pawhin hma a lain ka hria a. Amaherawhchu, a in chiah leh ta a. Kan han sorkar a, ‘hei hi chu khi let a ngai a ni e’ kan ti a, February ah court ah kan kal nghal a; High Court ah appeal kan dil a ni. A judgement civil court-in a rawn tiha kha appeal kan dil a; ni 600 chuang, ni 686 appeal loha dah mai mai a nih avangin, ‘appeal leh pawh phal a ni tawh lo e’ tiin, court order kha an stand tir ta a. Chutah chuan, kan ram neih te ‘hei hi khar tur a ni’ an ti a, zirlaite an mangang khawp mai a; keini pawh kan mangang a ni. High court ah appeal-a chin fel kan duh a. Nuai 98 sen kha sorkar tan chuan a na kan ti a, chak theih ngei pawh kan lo inbeisei a ni. Amaherawhchu, appeal theih loha a awm kha a hrehawm khawp mai a. Tichuan, tunah hian supreme court ah theh luh, ‘(kan theh lut’ pawh ti tawh i la), a document buaipui chhung a rei khawp mai a; tunah hian, Supreme courtah kan kal leh mek a. Chutiang chuan buaipui a ni a.

He thilah hian kan tang khawp mai a. Amaherawhchu, kan chak lo ang tih pawh kan hlau khawp mai a. Kan sorkar kan ngawi rei lutuk a, uncontested-a a awm rei lutuk te, appeal loh rei lutuk te kha kan tuar ta a. Keini sorkarah hian luhaiin kan awm ta a ni, tih kha kan tarlang tel a ni.

Pu Speaker, tun semester chhung hian college ah teacher grading system kan kalpui tawh dawn a. Zirlaite’n, ‘zirtirtute an fel em; an tha em; zirtirnaah hian an inbuatsaih tha em; a explain thiam em; zirlaite a ngaihsak em; college ah a awm tha em; zirlaite’n an mamawh hunah college ah a awm em’ tih te khan grading an pe dawn a. Hei hi confidential a ni dawn a. Principal ten an kawl ang a, zirtirtute chauhin an hria ang a. Chutiang chuan, tih a

ni dawn a ni. Ruahmanna NERC atangin kalpui a ni a, thla leh maiah chuan kan tih theih ngei kan beisei a ni.

Demand No. 26 - Information & Public Relations Department:

I&PR ah hian hei kan budget hi an han pung ve leh zauh thung a, cheng nuai 83 laiin; kan lawm khawp mai a. I&PR hi department ngaihven ngai tak a ni a. An hnathawh hi department zawng zawng kaihnawih a nih avangin, kan tang khawp mai a. Kan officers te, kan officials te an tang a. Chutiang chuan, kan inhmukhawm hnem viau a, thil kan sawi ho thin a; Sorkar hmalakna te, scheme te, programme pawimawh zawng zawng deuh thaw tarlan a ngai a; a dik thei ang bera tarlan a ngai bawk si a.

Tin, media a lo tam a, tv chauh a ni tawh lo a; facebook te, instagram te, twitter (X te pawh a ni tawh ang chu) khanga tihchhuah te kha a ngai a. Tin, Youtube lam thlengin, chutiang chuan, ngaihtuahna tam tak sen a lo ngai a. Kan VIP te, VVIP programme ah an kal a ngai a, (hmanni ka sawi tawh ang khan) kan indaihlo takzet a. Tunah hian district-a kan officer 3-te hi chu anmahni level aia hniamah thu-in, kan Dy. Director te hi District Officer-in tunah hian kan dah mek a. Achhan chu, IPRO kan indaihloh vang a ni a. CM-ah te, Governor-ah te, protocol-ah te an awm a ngai a, helaia kan district bakah khan.

Chutiang a nih avang chuan, directorate lamah pawh kan indaihlo khawp mai a. Hmannia ka sawi tawh ang khan, kan Dy. Director te hian kan IPRO te hi an pui nawk nawk a, chutiang chuan kan kal mek a ni a. Kan IPRO, a bik takin a district-a awmte an khawngaihthlak khawp mai a, VIP te, VVIP te an lo kal a, zui a ngai a. Motor kan nei tlem khawp mai a, kan kawl theih zat hi chu 17 a ni a, allotment ang hi chuan. Amaherawhchu, kan neih a hi 7 chauh a ni a. Chutah chuan outsourcing-in kan han tihsak na a, outsource-a kan neihte hi SUV te a lo nilo a, a then four-wheel te a lo nilo deuh a. Kan VIP motorte chak tak takin an rawn inzui a, an motor te a lo kal theilo a; a changin a tang a, a chang phei chuan, an motor a kal thei dawn lo ngei a ni tih an hriat avangin, midang motora behna te an zawng a. Hemi chungchangah hian harsatna tam tak an tawk a, hei hi kan Chief Minister pawh hian min hriatpui sela, tih kha kan sawi tel duh a.

GIA kan neih hi sawi a ngaiin ka hria a; nuai ₹80 kan nei a. Mizoram Journalist Welfare Society atan nuai ₹30 dah a ni a. Hetah hian anmahni inenkawlina te, an medical bill te, tiang chuan nuai ₹30 atang hian pek a ni a. Visual Arts ah hian nuai ₹50 a awm a, hemi hnuaiah hian film lampang te, photography te, fine arts lampang, a lemziah ang chi te tan nasa taka hna thawh a ni a.

Kumin ah hian kan vannei khawp mai a, digital equipments, kan bungruate a hlui tawh avangin nuai 5 lai min rawn pe a, bungraw thar eng emaw zat chu kan nei thei dawn a. Sorkar press release a hi nikum chhung, nimin thleng pawh a ni ang chu kan siam nasa khawp mai a. 5300 chuang hi sorkar press release kan siam tawh a. Nikum financial year chhung khan nitin press release 15 siam ziah ang kan ni; kan officer te an hah dan tur chuan kan hrethiam mai awm mang e. Hetah hian thlalak hrang hrang 33,000 chuang leh video clip pawh 3300 chuang kan dahchhuak a, kan buaipui mek a.

Archive kan buaipui bawk a. kan video hlui VHS a awm te, kan lehkhabu hluite vawn thatna kawngah nasa taka hmalak kan tum a ni. Tin, hei kan vannei khawp mai a; film lampanga eizawngte tan International Film Festival angah hian kalna chance a awm a,

kumin ah pawh mi 6 lai foreign ram, Berlin ah te an kal a, India ram chungah pawh Goa ah te Mumbai ah te kan intir thei a, Central sorkar chungah pawh kan lawm takzet a ni.

Mizoram Journalist Pension Scheme ₹8,500/- hi mi 8 hnenah pek mek a ni a, damlo journalist mi 46 hnenah a vaia lakshawmin ₹23,74,000 pek a ni tawh a. Press tour hi vawi 2 kan tihsak thei a, keini pawh kan lawm khawp mai a. Tin, lemziak mite tan programme vawi 11 siam a ni a, visual arts lamah pawh programme vawi 6 kalpui a ni a. Building hi district 3 ah hian kan neilo a, a ram kan nei a, a building kan nei lo a. Hei hi SASCI atangin kan dil a, kan hmuh leh hmuh loh tur chu nakinah a hriat ang a, kan han dil ve tang tang dawn a ni.

Nichina kan hriat angin, calendar 90000 leh diary a lian leh a te 6000 ve ve kan siam a. Kan dawng tlem in ti a, nikum nen inang chiahin kan inpein ka hre si a, kha kha kan dawng tlem ta nge, ka hrelo a. Nikum khan in rawn lak belh niin ka hria, keimah; office atanga kan inpek dan kha chu a ngai chiah a ni, kumin nen. Amaherawhchu, keimah atang khan kan inpawh belh a, kan inpek belh a, kuminah pawh a remchang ang ang kan inpek belh a. Engpawh ni sela, he hi kan lo en ang e.

Tin, Bana Kaih Policy ah, Information lamah keini kha a nodal department kan ni a, youtube channel te, instagram te, twitter page te kan enkawl a ni. (Pu Speaker, ka zo tep e).

Demand No. 48 - Information and Communication Technology:

Hei hi ka department zinga a te ber a ni a, budget ah chuan ₹5.43 crore a ni a. Kan budget a hi a tam lo khawp mai a. A tet zia endan turah chuan, Samagra-a thla khata kan hlawh pek hi crore 17 a ni a, helai a kan department ICT a kan budget pumpui hi 5.43 crore chauh a ni.

Directorate a thawk hi 35 kan nei a. MSeGS (Mizoram State e-Governance Society)-ah hian mi 33 kan nei a, hei hi GIA grant-in-aid atanga enkawl a ni. Tichuan, 4G 100% saturation neih an tum a. Nikumah IT Ministers ho min ko a, chutah pawh chuan Chief Minister sawi ang khan India rampum puiah 4G hi kil tinah neih vek kan tum a. ‘Harsatna in nei a nih chuan rawn sawi rawh u,’ tiin a sawi a. Hma kan han la a; tunah hian mobile tower 53 neihna turin hma lak mek a ni a, 34 phun fel tawh a ni. Tin, PMJVK hnuaiah (Pu Robert Romawia Royte hmalakna te a ni a) hian IT Skill Development & Training Centre-in Minority Concentration Areas of Mizoram tih a kalpui a, computer 50 zel hmun 7 - Chawngte Block, Lawngtlai Block, Bungtlang South Block, Zawlnuam Block, West Phaileng, Lungsen leh West Bunglemun Block-ah te dah tur a ni.

Tin, e-Office kan kalpui dawn a, kan phur khawp mai a. NIC nen tang hoa tih tur a ni a. NIC-in User 5000 hman theihna tur an rawn nei fel tawh a. Heta kan bungraw mamawh tamah tender pawh koh a ni tawh a, hawn a ni tawh a, kan lei thei tep tawh a ni. He thil hi kan tih theih chuan, Secretariat atangin kan tan ang a. Kan officer-te an zin a nih pawhin, an zinna atangin, Minister-te pawh a ni vek tawh a, zinna atangin chutiang chuan file a kal ang a. Chutiang chuan file tang emaw, file umzui ngai kha a tlem deuh ang a. Kal loh te emaw, zin chhuanlam awm lovin file a thlen chin te a hriat ang a, chak zawka kal theih kan beisei a. Tin, lehkha hman hi (environment lampang te pawh a ni ang a, sum te pawh a ni ang a) a tlem zawnga hman gura kan inbuatsaihna a ni a. Hetah hian kan phur viau a, tihngai, training ngai te pawh kan kal tawh a ni.

Pu Speaker, Village Knowledge Centre hmun 15-ah tih tur a ni a. Hei hi NABARD IRDF27-a koh a ni a. Hei hi kan tarlan duhna chhan chu, he thilah hian loneituten awlsam takin an mamawh an hre zung zung ang a, thlai thar rate te an inhre pawh zung zung ang a. Hei hi Mizoram hmun hrang hrangah village level entrepreneur-te dah an ni ang a, computer enkawl thiamin an enkawl ang a. Chutiang chuan, kan loneitute, kan kuthnathawktu ten market chungchang a thil hriat duh thil man chungchang te, lei dawn pawh ni sela, a lei dan tur te kha an hre zung zung thei dawn a. Chu chu kalpui mek a ni a, hei pawh hi zawh thuai theih kan inbeisei a ni.

Tin, nichina zawhna awm baw, Pu Robert-a rawn zawhna OPGW Optical Ground Wire/Optic Fiber crore 50 senna tur kha tunah hian Finance Department-ah theh luh tawh a ni a, an niin an buaipui mek a ni.

Bana-Kaih portal hi ICT lam MSACS kaltlanga buaipui a ni a. Chuta dilna lut tawhte pawh a hriat theih vek a; project 15,856 he portal kaltlang hian a lut tawh a. A vai kha a ni lo a, online lo pawhin a dil theih avangin. Online-a rawn dil chin hi kan rawn tarlang a ni. Tin, Inner Line Permit te, MPSC website te, Spartan (ACR sorkar hnathawk tena an thehluhna) te, Fire NOC, kumina kan tlangzarh tak, Home Minister zahawm takin a tlangzarh tak te, School Education-in kan han hman tan 'KAI', department dang pawhin kan hman chhoh tak zel te pawh kha siam a ni a, he department kaltlang hian. Kan hriat ve hrim hrim atana thil lawmawm deuh chu, KAI App kan hman atang hian sorkar hnathawkte pawh an tangin kan hria a. Average sign in time, office an thlen tlanglawn bera chu dar 9:24 AM a ni a., an haw hun a tlanglawn bera pawh dar 4.16 PM a ni. Chu chu kan hriat ve hrim hrim atan ka'n tarlang ve leh duh a.

Tin, School Education-a 'VSK' kan tih nen tunah hian integration tih mek a ni a. Tin, Leave Application Management System hi Group A chinah kalpui mek a ni baw. Karleh lawk, April Ni 1 atang chuan sorkar-hnathawk zawng zawngah hman tawh tur a ni a, hetah hian training kan inpek belh zel te pawh a ngaiin ka hria a. Hei hi kan sorkar-hnathawkte pawhin kan hriat a ngai khawp mai. Tin, CM - Online Dispose Cell tih te pawh kha he department kaltlanga tih vek a ni a. Tunah hian hmachhawp hrang hrang kan nei a, hun a rei tawh a, ka duhtawk dawn tawh ang a. Tin, AI chungchangah hian hma la turin kan inbuatsaih viau a ni tih kha ka sawi theih ni ta sela.e-RAM te, Ruang phurh te, khatiang khan he department hian sorkar department dang website tangkai tak tak a siam mek a ni.

Pu Speaker, staff-quarter sak kha khan ka rawn sawi a, ka ziaakna a, ka rawn react tawh lo mai ang a, a bak kha chu. **(Pu Lalrintluanga Sailo:** Khawngaih. Staff Quarters ka rawn sawi kha a list min pe thei em?) E, pe thei e. A list kan inpe thei a; nichinah pawh khan ka'n tarlang nawk nawk kha a ni a. Hei ka nei a, naktukah kan officer-te khan min lo hriat sak ula, kan Member zahawm tak hi kan pe ang a. Member dang zawng zawng kha inpe mai ang u. Anmahni bial an lo en ve duhin ka ring a. Chutiang chuan Samagra Shiksha hnuaiia kan quarters neih an dinhmun te pawh kan en tlang thei ang a. Ka duhtawk tawh mai ang a, Pu Speaker; a ninawm lamah te pawh a kal tawh ang.

Tichuan, Pu Speaker, heng ka Demand-te –

| <i>Demand No.</i> | <i>Department</i> | <i>Amount in ₹</i> |
|-------------------|--|---------------------------|
| 20 | School Education | 17,27,21,53,000.00 |
| 21 | Higher & Technical Education | 323,76,80,000.00 |
| 26 | Information & Public Relations | 13,19,86,000.00 |
| 48 | Information & Communication Technology | 5,43,70,000.00 |
| TOTAL | | 20,69,61,89,000.00 |

hi he House zahawm tak hian min pass-pui turin ka rawn ngen e.

SPEAKER : Aw le, tunah chuan, Minister zahawm tak Dr. Vanlalhlana'n a demand-te –

| <i>Demand No.</i> | <i>Department</i> | <i>Amount in ₹</i> |
|-------------------|--|---------------------------|
| 20 | School Education | 17,27,21,53,000.00 |
| 21 | Higher & Technical Education | 323,76,80,000.00 |
| 26 | Information & Public Relations | 13,19,86,000.00 |
| 48 | Information & Communication Technology | 5,43,70,000.00 |
| TOTAL | | 20,69,61,89,000.00 |

A vaiin ₹20,69,61,89,000.00 crore chu House-ah pass a rawn dil a. Remti apiangin, 'remti' ti ula. Remtilo kan awm chuan 'remtilo' ti ula. (House-in pass a remti a.)

A lawmawm e. Minister zahawm tak Dr. Vanlalhlana Demand chu House-in lungual takin a passed ta a ni. (**Dr. Vanlalhlana, Minister:** Pu Speaker, ka lawm e.)

SPEAKER : Aw le, tunah chuan Minister zahawm tak Prof. Lalnilarwma'n a department chante kan han sawihona te rawn windup-a, sawifiah ngai a tihte rawn sawifiahin leh a demand te House-ah pass rawn dil nghal bawk turin ilo sawm ang u.

PROF. LALNILAWMA, MINISTER: Pu Speaker, ka lawm e. Dar 9 PM, a then tan chuan mut a hun tawh a. Kan hun tawnin a zir chhoh chuan dar 12 te pawh kan thleng mai thei a ni.

Vawiin hian, Pu Speaker, ka department 3-te a-siruk-la-in kan rawn thawk chhuak a. Secretariat, Directorate leh kan E-in-C office te, kan Division EE te, kan SE te pawh an mahni thuthmunah online-in an lo awm a. Vawiina Memberte'n an sawi zawng zawnga kha chipchiar deuhin an lo list chhuak a, chutah chuan heti hian compile vekin kan nei a, RD pawh hi a chhah leh-lawh khawp mai. React vek dawn ila, darkar thum vel a ngaiin kan ring a, chhah lo mai ila. A copy kan chhuah rualin envelop-in an lo thun vekin kan ring a, in hawn vek thei ang, tih kha Member-te kan inhriattir ni se, Pu Speaker.

Zanin hian ka rilru a phir deuh a. A tir chuan darkar chanve vel sawi ila a tawh mai lawm ni ka ti deuh a. Amaherawhchu, thawhpui leh thiante'n, 'kum khatah vawikhat chauh a awm alawm le; i duh chen chen sawi rawh' an ti bawh si a; a eng ber nge ka zawm ang; a lai bawh vel kha rawn zawm ka tum deuh ang a, Pu Speaker. Eng pawh ni se, nizana sawitute leh zanina ka hmaa sawi Dr. Mathlantea ai chuan tawi deuh hlek se; amaherawhchu, kan phur chhoh chuan kan buai thei tho tih kha min lo hriatsak ve ula. A siruk-la-in kan rawn thawk chhuak ka tih kha.

Water test result hi, Pu Speaker, Member ten kan duh takin hetah hian kan rawn keng tel a ni. Aizawl-ina kan tui in - Phase I, II leh SIPMIU Phase III bika hi a quality latest kan test a, ‘A him a ni’ tih kha ka han report ni se. Tlemte heta a content hoa kha han chhiar chhuah lawk ka duh a, a example ka rawn la den den a.

Pu Lalrinsanga Ralte, Serlui Bialtu khan Saihapui ‘V’ hall convergence-a kan saka lawmthu a rawn sawia heta ka chhannaah hi ka’n chhiar mai mai ang e - “Kan lawmpui che u a; MGNREGA hnuai hian department leh MLA dangte pawh convergence min kalpui thei in awm chuan kan in hawng reng e,” tih kha a ni.

Heta pakhat hi ka’n chhiar leh lawk ang a; Pu V. Malsawmtluanga, Lunglei N Bialtu-ina Library sak chungchanga lawmthu a rawn sawi kha, ka chhanna chu - “Kan Library sakte lo hmang tangkai turin duhsakna kan hlan che u,” tih a ni.

Hei hi ka’n chhiar leh ang e, tawi te tein. Pu Papuaia hi a awm lova, Pu Speaker. ‘Samthang leh Dungtlang-ah cold storage min dah sak thei ang em’ tia a rawn zawhna kha, kan rawn chhannaah chuan, “Annual Action Plan 2025-26 hnuai hian cold storage hi telh a ni a. AAP approved anih hunah, chu chu Central-in a min rawn approve chuan, zikhlum thar tamna Samthang leh Dungtlang lamah te dah dan kan ngaihtuah dawn nia,” tih kha a ni.

Pahnih lek ka chhiar leh ang.; chhiar zawh vek law law hi a chakawm ang reng a. Pu Jejea khan – JMM hnuai gravity-a Tarpho tuilak dar rimnam hi hma min laksak thei ang em,” a ti a, ka chhanna chu - “Tarpho intake-ah leh a bula Aithur tuikhurah hian dar rimnam a awm lova. Amaherawhchu, Tarpho khaw chhungah hian dar rimnam a awm a. Hei hi a chhan zirchiana hma lak tum mek a ni” tih a ni. Chutiang chuan, chipchiar deuhin kan rawn chhang a ni.

Tichuan, Pi Prova-i kha a awmna atangin lo ngaithla mai rawh se. JJM hnuai tui connection-ah khan khaw tin kan cover a ni si a; ‘khaw 9-in kan la neilo’ a tih kha, hei hi a chhan a ni - JJM survey anih lai khan Pu Speaker, khaw thenkhat kha authorised village a nilo a, Mizoram sorkarin nikum khan authorised village-ah a rawn puan tak si ah chuan, khang khaw 9 JJM-a tel lote kha telh leh tumin hma kan la a, central-ah pawh kan zuk thlen tawh a. Tin, ‘Functional household-tap connection, a vaiin 100% kan nei tawh in ti bawk si a, system-ah a buai ang’ tih deuh te kha a awm a. Kan Secretary te an zuk chhuk a, tunah hian hma kan la mek a ni tih kha min hriatsak se a tha ang e.

Report tawi ka’n pe leh lawk ang a Pu Speaker. Kan Environment Minister Pu Chatea khan kangmei avanga Sentefiang leh Thaltlang Tui lakna a kang chhia a tih kha, kan bawhzui nghal char char a. Niminah a chakte an lam a. A chhiat dan tlangpuiin chu, Thaltlang-ah, 65 mm pipe 3 a chhia a, 32 mm pipe 6 a chhia a. Sentefiang-ah 40 mm pipe 6 a chhia a, chu chu nimin khan an lakhawm a, dar 4:21 khan ‘engnge kan an’ tiin ka han zawt a, message-in; an fit mek thu min rawn hrilh a, dar 7: 19-ah chuan kan fit fel tawh a ni, Pu Speaker. A bialtu hi a awmlo a, awm se chuan a lawm ve tur chu a ni.

Tlawng dinhmun hi demand lama ka luh hmian tawitein han report leh lawk ka duh a. Pu Speaker, session tan tirh khan kan Tlawng-a kan tui dinhmun a that vakloh zia report kha pek a ni tawh a. Kan report pek hmasakah khan, February Ni 22 khan litre maktadaui 80.04 a ni a. ‘A latest hi min rawn pe teh u’ ka ti a, kan engineer ten min rawn pe a. Nimin Ni

19-ah khan Tlawng ina tui a discharge, (Tlawng tui level anih chu) chuta kan neih zat chu - February Ni 22-a litre maktaduai 80.04 kha niminah chuan litre maktaduai 65 a ni; a kiam thla zel. Nimina ruah tlemte sur kha ka lawm viau a, Pu TBC-a kha a lawm vak lo a, ‘ka bialah kawng kan siam’ a ti a. Khatah chuan Pu Speaker, a tawngtai chak chak a ni tawh mai. February Ni 22 leh March Ni 19-a a inthlauhna chu, litre maktaduai 15-in kan kiam mek a ni. Hei hi kan dinhmun a ni a, member-puite ‘i tawngtai ngawrh deuh ang u’ tiin kan insawm a ni e, Pu Speaker. Ka demand-ah ka lut tawh ang.

Demand No. 25 - Public Health Engineering:

Pu Speaker, MP inthlan lai khan kan hotute’n campaign turin khawthlang lamah min tir a, chutah chuan zan riakin hun kan hman a, zan kan han riak a, a tuk zing kan thawh hlim velah khan pa pakhat a rawn kal a, a rawn sawi ber chu – ‘Mizoram-a Tui Lal ber ka hmu duh’ a rawn ti a ni. Tui Lal ber hmu duh chu, khawng kan hmu ve ang chu ka ti a, kan han inkawm ta a, khawtlanga tui harsatna te leh a mimal harsatna te kha a sawi a. Khata ka rilrua lo lang ber chu, ‘Tui Lal ber’ min titu chu ka theih ang tawka han puih ka va chak em ka ti a. Mahse, kan tui lal ber nihna dinhmun hi khatianga han tih zung zung theih kha a ni silo a. Tui Lal ber title min pekna department hi han sawi hmasak ber kan duh a, Pu Speaker.

Mak ve deuh chu, memberte hian min lo hriatpui lovin ka ring deuh a, kum khat leh tlem PHE Minister ka nih chhungin Secretary 6 (tuna mi nen) ka hrawn hman a ni. ‘A va zing em em ve; I sual deuh a ni lo maw’, min ti mai thei. Amaherawh chu, Pu Speaker, kan Secretary-te hi NESAs, Engineering Service Association-a awmte an ni a. An senior hnu thla hnih-thum an neih chauhin an rawn secretary a, min pension san zel a. Chu chu kan inthlak zinna chhan a ni.

Tichuan, ka note-ah hian a hmasa ber chu, ‘Tui tel lovin tunge awm thei?’ tih hi a ni a. Chutia tui tel lova awm thei kan awm loh lai chuan, keini PHE Department chuan kan tum ber chu, kan tui mamawh tih thianghlim leh kan tui mamawh phuhruk hi a ni.

Tichuan, PHE Dpartment hian hma lakna hrang hrang kan nei a. Centrally sponsored scheme kan kalpui hnem ber a, hetah hian JJM hi 15th August, (Independence Day) khan kum 5 atana Prime Minister-in a hawn a ni a. A nih dan takah chuan, nikum 2024 khan tawp tur a ni a. Keini chuan kan hna kan zo thawkhat kan ti a, house-hold tap connection 100% kan nei tawh a. Project thar dil leh tur kan nei lova, a kal lai bak kha chu. Chuvang chuan, nikum khan JJM ah hian project thar pakhatmah kan nei lo a ni; a kal lai enkawl a ni mai a. Amaherawh chu, tun budget session kal ta ah khan central-ah JJM hi pawhsei a ni a, 2028 thlengin. Chutah chuan, engte nge hma kan lakna tur kha tunah hian kan la bangbo ang reng a. Kar hmasa khan kan CE te Delhi ah review meeting an zuk nei a, chutah chuan guidelines thar, JJM 2.0 an rawn siam dawn an ti a, chu chu kan nghak mek a ni.

Kan beiseinaah chuan, wawiina problem tam tak kan sawi ang khan, ‘solar pump kan nei a, tui kan khamkhawp chuang lo’, tih te, khang problem sustainability a rawn awm chho turah kan ngai a. Tichuan, he guidelines thar hi kan nghak mek a ni.

JJM hnuaiiah hian khua zawng zawng functional tap-connection hi 133060 kan fit fel tawh a, sorkar school 2371-ah connection kan pe tawh bawk a, Anganwadi-ah 1556 connection kan pe tawh bawk a ni. NESIDS hnuaiiah hian project pathum kan nei a, pahnih kan zo tawh a, pakhat hi kan la zo hlei theilo a ni. Chung zinga kan la zawh loh pakhat chu,

Alternate Gravity Water Supply Scheme of Aizawl hi a ni a, 117.3 crore a ni. Chu chu vawiina Pu Zamtea Aizawl North-II bialtu rawn zawh – Tawitlang, Hualtu Dil atanga gravity-a kan tui lak a ni. Hei hi a buai thlak khawp mai a; a zawh hun turah an zo thei lova, pawhsei a ni a. An extent pawhin an zo hlei thei lova, ‘tihngaihna a awm tawh lo a mi aw’ kan ti a, a contractor te pawh an bei dawng deuh a ni. Amaherawh chu, thla hmasa khan ka room-ah meeting kan nei a, ‘hei hi engtin nge kan tih ang; hetia kan thlir liam mai chuan a theih dawn loh; tih dan i ngaihtuah tlang teh ang u’, kan ti a. Kan engineer leh contractor te an inrawn a. A problem chu, kan test apiangin pipe a puak keh ziah a ni. A pipe kha pipe lian deuh deuh a ni a. thlai tam tak a ti chhia a. Khang problem neiho pawh kha vawi tam tak ka office-ah an rawn leng tawh a, tihngaihna a awm vak lo a.

‘Engpawh ni se, a problem han zir chiang leh u la; computer te han en leh u la’ tiin, test turin an han ti leh a. ‘Muallungthu atanga pipe te deuh zawka a lak penna te kha, la peng lo ila, free deuhin kal tir ila a tha ang em aw’ tih te a ni a. Nimin khan an test a, ‘han zo hlauh teh u a; naktuk Session Demand sawinaah report te pawh a chakawm alawm le’ ka ti a. Nizan zanlaih report an rawn pe a, ‘hei hi kan dinhmun a ni e; engmah report kan la rawn pe thei rih lo e’ an rawn ti a. Vawi 22 test a ni tawh a, chutah chuan a valve lo leak te a awm a, a pipe puak kha a tam ber a. Chutiang dinhmunah chuan kan awm a. A contractor hian help pawh a nei tawh mang lo ang aw, te kan ti deuh a ni. Chutiang chuan, harsatna kan tawh a. Hei hi fel se, ‘Aizawl-a kan tui supply hi kan kham khawp em’ tih lai kha, hei hian a rawn chhang deuh turah ka ngai a. Chutiang chuan harsatna kan tawh a. He project bik hi NICETS ah chuan kan zo thei lo a ni.

Tichuan, AMRUT hnuaiiah hian project, water supply scheme 19 kan nei mek a. Chutah chuan sewerage scheme pakhat, Aizawl tlak lama septic tank thli luan khawmna tur pakhat nen AMRUT hnuaiiah hian scheme 19 kan kalpui mek a ni. Tichuan, SASCI hnuaiiah hian project 6 kalpui mek a ni a, project dang pawh hmuh kan inbeisei mek a ni. Tichuan, project pakhat, Lunglei West bialtu Pu Mahlima’n a rawn sawi, ‘min duhsaka kan lawm a; hna a muang ang reng’ tih kha, nikum atangin kan contractor te nen kan innawr a. A tuikhuahna thlang deuhah a sang zawka khuah tura tui tihtlina pump tur siamna tur kha a ni a. Nikumah bul kan han tan a, furin a han nang a, kan zo thei lo a; a contractor te nen pawh kan inbe reng a, kei pawhin mimal takin ka phone reng a.

Tichuan, tunah hi chuan, lei hnuaiia inphum a lang lo chin kha a hautak lai ber a ni a. An zo tawh a, a rawn lang chho tawh a. Report kan dawnah chuan, a chhun-pawna tur nimirah cement bag 120 an chung a, vawinah cement bag 140 an chung leh a; a thlalak te kan SE-in min rawn thawn a. Pu Speaker, a tui hi hetia han en chuan a tling chho tan a; kha kha a nih chuan, a kang chho zel ang a, hmuh theihin a rawn chak tawh dawn a, ‘tun fur zualpui hma chuan zawh kan inbeisei a ni’ tih kha min lo hriatsak se a tha ang e.

Tichuan, Pu Speaker, NABARD hnuaiiah project hrang hrang kan thawk leh bawh a. Ngaizawl Water Supply thawh zawh tawh niin, project dang 6 thawh mek a ni a. Tichuan, kum thar atan NABARD hnuaiiah project 3 pawm sak kan ni leh a. Chungte chu - Buangpui Water Supply Scheme (Solar Pump), Tualpui Water Supply Scheme (Champhai North bialtu pawh khan lawmthu a rawn sawi tawh kha), Neihloh Water Supply Scheme (Solar bawh). Chutiang chuan, pathum kum thara thawh turin hmachhawp kan nei a ni.

Tichuan, Mizoram puma tui lak leh pek dan dinhmun hi House memberte hian hre ve hrim hrim ila a thain ka hria a. Khawpui (Urban) ah 1,38,365 connection kan nei mek a ni. Tichuan, nichina ka sawi tawh ang khan thingtlangah 1,33,060 kan nei tawh bawk a. Tichuan, Water Supply Scheme bikah hian a scheme hi Grid, Solar leh Gravity-in kan then a. Gravity a kan feed hi 657 a ni. ... (*Interruption*)

PU LALRINTLUANGA SAILO: Pu Speaker, Minister-in a sawilai khan khawngaih takin. Ka bial Pukzing leh Hruiduk hi W. Phaileng, Marpara kawnga awm a ni a. Chutah chuan main road kawng chung lam khuan JJM scheme atang khan, a tirah kan Engineer ten an lo tvisual a, a kawng chhaklam zawngin eng emaw zat kha an dawng ve thei ta lo va. Chu chu 'NABARD ah kan EE in kan dil mek e' a ti a. Kan Minister-in min hriatpui se ka va duh ve, Pukzing vengthar leh Hruiduk hi.

PROF. LALNILAWMA, MINISTER: Aw le. Kan lo chhinchhiah ang e, Pu Speaker. Tichuan, gravity a kan lak zat hi Mizoram pumah 657 a ni a, solar pumping hi 188 kan nei a ni. Tichuan, Grid, electric power hmanga pumping scheme kan neih zat hi, khawpui ah 28 leh thingtlang ah 7 a ni.

Tichuan, Swachh Bharat Mission hi kan kalpui a, faina leh thianghlimna kawngah PHE chu public health a nihna laia kha, hetah hian kan kalpui mek a ni. Faina leh thianghlimna lampang hrim hrim a ni ta a; chutah chuan, vawiina kanrawn sawilan Aizawl South-III bialturawn sawi lan plastic sawngbawlina Aibawk-a kan neih saw tun zirtawp kalta khan kan va tlawh a. Aibawk water supply scheme cyclone remal-in a tihchhiat an siamthat leh tawh leh a hnukhawi kha kan va thlir a, chutah chuan, plastic waste management unit kan tlawh nghal a. Saw saw public-private partnership-in kalpui mek a ni a, a tha khawpin ka hria a, Pu Speaker. Chutah chuan, kan plastic zawng zawng leh kan hnawma bawhlawh tawih theilo zawng zawng kha khaw hrang hrang, thenawm khua atang tein an lo la khawm a. Chutah chuan, khang plastic kha bottle te kha an press a, a telin an lo dah a. Khang ka ngaihtuahnaarawn awm ber chu, 'heng heti hian lakhawm lo ta ila, Tlawng ah emaw a luang thla ang a, Tlawng chu a van rethei leh dawn em', tih a ni, Pu Speaker. Thil tha tak a ni a. Amaherawhchu, challenge tam tak a la awm a. Khang an telkhawma kha a recycle-na hmanrua kan la neih loh avangin Guwahati ah thawnthlak a ngai thin a ni. Chuta kan rilru a awm ta chu, khang centre kha pakhat chauh kan la din a, hmun dang dang Mizoram-ah a region-wise in emaw, a district-wise pawhin din ta ila; chutah chuan khang press-sa ho kha ka la ang a, Aizawl-ah emaw la khawmin recycle thei ila ava tha dawn em, tih kha kan rilru ah kanrawn paw haw a ni.

Tichuan, kan RD Addl. Secretary te pawh kha anrawn kal tel bawk a, 'Hetiang scheme a hi Ni-100 inhlawhna te nen hian converge chi a nih hi a; kan mamawhnaah inpui tawn ila a va tha awm ve' tih te kha kanrawn hawn a. Amaherawhchu, a hmun chungchangah, an siam lai chuan khawchhung vak pawh a ni lo mai thei; Tunah chuan a kalkawng leh a in te pawh a lo awm a, thenawm tan hnawk chanah te a chang tan niin kan hria a, hengah pawh hian ngaihtuahna hman ngai tak a ni. A hmun sawn dawn chuan sum leh pai tam tak sen la ngai tur chi a ni a. Tichuan, Swachh Bharat Mission hnuai hian Central YMA te nen faina kawnga thawhhona thuthlung tha tak kan nei a, kan thawkho tha hle a ni, tih kha han report leh zuai ka duh bawk a.

Tichuan, PHE Department bik hian revenue sorkara kan sum chhunluh hi kumtin target siamsak kan ni a. Nikum 2023-24 khan kan target chu ₹7200 lakhs a nih laiin, kan target khuma kan lak zat chu ₹762.28 lakhs a ni a, kan target kan khumna chu ₹562.28 lakh a ni. Tichuan, kum kal mekah hian target ₹8000 lakhs min siamsak leh a, February thla cyclone remal avangin kan target kan khum theilo awm mang e aw kan ti a. A chhan chu, tui kan pek mumal loh avangin, a fee kha kan khawn mumal lova. Tichuan, February 2025 thlenga kan lakluh zat chu ₹7207.25 lakhs a ni a. Tichuan, kan target tun March thla chhunga ₹792.75 lakhs kan hmuh theih chuan, kan target kan khum thei turah kan ngai a. Hetia thlatina lo lut zat han chhut chuan, kan target hi kan khum thei mai awm mang e aw, tiin ngaihtuahna kan nei a ni.

Tichuan, Ground Water Rules hi, Pu Speaker, Sorkar hmasa khan Act a lo siam tawh a, kan Sorkar hnuah a Rules kha kan han siam a. Khami a rules kan approved hnuah kha chuan lei hnuah tui verh duh zawng zawngin dan mumal tak kan neih tawh avangin, a dilna te pawh mumal taka zirchian hnuah permit pek tur a ni. Hetah hian han tarlan hram ka duh chu, Pu Speaker, kan CM zahawmtak hian ama ramah lei a verh duh a, midang CM ang te chu ni se, ‘vawiinahrawn ti nghal rawh u’ a’ n ti rum rum mai thei. Amaherawhchu a dilna te nen form fill up thlapin a rawn dil a, tichuan survey kan nei a, investigation kan tih zawh vek hnuah procedure pangaiin permit kan pe chauh a ni. Chungah chuan kan CM zahawm tak hi a fakawmna a ni.

Tichuan, hmachhawp kan neih hoa hi tawi tein. Pu Speaker, ‘ruahtui khawl hi a van ngai em’ tih rilruah a rawn lang leh a. ZPM party policy lian berte zinga mi a ni a, ruahtui khawl hi. ‘Mimalin in a sak dawn chuan, a in atangin ruahtui khawl a siam ngei ngei tur a ni’ tih te hi Dan-ah te pawh a lo awm tawh niin ka hria a. Hei kan UD & PA Minister nen meeting kan nei a Pu Speaker, chutah chuan khang te kha kan la hmang tangkai zel turah te pawh ngai ta ila.

Tichuan, Polytechnic Institute, Hrangchawkawn, Lunglei-ah rooftop-rainwater harvesting litre nuai 2 dawng thei 5 kan siam a. Tichuan, HATIM (Higher and Technical Institute)-ah litre nuai 1 dawng thei pathum kan bun sak bawh a. Tichuan, nikuma ka va zin khan ‘financial year tharah chuan LMC in ni tawh si a, Ni-100 inhlawhna in dawng thei tawh dawn si lova’ tiin kan MC atangin tuizem khuahna tur pakhat kha chu kan han pe ve leh hram a. Chuti khawp chuan ruahtui khuahna kan ngaipawimawh a ni.

Tichuan, ruahtui khawl chungchangah hetiangah hma kan la dawn tak tak a nih chuan, ‘Sorkar office pui ber hi bul tanna a ni dawn lawm ni’ tih te rilru-ah kan nei a. Officers-te nen room-ah meeting kan nei a, hemi project hi kan siam thei ang em kan ti a, chu chu kan han siam a. MINECO building-a ruahtui kan khawl theih chuan eng emaw zat sum kan save thei dawn a ni. Chutah chuan, thla khata kan bill leh kumkhata kan bill hi rawn chhut chhin teh u kan ti a, Pu Speaker, niminah a data kan nei thei a. Hetah hian tun February-a MINECO tui bill hi tawi tein han present ka duh a. Connection no. 1 leh no. 2 a awm a. Connection no. 1-ah chuan thlakhat, February, 2025-a kan tui bill chu ₹1,35,340/- a ni a, zonnection no. 2-a kan tui bill chu ₹44,140/- a ni. A pahnih belhkhawmin thla khat, February-a kan tui bill chu ₹1,79,480/- a ni. Kum khatah MINECO-ah ringawt pawh kan tui bill hi ₹20 lakhs a chuang tihna a nih chu. Chu chu, ruahtui kan khawla eng emaw chen kan rin theih chuan, ₹20 lakhs kan save em loh pawhin, ₹15 lakhs vel te hi chu kan save turah kan ngai a ni, Pu Speaker.

Tichuan, kan tui hman a tangka em ema han tih chu a nuam chiah lo a, amaherawhchu, a commode a mi kan zun tleuha kan zun ram thiarnaa kan tleuhna ringawt pawh hi recycle theih a ni lawm ni kan ti zel a ni. A recycle dan te pawh kan ngaihtuah chho dawn, hmachhawpah kan nei dawn. Kan recycle chuan, tui kha MINECO pang sir vela pangpar tui pekah te a la tha dawn khawp mai; chu chu hmachhawpah kan nei a.

Tichuan, ruahtui khawlina te nen tunah hian a project hi UIDF (Urban Infrastructure Development Fund) atanga pek turin sorkarin min pawmsak tawh a, hei hi min petute'n an rawn approve-a min pek chuan, MINECO-ah ruahtui khawlina kan tan dawn a ni tih kha min lo hriatpui ula ka duh a. Tuikhuah te pawh hi kan tihtam a ngaiin ka hria a. Tuikhuah han tih hian a man to leh tlawm te a awm thei bawk a ni. Ruahtui kan khawl theihna tur khawilai ruam emaw, man tlawm tea kan khuah theih chuam, chung te pawh chu khuap zel ila. Ka biala Maite-ah khian tha deuh mai a awm a, nuai 20-30 emaw chu seng ila kan khuap tling thei mai ang a; chu chu gravity hmangin a chhuk thei dawn si a, tiin kan survey tawh a, estimate chu kan la siam lo a; to vak lovin a khuah luih theih dawn a ni.

Tin 'Lui project' kan ti a, hei hi chu a man a tam tham deuh hlek a, Reiek chhakah sawn office kan luah ve hmaa survey neih vek tawh kha a ni a, tunah hian minstry ah a project chu kan theh lut vek tawh a, a to tham ang reng a. Tuikhuah ringawt nilo, drinking water chauh nilo, irrigation te pawh rawn telh rawh u an ti a, kan telh leh a, crore 500 chuang; min rawn pe thei ang em chu kan hre lova. Kan tuma chu, ruahtui inkhawla kha Reiek tlangah kan pump chho ang a, solar emawin reservoir atang khan khaw 14 kan kan chawm thei dawn a ni, gravity-in. Tichuan, lui kan khuahnaa tui tling kha hetah Tlawng atanga tui a nut emaw, tui kan pump theih loh emaw hunah gravity-in tui kan pump chhohna ah a zuk inkhawh lut ang a, furah pawh kan buai tawh lo turah kan ngai a, Chutiang chuan hmachhawpah neiin ngaihtuahna kan seng a ni.

Rilru-a lo lang chu Pu Speaker, MLA-te theuh pawh hian kan bialah khang hmun ang te pawh kha identify ila a tha ang em aw kan ti deuh a. Thahnem ngaih a na a, tui a vang chho telh telh si a. Khang kawr te kan khuahah khan tui lo tling thei tur a nih chuan, hawh u, i thawk ho ang u; department nen hian i thawk ho ang u; RD atangin MC-te nen i thawkho ang u. Sarovar tui khuah hrim hrima hi ministry-in an rawn ngai pawimawh a, chutiang chuan i ti zel ang u. Ruahtui hrim hrima kan sen zat hi, sorkar office building-a kan tui bill zawng zawng hi kan print chhuak a, a chhah viau a ni. Building pakhatatah, a thenah chuan sing chuang te, a thenah chuan sang 4-5 te a ni a. Heng zawng zawng hi han belhkhawm ila nuai engzat nge ni ang? Taing khan ruahtui khawl a pawimawh zia ka'n han tarlang leh lawk ni se.

Khuarel chhiatna laka invenna kan ti a. Chutah chuan a hma ka report tawh angin Pu Speaker, kan Tlawng tui pump khu tui lianin vawi hnih min chim sak tawh a, cyclone remal-in min tihchhiat sak bawk a. A hmunah chhiat kan tawh tumah kan zuk kal a, thim hnuah hawin, CM hnenah ka report a, "Sir, khu khu vawihnih min chim sak tawh a; tui a rawn lian leh a min chim sak leh a nih chuan, kan thiam loh a ni tawh ang. Chuvangin, invenna ngaihtuah a ngai" tiin. CM chuan, "E, hmalak nghal chi a nih chu" a ti a, tunah hian hmachhawpah kan nei a. Proposal concept paper pawh kan nei tawh a, sorkar pawhin min pawmsak tawh a. Tuna kan tui pump khawl ho a bik takin Phase-I atanga metre 3-a chawisan kan tum a ni. Tui rawn lian pawh ni se, a hnuailam bak a rawn chim pha lo turah kan ngai a, chutiang chuan kan kal a ni.

Tui hi ‘kan pump tha thei tawh e’ kan tih rualin, inren hi a ngai zel a. Chuta kan invenna turah chuan Pu Speaker, Water-leak Reporter-hi nikum khan kan siam chhuak a, hei pawh hi kan Engineer-te nen a sawiho zela hma la kan ni. Office kan han luah a, ‘tui chutah chuan a leak; an rawn sem apiangin a luang huau huau’ tih report te kan dawng a. A hmunah kan kal seng lo. Chutah chuan, awlsam tein, a hmuna kal loa a thla laka report a rawn luh theih nan Water-leak Reporter hi kan siam chhuak a, chu chuan tunah hian kan monitor a ni.

Entirnan:- Hetah lo leak ta se, thlalakin ka click ang a; kha kha ka thawh chuan a bialtu JE-in a lo hmu ang a, a bialtu SDO-ah a lo kal bawh ang a, SDO atang khan EE-ah, SE-ah, CE-ah, E-in-C ah Minister-ah, Secretary-ah; khatiang khan a kal kual ang a kan in-monitor thei reng a ni. Ka tablet-ah ka dah a, nitin ka monitor a, vawiin thleng hian report 197 kan dawng tawh a. Hmun 197-a tui leak chu ngaihtuah ila, Pu Speaker, engzat nge luang ral ang? Sum tam tak senga kan pump chho kha khatia luang hiau hiau tur a nih chuan, a uihawm lutuk a. Tichuan, 197 report lutah khan 194 kan chingfel tawh a, 3 la chingfel loh a awm a ni. A report kha nitin kan en thei a, kar khat-hnih te a lo vei tawh chuan, ‘hei hi engati nge; tu bial nge’ tiin a bialtu kha kan hrilh chat chat mai a, tichuan, an bawhzui a, tikhan tui tam tak kan save chho mek a. Pu Speaker, kan thawhhona hi a tha a ni.

Tichuan, hetah hian ‘Smart meter’ tiin kan ziaik leh a. Tui kan harsa a, Remal Cyclone -in khawlte min tihchhiatsak a, kan mangnag em em a ni. Theihtawp kan chhuah a, kan tang char char a. Kan han siam tha a, tui kan han hnianghnar ve tan ta a. Tichuan, ‘tui bill sang’ tih kha report kan han dawng leh ta a, tlema vuivaina public-ah a’n awm tan ta a. Kan ngaihtuah dan chuan, tui kan dawn that chuan, a bill chu a sang mai dawn lawm ni? Thla khata vawikhat dawng thin khan kartin kan dawn tawh chuan, a bill chu a sang tur alawm, tiin ngaihtuahna kan seng a. Amaherawhchu, kha mai kha a lo ni lo a; kan Secretary leh kan E-in-C te nen meeting kan nei leh ta a ni. Chutah chuan, ‘kan meter-te hi dik lo a awm thei em’ tih kan inzawt ta a.

Pu Speaker, kan department hi kan han inpuang ang e. Kan engineer ten an han sawi a, kan meter hi a supply-tu bik pawh kan nei hlei nem! Heta mi kan va lei a, legal meterology-ah kan va test tir a, ‘a dik’ an tih chuan kan hmang mai. Athen a lo dik a, a then a lo diklo thei tho a ni, tih kha kan han inpuang a ni. Amaherawhchu, diklo a awm a nih chuan, report se, kan test leh ang a; heta a dik kha chuan, a dik a ni mai a. Chutah chuan a dealer mumal taka indentify a nih loh avang khan a chhiat pawhin repair ngaihna a awm lo a ni. A thar zel kan lei avangin mipui tan pawh a senso thlak a. ‘Tui bill dik zawh hi kan mamawh ta ve’ tih a ni. Chutah chuan, ‘kan tui meter ho hi smart meter-in thlak ta ila mipui an va phun nasa awm ve’ kan ti leh deuh bawh si a.

Amaherawhchu, project kan siam ang a funding source te kan neih theih chuan, smart meter hi vuaha tih kan tum mek a ni. Pu Speaker, chu chu kan hmachhawp a ni. Chutah chuan, smart meter a nih chuan meter reader a ngai tawh lo ang a, hetah office thuthmun atangin ‘kha household khan tui engzat nge an dawn’ tih kha computer atangin kan rawn kan check vek thei ang a. Khata meter reader a tul tawh tak lohah chuan hmun dangah kan hmang ang a, kan indaihlohna te pawh kan phuhruk thei awm a, tiin ngaihtuahna te pawh kan siam a ni.

Tichuan, meter-a tui bill sang kha chu thuhnan ni rawh se, tui liam thin hi; tuizemah tui a rawn lut ta a, kan awm loh lai a nih chuan a liam thin a; heng te pawh hi kan invenpui a ngai mang e aw ka ti thin a. Ka chhinchhia dan phei chuan, Mizopa technician ka ti a; ani hian stopper ball hi a siam a, ₹1000/- leh tlemin a hralh theih a ti a. Pu F.Hmangaiha, kan CM hnenah pawh a leng tawh a, Kan CM hian a tuipui a. Amaherawh chu, department-in mipuia, 'hei hi lo lei ngei ngei rawh u' ti se, mipui an phun dawn. Tuizemah a rawn lut ta a, tuizem a full veleh khan kha kha a rawn kang chho a, khata tui rawn luhna kha stopper ball-in a off, amahin a in off mai a ni. Chutiang te pawh chu kan hman chhoh tam a van ngai awm em tih kha rilru ah a rawn lang a.

A dawtah chuan, Mat project hi a tam tham ang reng a, a tira an lo duan dan chuan crore 900 chuang a ni a. Amaherawh chu, 'a tam lutuk e' tiin kan reduce thei ang em kan han ti a. Amaherawh chu, Mat kan han sawi rual hian, thil harsatna a awm a. Pu Speaker, kan pump chhohna tur tuna kan hisap dan chuan, Mat tui hi Sairep tlanga pump chhoh a ni a, chu chu km 7 leh a chanve a ni. Tichuan, Sairep atanga Theiri at reservoir-a kaltlang tur chuan Mat atanga km 11 chuang a ni ta a ni. Km 7 leh a chanve pump tur kha chuan, Stage-I chauh kha a theih ta lo a, stage-II tal a ngai a. Chutiang a nih si chuan, a pumping kha stage khata kan tih chuan, darkar 24 duty tur manpower kha an ngai leh a; Stage-II a nih chuan, khata duty tur khan darkar 24 duty tur an ngai leh a. Bun chu kan bun thei mai ang, amaherawhchu, a running cost a kha state in kan tlin ang em tih te kha ngaihtuah a ngai a. Theih tawp kan chhuah a, hmachhawpah kan neih a ni tih kha min lo hriat sak ula.

Hmannia tui tlem zia thu kan report khan group-ah message ka dawng a. Keima dawn pawh a ni lo, ka wall ah khan a rawn post ve a. Chutah chuan, 'A va inkahpuk-chaw lo e' tih kha ka message dawn a ni. Tui a lian a, tui a nu a, tui a in pump thei lova. 'Khawl a chhia a, khawl a tha leh a, kan pump chho dawn chauh tihah 'tui a tlem' in ti leh si a; a inkahpuk-chaw lo mang e', an rawn ti a ni. PHE Department hi khatianga inkahpuk chaw lo inkar a awm kan ni, Pu Speaker. Amaherawh chu, lawmman kan nei ve thin. Chutah chuan Cyclone Remal-in a kan khawl zawng zawng a tih chhiat laia mipuiin dawhthei taka, theihtawp kan chhuah lai min lo thlir a, min lo nghak fan fana kha, lawmthu nangmah leh he House kaltlang hian han sawi ka duh a. Tichuan, nidanga la awm ngai lo stage-I kan han siam tha a, phase-II a tha a, SIPMIU phase III kan han siam thaa kan han pump chu, krismas hma December 24 khan Aizawl-a kan tuizem lian zawng zaawng kan han pump khat vek a, khawlte a chawl ve thuap mai a ni. Chutah chuan, kan engineer-te 'hetiang hi kan tawng ngai em' ka ti a, 'hetiang tumkhata avai a kan chawlh thuap hi a la awm ngailo' an ti a ni. Pathian malsawmna chhiatna karah kan dawng chho zel a, hei hi lawmna tur a ni.

Tichuan Pu Speaker, nangmah kal tlangin lawmthu han sawi leh ka duh chu, Dr. Pawchhua khan lawmthu min hrilh a; keimah zawk hi a ni lawmni; lawmthu hrilh tur chu ka ti deuh a, Saiha ah nikum khan an tui pump khawl wiring te a chhe vek a, a siam tur khan mithiam kan chah a, kan han ti char char a; a thla tel a chhia a ni, siam kan tum kha. Tichuan, kan in contact reng a, tun anga a political party anga inbei chu ni ila, kan inbei nasa ngawtin ka ring; 'An va rawn ngaihsak har ve PHE hian; a ti ang. Amaherawh chu, kan dinhmun ka hrilh apiangin, a nin a bial mipuite hnenah, 'E, lo dawh hram hram ang u; theih tawp an rawn chhuah e' tiin min hrilh sak a; hei hi a lawmawm a, lawmthu ka'n sawi a ni.

Demand No. 32 - Horticulture Department:

Pu Speaker, Horti kan tih dawn chuan tlem han show lawk ka duh a. Hei hi maua kan siam, thei bawm, thlai bawm a ni. 'Crate' kan ti a, Wooden crate; a man hi ₹800/- a ni, hei hi. Tichuan, hei aia size te deuh hlek, hei hi a khat deuh hlek a, a zing deuh hlek a ni. Maua siam, hei hi khutah Lengpui-ah kan Common Facility Center-a kan siam a ni a. Thlai te deuh hlek tan zing deuh hleka an siam a ni a, a kaw te tur hei hi a ni. Ka'n tarlan kherna chhan chu, Pu Speaker, mipui hian kan department hmalakna hi hmu ve se ka'n ti deuh a ni. Amaherawh chu, kan department hmalakna ka tih rual khan, kan CM hi credit ka,n pe duh a. Pu Speaker, CM ka ni a, 'chu chu, kha kha ti rawh u' tih zung zung mai hi a nilo; a ngaihtuahna hi a hmang a ni. Pu Speaker, innovative idea rawn thawhchhuaktu a ni tlat. Tum khat chu a inah thei kan va pe a, bawm plastic atang siam chi kha kan keng pheih a, khatah khan, 'plastic ni lovin, kan mau te hi a hman theih lo maw' a ti ta a. Tichuan, kan director hovin kan official ten ngaihtuahna sengin training an pe vat a, kha kha an rawn siam chhuak a ni. Hei hi phaiyah pawh thawn theih a ni. Environmental-friendly a ni tlat a ni, a ropui lai chu, Pu Speaker. Kan CM hian ngaihtuahna nasa tak a hman azarah keinin kan bawhzui a, vawin hi kan thleng a ni.

Tichuan, ZPM in Sorkarna kan chan hlim khan office te kan han luah sang sang a, Pu Jejea, South Tuipui bialtu khan tukina a sawi kha, Horticulture Minister ka nih hnuah Mizoram-a dawnfawh lianber record kan han nei mai a ni a, kan lawm em em a. E, ZPM Sorkarah hian mipui chauh an lawm lo, thlaite pawh hi an lawm a ni', ka ti ta a ni, Pu Speaker. Chutah chuan, horti. official ten hetah rawn thawn pheih turin an ti a, in lamah ka hawn nghe nghe a. A tui khawp mai; a hrisel bawk a; wawinia han ngaihtuah zawng pawh hian chil a la put thei ka ti, Pu Speaker. Hetiang record-ah kg 23 leh gram 500 kan han nei te hi a ropui a ni. Dawnfawh pumkhat kg 23 te chu patling pawm lawih tham a ni.

Tichuan, Horticulture Department hmalakna hi centrally sponsor scheme deuh vek a ni a, chutah chuan, MIDH (Mission for Integrated Development in Horticulture in North East' chu chu kan kalpui mek a. Thei leh thlai chin kawngah te kan inpui a, thlai kumhlun te, seasonal vegetable te kan tihpui a. Tichuan, leitha te thlai chi tha te, tui dahkhawlna te, mimal emaw, a intawm zawng emaw, individual water-tank emaw, community water tank emaw, khangte kha kan inpui thei a. Tichuan, tuipekna drip irrigation leh sprinkler te pawh farmers ten an mamawh dan leh sum kan neih danin kan pe thin a an tangkaipui khawp mai. Kar hmasa Zirtawpni khan kan Secretary leh kan Director te ho nen Zawlpui-Zau (kan CM bial Serchhip) ah kan va kal a, Sprinkler leh drip irrigation te kha kan han hmu a, kan hlim khawp mai a, farmers te pawhin an hlawkpui khawpin ka hria a; zikhlum, hmarcha, bawkbawn te an thar a. Naktukah hian kan CM pawhin zikhlum, a biala mi a rawn sem maithei a nia, lo chang rawh u.

Ti chuan, protected cultivation hi kan kalpui bawk a, Greenhouse te subsidy-in a kal thei a. Horticulture ka chan hnu hian pangpar te pawh hi ka duh thar a, Mizoram Florists Association te, Zo-Anthurium Growers Corporative Society te an phur em em a, anni nen hian phur takin hma kan la a. Chapchar Kut leh occassion hrang hrangah hian flower show te kan nei a, kan phur em em mai a ni. Tichuan, Anthurium bik hi, Anthurium Festival atanga khawvel leh ram pumin a min lo hriat zauna a zarah Delhi ah Phool Mandi Delhi ah kar tin thawn thlak ziah a ni. Tichuan, Singapore-a a market min zawn sak turin APEDA leh exporter PVC Agrovat Pvt. Ltd. te kaltlangin February 26, 2025 khan kan Secretary-

in anthurium kuang 1000 a vai liam a. A thata kan tuang zel a nih chuan, Singapore ah hian kan anthurium hi kar tin la thawn theih kan inbeisei a ni.

Tin, post-harvest management te pawh kan ti a, chutah chuan ripening chamber-balhla leh thei um hminna te kan pe a. Balhla hi a um pangngai chuan a rei thin a, ripening chamber-ah chuan ni 4 atanga ni 7 ah a hmin thei a, kan farmers te tan a tha khawp mai. Chutiang chuan, hma kan lakpui a ni. Tin, a that bikna chu, a hrisel bik a, calcium carbide-a hmin hman tura kan hman thin kha, khangah kha chuan a tul tawh lo a. Tin, farmers leh a mipuite tan pawh a hrisel zawk a ni. Tin, solar dryer te pawh a scheme ah kan sem a. Amaherawhchu, sum hi a tamlo a, vawikhatah kan pe teuh thei lo a ni. Chutiang chuan hma kan la mek a ni. Tin, ‘Per drop, more crops’ kan tihnaa sprinkler te, drip irrigation-ah te khan kan farmers (kan partner) te nena thawk hoa tih a ni.

Tichuan, National Bamboo Mission a awm a, a hnuaiyah chuan Mizoram State Bamboo Mission hi kan nei ve leh a. Chutah chuan, ‘engatinge mau hi Forest Department-a awm lova Horticulture hnuaiyah ah a awm teh daih’ tih te pawh kan zawhna kha a ni a.

Bamboo hi (Pu Speaker, Pu Muanpuia chuan a awihlo ang a,) scientist hovin grass an ti ve tlat a ni. Grass a nih takah chuan Central-a Ministry of Agriculture & Farmers Welfare, Horticulture hnuaiyah bamboo hi an dah a. Chuta kan hma lakna ber chu, bamboo cultivation and development a ni. Kan chin hnuah khan a development entirnan: tuna kan rawn show thei bawm (crate) te, khatiang khan siam kan zirtir ang a, mimalin a thiam hnu ah a in din duh a nih chuan, khatiang khan Commerce & Industries lam khan an indinna tur an lo ngaihtuah mai dawn a; khatiang khan a kal a ni. Khangte kha centrally sponsor scheme kan kalpui te an ni a.

State sorkar hian he ZPM sorkar atang hian State-flagship program kan nei a, chu chu Bana-Kaih Policy kha ni a. Chutah chuan loan component a awm a. Tin, CM-special package, a loan ni lo, a puiha inpuihna kan nei leh bawk a. Loan component hnuaiyah hian mi 1103 in an project an rawn theh lut a, chu chu thliar felin apex body ah final turin kan thawn tawh a. CM-special package bikah hian mi 3149 in dilna an rawn theh lut a. Amaherawhchu, heti zat zat hi kan cover thei dawn lo; department-ina sum min pek bik milin kan la thliar fel dawn a, kan final tep tawh a ni. Bana Kaih policy kan kalpui reng reng hi department scheme neihsa te nen convergence-in kan kal zel dawn a ni. Tin, NABARD hnuai ah hian Collection Centre-te kan sa a. Kumin ah chuan link road kan mamawhna a san em avangin link road kan propose-a. Tam tak kan propose zingah kum thara link road laih țanna tur hi district khatah pakhat (11 a nih chu) theuh min pe a ni.

Tin ‘Operation Ginger’ kan ti a. Sawhthing ching kan han tam ta a; a tãm dawn tih kha chu rin sa a ni, a tira țangin, Pu Speaker. Chutah chuan kan han ching ta a, a rawn tãm ta tak tak a, report te kan han dawng a. Kan Director leh a hote’n ngaihtuahna rang takin an rawn hmang a, “Operation kan neih vat a ngai a nih hi” tiin, August Ni 16, (nikum Independence tukah) khan Mizoram puma sawhthing tãm veng turin kan intir chhuak a ni. Chutah chuan khaw 423 kan cover-a; farmers/kan partners 6,366 kan cover hman a ni. Khatiang Operation Ginger kan neih avanga sawhthing tam chhe tur 70.45% kkha humhim theiah kan inngai a ni. Operation Ginger hi a lehlam zawnga thliar chuan, ‘tãm vek se, Sorkarin lei lo mai se a hahdam ting mai alawm’ te a tih theih a. Amaherawhchu, khatiang zawng

kha kan rilru put dan a ni lem lo a. A tam thei ang ber thar ila kan tih avangin he operation hi nei kan ni.

Tin, project thar hi kan thehltut ve nial a. Chutah chuan, July thla kha ni tain ka hria, MP inthlan kan zo a, Central-ah Ministry an form a; Ministry-a kan Minister - RD leh Agriculture changtu Shivraj Singh Chauhan kah kan zuk hmu a, kan mamawh hrang hrangte kha kan sawi a. “Rawn siam ta che u”, a ti a. Amahin, ‘Rawn siam rawh u’ a tih aṅanga kan bawhzui a ni a, hengte hi. ‘Centre of Excellence for Vegetables’ kan ti a. Thlai kan chinin a, chi hrisel kan mamawh a. Khang a chi siamchhuahna tur kha kan duha kha Indo-Israel hnuai a ni a. Israel leh India Sorkar ṅang kawpin he Centre of Excellence for Vegetables hi Serchhip-Zawlpui-Zau, (Mat kam) kan CM bialah Horti-in ram kan nei a, chutah chuan bun kan tum a, Israel Embassy-a an agriculture expert pawh a rawn kal a, field lama an kal zawh hnu ah ka room-ah an rawn leng a, kan inkawm a, min phurpui khawp mai. ‘Eng nge I hmuh dan?’ tia ka’n zawh chuan, ‘Ni e, a phurawm; amaherawhchu, a technical lamah hian tlem chu puih in ngai deuh a nih hi”, a ti a. chu chu kan beisei a ni.

Tin, ‘Centre of Excellence for Flowers’ tih a ni leh ta a, hei hi chu Indo-Dutch tur a ni. A project zirchiang turin Dutch embassy aṅangin an rawn kal ve tawh bawk a, kar hmasa khan. Ka room-ah kan inhmu ve leh a, field an kal hnu ah. Tichuan, kan inkawm a. Tichuan, a technical lama mithiam an rawn kal ang a. Min pawm sak chuan he Centre of Excellence for Vegetables leh Centre of Excellence for Flowers hi chu min pe mai tur chuan kan han beisei deuh a. Tin, concept pakhat kan thehltut leha chu, Centre of Excellence for Mushroom a ni; ‘pa’ a nih chu. Hetah hian tuna kan pa neih ang oyster chauh nilo shitake, ram dang market a mi, a man man ṅa, ram dang pawha export theih tur chi ‘pa’ hi tih kan tum bawk a. Hetah hi chuan hma kan la sawn thui vak lo. A concept kan peih a, kan thawn thla tawh; chu te chu a ni.

Engtin nge min rawn thlirpui dan tur ka hre lo a; Spray dyeing te pawh dragon fruits hi tih roa, a powder-a siamna tur te pawh kan thlen a. “E! A ṅa mang e; rawn siam rawh u”, an ti a; chung project-te pawh chu kan thehltut a. Delhi University pakhat nen kan thawk ho mek a. Chutah chuan, a dry-powder siamchhuah chuan food colouring-ah te pawh kan hmang thei ang a, juice-ah te pawh kan la siam thei ang a. Kan preserve hrim hrim chuan a tha ang a (wine chauh a ni lovin). Dragon fruit aṅangin powder kan siam dawn, hei hi min rawn pek chuan. Wine chauh emaw an lo ti zel a. Chuti lai te chu a ni.

Tichuan, area expansion chungchang hi, kan thlaite hi kan la khawpkham lo nangin, vawi khata a thar teuh chuan kan buai si a. Chuvangin, han chin zau deuh te pawh hi a inthlahrunawm deuh e a. Rawn thar ta teuh se, khawiah nge kan market ang, tih te kha a ni ta a ni. Amaherawhchu, wine rules te kan han siam tha tawh bawk a, khang a siam theihna tur, a process-na tur hrang hrang a awm takah chuan area expansion, a chinna te pawh hi zauh ila tiin grape leh sapthei te, kan CM in a sawi a sawi ang khan hmalak ni se kan ti a. Keini pawh CM sawi meuhin a tih chuan bawhzui lo thei kan nilo a, kan bawhzui a. Kan beisei loh deuhin he sapthei leh grapes chin belhna kum thara hmalakna tur hi Ministry in min rawn pawmsak hlauh mai a, kuminah sum, additional allocation min rawn siamsak a ni. Grapes chin belhna turin nuai 1323.39 leh sapthei chinbelh nan nuai 1250, avaiin nuai 2573 min pe a ni, Pu Speaker. Chu chu district pahnih - Khawzawl leh Champhai area tur a ni a. Tunah hian a organic zawnga ti turin Sikkim-a organic certification buaipuitu SIMFED nen tunah hian project kan buaipui mek a. District 5-ah

sapthei chinna organic-a kalpuina tur kan thehlut a. Amaherawchu, kumin hian min pe hman dawn lo nge, Ministry-a Joint Secretary nen kan inbia a. “Engpawh nise, a project chu hetiang hian kal se, kum tharah in rawn dil belh mai ang a; tuna kan pawisa rawn pek che hi hmang vat vat ula in rawn dil belh mai dawn nia” tih zawngin a ni a. Amaherawhchu, “dil belh zawng ni lovin min allocate thei lo em ni” tiin kan inbe leh mek a.

A department bika hi, kha bialtu hrang hrangte khan ‘Horticulture office awm ve siin a thawktu an hmel pawh kan hmu ngailo’ tih te kha a awm a. Kan dinhmun hi tawi te in ka’n tarlang ang e.

Kuminah Horticulture officer 13 pension-in an chhuak a, kum 1 chhungin. Chutih rualin, a thar lak MPSC in min phalsak chu 5 chiah a ni a. Kan chhung dinhmun tak tak hi min rawn hriatpui ula chu, Pu Speaker, ‘engtin nge department hi tluchhe loa in kal theih zawk le; engtin nge hetiang hian achievement in rawn neih theih zawk le’ min ti ngei ngei ang. Amaherawhchu, ‘Sorkarin min pek theih tawh min pe a, keini chuan kan tlem avanga thawklo thei kan nilo; theihtawp i chhuah ang u’ tiin, theihtawp kan chhuah mek a. Tunah hian Block Office hi hmun 26 hawn phalna kan neihah 9 chiah kan fill up thei a ni. Chuvangin, bialtu theuh ka’n ngen duh chu Pu Speaker, District office ah kan mamawh ngawih ngawih avangin Block Office-a staff kan han dah luh zawk khan, ‘kan bial a ni a’ tiin i innawr hrep lo teh ang u. A District Office ah DHO a awm a, Additional DHO khan DDO hna a chelh avangin a puih a ngai si a,;khatiang dinhmunah khan kan indah a. Heta Block office-a ruak kha a khaw nawtin mi rawn nawr an tum mai a; khatiang kha chu i la tilo hram ang u. Pu Speaker, kan kal ve hram hram a ni e’ tih kha min hriatsak se.

Demand No. 38 - Rural Development Department:

Pu Speaker, a tam angreng a. Amaherawhchu a tawi thei ang berin kan sawi ang e. Pu Nguna pawh khan ‘an hlawh lak lohna a rei tawh mah mah lo maw’ a rawn ti a. Ni 100 inhlawhna wage component bika hi Mizoram sorkar hian tih theih kan nei tlem khawp mai a, central liability hrim hrim a ni. Keiniin kan tih theih chu, inhlawhna, an inhlawh zo a, an inhlawh zawh khan fund transfer, FTO (Fund Transfer Order) kan generate a. Tichuan, khata kan generate khan Ministry lam atangin mimal account-ah direct benefit transfer-in an rawn ti thin a. FTO kan generate tawh chuan tih theih kan nei tawh lo; Ministry atangin anmahni account-ah direct-a transfer zel a nih avangin, Ministry lamin pawisa an la nei remchang lo te pawh a ni thei a. Amaherawhchu, March Ni 7 a order kan hmuh danin, January, 2025 thleng kha chu kan rawn release tan e, an ti a. February pawh an release chho tan dawn a. Chung chu kan dinhmun a ni.

Tin, a thawktute hlawh hi ruahmanna kan siam a. December vela an hlawh pawh kha theihtawp chhuahin kan Secretary te, kan official te leh keimah ngei pawhin Ministry-ah phone in ka zuk nawr a, ‘tun tumah hian revised estimate kan dil a, Finance hian min pe thei lo’ an ti a, anni pawhin harsatna an tawh a ni. Khatiang chung chung khan, ‘sum neih ang ang min rawn pe mai teh u’ kan ti a, eng emaw zat chu kan clear a. Tunah hian a la kal zel dawn a, CM pawhin ‘puk a ngaih chuan, puk rawn dil rawh u’ a ti a. Kan han ngaihtuah chiang leh a, khatia puk kha a lo theih loh a, keimahni lam atangin. A chhan chu, an hlawh kha anmahni account a luh a ngai si a. An account pakhat te tea khawnkhawma Finance a rulh leh kha kan tan a buaithlak a ni. Chu chu Ni 100 inhlawhna chungchang leh a sum vei vir vela kan kalpui dan a ni a, thil a harsa khawp mai.

Tichuan, RD-ah pawh hian lawmna tur kan nei a, Pu Speaker. Nikum March khan kan Secretary leh a hote empowered committee an zuk kal a. Chutah chuan, kumin chhunga kan Ni 100 inhlawhna tur labour budget an sawi a. Chutah chuan, labour budget kha tum khatah Ni 100 inhlawhna daih tur min rawn pe nghal a ni. Tichuan, kumin March Ni 4-ah empowered committee an zuk kal leh a, kan Secretary hovin. Tichuan, kumin kum thar turah hian Ni 100 inhlawhna tur labour budget-ah min telh sak leh a ni. Tum dangah chuan labour budget hi Ni 100 inhlawhna tling tur min pe ngai lo reng reng. Min pe a, kan mamawh danin kan dil belh a, min pe zel a ni. Kumin kal mek leh kum thar atan hian Ni 100 inhlawhna tling hi tumkhatah min pe a, hei hi malsawmna a ni; Pu Pawchhua ten min lo pui nge chu ka hre lo a, hei hi. Chuvangin kan lawm em em a ni.

Tichuan, material component bikah pawh hian zawhna a tam a. Material Component bik hi a tam zawkah chuan kalphung pangngaiin kan kal a. Amaherawhchu, nichina kan sawi, kan hna hrim hrima hi rotlinglo te pawh a tam lutuk a, sum kan seng teuh teuh si a; ‘A rotling zawngin i kal teh ang u; project rotling i duang teh ang u’ kan ti a. A hmingah ‘Project Rotling, Hmasawmna Rahbi Thar’ kan ti a. Chutah chuan, BDO leh DRDO zawng zawng kha, ‘a duh apiangin he project-ah hian rawn ziaak ula, competition kan nei ang’, kan ti a, kan inel tir a. An rawn present a, nileng ni thum an project endikin kan official te nen kan thuho a ni. Chutah chuan, short term-ah project 5 leh medium term-ah project 5 kan thlang a. Tin, long term-ah project 5 kan thlang bawka a, project 15 kan kalpui mek a ni. Hetah hian Pu RS-a, Serlui bialtu kha a awm lo a; nichina lawmthu a sawi khan a rawn sawilang dawn emaw ka ti a. Bilkhawthlir-ah hian kan Project rotling atangin kuhva hnah kawr a season laia dah that loh chuan a hmuar chhia a, a liam mai a; chu chu a dah thatna tur in kan sak sak a ni. Tichuan, kan self-help group member ten khatiang khan an ti chho ang a. Englai pawhin kuhva hnaha plate siam kha an siam chhunzawm thei dawn a; chutiang chuan kan kalpui mek a ni.

Tichuan, convergence hi hemi Ni 100 inhlawhna nen hian department 14 kan thawhhopui mek a ni. Tichuan, ‘sawhthing kan ching tam a, ram a bua duh awm mang e’ tih te a awm a. Keini chuan hmanni lawk khan Horticulture leh RD Officer-te ka room-ah meeting kan nei a. ‘Sawhthing ching tur a thar an awma, an ramah, an lo ah terrace siamna rem a awm chuan rawn identify ula, RD-ah rawn thelut rawh u; RD ah Ni 100 inhlawhna atangin terrace kan lai ang’ kan ti a a. Chutiang chuan ka department pakhat leh pakhat pawh hi kan thawk ho mek a ni.

Tichuan lawmthu ka’n sawi mawlh mawlh a, Pu RS-a chungah pawh khan. A bial chhunga Community Hall sakna tur kha ‘convergency-in i ti ang; nangniin nuai 15 rawn tum ula; keiin ka fund atangin nuai 10 ka lo tum ang a; Saihapui V ah hall an nei thei dawn a ni’ tih kha a ni a, tunah kan tichho mek a. Kan MLA dangte pawh khan Pu Speaker, khatianga convergence-a an rawn pen chhuak duh a nih chuan ‘kan inhawng reng e’ tih kha min lo hriat sak se a tha ang e.

Tichuan, Pu Nguna pawh khan, ‘MGNRGS hnuai VEC-ah hian material component hi a pek tam deuh theih lo maw’ a rawn ti a. A guideline-in a tih danah chuan, (material component a sawi hrang lo) ‘a vai atanga 50% hi VEC-in an thawk tur a ni’ tih a ni ta a ni; a wage zawng zawnga hi 60% a ni nghal. Chutah chuan, 60% an khawih nghal chuan, VEC kha a hranpain hna pe miah lo mah ila, a guidelines hian engmah min phuar lo. Chutah chuan, 40%, material component bika kha keini chuan State Employment

Guarantee Council ah thutlukna kan siam a, ‘DRDO lamin a material component 40% chang se, VEC in 30%’ tih a ni ta a ni. 60% an chan bak kha 40% atanga 30% kha VEC in an la chang tho a ni.

Chuta hriatsual awm thei chu, a district zawnga then a nih takah khan VEC khan a chan tur 30% kha pawisa a rawn kal apianga khan an dawng thei chuang lo. A chhan chu, tun tumah chuan VEC hnuai 30% khan khaw 2 emaw, khaw 3 chauh a daih mai thei. Kha block area pakhata VEC 10 awmah 2 chauh a daih chuan, tun tumah chuan VEC pahnih chauhin an dawng dawn a ni. Khatiang khan a kal tlangpui a. Chutah chuan engmah khati lamah chuan buaina a awm lova, a field level ah chuan, ‘pawl dang te pawh pe ve tawh te u’ tih kha a ni a; keini chuan kan thliar lem lo a ni.

Tichuan, PMAYG ah pawh phone call tam tak kan dawng a, harsatna a awm a; tunah hian a hmaa kan list neihsa SEC, 2011 census-a in leh lo neilo ho list-a telh hnuah khan, ‘Awas Plus’ tih a awm leh a, khata dawng tur telh lehna kha a awm ta a. Tunah hian kha a list-a dawng tawh ho a zo anih chuan, a thar 2025 a kalna tur tunah hian a Awas Plus, 2024 hi kalpui mek a ni. Chutah chuan harsatna awm, phone call thenkhata kan dawn danah chuan Pu Speaker, i phalnain, - VC thenkhatin entirnan: mi 20 thlan chhuah tura tihah khan ‘keini party-in 12 kan chang ang a, nangni party in 8 rawn theh chhuak rawh u’, ti ang zawngin an ti a; khatiang tur kha a ni reng reng lo a, Pu Speaker. A dil duh apiangin an dil thei a, a criteria a awm vek a; dil theia inngai apiangin an dil mai tur a ni. Chu chu Gram Sabha ah an thliar ho ang a Gram sabha-in a pawmpui hnuah NGO te an tel thei anih chuan, NGO te pawhin an sign ang a, hriatpuina an sign hnu ah chu chu an rawn thelut ang a. Kha list atang khan surveyor tur kan ruat ang a, anmahniin va kalin an survey ang a; lirthei ke thum a nei em; ke li a nei em? ‘Yes’ an tih chuan, an tel thei dawn lo. Chuvang chuan, an thlanah na nana chuan dik takin kan kalpui a ni.

Pu Speaker, amaherawhchu, khaw thenkhatah (kan Supply Ministeer-in a sawi ang khan) an au lo a nih ka ring ta. ‘Au tur’ kan tih lawm lawm a, ‘dil theih a ni’ tih hrelo an tam. Tuna a then an zo tawh hnu ah pawh, ‘ka la dil duh a sin’ tite pawh an awm. Chuvang chuan, hmannah meeting kan nei a, ‘hei hi March thlaah peih fel tur anih avangin kan tihraan a ngai a ni’ an ti a; a hma ah VC inthlan te kha a rawn awm a, tunah pawh CADC inthlan avangin kan la zolo nasa a, kan bawhzui mek a ni. “Ministry lamah extend i dil teh ang u”, ka ti a, April thla thleng extend turin kan Director-in dilna a thawn thla a ni. Chutiang chuan hma kan lakpui a. Chutah complain te a awm a nih chuan, kan la complain thei. A dawng tur lo na na na thun a niha complain a awm chuan, cross check a nih hnuah pah leh theih a ni tih kha min lo hriat sak ula. Pu Speaker, fair takin kan kal ang a. Amaherawhchu, a dawng thei tur list-ah na na na chuan, “party office-a i thusawi,” tih te kha; Pu Speaker, kan party office-ah te chuan duh duh kan sawi ve ang chu maw le. Kan inah kan nu hnenah ‘Ka hmangaih che’ ka ti a, ‘Pu Nitea’n an nu hnenah, Ka hmangaih che, a ti’ tih te; inah te chuan duh duh kan sawi ve ang chu maw, Pu Speaker. Tichuan, a dawng thei list ho rau rauah kan party mi leh sa kha No. 1, 2, 3-ah te pawh dah ta ila, thilsual em em chu a ni dawn chuang em maw ni le, ka ti deuh a. Amaherawhchu, thilsual em em a nih chuan, nakinah kan la sawiho turah ngai ta ila, Pu Speaker. Chu chu kan PMAY dinhmun a ni a.

Tichuan, PMKSY – Water-Shed Development lampang hi rambua tawhte siam that lehna, ram neitute an livelihood (an eizawna) tuihna humhalh te, Khang zawng zawnga hma

lakna kha a ni a. tunah hian project 20 Mizoram-ah hian kan kalpui mek a ni. Tichuan, hei hi 2026 (nakum) a tawp tur a ni a, 2.O kan tih a hi. Chumi 2026-ah PMSKY 3.O hman tan tur a ni a. Hei hi Centralin a kalpui dan turah a inbuatsaih mek a. Kan bialah khang hmun tha deuh te, ram tha deuh te a awm anih chuan lo identify sa ila, Central-ah kan la dil ho dawn nia tih kha min lo hriatsak ula.

Chutah chuan tuihna humhalh hi kan vei a; ‘i thawk ho teh ang u’ tiin North East Initiative Development Agency, (NEIDA) nen Ni 18 Feb., 2025 khan thawhhona thuthlung kan ziak a. Chutah chuan tui hna humhalh, district 3 - Lunglei, Serchhip leh Mamit huam chhunga Tlawng dunga khua awm zawng zawng, Pu Speaker, khaw 42-ah survey kan nei tawh a. Kum tharah sum kan neih remchan ve lah ruahtui khawlna tur khur te kan lai ang a, thingphun a tul leh kan phun ang a, check dam siam a tul leh kan siam ang a. He tuihna Tlawng rawn fintute hi tih nun leh kan tum a. Kan hlawhtlin leh tlin loh tur chu a hriat loh a, chuti zawng chuan kan hawi a ni. He Tlawng hi chhan a ngai tak zet a ni.

Tichuan, MZSRLM hi Self Help Group, nuho tana hmalakna a ni ber a. Chumi piahlahmah chuan DDUGKY kan ti a, thingtlanga thalaite skill train duh tan training he PIA - Project Implementing Agency hian training an pe thei a. Chungah chuan heng -Food and Beverages Services, Domestic Date Entry Operator, Retail Sales Associates, Baking Technician, Airline Cabin Crew ah te hian training kan pe mek a. Chuta mi 693 hi kan train chhuah tawhte chu 5-star hotel ah te, cabin crew-ah te, airlines cabin crew-ah te, Mall changkang deuhah te an thawk a, mizo thalaite pawh hmun hrang hrangah kan chhuak mek a ni.

Tin, MZSRL hnuaiyah hian Ropuiliani - Self Help Group, hmanni deuha boruak ri hlui kha tawite in remchang ka'n la ang a, Pu Speaker. Ropuiliani Women Self Help Group Producer Company hian share holder an nei a, self-help group member, khang shareholder-a tangte khan thlaite an lakhawm thin a, hmarcha te, sawhthing te, aieng te. Tichuan, Reliance nena agreement kan han sign takah chuan reliance khan sawhthing ton 10, Kolkata-a thawn thla turin min rawn request a. Keini chuan, ‘a va lawmawm ve’ kan ti a. Ropuilliani producers company te hian experience an nei tawh a, chu bakah, an share holder te annih chuan, an shareholder-te kha engkim hrilh anni tawh a; a hma pawhin sawhthing te chu an lei reng a, sawhthing an lei sak chuan a fai thah, a tha tha ni tura ngaih a ni. Keini chuan khatiang turah khan ngaiin thlamuang takin kan thawn thla ta a.

Amaherawhchu, Reliance hotute hnen an thlen khan khatiang kha a ni ta a, tunah hian kan la thawn chhunzawm zel thei lo a. Khami tumah phei kha chuan Pu Speaker, an khaw hming pawh kei chuan ka sawilo, mahse keimah khan a mimala beih ka tawh a, ‘bang rawh se; a ban a tha ang’ tih te pawh kha a ni a. Khang te pawh kha kan tawng a, kei chuan hlawknaah ka ngai tho. Vawiin hian Pu Speaker, ka message dawn tam takah chuan, khang avang khan, ‘tunah chuan kan sawhthing te hi a fai tha tawh khawp mai’ tih te a awm nual a, hlawknaah ka ngai. ‘Bang rawh se’ min ti mahse, hlawknaah ka ngai, Pu Speaker.

Tichuan, tuna ka rilrua awm leh chu, Reliance hotute kha, ‘chance vawi khat tal min pe leh rawh u’ tiin kan request mek a ni. Chance min pe leha, thawn chhuah theihna remchang min siam sak chuan, Pi Baryl-i biala khaw 2-ah anmahni hruai tel ngatin ka kal ang a, ‘heta mi i lei leh chhin ang u; a that tawh loha lekah’ tih ka tum a ni. Chuti khawp chuan rilruah thahnem ka ngai a. Tunah chuan Pu Speaker, ‘Mizo-ginger, Mizo-chilli’ tih hi India rama

company lian Reliance smart store-a tar tur kan han hmu ringawt pawh hi achievement ropui tak a ni. ‘Mizo-chilli, Mizo-ginger’ tih hi a brand kan siam tan mek a ni.

Hei pawh hi kan Chief Minister hmalakna zara hetiang dinhmun thleng kan ni a. Inneihnaah a kal a, kan sawisel luai luai a, kal lo se hetiang hi kan thleng miah lo ang; inneihnaa kal pawh hi a tha viau a sin, Pu Speaker. Kal zel rawh se. Hetah hian tlem harsatna challenge kan tawh a, nakinah chuan kan la paltlang turah ngai ila. Mumbai leh Kolkata-a kan sawhthing zuk pekna rate kha kg ah 80/- a ni. Mahse, a thawnna, Mumbai phei chu thlawhna ah kan han keng thla a, a thawnna man (transportation charge) kha kg 1-ah 54/- kan chawi; thlawhna ah chuan a chi loh. Nakinah Air cargo te kan neiha kan la thawn thei zel a nih chuan le. Mahse, tuna kan duh ber chu, kan thawn thlak te te kha, a tam emaw, a tlem emaw, min lo pho chhuah sak zel rawh se; Mizo Brand hi kan siam duh a ni. Hma kan la a, theihtawp kan chhuah chho mek zel a ni; sawiselna karah, Pu Speaker.

Tichuan, BADP kha nikum khan tawp tawh tura ngaih a ni a Pu Speaker, nikum khan a tawp tawh a. Mahse project proposal-ah approved sa 32 kan lo la nei avangin Ministry nen kan indawr a, vawi khatah ‘one time sanction-in min lo pe nghal mai teh u; kan zo ang a, VVP-ah kan lut mai dawn nia’ kan ti a, kan Ministry chuan min pawm sak a. Mahse, Finance-ah an han nawr a, Finance chuan 4 installments-a rawn kal tur a ni an ti ve tlat a; anmahni dan a ni a, an policy a nih avangin. Chu chu kan tlaina chhan a ni. Kum kalta chhung khan project thar pakhatmah kan nei theilo. Tunah hian a kal mek a, BADP hnuaiia kan project 32 hi kan thawh zawh chuan, 3rd installment kan dawng tawh a; 4th installment kan dawna, kan thawh zawh theih chuan, VVP-ah direct-in, automatic-in kan lut turah kan ngai a; BADP area kha kan la chhonzawm zel thei a ni, khang hna kha. Hemi BADP area bik hi Myanmar leh India border-ah chuan block 10 kan nei a, Bangladesh border-a block 5 nen, a vaiin block 15 tih kha member-te hriat atan.

Tichuan, Social Audit Unit-te kan nei a. Heng hian kan hna centrally sponsored scheme hrim hrim hi kumtin audit an nei a. Hei pawh hi kan vannei ang reng a, lawmna tur a ni a. Kan Social Audit Unit hian tun kum kal mekah hian Mizoram khua zawng zawng hi an cover vek a ni. India ramah hian Mizoram leh Kerala chiah hi khua zawng zawng social audit covera nei thei awm chhun kan ni. Mizoram hi kan vannei a, ZPM vang nge ka hre lova. Kalphung-thar ah chuan kan au ring deuh te pawh a lo ni mahna. RD hnuaiia SIRD&PR ah hian research te, training te, evaluation and assessment studies te an nei a, an buai ve thei em em a ni.

Tin, SASCI hnuaiia hian Library sak theihna hi kan Chief Minister nikum March thlaa Delhi-a zin khan additional SASCI 2023-2024, Clause 5 (part 7) hnuaiia crore 55.1873 vel a rawn hawn hlauh mai a. ‘RD hian block in nei a, mi leh sa viltu tur in ngah ber e’, an tih avangin kan department-ah min pe hlauh a. SASCI hnuaiia Library kan sak hrim hrim hi lawmthu sawi tur anih chuan, keimahah ni lovin, CM-ah a ni ang, Pu Speaker. Tunah hian khaw hrang hrangah Library thar 299 leh renovation 44 kan nei a, a vaiin 343 kan sa mek a ni. Hei hi kan zo ang a, tuna second instalment kan nghah hi min rawn pek chuan kan zo fai thei turah in ngai ila.

Tichuan, lawmthu sawi ka duh a. Vawiin kan session chu ka hnuk a ulh tep zawk a ni. Keini i dinglama thute hian lawmthu inhrilh tawn chu ni ila, a la awm viau. Amaherawh chu, i vei lama thu, kan thawhpui tha tak takte’n lawmthu an sawi hi a ropui ka ti. Hei hian

keimah ah chona min pe a, tun aia tha zawka thawh duhna rilru min neih tir a ni. Pu Speaker, nangmah kal tlangin, 'ka lawm tak zet a ni', tih kha ka sawi duh a ni. Phu lo hle mah ila, hetiangah fakna kan dawng hi kan tan chakna a ni.

A tawp berah chuan, department-a ka thawhpuite, wawiina ka demand wind-up speech te pawh hi a tir atangin min duan chhuah sak a, a final hi ka han siam chhuak thei chauh a ni. An rawn siam zawng zawng kha sawi ila darkar thum vel a ni ang a. Kan kai tawi deuh a, kan kalpui thei a ni a. He kan thawhhona tha tak hi a ropui ka ti a. Ka department chan pathum – PHE, Horticulture leh RD-a ka thawhpuite nen team-work kan nei tha em em a. Hei hian keimah tak pawh hi min chawimawi a, an chungah ka lawm tak zet a. Chu chu ka sawi theih ni se. Pu Speaker, ka lawm e.

SPEAKER : Member-te zingah duat bik i neih leh neih loh kha i sawi ta miah lo mai a. Kan zo tawh nain, Pu Speaker, pakhat a lo lang leh a.

Kan Dy. Speaker hi engmah sawi theih a nei ve lo a. Chutah chuan, a bial tana zawhna Member pakhat a pe a, kha Member a pek khan a zawt hman lo pek a. A lehkhain min pe a, Pu Speaker, chu chu ka'n chhang mai ang a.

PROF. LALNILAWMA, MINISTER: Ama bialah Horticulture link-road project a awm ve leh awm ve loh chungchangah 'Kolasib Project Veng – Pangangzau, Bairabi via Tuichhuahen project te kha pawmsak kan ni ta em' tih kha lo zawt teh a tih khan lehkhain min pe a. Pu Speaker, he project hi hmanni SASCI rawn kalah khan 2 crore kha a hmu a ni lawm ni? Chu chu a ni a. Kolasib lam pawh an lawm khawpin ka ring.

Tichuan, Heng Demand-te:

| <i>Demand No.</i> | <i>Department</i> | <i>Amount in ₹</i> |
|-------------------|---------------------------|--------------------------|
| 25 | Public Health Engineering | 2,85,96,23,000.00 |
| 32 | Horticulture | 1,07,28,30,000.00 |
| 38 | Rural Development | 4,13,84,18,000.00 |
| TOTAL | | 8,07,08,71,000.00 |

hi he House zahawm tak hian min pass pui turin ka rawn ngen e. Ka lawm e.

SPEAKER : Minister zahawm tak Prof. Lalnilawma'n a heng a Demand te: –

| <i>Demand No.</i> | <i>Department</i> | <i>Amount in ₹</i> |
|-------------------|---------------------------|--------------------------|
| 25 | Public Health Engineering | 2,85,96,23,000.00 |
| 32 | Horticulture | 1,07,28,30,000.00 |
| 38 | Rural Development | 4,13,84,18,000.00 |
| TOTAL | | 8,07,08,71,000.00 |

House ah pass a rawn dil ta a. Remti apiangin, 'remti' ti ula; remti lo kan awm chuan, 'remtilo' ti ula. (House-in pass a remti a.) A lawmawm e. Minister zahawm tak Prof. Lalnilawma Demand chu House in lungrual takin a pass ta a ni. (**Prof. Lalnilawma, Minister:** Pu Speaker, ka lawm e.)

SPEAKER : Report tawi te ngaithla leh ila. A hniam lam atangin tan ila. Tun tum chu kan pel vek mai.

Pakhatna, Pu K. Hrahmo a hniam ber a - Minute 10:32;

Pahnihna, Pu Lalchhuanthanga - Minute 10:46;

Pathumna, Pi Prova Chakma - Minute 11:9.

A sang lamah chuan, pakhatna nih tum hrim hrim hi a hlawhtling a.

Pakhatna, Pu T. Lalhlipua - Minute 15:57;

Pahnihna (fak a dawl lo hle mai, hmannah kan fak a, top 3 ah a rawn lang chho leh char char mai a.) Pu Lalrintluanga Sailo - Minute 15:3,

Pathumna, Pu TBC Lalvenchhunga - Minute 14:49 te a ni a.

Nizan ka mutnaah leh vawiin nilengin ka ngaihtuah a; nimina member zahawm tak Pu Nguna sawi sangha chungchang kha - phai atangin sangha chi an rawn keng a, 'sangha luhai chau' a tih kha, sangha luhai chau hi engtin nge a awm kan suangtuah thin a, a luhai lai taka kha nakinah min la hrilhfiah se; a thle deuh ber nge ni a, a kun deuh nge hriat ka chak khawp mai a. Tin, member zahawm tak West-I bialtu Pu TBC-a bial kha, hei kan zo dawn hnai tawh a, kal ve pawh chakna riau ka nei a. A biala hna thalo chungchang a sawi a, balu a lei to kha hmuhve ka chak deuh hlek a, min la hruai ve se la a tha ang.

Tichuan, kan CM, kan House Leader zahawm tak khan Zitawpni ah dinner a show dawn a. Kan tluanga Pathian-in rem a tih chuan, naktuk hian kan tiak dawn tawh mai si nen; naktuk tlai ah Speaker's dinner kan ei ho ve thung dawn a nia. Vawiin atana kan business chu kan zo leh ta a, naktuk, March 20 (Ningani) chawhma dar 10:30 ah kan inhu leh dawn a nia.

Sitting is adjourned. (10:35 PM)